

## 目錄

詩經原始自序

卷首上

凡例

詩無邪太極圖說

十五國風輿地圖

大東總星之圖

七月流火之圖

楚邱定之方中圖

公劉相陰陽圖

幽公七月風化之圖

諸國世次圖

附作詩時世圖

卷首下

詩旨

卷第一 國風

周南

關雎(七一) 葛覃(七五) 卷耳(七七) 樛木(八〇) 蟋斯(八〇) 桃夭(八三) 兔置(八三)  
采芣(八五) 淇風(八六) 汝墳(八八) 麟之趾(九〇)

卷第二

召南

鵲巢(九四) 采芣(九六) 草蟲(九八) 采蘋(一〇〇) 甘棠(一〇三) 行露(一〇五) 羔羊(一〇五)  
殷其雷(一〇七) 標有梅(一〇九) 小星(一二〇) 江有汜(一二三) 野有死麕(一二五) 何彼  
穠矣(一二五) 鵲巢(一二六)

卷第三

邶

柏舟(一二二) 綠衣(一二三) 燕燕(一二五) 日月(一二六) 終風(一二七) 擊鼓(一二八)  
凱風(一二〇) 雄雉(一二三) 匏有苦葉(一二三) 谷風(一二五) 式微(一二六) 旄丘(一二九)  
簡兮(一四〇) 泉水(一四三) 北門(一四五) 北風(一四六) 靜女(一四七) 新臺(一四九)  
二子乘舟(一五〇)

卷第四

鄭

柏舟(二五) 牆有茨(二五) 君子偕老(二五) 桑中(二六) 鶉之奔奔(二六)  
定之方中(二六) 蠨蛸(二六) 相鼠(二六) 干旄(二六) 載馳(二六)

衛

淇奥(二七) 考槃(二七) 碩人(二七) 氓(二七) 竹竿(二八) 芄蘭(二八)  
河廣(二八) 伯兮(二八) 有狐(二八) 木瓜(二八)

卷第五

王

黍離(二九) 君子于役(二九) 君子陽陽(二九) 揚之水(二九) 中谷有蓷(二九)  
兔爰(二九) 葛藟(二九) 采芣(二九) 大車(三〇) 丘中(三〇)

鄭

緇衣(三〇) 將仲子(三〇) 叔于田(三一) 大叔于田(三一) 清人(三一)  
羔裘(三一) 遵大路(三一) 女曰鷄鳴(三一) 有女同車(三一) 山有扶蘇(三一)  
褊兮(三一) 狡童(三一) 褰裳(三一) 丰(三一) 東門之墀(三一) 風雨(三一)  
子衿(三一) 揚之水(三一) 出其東門(三一) 野有蔓草(三一) 溱洧(三一)

卷第六

齊

鷄鳴(二三八) 還(三三九) 著(三三〇) 東方之日(三三一) 東方未明(三三三) 南山(三三二)

甫田(二三五) 盧令(三三六) 敝笱(三三七) 載驅(三三八) 猗嗟(三三九)

魏

葛屨(二四一) 汾沮洳(二四二) 園有桃(二四四) 陟岵(二四六) 十畝之間(二四七)

伐檀(二四八) 碩鼠(二五〇)

唐

蟋蟀(二五三) 山有樞(二五三) 揚之水(二五五) 椒聊(二五六) 綢繆(二五七) 杕杜(二五八)

羔裘(二五九) 鶉羽(二五九) 無衣(二六一) 有杕之杜(二六三) 葛生(二六四) 采芣(二六四)

卷第七

秦

車鄰(二六七) 駟驥(二六八) 小戎(二七〇) 蒹葭(二七二) 終南(二七四) 黃鳥(二七五)

晨風(二七六) 無衣(二七七) 渭陽(二七八) 權輿(二七九)

陳

宛丘(二八一) 東門之枌(二八二) 衡門(二八三) 東門之池(二八四) 東門之楊(二八五)



墓門(二六六) 防有鶴巢(二六七) 月出(二六八) 株林(二六九) 澤陂(二七〇)

槍

羔裘(二九二) 素冠(二九四) 隔有莠楚(二九五) 匪風(二九六)

曹

蟋蟀(二九八) 候人(二九九) 鶉鴝(三〇〇) 下泉(三〇二)

商

七月(三〇四) 鸛鳴(三二六) 東山(三二九) 破斧(三三二) 伐柯(三三三) 九罭(三三四)

狼跋(三三五)

卷第九小雅

鹿鳴之什

鹿鳴(三三八) 四牡(三三九) 皇皇者華(三三二) 常棣(三三三) 伐木(三三五) 天

保(三三八) 采芣(三四〇) 出車(三四二) 杕杜(三四五) 魚麗(三四七)

南陔之什

南陔(三四八) 白華(三四九) 華黍(三四九) 南有嘉魚(三五〇) 南山有臺(三五一) 由

庚(三五三) 崇丘(三五三) 由儀(三五三) 蓼蕭(三五三) 湛露(三五四)

卷第十

形弓之什

彤弓(三七七) 菁菁者莪(三三八) 六月(三三九) 采芣(三四〇) 車攻(三四一) 吉日(三四二) 鴻雁(三四三) 庭燎(三四四) 沔水(三四五) 鵲巢(三四六)

祈父之什

祈父(三四七) 白駒(三四八) 黃鳥(三四九) 我行其野(三五〇) 斯干(三五二) 無羊(三五三) 節南山(三五四) 正月(三五五) 十月之交(三五六) 雨無正(三五七)

卷第十一

小旻之什

小旻(三六〇) 小宛(三六一) 小弁(三六二) 巧言(三六三) 何人斯(三六四) 巷伯(三六五) 谷風(三六六) 蓼莪(三六七) 大東(三六八) 四月(三六九)

北山之什

北山(三七〇) 無將大車(三七二) 小明(三七三) 鼓鐘(三七四) 楚茨(三七五) 信南山(三七六) 甫田(三七七) 大田(三七八) 瞻彼洛矣(三七九) 裳裳者華(三八〇)

卷第十二

桑扈之什

桑扈(四四三) 鴛鴦(四四四) 頰弁(四四六) 車轡(四四七) 青蠅(四四九) 賁之初  
筵(四五〇) 魚藻(四五四) 采芣(四五五) 角弓(四五七) 苑柳(四五六)  
都人士之什

都人士(四六〇) 采芣(四六二) 黍苗(四六三) 隰桑(四六四) 白華(四六五) 縣蠻(四六六)  
瓠葉(四六七) 漸漸之石(四六八) 君之華(四七〇) 何草不黃(四七一)

#### 卷第十三 大雅

文王之什

文王(四七四) 大明(四七七) 綿(四八〇) 棫樸(四八四) 旱麓(四八六) 思齊(四八七)  
皇矣(四八九) 靈臺(四九五) 下武(四九八) 文王有聲(四九九)

#### 卷第十四

生民之什

生民(五〇三) 行葦(五〇八) 既醉(五一〇) 鳧鷖(五二三) 假樂(五二四) 公劉(五二五)  
洞酌(五三〇) 卷阿(五三二) 民勞(五三四) 板(五三七)

#### 卷第十五

蕩之什

蕩(五三一) 抑(五三五) 桑柔(五四三) 雲漢(五四七) 崧高(五五一) 烝民(五五五)

韓奕(五五) 江漢(五三) 常武(五四) 瞻卬(五八) 召旻(五七)

卷第十六頌

周頌上

清廟(五七) 維天之命(五七) 維清(五九) 烈文(五八) 天作(五九) 昊天有成命(五六) 我將(五九) 時邁(五九) 執競(五九) 思文(五九) 臣工(五九) 噫嘻(五九) 振鷺(六〇)

卷第十七

周頌下

豐年(六四) 有瞽(六五) 潛(六六) 騶(六七) 載見(六八) 有客(六九) 武(六三) 閔予小子(六三) 訪落(六四) 敬之(六四) 小毖(六六) 載芣(六七) 良耜(六九) 絲衣(六三) 酌(六三) 桓(六五) 賁(六六) 般(六八)

卷第十八

魯頌

駉(六三) 有駟(六三) 泮水(六三) 閟宮(六三)

商頌

那(六四) 烈祖(六四) 玄鳥(六四) 長發(六四) 殷武(六五)

# 詩經原始卷首上

## 凡例

一、詩必有題，題必有序，此定例也。今《三百》既無題，復無序。而世所傳大、小《序》，又皆衛宏所託，未可據以爲信。不得已而攷諸載籍，求其可以爲《詩》序者，亦屬寥寥無幾。姚氏云：「《鸛鳴》之爲周公貽王，見于《書》；《載馳》之爲許穆夫人，《碩人》之爲美莊姜，《清人》之爲惡高克，《黃鳥》之爲殉秦穆，見于《左傳》；《時邁》、《思文》之爲周公作，見于《國語》。若此者真《詩》之序也，惜其他不盡然。」意夫子當日言《詩》，必有明白曉然者在，不知何時失去耳。孟子云：「不以辭害意，以意逆志。」固已，然此特爲斷章取義言之，非謂全詩大旨可以臆斷也。夫《詩》固有無題而自明者。是亦僅耳，非盡然也。今古序既失，不得不本「以意逆志」之訓而作事或當然之想，因復爲擬一序題下，以補其闕，非敢謂卽古序也，蓋尋繹《詩》意，得之，亦將使讀者開卷瞭然，不至如瞽者之徃徃無所適從焉耳。識者諒諸。

一、讀《詩》當涵泳全文，得其通章大意，乃可上窺古人義旨所在，未有篇法不明而能得其要領者。今之經文，多分章離句，不相聯屬。在明者，固可會而貫通，在初學，殊難綴而成韻。解之者又往往泥於字句間，以致全詩首尾不能相貫。無怪說《詩》者之難於解頤也。是編每詩無論章句多寡短長，均聯屬成篇，不肯分開。唯於每章下細注畫明，如漢樂府「一解」、「二解」之例，以清段落。庶使學者得以一氣讀下，先覽全篇局勢，次觀筆陣開闔變化，後乃細求字句研鍊之法，因而精探古人作詩大旨，則讀者之心思與作者之心思自能默會貫通，不煩言而自解耳。

一、賦、比、興三者，作詩之法，斷不可少。然非執定某章爲興，某章爲比，某章爲賦。更可笑者，「賦而興」，「興而比」之類，如同小兒學語，句句強爲分解也。夫作詩必有興會，或因物以起興，或因時而感興，皆興也。其中有不能明言者，則不得不借物以喻之，所謂比也。或一二句比，或通章比，皆相題及文勢爲之。亦行乎其所不得不行已耳，非判然三體，可以分晰言之也。學者不知古詩，但觀漢、魏諸作，其法自見。故編中「興、比也」之類，概行刪除。唯於旁批畧爲點明，俾知用意所在而已。至賦體逐章皆是，自無煩贅。

一、古經何待圈評？月峯、竟陵久已貽譏於世，然而奇文共欣賞，書生結習，固所難免，卽

古人精神，亦非借此不能出也。故不惜竭盡心力，悉爲標出。既加眉評，復着旁批，更用圈點，以清眉目。豈飾觀乎？亦用以振讀者之精神，使與古人之精神合而爲一焉耳。

一、讀書貴有特識，說《詩》務持正論，然非舊萃諸家，辨其得失，不足以折衷一是。自來說《詩》，唐以前悉遵古《序》，宋以後獨宗朱《傳》，近日又將反而趨《序》，均兩失道也。故姚氏起而論之，其排《傳》也，尤甚於排《序》，而其所論，又未能盡與古合。是以編中所論，只以三家爲重，三家定則羣喙息。其或衆說有互相發明，足以起予者，亦旁及之。間附全文於後，用備參觀，非好異也，亦將使羣說同歸一致耳。辭或傷煩，所不暇計。

一、《詩》稱「多識」，箋注之功，似未可泯。唯附會穿鑿處，亦最足以增厭。是編所採，斟酌悉當。間有疑義未安者，亦嘗參以己見，用「案」字別之。蓋不徒以多識務博雅名，且藉是以發明《詩》旨也。

一、音韻一道，古必自有定本。自《詩》亡而韻亦因之以亡耳。吾人生古人數千百年後，而欲求古人數千百年上之音，強爲之辨，曰此古音也，此今韻也。縱極精微，其可信乎？《集傳》本吳才老《韻補》以叶《三百》之音，識者譏之，以其非古而自命爲古也。然

近世儒者，如顧亭林、江慎修、戴東原輩，又各以私意自定古音，其能免非古而自命爲古之誚乎？自命爲古而不足以信乎今，則何若聊卽今韻以上該乎古。其有合有不合，今之人尚可一覽而自識也。姚氏雖亦知以今韻該古韻矣，而所分譜，則以喉、舌、齒、唇五聲，分本韻、通韻、叶韻三者，亦未能與今韻合，則今之人仍未能盡識也。茲編亦分本韻、通韻、轉韻、叶韻四者，然悉照今韻標明，不敢強作通人，以誤學者。

一、《詩》原有圖有譜，二者均不可廢。但三代制作，去今已遠，後人以意仿圖，未必卽肖。唯山川封域，萬古不易，建置雖多，尚可尋討而得。卽《作詩時世圖》，豈盡一一可據？然其大要，亦頗不爽，因畧加考訂而附存之，庶學者可一覽而得其時勢之升降，陵谷之變遷焉。唯制度、名物諸圖，則在所畧。

一、六經中唯《詩》易讀，亦唯《詩》難說。固因其無題無序，亦由於詞旨隱約，每多言外意，不比他書明白顯易也。又況說《詩》諸儒，非考據卽講學兩家。而兩家性情，與《詩》絕不相近。故往往穿鑿附會，膠柱鼓瑟，不失之固，卽失之妄，又安能望其能得詩人言外意哉？本擬蒼萃羣說而條論之，又嫌其鄰於辯，徒啟口舌紛爭，無益興觀要旨。爰集《虞書》以來說《詩》之當理者，得若干條，仍逐條案論其下，蓋發明義蘊，非吹求小疵也。另編卷首，以便觀覽。



一、是書持論務抒己見，不得不小異前賢，未免有乖世好，詎敢出而問世？然而蘊嗜菴蒲，未始無人，於是羣相慫恿，勸付剞劂，亦不能以自主焉。其役經始於辛未仲冬，告竣於癸酉孟夏，凡閱月一十有八。助貲則張子衡方伯岳齡、李勤伯都轉漢、喻冀生都轉步蓮、及羅鳳翔誠之司馬、黃寶鷄海樓直刺振河、林扶風望侯大令之焜、周隴州躍門直刺豫剛、蕭麟遊香圃司馬大勳、沈大荔筠亭司馬家楨、張少竹司馬勳、張潛園明府丕顯、高春潭觀督□□、王子萱幕府壽光與現篆隴牧周振初刺史鸞諸君，共贊厥成。參訂則萬伯舒司馬方煦、毛子林刺史鳳枝、楊仲山學博鼎昌三人之益居多。校讐則汧隴及門諸子，如五峯監院馬生喜亭明經康樂、邊生次臨廣文觀化、李生培之茂才仲霄、王生鏡堂選拔秉鈞，均與有力焉。



## 說

《詩》亦何太極之有？然夫子不云乎：「《詩》三百，一言以蔽之，曰：『思無邪。』」《三百》蔽以一言，則此一言也，實作詩者之真樞也，而可無圖乎？圖卽以思爲極。思有貞淫，思有哀樂，皆二氣之所感。唯恃有無邪之思以制之，故哀而不至於傷，樂而不至於淫。於是貞者存而淫者去，此《詩》之大要也。然其作之之方，不外《舜典》命夔數言曰：「詩言志，歌永言，聲依永，律和聲。」千古學《詩》要言，盡於是矣。故以之環列極旁，使有志《風》《雅》者，知所用志焉。由是而爲風、爲雅、爲頌，皆因體以定名。風有正變，雅亦有正變。不唯正變，且分大小，而正變亦隨之。頌似有正而無變矣，然其體與聲有時而異，或變而近乎風，如《魯》之《有駟》、《泮水》之類。或變而近乎雅，如《國》言與《商》之伍篇。不謂之變不得也。故正頌之中亦復有變頌存焉。夫所謂變者，非必盡出於衰世之音，而或有淫邪之思也，但其體裁有異常格，音律因之變換，卽謂之變耳。以故正風之中亦有變風，如《召南》之《野有死麇》。變風之內不無正體。如《鄘》、《邶》、《衛》之類。雅亦如之，頌何不然？然則賦、比、興何以無別乎？詩非興會不能作，或因物以起興，或因時而感興，皆興也。中有不能明言，或難以言語形容者，

則假物以譬之，是之謂比。而顧可判然別之乎？而顧可謂《風》有比，而《雅》與《頌》獨無比乎？然則四始分布四方，抑又何也？《詩》，聲教也。聲出乎風，故首《風》。風之本乎天者，噓氣而成聲，風之本乎人者，因時而爲俗。本時勢之風尚，發而爲天籟之聲。歌體近乎風者，則風之體，近乎雅者，則雅之體，近乎頌者，則亦頌之而已矣。故舉一風也，而雅、頌可珠聯而繩貫焉。一如四序，首春，由是而夏而秋而冬之不可相越也。且夫聲之爲道，始而輕颺和婉，裊裊不斷，繼而昌大條達，充滿天地，終則沖融雋永，肅穆無間。故《詩》之體象焉。曰風者，飄也，有類乎春風之風人也；雅者，大也，有類乎夏氣發揚與秋令之廣大而清明也；頌則隆冬收閉，萬物盡藏，一歲長養，可告成功矣。讀者試取風、雅、頌三音口咏而神會之，自得其命名取義之實也。若其爲用，可以興，可以觀，可以羣，可以怨，邇事父，遠事君，且並多識於草木鳥獸之名，則夫子教人學《詩》之旨，又無過此數言之詳且盡焉，然其要則總歸之以「思無邪」一語。吾人學《詩》，誠能守此一言以爲之宰，然後本《舜典》數言奉爲矩矱，自能八音克諧，用之邦國，用之郊廟，無施不可。謂之神人以和者，不亦宜哉？蓋思者，可以通天地而感鬼神者也。在心爲志，發言爲詩。詩不本此而出，徒從事於風雲月露以炫藻采而騁才思，或流於淫而不知，或近乎邪而不覺，而欲望其移風俗、美教化也，得乎？故太史陳風，可以考風俗之美惡，知教化之得失，聖人刪之，亦無妨貞淫互見，

然後可以懲勸並施。特標「無邪」一言以爲用思之準，其刪存一片苦心，揭以示人，不既深且遠哉？



五十國風輿地圖

北




自來《詩經》均首列《十五國輿地圖》以便觀覽。然按之地界方位，舛訛頗多，無論其山川脈絡，關隘險夷也。愚足跡幾遍天下，頗知大地山海融結形勢。歸讀《國風》，始悉各國風尚攸殊，隨地變遷，迥不相侔，未嘗不想見當時歌詠情形。是讀《詩》不可不資乎地圖也明矣。因以己意，創爲是圖，與諸家所繪輿圖又異。覽者尋其脈絡，以察形勢，仍復按之歌《詩》，當自有得於心目間也。又周、召舊封，本在岐境內，其後東遷，乃改封陝洛間。而詩則多採之於岐，自當仍圖之岐山下爲是。唯「太原」，說各不同，亦難臆定，爰闕之以俟後攷。僅附諸說於左，俾覽者自擇焉。

【附錄】周氏斯盛曰：「語云：『薄伐獯豸，至于太原。』」傳云：「大音泰。大原，地名，亦曰大鹵。今在太原府陽曲縣。」至于大原，逐出之而已，不窮追也。」案：大、太二字，音本不同。《禹貢》：「既修大原」在冀州，《詩》：「至于太原」在雍州。周都豐鎬，獯豸侵鎬及方，至于涇陽，非自冀州大原而入。《地理志》：「涇水出安定涇陽縣，今原州百泉縣斧頭山也。」則《詩》所云「涇陽」，指此地而言。涇陽東北至太原二千餘里，山川險阻，黃河介其中，安得飭戎車日行三十里，逐雍州涇陽獯豸，由冀州太原而出乎？《禹貢》「原隰底績」，蔡傳引鄭氏云：「其地在今邠州，唐有涇原節度使，今固原州即唐原州故城。漢唐以來，又以河南地爲五原郡。」則詩人所云「至于大原」者，指原州而言，非冀州之太原也。朱子在南渡後未至北方，《集傳》偶誤耳。《集傳》曰：「案《大全》原圖，地界方位舛訛頗多，今參攷輿圖地志，改就清析。惟獯豸猶舊列於大原之北，長城之外者，以《小雅》六月篇『薄伐獯豸，至于太原』，毛、鄭、孔俱未實指何地，至朱傳始云：




「大原，地名，亦曰大鹵。今在大原府陽曲縣。」是禹貢冀州之太原也。明嘉靖間周斯盛輯《山西通志》，以經文焦穫、鎭方，皆近涇陽之地，似大原當亦距涇陽不遠，意即禹貢雍州之原隰，漢爲邠州，唐爲原州，而非冀之太原。其說似近於理。且攷《國語》「宣王料民於大原」，似爲鎭備禦之計，未必遠料之於晉國也。又攷前漢《地理志》：太原郡，秦置。周爲唐國，《詩》所言大原。《集傳》引《公羊》、《穀梁》、大原、大鹵之文爲據，然《公》、《穀》本文，非有定指，而唐徐彥《公羊解》云：「此地勢高大而廣平，故謂之大原。」則古屬通名，似難專指陽曲也。豈朱子當日以經文明有大原，疑周時蠻狄往來乘，冀無定處，或宣王用師有次第，時日有先後，經文總敘其事，非必執一時一處而言耶？故仍從朱《傳》，照《大全》舊圖註列，而以《公羊》、《穀梁》二書所解「太原、大鹵」之義，併附《通志》之說以備一解云。

大東總星之圖



朱子曰漢天河也織女星名在漢旁牽牛星名啟明長庚皆金星也以其先日而出故謂之啟明以其後日而入故謂之長庚天畢畢星也箕斗二星以夏秋之間見於南方云北斗者以其在箕之北也或曰北斗常見不隱者也南斗柄固指西若北斗而西柄則亦秋時也

七月流火之圖




孔氏穎達曰左傳張  
趯曰火星中而寒暑  
退服虔云火大火心  
也季冬十二月平旦  
正中在南方大寒退  
季夏六月黃昏火星  
中大暑退 朱子曰  
心星以六月之昏加  
於地之南方至七月  
之昏則下而西流矣



# 公劉相陰陽圖

楚邱定之方中國 公劉相陰陽圖



朱子曰景測日景以正四方也相視也陰陽向背寒暖之宜也山西曰夕陽嚴氏衆曰幽在梁山西公劉相此夕陽地以建幽居也胡氏廣纂大全曰今得西山眞先生儒家武庫所著公劉相陰陽圖謹按其式作圖於上以備讀詩者考焉

胡氏廣依朱子《集傳》所載王氏總論《七月》之義一段，分布爲圖，今從之。

化 風 月 七 公 爾							
六月	五月	四月		四之日 (三)	三之日	二之日	一之日
	鳴蜩。 斯蠡動股。	秀蓂。	春日載陽。 春日遲遲。			栗烈。	鶩發。
莎雞振羽。			有鳴倉庚。				
			蠶月條桑。		納于凌陰。	鑿冰沖沖。	
			采桑，取斧斯， 伐遠揚。	舉趾。	于相。	其同。 載績武公。	于絡。
						言私其穡， 獻新于公。	取彼狐狸， 爲公子裘。
食鬱及蓂。				同我婦子， 饁彼南畝。			
				其蚤。 獻羔祭韭。			其祭祀也時。 其燕饗也節。

之圖			
七月	八月	九月	十月
流火。		肅霜。	
鳴鴈。在野。	萑葦。在宇。	在戶。	限薄。蟋蟀入我牀下。
		授衣。築場圃。	淅場。穹室熏鼠，塞向瑾戶。
載績。載黃。載玄。載其種。			穫稻。納禾稼。嗟我農夫，我稼既同。
	我朱孔陽，爲公子裳。		上人執官功。晝爾于茅，宵爾索綯。亟其乘屋。
食瓜。烹葵及菹。	斷壺。剝棗。	叔苴。采荼新樗，食我農夫。	嗟我婦子，曰爲改歲，入此室處。爲此春酒，以介眉壽。
			朋酒斯饗，曰殺羔羊。膋彼公堂，稱彼兕觥，萬壽無疆。

張子曰：《七月》之詩，皆以夏正爲斷。朱子曰：一之日，謂一陽之月。二之日，謂二陽之月。變月言日，言是月之日也。餘放此。曹氏粹中曰：公劉正當夏時，所用者夏正也。胡氏廣曰：詩中載一歲事，獨缺三月。嘗觀二章「春日載陽」至「公子同歸」，及三章「蠶月條桑」至「猗彼女桑」，竝不言何月。今摘其辭，布於二月、四月之間，非敢遽以爲三月也，特以備見《豳風》春日之事云。

#### 校記

①「四之日」，原分兩欄，據《彙纂》改。

# 諸國世次圖

商〔宋〕附

契 昭明 相土 昌若 曹圉 冥 振 微 報丁 報乙 報

丙 主壬 主癸 湯即天乙 外丙湯次子 仲壬外丙弟 太甲湯嫡孫 沃丁

太康沃丁弟 小甲 雍已小甲弟 太戊雍已弟 仲丁 外壬仲丁弟 河亶甲

外壬弟 祖乙 祖辛 沃甲祖辛弟 祖丁祖辛子 南庚沃甲子 陽甲祖丁子

盤庚陽甲弟 小辛盤庚弟 小乙小辛弟 武丁 祖庚 祖甲祖庚弟 廩辛

庚丁廩辛弟 武乙 太丁 帝乙 紂 〔宋〕微子紂庶兄 微仲微子弟

宋公稽 丁公 滑公 煬公滑公弟 厲公滑公子 釐公 惠公 哀公

戴公 武公 宣公 穆公宣公弟 殤公宣公子 莊公穆公子 滑公 桓

公滑公弟 襄公 成公 昭公 文公昭公弟 共公 平公 元公

景公 昭公元公庶孫 悼公 休公 辟公 剔成 偃剔成弟

周〔幽〕附



后稷 不窋 鞠〔左傳〕作鞠陶。 〔幽〕公劉 慶節 皇僕 差弗 毀隃

公非 高圉 亞圉 公叔祖類 〔岐周〕太王 王季 文王 武王

成王 康王 昭王 穆王 共王 懿王 孝王共王弟 夷王懿王子

厲王 宣王 幽王 平王 桓王平王孫 莊王 釐王 惠王 襄王

頃王 匡王 定王匡王弟 簡王 靈王 景王 悼王 敬王悼王弟

元王 貞王 哀王 思王哀王弟 考王哀王弟 威烈王 安王 烈王

顯王烈王弟 慎觀王 赧王

### 周公封魯侯爵

周公 伯禽 考公 煬公考公弟 幽公 魏公幽公弟 厲公 獻公厲公

弟 真公 武公真公弟 懿公 伯御懿公姪 孝公懿公弟 惠公 隱公

桓公隱公弟 莊公 閔公 僖公閔公庶兄 文公 宣公 成公 襄公

昭公 定公昭公弟 哀公 悼公 元公 穆公 共公 康公 景公

平公 頃公

### 召公封燕侯爵

召公九世至 惠侯 釐侯 頃侯 哀侯 鄭侯 繆侯 宣侯 桓侯

莊公 襄公 宣公 昭公 武公 文公 懿公 惠公 悼公  
共公 平公 簡公 獻公 孝公 成公 滑公 釐公 桓公  
文公 易王 子噲 昭王 惠王 武成王 孝王 王喜

邶

邶以上三國封爵世次未詳。

衛侯爵

康叔 康伯 考伯 嗣伯 康伯 靖伯 貞伯 頃侯 釐侯  
共伯 武公共伯弟 莊公 桓公 宣公桓公弟 惠公 黔牟桓公子 懿

公 戴公公子頑子 文公戴公弟 成公 穆公 定公 獻公 殤公定公弟  
襄公獻公子 靈公 出公靈公孫 莊公出公父 班師襄公孫 君起靈公子 悼  
公出公季父 敬公 昭公 懷公襄公子 慎公敬公孫 聲公 成侯 平侯

嗣君 懷君 元君 嗣君弟 君角

鄭伯爵

桓公 武公 莊公 昭公 厲公昭公弟 子亶昭公弟 子嬰子襄弟，左傳作  
子儀。 文公厲公子 穆公 靈公 襄公靈公弟 悼公 成公悼公弟 釐

公 簡公 定公 獻公 聲公 哀公 共公聲公弟 幽公 緡公幽  
公弟 君乙幽公弟

齊侯爵

太公 丁公 乙公 癸公 哀公 胡公哀公弟 獻公哀公弟 武公  
厲公 文公 成公 莊公 釐公 襄公 桓公襄公弟 孝公 昭公  
孝公弟 懿公孝公弟 惠公孝公弟 頃公 靈公 莊公 景公莊公弟 晏  
孺子 悼公景公子 簡公 平公簡公弟 宣公 康公

魏畢公高之後，封爵世次未詳。

唐即「晉」，侯爵。「曲沃」附。

唐叔 「晉」侯燮 武侯 成侯 厲侯 靖侯 釐侯 獻侯 穆侯  
殤叔穆侯弟 文侯穆侯子 昭侯 孝侯 鄂侯 哀侯 小子侯 緡哀  
侯弟

「曲沃」桓叔穆侯子 莊伯 「晉」武公 獻公 奚齊 卓子奚齊弟 惠公獻  
公子 懷公 文公獻公子 襄公 靈公 成公襄公弟 景公 厲公 悼  
公襄公曾孫 平公 昭公 頃公 定公 出公 哀公昭公曾孫 幽公

烈公 孝公 靜公

秦伯爵

非子 秦侯 公伯 秦仲 莊公 襄公 文公 甯公文公孫 出子

武公甯公長子出子兄 德公武公弟 宣公 成公宣公弟 穆公成公弟 康公 共

公 桓公 景公 哀公 惠公哀公孫 悼公 厲共公 躁公 懷公

驪公弟 靈公懷公孫 簡公懷公孫 惠公 出子 獻公驪公孫 孝公 惠

文王 武王 昭襄王武王弟 孝文王 莊襄王 始皇帝 二世皇帝

子嬰二世皇帝弟

陳侯爵

胡公 申公 相公申公弟 孝公申公子 慎公 幽公 釐公 武公

夷公 平公夷公弟 文公 桓公 厲公桓公弟 利公桓公孫 莊公利公弟

宣公莊公弟 穆公 共公 靈公 成公 哀公 惠公哀公孫 懷公

滑公

檜祝融之後，封爵世次未詳。

蕭伯爵

公聲公弟	伯陽	宣公	成公宣公弟	武公	平公	悼公	聲公悼公弟	隱公平公弟	靖
		伯	石甫	繆公石甫弟	桓公	莊公	釐公	昭公	共公
		振鐸	太伯	仲君	宮伯	孝伯	夷伯	幽伯夷伯弟	戴伯幽伯弟
									惠

附 作詩時世圖 從《傳說彙纂》錄出

商詩五篇

太甲之世

頌一篇。

那鄭氏虞成謂太甲祭湯也。孔氏穎達謂《那》之作當太甲時。朱子不詳其世。

仲丁以後

頌一篇。

烈祖孔氏穎達謂《箋》稱祭中宗，諸侯來助。明是其後，或子孫之時，未知當誰世。朱子不詳其世。

祖庚之世

頌一篇。

玄鳥孔氏穎達謂《禮》三年喪畢，禘於太祖之廟。《序》言禘高宗，明是厲高宗而作禘，故知是禘於契之廟也。朱子不詳

其世。

祖庚以後

頌二篇。

長發

殷武孔氏穎達謂《玄鳥》、《雉》以爲高宗始禘。《殷武》云祀高宗，則亦在其後。《殷武》既在後，則知《長發》之作

亦在後矣。以上二篇，朱子不詳其世。

周詩三百六篇

文王之世

正風二十三篇。孔氏穎達謂《二南》之詩，文王時作，惟《甘棠》、《何彼穠矣》武王時作。朱子皆同，而以《甘棠》

亦爲文王時詩。

〔周南〕

關雎

葛覃

卷耳

樛木

蟋斯

桃夭

兔置

采芣

漢廣

汝墳

麟之趾

〔召南〕

鵲巢

采芣

草蟲

采蘋

行露

羔羊

殷其雷

標有梅

小星

江有

汜

野有死麇

騶虞

正小雅八篇。孔氏穎達謂《鹿鳴》等三篇，此文王《小雅》；《采芣》爲伐昆夷而作，事在受命四年；《出車》、《秋

杜》還而勞之，在受命五年。《伐木》、《天保》無文王之證，或當時卽作，或後爲之，未可定也。朱子皆不詳其世。

鹿鳴 四牡 皇皇者華 伐木 天保 采芣 出車 杕杜

正大雅三篇。孔氏穎達謂《杕杜》云「濟濟辟王」，《靈臺》云「王在靈沼」，皆言王；《旱麓》不言王，又不言王。但

經無證者，或當其生存之時，或在其後，不可定也。朱子皆是爲周公所作。

杕杜 旱麓 靈臺

### 武王之世

正風二篇。

〔召南〕

甘棠 孔氏穎達謂《甘棠》云美其爲伯之功，則武王時也。朱子以爲文王時詩。

何彼穠矣 孔氏穎達謂《何彼穠矣》，太公

已封於齊，武王時作。朱子同，又疑爲東遷後詩。

正小雅四篇。

南陔 白華 華黍 孔氏穎達謂此三篇蓋武王之時。朱子皆不詳其世。

魚麗 孔氏穎達謂此篇武王時詩。

朱子不詳其世。

正大雅三篇。孔氏穎達謂三篇皆言文王之德，皆文王後作之。朱子以《縣》爲成王時詩，《思齊》、《皇矣》疑爲周

公所作。

縣 思齊 皇矣



## 成王之世

變風七篇。鄭氏康成謂成王之時，周公避流言之難，其詩爲幽國變風。朱子亦以爲成王周公時詩。

〔商〕

七月 鵲鳴 東山 破斧 伐柯 九罏 狼跋

### 正小雅十篇。

常棣 鄭氏康成謂周公弔二叔之不成，召公爲作此詩。朱子同。 由庚 南有嘉魚 崇丘 南山有

臺 由儀 蓼蕭 淇露 彤弓 菁菁者莪 孔氏穎達謂《由庚》以下，周公成王之詩。則《南有嘉

魚》至《菁菁者莪》從可知也。朱子皆不詳其世。

### 正大雅十二篇。

文王 大明 孔氏穎達謂《文王》、《大明》二篇成王時作。朱子同。 下武 孔氏穎達謂成王時作。朱子同。

文王有聲 孔氏穎達謂《文王有聲》舉其盛，則成王時作。朱子同。 生民 行葦 既醉 鳧鷖

假樂 公劉 洞酌 卷阿 鄭氏康成謂《生民》及《卷阿》，周公、成王時詩。朱子同。

頌三十一篇。鄭氏康成謂《周頌》者，其作在周公攝政，成王卽位之初。朱子亦以爲多周公所定，而間或有康王

以後之詩。

清廟 維天之命 維清 烈文 天作 昊天有成命 朱子疑爲康王時詩。 我將

時邁朱子以爲武王時詩。

執競朱子疑爲昭王時詩。

思文

臣工

噫嘻朱子疑爲康王時詩。

振鷺

豐年

有瞽

潛

離朱子以爲武王時詩。

載見

有客

武

閔予小子

訪落

敬之

小毖

載芟

良耜

絲衣

酌

桓

賁

般

### 懿王之世

變風五篇。

〔齊〕

雞鳴鄭氏康成謂哀公政衰，懿王烹之，齊人變風始作。朱子不詳其世。

邶孔氏穎達謂《邶》序云刺哀公，則哀公時

詩也。朱子不詳其世。

著

東方之日

東方未明孔氏穎達謂三篇亦爲哀公時詩。朱子不詳其世。

### 夷王之世

變風一篇。

〔邶〕

柏舟《序》：衛頃公之時，仁人不遇，小人在側。鄭氏康成謂頃公當周夷王時。朱子不詳其世，又疑爲莊姜詩，則平王之世。

### 夷王厲王之間

變風四篇。鄭氏康成謂夷王、厲王之時，槍之變風始作。朱子不詳其世。

〔槍〕

羔裘 素冠 隔有莠楚 匪風

### 厲王之世

變風二篇。

〔陳〕

宛丘序：刺幽公也。鄭氏康成謂刺厲王，十月之交、兩無正、小旻、小宛是也。

棄其舊業，亟會於道路，歌舞於市井。朱子不詳其世。

變小雅四篇。鄭氏康成謂刺厲王，十月之交、兩無正、小旻、小宛是也。

十月之交：朱子以爲幽王時詩。

兩無正：朱子不詳其世，疑爲東遷後詩。

小旻

小宛以上二篇，朱子不

詳其世。

變大雅五篇。

民勞序：召穆公刺厲王。朱子同。

板序：凡伯刺厲王。朱子同。

蕩序：召穆公傷周室大壞。朱子同。

抑序：衛武公刺厲王。朱子以爲衛武公作此自警，當在平王之世。

桑柔序：芮伯刺厲王。朱子同。

### 共和之世

變風一篇。

〔唐〕

蟋蟀序：刺晉僖公也。鄭氏康成謂當周公、召公共和之時。朱子不詳其世。

### 宣王之世

變風五篇。

〔邶〕

柏舟孔氏：邶達謂衛武公時作。朱子同。

〔秦〕

車鄰鄭氏：康成謂非子曾孫秦仲，宣王命爲大夫，國人美之。朱子不詳其世。

〔陳〕

衡門 東門之池 東門之楊孔氏：邶達謂衡門、詩僖公、東門之池、東門之楊，從上明之，亦僖公時詩也。

朱子皆不詳其世。

### 變小雅十四篇。

六月序：宣王北伐也。朱子同。

采芣序：宣王南征也。朱子同。

車攻序：宣王復古也。朱子同。

吉日序：美宣王也。朱子同。

鴻雁序：美宣王也。朱子同。

庭燎序：美宣王也。朱子不詳其世。

河水序：規宣王也。朱子不詳其世。

鶴鳴序：美宣王也。朱子不詳其世。

祈父序：刺宣王也。朱子

不詳其世。

白駒序：大夫刺宣王也。朱子不詳其世。

黃鳥序：刺宣王也。朱子不詳其世。

我行

其野序：刺宣王也。朱子不詳其世。  
斯干序：宣王考室也。朱子不詳其世。  
無羊序：宣王考牧也。朱子不詳其世。

### 變大雅六篇。

雲漢序：仍叔美宣王也。朱子亦以爲宣王時詩。  
崧高序：尹吉甫美宣王。朱子亦以爲宣王時詩。  
烝民序：尹吉甫美宣王。朱子亦以爲宣王時詩。  
韓奕序：尹吉甫美宣王。朱子不詳其世。  
江漢序：尹吉甫美宣王。朱子亦以爲宣王時詩。  
常武序：召穆公美宣王。朱子亦以爲宣王時詩。

### 幽王之世

變小雅四十篇。孔氏類達謂小雅自節南山下盡何草不黃，去十月之交，等四篇，餘四十篇皆幽王

時詩。

節南山朱子亦以爲幽王時詩。  
正月朱子不詳其世。  
小弁朱子亦以爲幽王時詩。  
巧言朱子不詳其世。  
何人斯朱子不詳其世。  
巷伯朱子不詳其世。  
谷風朱子不詳其世。  
蓼莪朱子不詳其世。  
大東朱子不詳其世。  
四月朱子不詳其世。  
北山朱子不詳其世。  
無將大車朱子不詳其世。  
小鼓鐘朱子亦以爲幽王時詩。  
楚茨朱子不詳其世。  
信南山朱子不詳其世。  
甫田朱子不詳其世。  
大田朱子不詳其世。  
瞻彼洛矣朱子不詳其世。  
裳裳者華朱子不詳其世。  
桑扈朱子不詳其世。  
鴛鴦朱子不詳其世。  
頍弁朱子不詳其世。  
車鄰朱子不詳其世。  
青蠅朱子不詳其世。  
賓之初筵朱子亦以爲幽王時詩。  
魚藻朱子不詳其世。  
采芣朱子不詳其世。  
角

弓朱子不詳其世。苑柳朱子不詳其世。都人士朱子不詳其世。采芣朱子不詳其世。黍苗朱

子以爲宣王時詩。隔桑朱子不詳其世。白華朱子亦以爲幽王時詩。蟋蟀朱子不詳其世。瓠

葉朱子不詳其世。漸漸之石朱子不詳其世。苕之華朱子不詳其世。何草不黃朱子亦以爲幽王

時詩。

變大雅二篇。孔氏穎達謂幽王「大雅」，「瞻卬」、「召旻」。朱子同。

瞻卬 召旻

### 平王之世

變風二十八篇。

〔邶〕

綠衣孔氏穎達謂當莊公時。朱子同。

〔衛〕

淇奥孔氏穎達謂「淇奥」美武公，則武公時詩矣。朱子同。考槃孔氏穎達謂莊公時詩。朱子不詳其世。碩

人孔氏穎達謂莊公時詩。朱子同。

〔王〕

黍離孔氏穎達謂平王時詩。朱子不詳其世。君子于役「序」：刺平王也。朱子不詳其世。君子陽陽孔氏

穎達謂平王時詩。朱子不詳其世。揚之水「序」：刺平王也。朱子同。中谷有蓷孔氏穎達謂平王時詩。朱子

不詳其世。 葛藟序：王族刺平王也。朱子不詳其世。

〔鄭〕

緇衣序：美武公也。朱子同。 將仲子序：刺莊公也。朱子不詳其世。

叔于田序：刺莊公也。朱子亦以爲莊公時詩。 大叔于田序：刺莊公也。朱子亦以爲莊公時詩。 羔裘

孔氏穎達謂莊公時詩。朱子不詳其世。 遵大路序：莊公失道。朱子不詳其世。 女曰鷦鷯孔氏穎達謂莊

公時詩。朱子不詳其世。

〔唐〕

山有樞序：刺晉昭公也。朱子不詳其世。 揚之水序：刺晉昭公也。朱子亦以爲昭公時詩。 椒聊序：

刺晉昭公也。朱子亦以爲昭公時詩。 綢繆孔氏穎達謂昭公時詩。朱子不詳其世。 杕杜孔氏穎達謂昭公時詩。

朱子不詳其世。 羔裘孔氏穎達謂昭公時詩。朱子不詳其世。 鶉羽序：昭公之後大亂五世，君子下從征役，不

得養其父母而作是詩。朱子不詳其世。

〔秦〕

駉序：美襄公也。朱子不詳其世。 小戎序：美襄公也。朱子同。 蒹葭序：刺襄公也。朱子不詳其

世。 終南序：戒襄公也。朱子不詳其世。

平王桓王之間

變風七篇。鄭氏康成謂當周平、桓之世，魏之變風始作。朱子不詳其世。

〔魏〕

葛屨 汾沮洳 園有桃 陟岵 十畝之間 伐檀 碩鼠

### 桓王之世

變風三十三篇。

〔邶〕

燕燕孔氏類達謂州吁時詩。朱子同。 日月序：衛莊姜遭州吁之難。朱子以爲莊公時詩。 終風序：莊姜

遭州吁之暴。朱子以爲莊公時詩。 擊鼓序：怨州吁也。朱子同。 凱風孔氏類達謂州吁時詩。朱子不詳其

世。 雄雉序：刺衛宣公也。朱子不詳其世。 匏有苦葉序：刺衛宣公也。朱子不詳其世。 谷風

孔氏類達謂宣公時詩。朱子不詳其世。 式微孔氏類達謂宣公時詩。朱子不詳其世。 旄丘孔氏類達謂宣公時

詩。朱子不詳其世。 簡兮孔氏類達謂宣公時詩。朱子不詳其世。 泉水孔氏類達謂宣公時詩。朱子不詳其世。

北門孔氏類達謂宣公時詩。朱子不詳其世。 北風孔氏類達謂宣公時詩。朱子不詳其世。 靜女孔氏類達謂

宣公時詩。朱子不詳其世。 新臺序：刺衛宣公也。朱子不詳其世。 二子乘舟孔氏類達謂宣公時詩。朱

子不詳其世。

〔鄭〕

牆有茨序：公子頑通於君母，國人疾之。朱子同。 君子偕老序：刺衛夫人。鄭氏康成謂宣公夫人。朱子同。

桑中序：衛之公室淫亂。朱子不詳其世。 鶉之奔奔序：刺衛宣姜也。朱子同。



〔衛〕

氓〔序〕：宣公之時。朱子不詳其世。

竹竿〔序〕：孔氏類達謂宣公時詩。朱子不詳其世。

芄蘭〔序〕：刺惠公也。朱

子不詳其世。

伯兮〔序〕：鄭氏康成謂宣公時詩。朱子不詳其世。

有狐〔序〕：孔氏類達謂宣公時詩。朱子不詳其世。

〔王〕

兔爰〔序〕：桓王失信諸侯。朱子不詳其世。

采芣〔序〕：鄭氏康成謂桓王之時。朱子不詳其世。

大車〔序〕：孔氏類達謂桓

王時詩。朱子不詳其世。

〔鄭〕

有女同車〔序〕：刺忽也。朱子不詳其世。

寢裳〔序〕：孔氏類達謂〔義〕：思見正，突初立事也。朱子不詳其世。

〔陳〕

墓門〔序〕：刺陳佗也。朱子不詳其世。

## 莊王之世

### 變風十五篇

〔王〕

丘中有麻〔序〕：莊王不明，賢人放逐，國人思之，而作是詩也。朱子不詳其世。

〔鄭〕

山有扶蘇〔序〕：刺忽也。朱子不詳其世。

蓍兮〔序〕：刺忽也。朱子不詳其世。

校童〔序〕：刺忽也。朱子不

詳其世。

丰 東門之墀

風雨

子衿孔氏穎達謂「丰」、「東門之墀」、「風雨」、「子衿」，或當突筵之

時，或當忽人之後。朱子皆不詳其世。

揚之水「序」：君子同怨之無忠臣良士，終以死亡，而作是詩也。朱子不詳其

世。

〔齊〕

南山「序」：刺襄公也。朱子同。

甫田「序」：大夫刺襄公也。朱子不詳其世。

盧令「序」：襄公好田獵，故陳古

以風焉。朱子不詳其世。

敝笱「序」：刺文姜也。朱子同。

載驅「序」：齊人刺襄公。朱子同。

猗嗟

「序」：刺魯莊公也。朱子同。

釐王之世

變風五篇。

〔鄭〕

出其東門

野有蔓草

溱洧孔氏穎達謂此一篇屬公時詩。朱子皆不詳其世。

〔唐〕

無衣「序」：美晉武公也。朱子亦以爲武公時詩。

有杕之杜「序」：刺晉武公也。朱子不詳其世。

惠王之世

變風十二篇。

〔鄭〕

定之方中序：美衛文公也。朱子同。

蠲蠲序：衛文公能以道化民。朱子同。

相鼠序：衛文公能正其

羣臣。朱子同。

干旄序：衛文公臣子多好善。朱子同。

載馳序：許穆夫人閔衛之亡。朱子同。

〔衛〕

木瓜序：美齊桓公也。朱子不詳其世。

〔鄭〕

清人序：刺文公也。朱子同。

〔唐〕

葛生序：刺晉獻公也。朱子不詳其世。

采芣序：刺晉獻公也。朱子不詳其世。

〔陳〕

防有鵲巢序：宣王多信讒，君子憂懼焉。朱子不詳其世。

月出序：孔氏穎達謂宣王時詩。朱子不詳其世。

〔曹〕

蟋蟀序：鄭氏康成謂周惠王時，昭公好奢，曹之變風始作。朱子不詳其世。

## 襄王之世

### 變風九篇

〔衛〕

河廣序：宋襄公母歸于衛，思而不止，故作是詩。朱子同。

〔秦〕

黃鳥序：國人刺穆公。朱子同。

晨風序：刺康公也。朱子不詳其世。

無衣序：孔氏穎達謂康公時詩。朱子

不詳其世。

渭陽序：康公念母也。朱子同。

權輿序：刺康公也。朱子不詳其世。

〔曹〕

候人序：刺共公也。朱子同。

鵲鳩序：孔氏穎達謂共公時詩。朱子不詳其世。

下泉序：曹人疾共公。朱子

不詳其世。

頌四篇。

魯頌

駉序：頌僖公也。朱子同。

有駟序：頌僖公也。朱子不詳其世。

泂水序：頌僖公也。朱子不詳其世。

閟宮序：頌僖公也。朱子同。

定王之世

變風二篇。

〔陳〕

株林序：刺靈公也。朱子同。

澤陂序：言靈公君臣淫於其國，男女相說，憂思感傷焉。朱子不詳其世。

《彙纂》曰：案作《詩》之時世，經秦火之後，難以全攷，故自漢唐諸儒，訓詁互異。然古

《序》與經並出，毛、鄭、孔氏羽翼其說，傳流最古。至朱子一以經文爲據，其餘不見諸經

者，都爲未定之辭，此據理之論也。歐陽修祖《鄭譜》而駁議，許謙、劉瑾宗朱《傳》而亦微有不同。迨明何楷作《世本古義》，引證雖博，而偏說滋繁矣。今輯古序及毛、鄭、孔氏舊義，而大指仍以朱子爲歸，餘說則存而不論也。

案：作《詩》時世，本難全攷。卽諸儒所定詩體正變，亦未爲確。余既各有考正於各詩之下，閱者可以隨時領畧其義矣。而茲復錄此篇於卷首者，一可以互相印證，一以見說《詩》之難得通論也如是。

## 詩經原始卷首下

### 詩旨

《虞書》：詩言志，歌永言，聲依永，律和聲。

案：此千古說詩之祖。開口即題志字，貫徹始終，中間率以聲律，末歸重神人以和。詩之體用，盡於是矣。惜其時詩皆不傳，僅聞《擊壤》、《康衢》數歌，然又非詩體。可見古詩逸者尚多，《三百篇》特其盛焉者耳。

《禮記》：溫柔敦厚，《詩》教也。

案：四字亦括盡《詩》旨，《詩》教。自古至今，詩體千變萬化，其能外此四字否耶？古人立言，何其簡而賅也！

《論語》：《詩》三百，一言以蔽之，曰「思無邪」。

案：此聖人教人讀《詩》之法。《詩》不能有正而無邪，《三百》雖經刪正，而其間刺淫亂世與寄託男女之詞，未能盡汰，故恐人誤認爲邪，而以爲口實，特標一言以立之準，庶使學者讀之有以得其性情之正云耳。不料朱子竟以爲邪正兼收，復爲之說曰：善者可以感發人之善心，惡者可以懲創人之逸志。

夫《詩》之足以感發人心固已，而其所以能懲創逸志者，不賴有刺淫諷世諸作乎哉？若謂淫奔者而亦收之，是直誨淫而已，安見其懲創人之逸志爲也？夫子本懼後人誤讀《鄭》、《衛》爲淫詩，而後儒偏指《鄭》、《衛》爲夫子所收之淫詩，教人以讀之，雖宜聖其如之何哉？

誦《詩》三百，授之以政，不達，使于四方，不能專對，雖多，亦奚以爲？

案：古者天子巡狩，命太師陳詩以觀民風，《詩》之有關國政也久矣。其後列國士大夫，出使朝聘，燕享會盟，莫不歌《詩》作樂，往來贈答，一時《風》、《雅》互相競尚，且有以是卜人休咎，毫釐不爽者，則《詩》之爲教，豈不益重也哉？是以夫子之言云然。迨戰國競尚游說，而此風遂遞，漢、唐後作者雖多，然皆徒逞才華，藉抒懷抱而已，非皆有闢國政也。無怪詩道陵夷，今愈不古若矣。學者誦《詩》尚當體會聖言，務求聲詩何以與國政相關處，默驗諸心，有得於己，然後見之事爲與形諸歌咏，自能與古爲一，而聲教因之復振。不然，日誦三百，夫何爲哉？

《詩》可以興，可以觀，可以羣，可以怨。邇之事父，遠之事君，多識於鳥獸草木之名。

案：今人作詩，只從鳥獸草木上用工，何嘗有關君父之大哉？殊不知興、觀、羣、怨，卽從事父事君來。不能事父事君，而欲其興、觀、羣、怨，吾不知其所可者安在也？聖人一言，固早有以賅其全歟！

子謂伯魚曰：女爲《周南》、《召南》矣乎？人而不爲《周南》、《召南》，其猶正牆面而立也歟？

案：《二南》皆房中樂，且其篇什無多，非如《雅》、《頌》鉅觀，所言皆宗廟朝廷，大經大法，偉烈豐功，可

以擴人識見，長人才思，而何以不爲之卽至如面牆而立歟？殊不知《二南》所咏，皆夫婦詞，爲人倫始基。古來聖帝明王，其發施事業，莫不肇端宮闈，一室燕寢，卽對越帝天時。於此而不知謹其所爲，而欲異日之見諸事業者能慎始以要終也，其可得耶？故人不能行於家庭之際，卽不能行於閭里之間，不能行於閭里之間，卽不能行乎邦國之內。謂之正牆面而立也，不亦宜哉？蓋聖賢爲學，身體力行，必有得乎心乃可謂之學。非如後人不過誦習文義，竊取浮詞，供我言論，佐我文章而已。故不爲《二南》則已，欲爲《二南》，必將有以得夫型于式化之端，溫柔敦厚之旨，體之於心而咏之於口，卽以見諸倫常夫婦之間，而皆可以自信其無愧，則始基立矣。始基立而王道聖功皆由此建，猶謂《二南》爲不足爲者，豈理也歟？

子曰：吾自衛反魯，然後樂正，《雅》、《頌》各得其所。

案：夫子反魯在周敬王三十六年、魯哀公十一年丁巳，時年已六十有九。若云刪《詩》，當在此時。乃何以以前此言《詩》皆曰「三百」，不聞有「三千」說耶？此蓋史遷誤讀正樂爲刪《詩》云耳。夫曰正樂，必《雅》、《頌》諸樂，固各有其所在，不幸歲久年湮，殘闕失次。夫子從而正之，俾復舊觀，故曰「各得其所」，非有增刪於其際也。奈何後人不察，相沿以至於今，莫不以正樂爲刪《詩》，何不卽《論語》諸文而一細讀之也？

孟子：說《詩》者不以文害辭，不以辭害志，以意逆志，是爲得之。

案：詩辭與文辭迥異，文辭多明白顯易，故卽辭可以得志。詩辭多隱約微婉，不肯明言，或寄託以寓



意，或甚言而驚人，皆非其志之所在。若徒泥辭以求，鮮有不害志者。孟子斯言，可謂善讀《詩》矣。然而自古至今，能以己意逆詩人志者，誰哉？

《大序》：詩者，志之所之也。在心爲志，發言爲詩。情動於中而形於言，言之不足故嗟歎之，嗟歎之不足故永歌之，永歌之不足，不知手之舞之，足之蹈之也。情發於聲，聲成文，謂之音。治世之音安以樂，其政和；亂世之音怨以怒，其政乖；亡國之音哀以思，其民困。故正得失，動天地，感鬼神，莫近於《詩》。先王以是經夫婦，成孝敬，厚人倫，美教化，移風俗。故《詩》有六義焉：一曰風，二曰賦，三曰比，四曰興，五曰雅，六曰頌。上以風化下，下以風刺上，主文而譎諫，言之者無罪，聞之者足以戒，故曰《風》。至於王道衰，禮義廢，政教失，國異政，家殊俗，而變風、變雅作矣。國史明乎得失之跡，傷人倫之變，哀刑政之苛，吟詠性情，以風其上，達於事變而壞其舊俗者也。故變風發乎情，止乎禮義。發乎情，民之性也；止乎禮義，先王之澤也。是以一國之事，繫一人之本，謂之《風》；言天下之事，形四方之風，謂之《雅》。《雅》者，正也，言王政之所由興廢也。政有大小，故有《小雅》焉，有《大雅》焉。《頌》者，美盛德之形容，以其成功告於神明者也。

案：此《序》總論《詩》旨，純駁參半。雖多襲《樂記》語，要自是說《詩》正論，可補《論語》、《虞書》所不及。若云《序》出子夏，此其庶幾。至《小序》，則純乎僞托，故舍彼而錄此。唯其中有未盡合者，如

「國史明乎得失」一節，誠如朱注所駁：「政有大小」數語，亦爲韋氏所指。學者分別觀之可耳。

黃氏樵曰：有天地，有萬物，而詩之理已具。雷之動，風之偃，萬物之鼓舞，皆有詩之理而未著也。嬰孩之嘻笑，童子之謳吟，皆有詩之情而未動也。桴以鼗，鼓以土，簫以葦，皆有詩之用而未文也。「康衢」、「順則」之謠，「元首」、「股肱」之歌，詩之義已備矣。

案：詩情原自充滿兩間，無以感之則寂而不動，有以觸之則文而成聲，此可謂善形容詩之本體者矣。

歐陽氏修曰：《風》生於文王，而《雅》、《頌》雜於武王之間。《風》之變自夷懿始，《雅》之變自幽、厲始。霸者興，變風息焉。王道廢，《詩》不作焉。王通謂諸侯不貢詩，天子不采風，樂官不達雅，國史不明變，非民之不作也。詩出於民之情性，情性豈能無哉？職詩者之罪也。

案：此亦運會所關，民雖有作而時不尚，則作如不作也。迨漢後詩道復昌，而風、雅、頌之體竟亡，以至於今，則又何故？

鄭氏樵曰：六義之序，後先次第，聖人初無加損也。《風》者，出於風土，大概小夫賤隸，婦人女子之言。其意雖遠，其言淺近重複，故謂之《風》。《雅》出於朝廷士大夫，其言純厚典則，其體抑揚頓挫，非復小夫賤隸、婦人女子能道者，故曰《雅》。《頌》者，初無諷誦，惟以鋪張勳德而已。其辭嚴，其聲有節，以示有所尊，故曰《頌》。

案：《風》、《雅》、《頌》之編，自有次第，不容或紊。而此云聖人初無加損者，蓋祇知《風》、《雅》、《頌》之所從出，而未識《風》、《雅》、《頌》之所由名耳。說見鄙人所著《詩無邪太極篇》中，茲不贅。

鄭氏又曰：《風》有正變，仲尼未嘗言，而他經不載焉，獨出於《詩序》，皆以美者爲正，刺者爲變。則邶、鄘、衛之詩，謂之變風可也；《緇衣》之美武公，《駉》、《小戎》之美襄公，亦可謂之變風乎？必不得已從先儒正變之說，則當如《穀梁春秋》書築王姬之館於外，書秋盟於首戴，皆曰變之正也。蓋言事雖變常而終合乎正。《河廣》之詩，欲往而不往；《大車》之詩，畏之而不敢；《氓》之詩，反之而自悔，此所謂變之正也。序謂變風出乎情性，止乎禮義，此言得之。然《詩》之必存變風，何也？見夫王澤雖衰，人猶能以禮義自防也。見中人之性，能以禮義自閑，雖有時而不善，終蹈乎善也。見其用心之謬，行己之乖，倘反而爲善，則聖人亦錄之而不棄也。

案：風、雅正變，原不在時世升降，諷刺美惡之間，要亦不外諷刺美惡，時世升降之故，唯視乎體之何如耳。鄭氏雖疑及之，而未能知其所以然，亦尚爲舊說所囿故也。

葉氏適曰：諸詩各具一體，故皆以先後爲次。惟《豳》兼有風、雅之制。以爲風，則其辭作於朝廷，繫於政事，以爲雅，則又記風土焉，故列於《風》、《雅》之間，明其不絕於風，而可以雅也。

案：《關·七月》實兼風、雅、頌三體。蓋記風土、譜農政外，又可以爲祭賽用，故曰頌。《周官》不得其解，妄分爲三，曰關風、關雅、關頌，致啟漢、宋諸儒疑議。葉氏雖知其二，未識其三。豈人之聰明，固有明於此而暗於彼者歟？

嚴氏粲曰：純乎雅之體爲雅之大，雜乎風之體爲雅之小。太史公稱《國風》好色而不淫，《小雅》怨誹而不亂，若《離騷》可謂兼之。言《離騷》兼《國風》、《小雅》而不兼《大雅》。見《小雅》與《風》、《騷》相類，而《大雅》不可與《風》、《騷》並言也。

案：太史公所云「《小雅》怨誹而不亂」者，特舉《小雅》之變者言之耳。若正《小雅》之詞，則未盡然。而欲執是以辨大、小《雅》之分，其可得乎？蓋《小雅》固可兼風，《大雅》亦未嘗不可兼風，讀者試卽《河》、《卷》、《阿》諸詩而細咏之，其體自見。

王氏柏曰：風、雅之別，卽朱子答門人之問亦未一。有腔調不同之說，有詞氣不同之說，有體製不同之說，或以地分，以時分，以所作之人而分。諸說皆可參考。惟腔調之說，朱子晚年之所不取。至於《楚詞》之《集注》，後《詩傳》二十年，風、雅、頌之分，其說審矣。其言曰：「《風》則閭巷風土、男女情思之詞。《雅》則燕享朝會、公卿大夫之作。《頌》則鬼神宗廟、祭祀歌舞之樂。」以此例推之，則所謂體製詞氣，所謂以時、以地、以所作之人不同等說，皆有條而不紊矣。

案：詩之腔調生於詞氣，詞氣生體製，體製不同，故詞氣與腔調亦因之以異。事原一貫，理本相通。豈可執一以辨大、小、雅之分乎？至時、地與人，亦有因是以別者，但不可泥而求之耳。

孔氏穎達曰：原夫作樂之始，樂寫人音。人音有大小高下之殊，樂器有宮、徵、商、羽之異。依人音而制樂，託樂器以寫人，是樂本效人，非人效樂。但制樂之後，則人之作詩，先須成樂之文，乃成爲音。聲能寫情，情皆可見。聽音而知治亂，觀樂而曉盛衰，故神瞽有以知其趣也。《樂記》曰：「其哀心感者，其聲噍以殺；其樂心感者，其聲發以散。」是情之所感，入於樂也。季札見歌《唐》曰：「思深哉！其有陶唐氏之遺民乎？」是樂音之得其情也。

朱子曰：詩者，樂之章也。故必學樂，然後誦詩。所謂樂者，蓋琴瑟壎箎之類，以漸習之而節夫詩之音律者。然詩本性情，有美刺風喻之旨。其言近而易曉，而從容詠歎，所以感人者又易入。至於聲音之高下，舞蹈之疾徐，所以養其耳目，和其心志，使人淪肌浹髓而安於仁義禮智之實，又有非思勉之所能及者。

又曰：詩之作，本爲言志而已。方其詩也，未有歌也。及其歌也，未有樂也。以聲依永，以律和聲，則樂乃爲詩而作，非詩爲樂而作也。三代之時，禮樂用於朝廷，而下達於閭巷。學者諷誦其言，以求其志。詠其聲，執其器，舞蹈其節，以涵養其心。則聲樂之所助於詩者爲多。然猶曰「興於詩，成於樂」，其求之固有序矣。是以聖賢之言詩，主於聲者少，而發

其義者多。仲尼所謂「思無邪」，孟子所謂「以意逆志」者，誠以詩之作本乎其志之所存。得其志而不得其聲者，有矣；未有不得其志而能通其聲者也。就使得之，止其鐘鼓之鏗鏘而已，豈聖人「樂云、樂云」之意哉！況今去孔、孟千有餘年，古樂無復可考，而欲以聲求詩，則未知古樂之遺聲，今皆可推而得之乎？三百五篇皆可協之音律，而被之絃歌乎？故愚以爲詩出乎志者也，樂出乎詩者也。志者，詩之本；而樂者，其末也。

案：古人作樂將以狀萬物之性情，而得諸聲音形容之際者也。雖無聲之詩，尚可以神會而音譜之，況三百五篇之有詞有韻乎？特古樂既亡，後人無復考證得失，時王又不以是爲重，故任其散在兩間，而若或亡之耳。倘有應運者出，則卽詞以審音，由音以定樂，雖三代製作，不難復見於今。前明吾鄉葛氏中選，精於音律而不逢時，乃著《泰律篇》一書以傳世，始知後世未嘗無人可與共復古樂，但時未至，則亦有待焉耳。

鄭氏樵曰：善觀《詩》者，當推詩外之意，如孔子、子思。善論《詩》者，當達詩中之理，如子貢、子夏。善學《詩》者，當取一二言爲立身之本，如南容、子路。善引《詩》者，不必分別所作之人，所采之詩，如諸經所舉之詩可也。「縣蠻黃鳥，止于丘隅」，不過喻小臣之擇卿大夫有仁者依之，夫子推而至於爲人君止於仁，與國人交止於信。「鳶飛戾天，魚躍于淵」，不過喻惡人遠去，而民之喜得其所，子思推之，上察乎天，下察乎地。觀《詩》如此，尚何疑

乎？「如切如磋，如琢如磨」，而子貢能達於貧富之間。「巧笑倩兮，美目盼兮」，而子夏能悟於禮後之說。論《詩》若此，尚何疑乎？南容三復，不過「白圭」；子路終身所誦，不過「不伎不求」；學《詩》至此，奚以多爲？「維嶽降神，生甫及申」，宣王詩也，夫子以爲文武之德。「夙夜匪懈，以事一人」，仲山甫詩也，左氏以爲孟明之功。引《詩》若此，奚必分別所作之人，所采之詩乎？達是，然後可以言《詩》也。

范氏浚曰：「高山仰止，景行行止。」夫子曰：「《詩》之好仁如此。」天生烝民，有物有則。」夫子曰：「爲此詩者，其知道乎？」凡夫子爲《詩》之說，率不過以明大義。後世深求曲取，穿鑿遷就之論興，而《詩》之論始不明矣。

案：《詩》多言外意，有會心者卽此悟彼，無不可以貫通。然唯觀《詩》、學《詩》、引《詩》乃可，若執此以釋《詩》，則又誤矣。蓋觀《詩》、學《詩》、引《詩》，皆斷章以取義，而釋《詩》，則務探詩人意旨也，豈可一概論哉？

呂氏祖謙《讀詩記》曰：《桑中》、《溱洧》諸篇，幾於勸矣，夫子取之，何也？曰：仲尼謂「《詩》三百，一言以蔽之，思無邪。」詩人以無邪之思作之，學者亦以無邪之思觀之，閔惜懲創之意，隱然自見於言外矣。或曰：《樂記》所謂「桑間濮上之音」，安知非卽此篇乎？曰：《詩》、雅樂也，祭祀朝聘之所用也。「桑間濮上之音」，鄭、衛之樂也，世俗之所用也。雅、鄭不同

部，其來尚矣。甯有編鄭、衛樂曲於雅音中之理乎？《桑中》、《溱洧》諸篇，作於周道之衰，其聲雖已降於煩促，而猶止於中聲。荀卿獨能知之。仲尼錄之，所以謹世變之始也。借使仲尼之前，雅、鄭果嘗龐雜，自衛反魯正樂之時，所當正者，無大於此矣。《論語》答顏子之問，乃孔子治天下之大綱也。於鄭聲亟欲放之，豈有刪詩示萬世，反收鄭聲以備六藝乎？

案：《溱洧》乃刺淫之作，《桑中》實無題之詩。凡皆所以諷世云耳，非淫奔者比也。蓋鄭、衛之風誠淫，鄭、衛之詩則非淫，何也？夫使鄭風不淫，則《溱洧》無所刺；衛風不淫，則《桑中》何所諷？且《新臺》、《靜女》諸詩，非衛淫風之實迹乎？要知其風雖淫，而所收之詩則皆刺淫作，非淫奔詞，不可以不辯也。不然，夫子論樂必曰「放鄭聲」，豈有正樂時又反收淫詞乎？蓋放者，放其聲之淫者耳，非盡鄭聲而悉放之也。使盡鄭聲而悉放之，則《緇衣》好賢，《風雨》懷友諸詩，均在所刪之列，何以尚存焉？此亦明顯易見之事，不知後儒何以嘵嘵不已如是。呂氏雖稍見及於此，而不能明白剖決，止引荀卿中聲之說以證之，則仍是狐疑不定，未有以得乎中也。故又啟朱晦翁反覆辯論，而愈堅其一定不移之心。此葩經一大厄時也，豈不恨哉！

朱子曰：孔子之稱「思無邪」也，以爲《詩》三百篇，勸善懲惡，其要歸無不出於正，非以作詩之人所思皆無邪也。今必曰彼以無邪之思，鋪陳淫亂之事，而閔惜懲創之意自見於言外，



則曷若曰彼雖以有邪之思作之，而我以無邪之思讀之，則彼之自狀其醜者，乃所以爲吾警懼懲創之資邪？若夫《雅》、《鄭》若干篇，自衛反魯以來，未之有改。至於《桑中》、《小序》之文與《樂記》合，則是詩之爲「桑間」不爲無據。今必曰三百篇皆雅，則邪正錯糅，非復孔子之舊矣。夫《二南》正風，房中之樂也，鄉樂也；《二雅》之正，朝廷之樂也；商、周之《頌》，宗廟之樂也。見於序義，傳記皆有可考。至於變雅，則固已無施於事，而變風，又特里巷之歌謠，其領在樂官者，以爲可以識時變，觀土風耳。今必曰三百篇皆祭祀朝聘之所用，則未知《桑中》、《溱洧》之屬，當以薦何等之鬼神，接何等之賓客耶？古者太師陳詩以觀民風，固不問美惡而悉存以訓也。然其與先王《雅》、《頌》之正，施用亦異，則固不嫌於龐雜矣。今於《雅》、《鄭》之實察之，既不詳於龐雜之名，畏之又太甚，顧乃文以風刺之美說，強而置諸《雅》、《頌》之列，是乃反爲龐雜之甚而不自知也。其以二詩爲猶止於中聲者，太史公所謂孔子皆弦歌之，以求合於《韶》、《武》之音，其誤蓋亦如此。然古樂既亡，無所考正，吾獨以其理與詞推之，有以知其必不然耳。又以爲近於勸一諷百，而止乎禮義，則又信《大序》之過者。夫《子虛》、《上林》猶有所謂諷也。《漢廣》知不可而不求，《太車》有所謂而不敢，猶有所謂禮義之止也。若《桑中》、《溱洧》，則吾不知其何詞之諷，而何禮義之止乎？

案：晦翁此論，不唯誤讀「鄭聲淫」一語，且「溱洧」、「桑中」二詩亦並未嘗細咏其詞。「溱洧」之詞曰「惟士與女」，則是非爲己而言也。「桑中」一時而期三人於三地，又豈一人所能爲哉？二詩明，則其他所謂淫奔之詞者，亦無不明矣。且夫子所以必標「無邪」一語爲訓者，正恐其詞之鄰於淫，人或誤認爲淫而淫之，則未免啟人以淫邪之思耳。乃晦翁竟錯會聖旨，致啟說《詩》門戶數百年之爭，則豈夫子所能逆計哉？

朱子又曰：《小序》大無義理，是後人湊合而成，多就詩中採摭言語，不能發明大旨。見有「漢之廣矣」之句，以爲「德廣所及」，見有「命彼後車」之言，以爲「不能飲食教載」。《行葦》之《序》，見「牛羊勿踐」，謂「仁及草木」；見「戚戚兄弟」，謂「親睦九族」；見「黃耆台背」，謂「養老」；見「以祈黃耆」，謂「乞言」；見「介爾景福」，謂「成其福祿」。隨文生義，無復倫理。《卷耳》之《序》，以「求賢審官，知臣下之勤勞」爲「后妃之志」，固不倫矣；況詩中所謂「嗟我懷人」，其言親暱太甚，寧后妃所得施於使臣者哉？《桃夭》之詩，謂「婚姻以時，國無鰥民」爲「后妃所致」，不知文王刑家及國，其化固如此，豈專后妃所能致邪？其他變風諸詩，未必是刺者，皆以爲刺；未必是言此人，必傳會以爲此人。《桑中》之詩，止是淫者相戲之詞，豈有刺人之惡，反自陷於流蕩之中？《子衿》詞意輕儇，豈刺學校之詞？《有女同車》等，皆以爲刺忽而作。鄭忽不娶齊女，亦是好的意思。見後來失國，便將許多詩盡爲「刺忽」而

作。考之於忽，所謂淫暴之類，皆無其實。至目爲「狡童」，豈詩人愛君之意？況其失國，正坐柔懦，何狡之有？幽、厲之刺，亦有不然。《甫田》諸篇，凡詩中無詆譏之意者，皆以爲傷今思古而作。其他謬誤，不可勝說。後世但見《詩序》冠於篇首，不敢議其非，至解說不通，多爲飾辭以曲護之。其誤後學多矣。《大序》却好，或謂補湊而成，亦有此理。

案：《小序》之謬，誠如公論。但詩傳之謬，又有甚乎序者，則何以故？此篇本不欲錄，以關序傳得失，著爭始也，故存之。以見葩經不幸，遇此二家，遂成聚訟，豈偶然哉？

朱子又曰：大率古人作詩，其間亦自有感物道情，吟咏情性，幾時盡是譏刺他人？只緣序者立例，篇篇作美刺說，將詩人意思盡穿鑿壞了。

案：詩本吟咏性情，不盡譏刺他人，是公所知。然詩多寄託男女，不盡描寫己事，又非公之所識。以故《鄭風》篇篇指爲淫詞，不更將詩人意思盡情說壞耶？

《集傳序》曰：本之《二南》以求其端，參之列國以盡其變，正之於《雅》以大其規，和之於《頌》以要其止，此學《詩》之大旨也。於是乎章句以綱之，訓詁以紀之，諷詠以昌之，涵濡以體之。察之情性隱微之間，審之言行樞機之始，則脩身及家，平均天下之道，其亦不待他求而得之於此矣。

案：學《詩》規模大要不出此數語，且有與夫子面牆之訓互相發明者，因亟錄之，以爲《詩》教準。

馬氏端臨曰：《詩》、《書》之《序》，自史傳不能明其爲何人所作，先儒多疑之。至朱文公之解經，於《詩》、《國風》諸篇之《序》，詆斥尤多。以愚觀之，《雅》、《頌》之《序》可廢，而十五《國風》之《序》不可廢也。《雅》、《頌》之作，其意易明，則《序》之辭可畧。至於《風》之爲體，比興之詞多於序述，風喻之意浮於指斥，有聯章累句而無一言序作之之意者。而序者乃曰爲其事也。苟非其傳授有源，孰能臆料當時指意之所歸乎？夫《采芣苢》之《序》，以爲「后妃之美也」，而其詩旨，不過形容采撷芣苢之情狀而已。《黍離》之《序》，以爲「閔周室之顛覆也」，而其詩語，不過慨歎禾黍之苗穗而已。《叔于田》之二詩，《序》以爲「刺莊公也」，而其詩語則愛叔段之辭耳。《揚之水》、《椒聊》二詩，《序》以爲「刺晉昭公也」，而其詩語則愛桓叔之辭耳。此詩之賴《序》以明者也。《鶉羽》、《陟岵》之詩，《序》以爲「征役者不堪命」而作也，《四牡》、《采薇》之詩，序以爲「勞使臣」、「遣戍役」而作也。四詩之旨，辭同意異，若捨《序》以求之，則文王之臣民亦怨其上，而《四牡》、《采薇》不得爲正雅矣。卽是觀之，則《桑中》、《溱洧》何嫌其爲刺奔？而必以爲奔者所自作，使聖經爲錄淫辭之具乎？且詩之可刪，孰有大於淫者？今以《詩傳》考之，其指爲男女淫佚奔誘，而自作詩以序其事者，凡二十有四。淫詩之繁多如此，夫子猶存之，則不知所刪何等一篇也？又以爲《序》者之意，必以爲《詩》無一篇不爲刺時而作，有害於溫柔敦厚之教。愚謂欲使其避諷諷之名，而自

處於淫譴之地，則夫身爲淫亂，而復自作詩以贊之，反得爲溫柔敦厚乎？或曰：《春秋》所記，無非亂臣賊子之事，不如是，無以見當時事變之實而垂鑒於後世，故不得已而存之。愚以爲史以記事，有治不能無亂，固不容錄文、武而棄幽、厲也。至於文辭，則其淫哇不經者，直爲削之而已。而夫子猶存之，則必其意不出於此，而《序》者之說是也。或曰：《序》求詩意於辭之外，文公求詩意於辭之內，子何以定其是非乎？曰：知詩人之意者莫如孔、孟，慮學者讀《詩》而不得其意者，亦莫如孔、孟。是以有「無邪」之訓焉，則以其辭之不能不鄰乎邪也。使篇篇如《文王》、《大明》，則奚邪之可閑乎？是以有「害意」之戒焉，則以其辭之不能不戾其意也。使章章如《清廟》、《臣工》，則奚意之難明乎？以是觀之，則知刺奔果出於作詩者之本意，而夫子所不刪者，決非淫佚之人所自賦也。如《木瓜》、《采芣》、《遵大路》、《風雨》、《褰裳》、《子衿》、《揚之水》諸篇，雖疑其辭欠莊重，然首尾無一字及婦人，而謂之淫邪可乎？或又曰：《二南》、《雅》、《頌》，祭祀朝聘之所用也，鄭、衛、桑、濮，里巷狹邪之所作也。夫子於鄭、衛，蓋深絕其聲於樂以爲法。今欲諱其鄭、衛、桑、濮之實，而文以雅樂之名，將薦之於何等之鬼神，用之於何等之賓客乎？愚以爲《左傳》言季札來聘，請觀周樂，而所歌者——《邶》、《鄘》、《衛》、《鄭》皆在焉，則諸詩固雅樂矣。使其爲里巷狹邪所用，則周樂安得有之？而魯之樂工亦安能歌異國之淫邪詩乎？至於古人歌詩合樂之意，

蓋有不可曉者。夫《關雎》、《鵲巢》、后妃夫人之詩也，而鄉飲酒燕禮歌之。《采蘋》、《采芣》、夫人大夫妻主祭之詩也，而射禮歌之。《肆夏》、《繁遏》、《渠》、宗廟配天之詩也，而天子享元侯歌之。《文王》、《大明》、《緜》、文王興周之詩也，而兩君相見歌之。以是觀之，其歌詩之用，與作詩之意，蓋有判然不相合，不可強通也。《左傳》載列國聘享賦詩，固多斷章取義。然其大不倫者，亦以來譏誚。如鄭伯有賦《鶉之奔奔》、楚令尹子圍賦《大明》及穆叔不拜《肆夏》、寧武子不拜《彤弓》之類是也。然鄭伯如晉，子展賦《將仲子》，鄭伯享趙孟子，太叔賦《野有蔓草》，鄭六卿餞韓宣子，子鱣賦《野有蔓草》，子太叔賦《褰裳》，子游賦《風雨》，子旗賦《有女同車》，子柳賦《籟兮》，此六詩皆文公所斥以爲淫奔之人所作也，然所賦皆見善於叔向、趙武、韓起，不聞被譏。乃知《鄭》、《衛》之詩，未嘗不施之燕享，而此六詩之旨意訓詁，當如《序》者之說也。

案：此駁《集傳》，可謂痛切言之矣。然其回護《序》者，則亦未能分別得失所在，又安足以服文公心哉？要之，《集傳》固失，古《序》亦未嘗不失。欲直此而曲彼，不若兩平視之，舍却《序》、《傳》，直探古人作詩本旨，庶有以得其真耳。

章氏潢曰：六義先風，而風之義何居？《大序》、《集傳》所言二說原文節去不錄，皆是也，然未盡其義也。蓋風乃天地陰陽之鼓動，萬彙無所不被，無所不入。而各國之風土不齊，則各國

之風氣不一，故各國之風化因之。善者矯其偏而歸之中，不善者循其流習而莫之返也。《記》曰：「鄭聲好濫淫志，衛音促數煩志，齊音傲僻驕志。」是列國之音亦不同。天子巡狩列國，太史陳詩以觀民風者，此也。但列國之風化不齊，聲氣不類，而禮則一焉。是故，風之體輕揚和婉，微諷諷諫，託物而不著于物，指事而不滯于事。義雖寓于音律之間，意嘗超于言詞之表。雖使人興起，而人不自覺。如「參差荇菜」與「樛木」，《蟋斯》之三疊，如「已焉哉，天實爲之，謂之何哉」，「母也天只，不諒人只」，重複咏之，如《麟趾》三章，止更易子、姓、族數字，而咏嘆不已，皆風之類也。若夫《碩人》一篇，正是稱美衛莊姜，中間止點出「衛侯之妻」一句，而不見答，于衛莊公全不說出，《猗嗟》一篇，全是稱美魯莊公，中間止點出「展我甥兮」一句，而不能防閑其母，亦不說出，美中含刺之意却在言外。風之體，率類此。

又曰：《詩》之在《二南》者，渾融含蓄，委婉舒徐。本之以平易之心，出之以溫柔之氣。如南風之觸物，而物皆暢茂。凡人之聽其言者，不覺其人之深而咸化育于其中也。

案：此論風體，精微入妙。近世說《詩》，罕與倫匹。而形容《二南》氣象，尤爲深至。唯以南字取義爲南風之南，爲未當。故節錄其辭，而不取命名之義。

又曰：雅之義云何？《大序》曰：「雅者，正也。言王政之所由興廢也。政有大小，故有小雅

焉，有大雅焉。」程子曰：「雅者，陳其正理。如『天生烝民，有物有則。民之秉彝，好是懿德』是也。」朱子曰：「小雅，燕饗之樂也；大雅，朝會之樂，受釐陳戒之詞也。」論雅之義備是也。然以政之小大，燕饗朝會分屬，其亦未識小、大雅之體乎？彼《鹿鳴》、《天保》，君臣上下之交孚，《棠棣》、《伐木》、《蓼莪》、《白華》，乃父子、兄弟、夫婦、朋友之恩義，倫孰有大于斯者乎？《湛露》、《彤弓》之燕饗，《采芣》、《出車》之兵戎，《楚茨》、《信南山》之田事，政孰有大于斯者乎？謂小雅爲政之小與燕饗之樂，果足以該小雅否也？《鳧鷖》、《既醉》之燕禮，未必大于《魚麗》、《嘉魚》、《江漢》、《常武》之征伐，未必大于《六月》、《采芣》，安見其爲政之大乎？又安見其爲朝會受釐陳戒與小雅異也？不知雅體較之于風，則整肅而顯明，較之于頌，則昌大而暢達。惟彝倫政事之間，尚有諷諭之意，皆小雅之體也；天人應感之際，一皆性命道德之精，皆大雅之體也。其中或近于風與頌者，則又爲小、大雅之變體也。小雅未嘗無朝會，大雅未嘗無燕饗。小、大雅之正變無所與于時世之盛衰，要在辨其體，而小、大雅正變之義，俱不待言矣。

案：大、小雅正變之分，固因體異，而體之所以異，亦往往由時世升降之故。故論正變不兼時世言，義不備，專以時世言，理未周。若以政之大小爲雅之大小，則陋說也，何足以爲訓！

又曰：頌之義云何？《大序》曰：「頌者，美盛德之形容，以其成功告于神明者也。」呂氏曰：



「頌者，美之詞也，無所諷議。」果足以盡頌之義乎？未也。蓋頌有頌之體，其詞則簡，其義味則雋永而不盡也。如《天作》與《雅》之《綿》，均之美太王也；《清廟》、《維天之命》與《雅》之《文王》，均之美文王也；《酌》、《桓》與《雅》之《下武》，均之美武王也。試取而同誦之，同乎？否乎？蓋雅之詞俱昌大，在頌何其約而盡也！頌之體于是乎可識矣。《敬之》、《小毖》雖非告成功，而謂之爲雅可乎哉？《魯》之《有駜》、《泮水》則近乎風，《閟宮》與《商》之伍篇則皆近乎雅，而其體則頌也，故謂爲變頌也亦宜。

案：頌有變體，可謂創論，亦實確論也。然而篇中所舉，未盡其義也。蓋《閟宮》予小子似祝詞，《訪落》、《敬之》、《小毖》似箴銘，《閟宮》不唯似大雅，且開漢賦褒揚先聲。凡此皆頌之變焉者也。若《商頌》伍篇，則頌之源耳。雖非告成功，實祭祀樂，安得謂之爲變耶？

又曰：《詩》，聲教也。言之不足，故長言之。性情心術之微，悉寓于聲歌咏歎之表。言若有限，意則無窮也。讀《詩》者先自和衷其性情，于以仰窺其志，從容吟哦，優游諷詠，玩而味之，久當自得之也。蓋其中間，有言近而指遠者，亦有言隱而指近者。總不可以迫狹心神索之，不可以道理格局拘之也。噫！賜、商可與言《詩》，其成法具在也。否則，「誦《詩》三百，雖多，亦奚以爲？」

案：讀《詩》不可以迫狹心神索之，是諸儒之所知；讀《詩》不可以道理格局拘之，非諸儒所能識。而

宋儒則尤甚動輒以道理論詩旨，烏能有合詩人意旨乎？

又曰：《風》首《關雎》，而夫婦之倫正；《小雅》首《鹿鳴》，而君臣之情通；《大雅》首《文王》，而天人之道著；《頌》首《清廟》，而幽明之感孚。

案：此四始之義，亦諸儒所未道。

又曰：鳶魚飛躍，自後世詩家觀之，不過點綴景物之詞爾。惟子思子一發明之，昭明有融，觸處皆道。乃知於昭陟降，即鳶魚飛躍之真機也。果能小心昭事，不愧屋漏，而夙夜之匪懈焉，則自求多福之道即于此乎在，而矢音遂歌，亦莫非大雅之音矣。孰謂大雅終不可作乎？

案：說《詩》當觸處旁通，不可泥於句下；解《詩》必循文會意，乃可得其環中。此自兩道，非可例言。章氏說《詩》，多主言外意，而欲解《詩》者，亦悉如之，其可得耶？茲特摘其一義之善者錄之，而其餘可想知矣。又其論大雅體，多以天人奧蘊為言。夫天人奧蘊，大雅固多發之，然《洞酌》、《卷阿》與《民勞》諸詩，非唯有類小雅，而且類乎變小雅矣。竊意風、雅正變，固由人事政績以分大小正變，而其原，實由音節以辨體裁，由體裁而分風、雅、頌以及雅之大小與詩之正變焉。蓋《詩》之為教，聲教也。風、雅、頌雖分三體，而一氣元音實相貫注，由風而雅，由雅而頌，自有一段自然節奏不可紊亂。如十二律之次第相生，實一氣之鼓盪其間也。觀夫子正樂，不過曰「《雅》、《頌》各得其所」，則其義亦可

知已。

又曰：孟子云「王者之迹熄而《詩》亡」，即《詩序》「先王以是厚人倫，美教化，移風俗」之謂也。凡詩人之咏歌，非質言其事也，每託物表志，感物起興。雖假目前之景，以發其悲喜之情，而寓意淵微，有非恆情所能億度之者。況其言雖直，而意則婉，亦有婉言中而意則直也，或其言若微，而意則顯，亦有顯言中而意甚微者。故美言若黷，怨言若慕，諷言若謏，諷言若譽。要之，一出於性情之正。故孔子謂其可興、可羣、可怨，可以事父、事君，可以從政、專對，莫非綱常倫理所關係也。自《三百》後，求詩之可存王迹，厚人倫者誰歟？

又曰：誦《詩》、讀《書》當論其世，或時所難言，或勢不敢言，每借虛以爲實，託此以形彼。而說《詩》者不悟其意，本婉言也，反直言之；本託言也，反質言之；本微言也，反顯言之。中間凡託爲婦人女子之辭者，即信爲實言，而假游女靜女爲比喻者，又皆指爲淫詞，使作者之志意咸晦塞而不達矣。蓋惟不能以意逆志，故不免逐響尋聲，而詩人之旨無復存也。又安望如商、賜告往知來，以起予哉？

案：前條見詩人立言多寄託微婉，故足以感人於無形；後條見後人說《詩》多膠滯鮮通，詎能得會心於言外。學者不可不反覆以參觀也。

顧氏炎武曰：孔子刪《詩》，所以存列國之風也。有善有不善，兼而存之。猶古之太師陳詩

以觀民風，而季札聽之以知其國之興衰，正以二者之並陳，故可以觀，可以聽。世非二帝，時非上古，固不能使四方之風有貞而無淫，有治而無亂也。文王之化被於南國，而北鄙殺伐之聲，文王不能化也。使其詩尚存，而人夫子之刪，必將存南音以繫文王之風，存北音以繫紂之風，而不容於沒一也。是以《桑中》之篇，《溱洧》之作，夫子不刪，志淫風也。《叔于田》爲譽段之辭，《揚之水》、《椒聊》爲從沃之語，夫子不刪，著亂本也。淫奔之詩錄之不一而止者，所以志其風之甚也。一國皆淫，而中有不變者焉，則亟錄之。《將仲子》畏人言也，《女曰雞鳴》相警以勤生也，《出其東門》不慕乎色也，《衡門》不願外也。選其辭，比其音，去其煩且濫者，此夫子之所謂刪也。後之拘儒不達此旨，乃謂淫奔之作不當錄於聖人之經，是何異唐太子弘謂商臣弑君不當載於《春秋》之《傳》乎？《舊唐書·高宗諸子傳》：《黃氏日鈔》云：《國風》之用於燕享者，唯《二南》。而列國之風，未嘗被之樂也。夫子之所言正者，雅、頌，而未及乎《風》也。《桑中》之詩，明言淫奔，東萊呂氏乃爲之諱，而指爲雅音，失之矣。真希元《文章正宗》，其所選詩，一掃千古之陋，歸之正旨。然病其以理爲宗，不得詩人之趣。且如《古詩十九首》，雖非一人之作，而漢代之風，略具乎此。今以希元之所刪者讀之，「不如飲美酒，被服紕與素」，何以異乎《唐詩·山有樞》之篇？「良人惟古歡，柱駕惠前綏」，蓋亦《邶詩》「雄雉于飛」之義。「牽牛織女」，意昉《大東》，「兔絲女蘿」，情同《車牽》。十九作無甚優劣，必以坊淫正俗之旨嚴爲繩

削，雖矯昭明之枉，恐失《國風》之義。六代浮華，固當芟落，使徐、庾不得爲人，陳、隋不得爲代，無乃太甚，豈非執理之過乎？

案：愚少時讀《詩》，亦嘗爲是論。及後細繹《鄭》、《衛》諸詩，並無所謂淫奔之作，乃敢舍朱傳而別尋詩旨。蓋刪《詩》與陳詩不同，陳詩無妨貞淫並見，乃可觀一國之風尚，刪《詩》則將以垂訓萬世，豈可邪正兼收？縱云不沒其實，亦不過採一二有關風化作，如《秦風》之刺淫，《將仲子》之畏人言，及《桑中》之諷世，以見一國風俗向來如是足已。何必定採淫奔者所自作之詩以著之經，然後謂之可以觀，可以聽哉？且編《詩》又與脩史不同。史以紀事，有治不能無亂，固不容錄文、武而棄幽、厲。《詩》則將以厚人倫，美教化，移風俗也，曾是淫哇並著，而可以移風俗，美教化，厚人倫乎？必不然之事矣。若謂《國風》不入樂，則季札請觀周樂，何以爲之歌？《邶》、《鄘》、《衛》、《王》，爲之歌？《鄭》，爲之歌？《齊》，爲之歌？《豳》，爲之歌？《秦》，爲之歌？《魏》，爲之歌？《唐》，爲之歌？《陳》，自《鄘》以下，雖無譏而亦爲之歌耶？不寧惟是，鄭伯如晉，子展賦《將仲子》；鄭伯享趙孟子，太叔賦《野有蔓草》；鄭六卿餞韓宣子，子韙賦《野有蔓草》；子太叔賦《蓺裳》；子游賦《風雨》；子旗賦《有女同車》；子柳賦《籊籊》，使不人樂，何以施之燕享？黃氏之言，詎可引以爲證？又況正樂與刪《詩》亦微有異。夫子正樂，舉《雅》、《頌》而不以《風》，此或《雅》、《頌》有失而《國風》無缺，或舉其大而細者可該。不然，則《二南》固黃氏之所謂入樂者也，何以不與《雅》、《頌》而並舉之耶？顧氏通儒，亦爲前人所囿如此！總之，讀書未有心得，全憑考據以爲是非，而又不肯四面旁觀，共證得失，故有此弊。

姚氏際恆《詩經通論序》略曰：自東漢衛宏始出《詩序》，首唯一語，本之師傳。大抵以簡略示古，以渾淪見該。雖不無一二婉合，而固滯膠結，寬泛填湊，諸弊叢集。其下宏所自撰，尤極踳駁，皆不待識者而知其非古矣。自宋晁說之、程泰之、鄭漁仲皆起而排之，而朱仲晦亦承焉，作爲《辨說》，力詆《序》之妄，由是自爲《集傳》，得以肆然行其說。而時復陽違《序》而陰從之，而且違其所是，從其所非焉。武斷自用，尤足惑世。因歎前之遵序者，《集傳》出而盡反之以遵《集傳》，後之駁《集傳》者，又盡反之而仍遵序。更端相循，靡有止極。窮經之士，將安適從哉？予嘗論之，《詩》解行世者，有序，有傳，有箋，有疏，有《集傳》，特爲致多，初學茫然，罔知專一。予以爲傳、箋可略，今日折中是非者，惟在序與《集傳》而已。《毛傳》古矣，惟事訓詁，與《爾雅》略同，無關經旨，雖有得失，可備觀而弗論。鄭箋鹵莽滅裂，世多不從，又無論已。唯序則昧者尊之，以爲子夏作也；《集傳》則今世宗之，奉爲繩尺也。予謂漢人之失在于固，宋人之失在于妄，固之失僅以類夫高叟，妄之失且爲咸丘蒙以《北山》四言爲天子臣父之證矣。間觀《周頌·潛》之序曰：「季冬薦魚，春獻鮪。」本不韋《月令》，明爲漢人所作，奈何玷我西河！世人固可曉然分別觀之，無事凜遵矣。《集傳》紕繆不少，其大者尤在誤讀夫子「鄭聲淫」一語，妄以《鄭詩》爲淫，且及于衛，且及于他國。是使《三百篇》爲訓淫之書，吾夫子爲導淫之人，此舉世之所切齒而歎恨者。予謂若止目爲

淫詩亦已耳，其流之弊，必將併《詩》而廢之。王柏之言曰：「今世三百五篇豈盡定于夫子之手？所刪之詩，容或存于閭巷游蕩之口，漢儒取以補亡耳。」于是以爲失次，多所移易，復黜《召南·野有死麕》及《鄭·衛風》、《集傳》所目爲淫奔者。其說儼載于《宋史·儒林傳》。明程敏政、王守仁、茅坤輩和之。嗟乎，以遵《集傳》之故而至于廢經，《集傳》本以釋經而使人至于廢經，其始念亦不及此，爲禍之烈，何致若是！安知後之人不又有起而踵其事者乎？此予所以切切然抱杞宋憂也。夫季札觀樂，與今《詩》次序同，而《左傳》列國大夫所賦《詩》，多《集傳》目爲淫奔者，乃以爲失次，及漢摠入，同于目不識丁，他何言哉！我嘗緬思，如經傳所言可爲《詩》序者，而不能悉得，渺無畔岸，蠡之測海，其與幾何！又見明人說詩之失在于鑿，於是欲出臆論，則仍鄰鑿空，欲喜新譚，終涉附會，斂手縮筆，未敢昌言。惟是涵泳篇章，尋繹文義，辨別前說，以從其是而黜其非，庶使詩意不致大歧，埋沒于若固、若妄、若鑿之中。其不可詳者，寧爲未定之辭，務守闕疑之訓。俾原詩之真面目悉存，猶愈于漫加粉蠹，遺誤後世而已。若夫經之正旨篇題固未能有以逆知也。

案：自來說《詩》諸儒，攻《序》者必宗朱，攻朱者必從《序》，非不知其兩有所失也，蓋不能獨抒己見，即不得不借人以爲依歸耳。姚氏起而兩排之，可謂膽識俱優。獨惜其所見未真，往往發其端不能竟其委，追思意窮盡，無可說時，則又故爲高論以欺世，而文其短。是其於詩人本義，固未有所發明，亦由

於胸中智慧有餘而義理不足故也。然在當時，則固豪傑士矣。若篇中所云，以遵人集傳，故而至於廢經，則真庸妄流，豈可同日並語哉！



# 詩經原始卷之一

## 國風一

《詩》體有三，曰風，曰雅，曰頌。而風獨居首者，《集傳》云，風者，民俗歌謠之詩也。謂之風者，以其被上之化以有言，而其言又足以感人，如物因風之動以有聲，而其聲又足以動物也。故凡歌謠之體，皆風體也。章氏潢曰：天地噓育萬物，莫疾乎風，所以節宣陰陽之氣，而萬物之生機賴之以宣暢也。然吹萬不同一，皆隨其竅之所感，而聲亦因以異焉。是本之氣而形之聲，氣和則聲徐，氣勁則聲肅，和則物觸之欣欣向榮，勁則物觸之而撓折者多矣。此又各國之風尚不同，而詩之音節亦異焉。古帝王知其然，故巡狩列國，令太史陳詩以觀民風。可以知政治之得失，而考俗尚之美惡者，莫若乎風。於是採其善者，列於樂官，以時存肄，資觀感而垂聲教，用至廣也。然則國何以僅十有五？司馬遷謂古詩三千，夫子刪之，存三百餘篇。是刪者多而存者少。詩存則國存，詩刪則國亦不得不刪也。何容心哉！舊說又以《二南》爲正風，十三國爲變風者，亦非。風之正變，不係乎此也。《二南》固風之正，十三國中亦未嘗無正風，蓋正變以體異，不以國異，以聲異，不以時異。然體亦有以國異，聲亦有以時異者，是在乎善讀《詩》者反覆涵泳而自有得於心焉。

## 周南

周，地名，在禹貢雍州岐山之陽。周，大王始居之，故國號曰周。至武王有天下，又分其地以爲弟且采邑，故且亦曰周公。而此時之周，則周初地名，與且無涉也。凡其時所採民間歌謠，得自周地者，均繫之曰周。然而十三國皆曰風，周與召獨曰南者，何也？古序云：「南，言化自北而南也。」集傳因之。章氏潢則以南爲樂名，而取證於「以雅以南」之詩及記「胥鼓南」。又謂八方南爲正，八風南爲和，舜之解慍曰「薰風」，詩之正風故曰南。此皆影響臆測之見，非當時命名本意也。竊謂南者，周以南之地也。大畧所採詩皆周南詩多，故命之曰周南。何以知其然耶？周之西爲犬戎，北爲幽，東則列國，唯南最廣，而及乎江、漢之間。其地又多文明象，且親被文王風化，故其爲詩也，融渾含蓄，多中正和平之音，不獨與他國異，即古幽樸茂淳質之風，亦不能與之並廣而迭和。又況幽與各國，各成風氣，各存音節，尤不可以相混。此周以南之詩獨爲正風也。聖人取之，以爲房中樂，以其言皆夫婦昏姻、男女子息之謠，故被諸箏絃，可以用之鄉人，用之邦國焉。世之欲正人倫而敦風化者，舍二南其奚擇哉？若舊說云，關雎、麟趾之化，王者之風，故繫之周公。鵲巢、騶虞之德，諸侯之風也，先王之所以教，故繫之召公。吾不知王者、諸侯之風何所分？周、召之繫何所屬？且其時文王亦諸侯也，安見其爲「王者風」乎？關雎以前，周公猶未生；甘棠而後，召公則已死。以二南分屬二公，

其屬之生前乎，抑屬之死後乎？此等陋說，陳陳相因。朱傳不能正，又從而和之，無怪其來姚氏之譏，以爲尊序莫如朱矣。夫天地元音，原有其會。文王雖有聖德，非運際翔洽，亦不能使里巷歌謠涵元氣而譜正聲，洋洋如是之盛也。故詩至二南，詩之盛極，千載下無能爲繼，此豈特房中樂哉！

### 關雎 樂得淑女以配君子也。

關關雎鳩，在河之洲。興起却兼比意。窈窕淑女，君子好逑。承明正意，仍是總冒。○一章參差荇菜，興而比，下同。左右流之。左右流之。窈窕淑女，寤寐求之。二章求之不得，根上「求」字，忽生出「不得」一層，文心乃曲。寤寐思服。悠哉悠哉，輾轉反側。三章參差荇菜，左右采之。窈窕淑女，琴瑟友之。以下皆言既得情景，而用字自有淺深不同處。○四章參差荇菜，左右芼之。窈窕淑女，鐘鼓樂之。五章

右「關雎」五章，章四句。姚氏際恒曰：從鄭氏，今仍之。「小序」以爲「后妃之德」，「集傳」又謂「官人之咏大姒、文王」，皆無確證。詩中亦無一語及宮闈，況文王、大姒耶？竊謂風者，皆採自民間者也，若君妃，則以頌體爲宜。此詩蓋周邑之咏初昏者，故以爲房中樂，用之鄉人，用之邦國，而無不宜焉。然非文王、大姒之德之盛，有以化民成俗，使之咸歸於正，則民間歌謠亦何從得此中正和平之音也耶？聖人取之，以冠三百篇首，非獨以其爲夫婦之始，可以風天下而厚人倫也，蓋將見周家發祥之兆，未嘗不

自宮闈始耳。故讀是詩者，以爲咏文王、大姒也可，即以爲文王、大姒之德化及民，而因以成此翔洽之風也，亦無不可，又何必定考其爲誰氏作歟？

【眉評】（一章）此詩佳處全在首四句，多少和平中正之音，細咏自見。取冠三百，真絕唱也。（三章）忽轉繁絃促音，通篇精神扼要在此。不然，前後皆平沓矣。（四、五章）「友」字「樂」字，一層深一層。快足滿意而又不涉於侈靡，所謂樂而不淫也。

【附錄】姚氏際恒曰：「小序」謂「后妃之德」，「大序」曰「樂得淑女以配君子，憂在進賢，不淫其色。哀窈窕，思賢才，而無傷善之心焉」，因「德」字衍爲此說，則是以爲后妃自咏，以淑女指妾媵。其不可通者四：雖鳩雌雄和鳴，有夫婦之象，故託以起興。今以妾媵爲與君和鳴，不可通一也。「淑女」、「君子」的的妙對，今以妾媵與君對，不可通二也。「述」、「仇」同，反之爲匹，今以妾媵匹君，不可通三也。《常棣》篇曰：「妻子好和，如鼓瑟琴。」今云「琴瑟友」，正是夫婦之義。若以妾媵爲與君琴瑟友，則僭亂，以后妃爲與妾媵琴瑟友，未聞后與妾媵可以琴瑟喻者，不可通四也。夫婦人不妬則亦已矣，豈有以己之坤位甘遜他人而後謂之不妬乎？此迂而不近情之論也。《集傳》因其不可通，則以爲宮中之人作。夫謂王季之宮人耶？淑女得否何預其哀樂之情！謂文王之宮人耶？諸侯娶妻，姪娣從之，未有未娶而先有妾媵者。前人已多駁之。況「琴瑟友之」，亦非妾媵所敢與后妃言也。並說不去，于是乎僞子貢傳出，以爲姒氏思淑女而作，欲與《集傳》異，而不知仍歸舊說也。要之，自「小序」有「后妃之德」一語，「大序」因而附會爲不妬之說，以致後儒兩說角立，皆有難通，而《關雎》咏淑女、君子相配

合之原旨，竟不知何在矣。此詩只是當時詩人美世子娶妃初昏之作，以見嘉耦之合，初非偶然，爲周家發祥之兆。自此可以正邦國，風天下，不必實指大妣、文王，非若《大明》、《思齊》等篇實有文王、大妣名也。案：此說駁《序》、《傳》可謂詳且明矣，及其自詮詩旨，則仍不離世子娶妃之說。夫世子爲誰？妃又爲誰？周宮中之「淑女」、「君子」，孰有如大妣、文王者？是欲駁正前說，而仍不能脫前人窠臼，故備錄之，以見古今說詩之難得通論也如此。

【集釋】「關關」關關，雌雄相應聲。或云彼此相關，是聲中見意，亦通。「雝雝」《集傳》：雝雝，水鳥，一名王雝，狀類鳬鷖，今江、淮間有之。生有定偶而不相亂，偶常並遊而不相狎，故《毛傳》以爲「摯而有別」，《列女傳》以爲「人未嘗見其乘居而匹處」者，蓋其性然也。姚氏際恒曰：《毛傳》云：「摯而有別。」夫曰「摯」，猶是雝雝食魚，有搏摯之象。然此但釋雝雝之性習，不必於正意有關會也。若云「有別」，則附會矣。孟子述契之教人倫曰「夫婦有別」，此「有別」字所從出，豈必以夫婦字加於雝雝上哉？詩人體物縱精，安能擇一物之有別者以比夫婦，而後人又安知詩人之意果如是耶？《列女傳》因云：「雝雝之鳥，人未嘗見其乘居而匹處也。」尤附會。夫謂之有別，猶云不亂摯之謂耳，非異處之謂也。今云未嘗見其乘居匹處，則非所以比夫婦，亦大乖「關關」之旨矣。歐陽永叔曰：「不取其摯，取其別。」蘇子由曰：「物之摯者不淫。」若然，又不取其別，取其摯也。其無定論如此。大抵皆從傳之「摯而有別」，而舍經之「關關」以爲說也。《集傳》曰：「言其相與和樂而恭敬，亦若雝雝之情摯而有別也。」以「和樂」貼「至」字，以「恭敬」貼「有別」字。按下尚有「求之」與「求之不得」二義，此遽作成婦以後立

論，謂之「和樂恭敬」，且引匡衡疏語，而謂之善說詩，亦老大孟浪矣。此亦因「華而有別」一語展轉失真，以至於此也。案：釋鳩性，只《集傳》「生有定偶而不相亂，偶常並遊而不相狎」二語足已，而又必牽引《毛傳》及《列女傳》，以致姚氏辯論不休，此訓詁家惡習也。本不足錄，然存之，亦足見箋疏之多附會云。《竊窈》《集傳》：「竊窈，幽閑之意。姚氏際恒曰：「竊窈，字從穴，與「窳」「窩」等字同，猶後世言深閨之意，《魯靈光殿賦》云：「旋室便娟以竊窈」，駱賓王詩云：「椒房竊窈連金屋」，元稹詩云：「文牕竊窈紗猶綠」皆是。《毛傳》訓幽閑，幽或有之，閒則於竊窈何見乎？案：竊窈字雖從穴，然與「便娟」等字對用，則仍是閨閣幽靜之意，非竊窈即深閨也。脫却閨閣以釋竊窈固不可，即竟以竊窈爲閨閣亦豈可乎？《淑》善也。《述》匹也。《苕》《集傳》：「苕，接余也。根生水底，莖如銀股，上青下白，葉紫赤，圓徑寸餘，浮在水面。李氏榕曰：「苕菜，是水有之，黃花，葉似蓴，可爲茹。《左右》《集傳》：「或左或右，言無方也。《流》《集傳》：「流，順水之流而取之也。姚氏際恒曰：《毛傳》曰：「后妃有關雎之德，乃能供苕菜，備庶物，以事宗廟也。若然，以苕菜爲共祭祀用，故后妃及之，則是直賦其事，何云興乎？是誤以《采蘋》釋《關雎》矣。自毛爲此說，鄭氏執泥左右字，附會爲妾媵助而求之，以實其大姒求淑女之說。或不從其說者，謂苕菜取喻其柔，又謂喻其潔，皆謬。按苕菜只是承上雌鳩來，亦河洲所有之物，故即所見以起興耳，不必求之過深。《毛傳》云：「流，求也。未聞流之訓求者。且下即言求，上亦不應作流也。《寤寐》求之「下緊接「求之不得」，則此處正以苕菜喻其左右無方，隨水而流，未即得也。《集傳》云：「流，順水之流而取之也。不從流之訓求，是已。《取之》二字，則又添出。案：流即苕

菜之隨水而流，「左右流」，言其左右皆流而無方也，正以起下「求之不得」意。至下章則采而得之，末章則既得而熟薦之。詩人用字自有淺深，次序井然。至後兩「左右」字，不過相承而下，不可過泥。若鄭說以左右爲助義，非唯不得詩之佳處，卽文義亦有所不通。此處求之尚未必得，何遽云「事宗廟」耶？卽毛之訓流爲求，詩下文何不接云「寤寐流之，流之不得」？而又明言「求之」，不用「流」字，則何以故？說詩如此，豈不可笑！愚嘗謂講學家不可言詩，考據家亦不可言詩，卽此亦見一斑。姚氏駁之，當已，唯謂荇菜非取其柔潔，不過承上雖鳩來，以爲河洲所有之物而已，則恐非詩人意也。夫河洲所有之物亦多矣，詩人何獨有取於荇菜耶？且姚氏亦以此爲興而比矣，使非柔且潔，則何比之有？此又好爲以擊古人者之過耳。「服」猶懷也。「輾轉反側」卧不安貌。「芼」熱而薦之也。

【標韻】鳩今韻十一尤洲、遂並同本韻 流尤求同本韻 得今韻十三職服今韻一屋側職叶韻案：屋、職二韻，今雖不通，而

古恒通用。

采今韻十賄友今韻二十五有叶韻案：二韻今亦不通。

芼今韻二十號樂今韻十九效通韻後凡標韻，皆今韻，

做此，不重注。

### 葛覃 因歸寧而敦婦本也。

葛之覃兮，施于中谷，維葉萋萋。黃鳥于飛，集于灌木，其鳴喈喈。○一章葛之覃兮，施于中谷，維葉萋萋。是刈是獲，爲絺爲綌，服之無斁。一篇之主。○二章言告師氏，言告言歸。薄污我私，薄澣我衣。害澣害否，歸寧父母。三章

右《葛覃》三章，章六句。《小序》以爲「后妃之本」，《集傳》遂以爲「后妃所自作」，不知何所證據。以致駁之者云：「后處深宮，安得見葛之延於谷中，以及此原野之間鳥鳴叢木景象乎？」愚謂后縱勤勞，豈必親手「是刈是獲」，后卽節儉，亦不至歸寧尚服澣衣。縱或有之，亦屬矯強，非情之正，豈得爲一國母儀乎？蓋此亦采之民間，與《關雎》同爲房中樂，前咏初昏，此賦歸寧耳。因歸寧而澣衣，因澣衣而念締綌，因締綌而想葛之初生，至于刈獲，以見一物之成亦非易易，而服之者敢有厭心哉？縱至歸寧以見父母，所服私衣，亦不過澣濯舊物而已。可見周家王業，勤儉爲本，以故民間婦道亦觀感成風。聖人取之以次《關雎》，亦欲爲萬世婦德立之範耳。

【眉評】「一章」追敘葛之初生，三句爲一截，唐人多有此體。「二章」治葛既成，以至「服之無斃」，起下「污澣」。「三章」歸寧正面。三「言」字，兩「薄」字，兩「害」字，說得何等從容不迫，的是大家閨範賢媛口吻。

【集釋】《葛》《集傳》：葛，草名，蔓生，可爲締綌者。「覃」延也。「施」移也。「黃鳥」鵲也。陸氏璣曰：黃鵲留也。或謂之黃栗留。幽州人謂之黃鶯，一名倉庚，一名商庚，一名鶯黃，一名楚雀，齊人謂之搏黍。當甚熟時來在桑間，故里語曰：黃栗留，看我麥黃甚熟。不應節趣時之鳥也。「灌木」叢木也。「啾啾」和聲也。「莫莫」茂密也。「刈」斬也。「獲」煮也。「締綌」精曰締，粗曰綌。「敦」厭也。「師」女師也。毛氏萇曰：古者女師教以婦德、婦言、婦容、婦功，祖廟未毀，教於公宮三月，祖廟既毀，教於宗室。「薄」猶少也。污，《集傳》：污，煩擗之以去其污，猶治亂而曰亂也。陸氏德明曰：煩擗，猶撻抄也。



王氏安石曰：治汚曰汙。〔汙〕濯也。〔私衣〕《集傳》：私，燕服也。衣，禮服也。毛氏甚曰：婦人有副裱，盛飾以朝事舅姑，接見於宗廟，進見於君子，其餘則私也。姚氏際恒曰：私，袒服。衣，蒙服，非禮衣。禮衣不可汙也。〔害〕何也。〔歸寧〕歸問父母安也。

【標韻】谷一屋木同本韻二韻隔句叶。蕤八齊咍九佳通韻亦隔句叶。莫七遇濩同本韻。給十一陌黠同本韻。又遇韻，與上莫、濩亦叶。歸五微私四支衣五微通韻。否二十五有。母同本韻。

### 卷耳 念行役而知婦情之篤也。

采采卷耳，不盈頃筐。嗟我懷人，後三章從此生出。寘彼周行。一章 陟彼崔嵬，我馬虺隤。我馬指夫馬。我姑酌彼金罍，此「我」字乃懷人之人自我也。維以不永懷。二章 陟彼高岡，我馬玄黃。呼夫馬曰「我」，親之之詞耳。我姑酌彼兕觥，維以不永傷。三章 陟彼砠矣，我馬瘠矣，我僕痡矣，云何吁矣。四「矣」字，節短音長。虛收有神。○四章

右《卷耳》四章，章四句。《小序》謂「后妃之志」，《大序》以爲「后妃求賢審官」，皆因《左傳》引此詩，謂「楚于是乎能官人」，遂解「周行」爲「周之行列」，毛、鄭依之。歐陽氏始駁之云：「婦人無外事，求賢審官，非后妃責。」其說是矣。然其自解，則以后妃諷君子愛惜人才爲言，仍與舊說無異。姚氏際恒既知其非，而又無辭以解此詩，乃曰「且當依《左傳》，謂文王求賢官人，以其道遠未至，閱其在途勞苦而作」，旋又疑執筐「終近婦人事」，不敢直斷，遂以首章爲比體，此皆左氏誤之也。殊不知古人說《詩》，多

斷章取義，或於言外，別有會心，如夫子論貧富，而子貢悟及切磋；夫子言繪事，而子夏悟及禮後，皆善於說《詩》，爲夫子所許。左氏解此詩，亦言外別有會心耳，豈可執爲證據？況周行可訓行列，執筐終非男子。「求賢審官」是何等事，而乃以婦人執筐爲比耶？惟《集傳》謂「后妃以君子不在而思念之」，下皆「託言登山，以望所懷之人」，差爲得之。然婦人思夫，而陟岡飲酒，攜僕徂望，雖曰言之，亦傷大義，故又爲楊氏用修所駁，曰「原詩人之旨，以后妃思文王之行役而言。陟岡者，文王陟之。玄黃者，文王之馬。嘯者，文王之僕。金罍兕觥，文王酌以消憂也。蓋身在閨門而思在道路，若後世詩詞所謂『計程應說到涼州』意耳」。然仍泥定后妃，則執筐遵路，亦豈后妃事耶？且「維以不永懷」，「維以不永傷」者，聊以自解之辭耳，則「酌彼金罍」二語當屬下。說雖曰「飲酒非婦人事」，然非杜康，無以解憂，不必以辭害意可也。故愚謂此詩當是婦人念夫行役而憫其勞苦之作。聖人編之《葛覃》之後，一以見女工之勤，一以見婦情之篤。同爲房中樂，可以被諸管絃而歌之家庭之際者也。如必以爲託辭，則詩人借夫婦情以寓君臣朋友義也乃可，不必執定后妃以爲言，則求賢官人之意，亦無不可通也。

【眉評】「一章」因采卷耳而動懷入念，故未盈筐而「真彼周行」，已有一往深情之概。「二、三、四章」下三章皆從對面著筆，歷想其勞苦之狀，強自寬而愈不能寬。未乃極意摹寫，有急管繁絃之意。後世杜甫「今夜鄜州月」一首，脫胎於此。

【集釋】「卷耳」毛氏甚曰：「苓耳也。陸氏璣曰：葉青白色，似胡荽，白花，細莖蔓生，可煮爲茹。四月中生

子，如婦人耳中璫，或謂之耳璫，幽州人謂之爵耳。郭氏璞曰：亦名胡泉，江東呼常泉。朱子曰：據「本草」即今蒼耳。「頃」欹也。「筐」竹器。「實」舍也。「周行」大道也。姚氏際恒曰：周行，「左傳」作「周之行列」，毛、鄭依之。嚴氏云：「詩」有三周行，「卷耳」、「鹿鳴」、「大東」也。鄭皆以爲「周之行列」，惟「卷耳」可通。「鹿鳴」示我周行，破示爲實，自不安矣。「大東」行彼周行，又爲發幣于列位，其義尤迂。毛以「卷耳」爲列位，「鹿鳴」爲大道，「大東」無傳，則「周行」二字有兩義：一爲列位，一爲道。而道又「鹿鳴」爲道義之道，「大東」爲道路之道。按，嚴謂周行有二義，一爲列位，一爲道，猶近是。蓋「卷耳」曰實，「鹿鳴」、「大東」曰示，曰行，用字原有別。若謂道，又一爲道義之道，一爲道路之道，則未然。均爲道路也，解見「鹿鳴」。按「荀子·解蔽篇」曰：「頃筐易盈也，卷耳易得也，然而不可以貳周行。」以用心不可疑貳爲言。諸子引經，隨事取義，不可爲据。蘇氏、劉氏並祖述之爲解，非也。又「淮南子」引此，以爲言慕遠世，亦不可用行。案：朱子亦曰「詩」有三周行，此及「大東」皆道路之道，「鹿鳴」乃道義之道，此周行當以大道爲是。「陟」升也。「崔嵬」姚氏際恒曰：崔嵬，「毛傳」云「土山之戴石者」，「爾雅」云「石戴土」，相互異。愚以爲皆不可通。崔嵬字皆不從石，安得謂之「石戴土」？「土戴石」耶？按「說文」：崔，大高也；嵬，高不平也，只言其高，于義爲當。「虺隤」許氏慎曰：隤，下隊也。「壘」酒器，刻爲雲雷之象，以黃金飾之。「兕觥」以兕觥爲爵也。「阻」集傳曰：石戴土曰阻。「瘡」馬病不能進也。「痛」人病不能行也。

【標韻】筐七賜人十一真行陽通韻 嵬十灰隤、壘、懷並同本韻 岡陽黃同觥八庚傷陽通韻 阻、七虞瘡、痛、吁

並同本韻案：此詩除首句外，句句用韻，又一體也。

### 樛木 祝所天也。

南有樛木，葛藟荒之。比樂只君子，福履綏之。一章 南有樛木，葛藟荒之。樂只君子，福履將之。二章 南有樛木，葛藟荒之。樂只君子，福履成之。三章

右「樛木」三章，章四句。「小序」謂「后妃逮下」，「大序」遂衍爲「無嫉妒之心」，「集傳」因之，謂衆妾之頌后妃，似矣。然詩詞並無樂德意，而何以見其無嫉妒心耶？觀「葛藟荒」、「樂只君子」等字，有纏綿依附之意，如「葛藟之施松柏」，似於夫婦爲近。而「傳」又云：「南國諸侯慕文王之化，而歸心于周。」其說亦是。總之，君臣夫婦，義本相通，詩人亦不過藉夫婦情以喻君臣義，其詞愈婉，其情愈深，即謂之實指文王，亦奚不可？而必歸諸衆妾作，則固矣！

【眉評】三章只易六字，而往復疊咏，懇懃之意自見。

【集釋】「樛木」木下曲曰樛。「葛藟」葛類。陸氏璣曰：「藟，一名巨瓜，似蕪荑，亦延蔓生。」「樂」猶繁也。只語助辭。「福履」嚴

氏榮曰：「動罔不吉，謂之福履。」「綏」安也。「荒」莊覆也。「將」猶扶助也。「樂」旋轉之周也。成就也。

【標韻】「樂四支綏同本韻」荒七陽將同本韻 樂八庚成同本韻

螽斯 美多男也。

螽斯羽，詵詵兮。比。宜爾子孫，人比意。振振兮。一章 螽斯羽，薨薨兮。宜爾子孫，緼緼兮。二章 螽斯羽，揖揖兮。宜爾子孫，蟄蟄兮。三章

右《螽斯》三章，章四句。《小序》謂「后妃子孫衆多」，《大序》因言「若螽斯不妒忌，則子孫衆多」，《集傳》從之，而微易其辭，以螽斯爲不妒忌，固有說歟？卽謂后妃不妒忌而子孫衆多，亦屬擬議附會之詞。且謂此詩爲衆妾所作，則尤武斷無稽。周家腰妾縱多賢淑，安見其爲女學士耶？當是之時，子孫衆多，莫若文王，詩人美之固宜，但其措詞亦僅借螽斯爲比，未嘗顯頌君妃，亦不可泥而求之也。讀者細咏詩詞，當能得諸言外。

【眉評】詩只平說，唯六字鍊得甚新。

【集釋】《螽斯》毛氏甚曰：螽斯，蚣蝋也。孔氏穎達曰：此言「螽斯」，《七月》云「斯螽」，文雖顛倒，其實一也。陸璣疏云：「幽州人謂之春箕。」《集傳》：螽斯，蝗屬，長而青，長角長股，能以股相切作聲，一生九十九子。姚氏際恒曰：螽斯之「斯」，語辭，猶「鹿斯」、「鸛斯」也。《幽風》「斯螽動股」，則又以「斯」居上，猶「斯干」、「斯稗」也。不可以螽斯二字爲名。蘇氏謂螽斯一生八十一子，朱氏謂一生九十九子，今俗謂蝗一生百子，皆不知何從數之而得此數耶？爾，指人。《集傳》必以爲指螽斯，亦不知何意。如謂不便爾后妃，「天保定爾」，臣爾君矣。《詵詵》和集貌。《振振》盛貌。《薨薨》羣飛聲。《緼緼》不絕貌。《揖揖》會聚也。《蟄蟄》多之意。

【標韻】詵十一真振同本韻 薨十蒸繼同本韻 揖十四緝蟄同本韻

### 桃夭 喜之子能宜室家也。

桃之夭夭，興中有比。灼灼其華。鍊字法。之子于歸，實賦。宜其室家。虛想。○一章桃之夭夭，有實其實。又變。之子于歸，宜其家室。二章桃之夭夭，其葉蓁蓁。之子于歸，宜其家人。三章

右《桃夭》三章，章四句。《小序》曰：「后妃之所致也。」《大序》因言「不妒忌，則男女以正，昏姻以時，國無繆民也」，此亦本《孟子》「太王好色，內無怨女，外無曠夫」爲言。然必謂「不妒忌」者何哉？夫后妃不妒忌，豈待人言，亦豈待煩言而後信哉？即使妬忌，亦與小民昏姻何涉？此皆迂論難通，不足以發詩意也。《集傳》此章專言「文王之化，自家而國」，其說近是。然又引《周禮》「仲春令會男女以證桃夭之時，則又泥而鮮通。桃夭不過取其色以喻之子，且春華初茂，即芳齡正盛時耳，故以爲比，非必謂桃夭時，之子可盡于歸也。僞傳又以爲美后妃而作，《關雎》美后妃矣，而此又美后妃乎？且呼后妃爲「之子」，恐詩人輕薄亦不至猥褻如此之甚耳。蓋此亦咏新昏詩，與《關雎》同爲房中樂，如後世催妝坐筵等詞。特《關雎》從男求女一面說，此從女歸男一面說，互相掩映，同爲美俗。而此詩氣體稍輕，故不得與《關雎》並，次《蟋蟀》後，別爲一樂可也。然以如花勝玉之子，而宜室宜家，可謂德色雙美，艷稱一時。雖不知其所咏何人，然亦非公侯世族，賢淑名媛，不足以當。即謂之樂而不淫也可。

【眉評】「一章」豔絕。開千古詞賦香奩之祖。

「二」「三」章意盡首章，「葉」「實」則于歸後事，如「綠葉

成陰子滿枝」，亦以見婦人貴有子也。

【集釋】「桃」木名。「天天」少好貌。「灼灼」鮮明貌。孔氏穎達曰：「天天，言桃之少；灼灼，言華之盛。桃或少而未華，或華而不少，此詩天天、灼灼並言之，則是少而有華者。故辨之言桃有華之盛者，由桃少故華盛，以喻此女少而色盛也。」【歸婦人謂嫁曰歸。】「宜」和順之意。朱氏善曰：「之子所謂宜，猶后妃之所謂淑。然淑以其德之蘊於中者言，宜以其效之著於外者言。惟其有是德，故可必其有是效也。宜者，和順之意，和則不乖，順則無逆，此非勉強所能也。必孝不衰於舅姑，敬不違於夫子，慈不遺於卑幼，義不拂於夫之兄弟，而後可以謂之宜也。然由后妃教化倡於上，之子則效應於下，故于歸之際，見者知其必有以宜室宜家焉。此亦可以觀感應之機矣。」【實】實之盛也。朱氏道行曰：「凡華艷者鮮實，桃天不然，春開夏結，其實多而味美，故曰『有實其實』，彼于歸者之有子似之。」【葉葉】葉盛貌。

【標韻】華六麻家同本韻 實四質室同本韻 藁十一真人同本韻

### 兔置 美獵士爲王氣所特鍾也。

肅肅兔置，掾之丁丁。赳赳武夫，公侯干城。此層淺。○一章 肅肅兔置，施于中遠。赳赳武夫，公侯好仇。此層深。○二章 肅肅兔置，施于中林。赳赳武夫，公侯腹心。此層更深。○三章

右「免置」三章，章四句。「小序」謂「后妃之化」，不知武夫於后妃何與？章章牽涉后妃，此尤無理可厭。「集傳」云：「化行俗美，賢才衆多，雖置兔之野人，而其才之可用猶如此。」亦屬虛衍附會，毫無徵實。按墨子曰：「文王舉閔夭，太顛於置網之中，授之政，西土服。」後儒如金仁山、胡休仲多主是說，以爲誦此篇之義，必有人焉當之，如文王狩獵而得呂望之類。姚氏亦以爲然。然則呂望、閔夭、太顛諸公，亦可謂之「趙趙武夫」耶？夫擬人必於其倫，呂望諸賢縱極野處，亦斷不至與置兔野人同秉趙趙之氣。竊意此必羽林衛士，扈蹕游獵，英姿偉抱，奇傑魁梧，遙而望之，無非公侯妙選。識者於此有以知西伯異世之必昌，如後世劉基赴臨淮，見人人皆英雄，屠販者氣宇亦異，知爲天子所在，而嘆其從龍者之衆也。詩人咏之，亦以爲王氣鍾靈特盛乎此耳。不然，周縱多才，何至以置兔野人爲「干城」、「好仇」、「腹心」之寄哉？

【眉評】「一章」肅肅二字寫出軍容嚴肅之貌。「二、三章」干城、好仇、腹心，卽從上肅肅字看出。落落數語，可賅「上林」、「羽獵」、「長楊」諸賦。

【集釋】「置」罟也。「爾雅」：免罟謂之置。李氏巡注：「免自作徑路，張置捕之也。」「丁丁」，「集傳」：「丁丁，柞杙聲也。」「爾雅」：「柞謂之杙。」李氏巡注：「柞謂柞也。」許氏恒曰：「擊柞於地中，張置其上也。」「趙趙」武貌。「遠」九達之道。「好仇」仇與速同，匹也。「腹心」同心同德，可爲心膂之助也。

【標韻】置音陟，六麻。又叶直，入六魚。夫七處通韻隔句叶，謂之轉韻。下倣此。□丁九青 城八庚通韻 遠四支仇十一

尤叶韻 林十二侵心同本韻



采芣苢 拾菜謳歌，欣仁風之和鬯也。

采采芣苢，薄言采之。采采芣苢，薄言有之。一章 采采芣苢，薄言掇之。采采芣苢，薄言捋之。二章 采采芣苢，薄言結之。采采芣苢，薄言櫛之。三章

右《采芣苢》三章，章四句。《小序》謂「后妃之美」，《大序》云「和平則婦人樂有子矣」。皆因泥讀芣苢之過。按《毛傳》云：「芣苢，車前，宜懷妊焉。」車前，通利藥，謂治產難或有之，謂其「樂有子」，則大謬。姚氏際恒駁之，謂「車前非宜男草」，其說是矣。然又無辭以解此詩，豈以其無所指實。殊不知此詩之妙，正在其無所指實而愈佳也。夫佳詩不必盡皆徵實，自鳴天籟，一片好音，尤足令人低回無限。若實而按之，興會索然矣。讀者試平心靜氣，涵泳此詩，恍聽田家婦女，三三五五，於平原繡野、風和日麗中羣歌互答，餘音裊裊，若遠若近，忽斷忽續，不知其情之何以移而神之何以曠。則此詩可不必細繹而自得其妙焉。唐人《竹枝》、《柳枝》、《柵歌》等詞，類多以方言入韻語，自覺其愈俗愈雅，愈無故實而愈可以咏歌。即《漢樂府·江南曲》一首「魚戲蓮葉」數語，初讀之亦毫無意義，然不害其為千古絕唱，情真景真故也。知乎此，則可與論是詩之旨矣。《集傳》云：「化行俗美，家室和平，婦人無事，相與采此芣苢而賦其事以相樂。」其說不為無見。然必謂為婦人自賦，則臆斷矣。蓋此詩即當時《竹枝詞》也，詩人自咏其國風俗如此，或作此以畀婦女輩俾自歌之，互相娛樂，亦未可知。今世南方婦女登山採茶，結伴謳歌，猶有此遺風云。

【眉評】一片元音，羌無故實。通篇只六字變換，而婦女拾菜情形如畫如話。

【集釋】「芣苢」，《爾雅》：「芣苢，馬舄；馬舄，車前。」韓氏嬰曰：「直曰車前，瞿曰芣苢。」注：「生於兩旁者爲瞿。」

陸氏璣曰：「車前，一名當道，喜在牛跡上生，故曰車前、當道也。」〔擷〕拾也。〔捋〕取其子也。〔結〕以衣貯之而執其枉也。〔褊〕以衣貯之而扱其枉於帶間也。

【標韻】采十賄有二十五有叶韻 擷七易捋同本韻 結九屑褊同本韻

### 漢廣 江干樵唱，驗德化之廣被也。

南有喬木，不可休息。吳氏曰：「韓詩作思。」漢有游女，不可求思。言情。漢之廣矣，不可泳思。江之永矣，不可方思。寫景。○一章翹翹錯薪，言刈其楚。人事是主。之子于歸，言秣其馬。進一層言情。漢之廣矣，不可泳思。江之永矣，不可方思。再咏江景。○二章翹翹錯薪，言刈其蕞。之子于歸，言秣其駒。漢之廣矣，不可泳思。江之永矣，不可方思。三咏江景，有「篇終接混茫」意，而章法尤奇。○三章

右《漢廣》三章，章八句。《小序》謂「德廣所及」，《大序》因謂「化行乎江漢之域，無思犯禮，求而不可得」。《集傳》以下諸家莫不本此，以爲「江漢游女，非復前日可求，以見文王之化之廣矣」。然「翹翹錯薪」數語，終無著落，豈虛衍哉？夫「錯薪」非游囿地，「刈楚」亦於女子無關，乃不言采蘭贈勺而云擔柴刈草，豈不大煞風景？姚氏際恒謂「古者賓客至，必共其芻薪。薪以爲爨，芻以秣馬」，是以游女爲

賓客矣。既以游女爲賓客，而又欲戲而求之，豈禮也哉？下文忽又謂「其女子自有夫，彼將刈楚刈蕀以秣馬，待其歸而親迎矣。猶樂府所謂『羅敷自有夫』也」。前後兩說，自相矛盾，尤不可解。唯歐陽氏說「雖爲執鞭所欣慕」之意差爲近之。然刈楚、刈蕀，亦無詞以爲之說。殊不知此詩卽爲刈楚、刈蕀而作，所謂樵唱是也。近世楚、粵、滇、黔間，樵子入山，多唱山謳，響應林谷。蓋勞者善歌，所以忘勞耳。其詞大抵男女相贈答，私心愛慕之情，有近乎淫者，亦有以禮自持者。文在雅俗之間，而音節則自然天籟也。當其佳處，往往入神，有學士大夫所不能及者。愚意此詩，亦必當時詩人歌以付樵。故首章先言喬木起興，爲採樵地。次卽言刈楚，爲題正面。三兼言刈蕀，乃採薪餘事。中間帶言游女，則不過借以抒懷，聊寫幽思，自適其意云爾。終篇忽疊咏江漢，覺烟水茫茫，浩渺無際，廣不可泳，長更無方，唯有徘徊瞻望，長歌浩歎而已。故取之以況游女不可求之意也可，卽以之比文王德廣洋洋也，亦無不可。總之，詩人之詩，言外別有會心，不可以迹相求。然則太史取之，抑又何哉？蓋《國風》多里巷詞，況此山謳，猶能以禮自持，則尤見周家德化所及，凡有血氣莫不發情止義，所以爲貴也。

【眉評】「一章」從喬木興起，爲下刈薪張本。中間插入游女，末忽揚開，極離合縹緲之致。「二、三章」後二章刈楚、刈蕀，乃寫正面，仍帶定游女，妙在有意無意之間。「漢廣」三章疊咏，一字不易，所謂「一唱三嘆有遺音」者矣。

【集釋】「喬」高也。「休息」孔氏穎達曰：「疑『息』字作『思』」。《詩》之大體，韻在辭上。疑「休」「求」爲韻，

二字俱作「思」。〔漢〕《集傳》：漢水出興元府嶓冢山，至漢陽軍大別山人江。《皇輿表》：興元，今陝西漢中府。漢陽，今湖廣漢陽府。〔泳〕《集傳》：泳，潛行也。江《集傳》：江水出永康軍岷山，東流與漢水合，東北入海。《皇輿表》：永康軍，今四川成都府灌縣。〔永〕長也。〔方〕桴也。〔翹翹〕薪錯起不平貌。〔楚〕荆屬。〔秣〕飼也。〔藎〕蒿也。

【標韻】休十一尤求同本韻 廣二十二養方七陽叶韻隔句叶 泳二十四敬永二十三梗叶韻案：二句意本不相連，而韻自叶。或謂四句爲一韻，古韻則然，今韻否。 楚六語馬二十一馬叶韻 藎七虞駒同。本韻

## 汝墳 南國歸心也。

遵彼汝墳，伐其條枚。全詩皆比。未見君子，惄如調飢。一章 遵彼汝墳，伐其條肄。既見君子，不我遐棄。二章 魴魚賴尾，奧句。王室如燬。雖則如燬，父母孔邇。三章

右《汝墳》三章，章四句。《小序》謂「道化行」，而不言其所以行之之故。《大序》則以爲「婦人作」。《集傳》因之，兼用《小序》謂「汝旁之國，先被文王之化，故婦人喜其君子行役而歸」。夫婦人喜其夫歸，與文王之化何與？婦人被文王之化而後思其夫，豈不被化即不思其夫耶？如此說《詩》，能無令人疑議？大抵學究家說《詩》，必先有一付寬大帽子壓倒衆人，然後獨申己見。故此詩本欲說婦人思夫，而又覺無甚關係，故先言文王之化，以鄭重其辭，然後說思夫，以致上下文義不相連貫亦不之覺。且婦人思夫，苟無大過，何至以「不我遐棄」爲欣幸耶？縱使因是爲喜，而「王室如燬」之言又何自來？

於是復以家人慰辭爲解，以「父母」屬文王矣。而又引嚴氏說，更以「父母」爲己之父母，紛紛擬議，原無定解。唯何玄子曰：「時蓋文王以修職貢之故，往來於商，汝墳之人得見而喜之」之說差近。而姚氏以爲想像而得，蓋其心尚無定識耳。愚謂商辛無道，王室久如焚燬，天下臣民，皇皇無定，莫不欲得明主而事之矣。及聞西伯發政施仁，視民如傷，莫不引領延佇，若大旱之望雲霓，所謂「怒如調飢」是也。汝旁諸國，去周尤近，故首先嚮化，歸心愈亟，唯恐其棄予如遺耳。一旦得晤君侯，見其濶達大度，愛民若子，實能容衆而不我棄，乃知帝王自有真也，不覺欣欣然有喜色，而羣相慰勞，曰：「父老苦商久矣，王室其如燬乎？嗟我勞人，賴如魴尾，然亦將有所歸也。何也？」以西伯近在咫尺，不啻如赤子之依父母耳。此馬援所謂「當今之時，非但君之擇臣，臣亦擇君也」。然而商政雖虐，天命未改，詩人不敢顯言，故託爲婦人喜見其夫之詞，曰「王室」，曰「父母」，則又情不自禁，其辭且躍然紙上矣。誰謂「詩」旨隱而不露哉？

【眉評】「一章」調飢，寫出無限渴想意。 「二章」不我棄，寫出無限欣幸意。 「三章」孔邇，寫出無限安慰意。

【集釋】「遵」循也。「汝」水名。《集傳》：汝水，出汝州天息山，逕蔡潁州入淮。《皇輿表》：宋汝州，今河南汝州，宋蔡州，今河南汝寧府。宋潁州，今江南鳳陽府潁州。《條枚》《集傳》：枝曰條，幹曰枚。孔氏穎達曰：大木不可伐其幹，取條而已。枚細者，可以全伐之也。《怒》孔氏穎達曰：《釋詁》云：「怒，思也。」《釋言》云：「怒，飢也。」然則怒之爲訓，本爲思耳，但飢之思食，意又怒然，故又以爲飢。怒是

飢之意，非飢之狀。故傳言飢意，箋以爲思義，相接成也。〔調〕《集傳》：調，一作輞，重也。王氏安石曰：調飢，飢而又飢，飢之甚也。〔肆〕孔氏穎達曰：肆，餘也。《左傳》曰：晉國不恤宗周之闕，而夏肆是屏。又曰：杞，夏餘也。是肆爲復生之餘。〔遐〕遠也。〔魴〕魚名。陸氏璣曰：魴，一名魴，江東呼爲鰱。〔頰〕赤也。孔氏穎達曰：魴魚之尾不赤，故知勞則尾赤。《左傳》：如魚頰尾，衡流而彷徨。〔燬〕焚也。〔孔〕甚也。〔邇〕近也。

【標韻】枚十灰飢四支通韻 肆四寘棄同本韻 燬四紙邇同本韻

### 麟之趾 美公族龍種盡非常人也。

麟之趾，振振公子。于嗟麟兮！一章 麟之定，振振公姓。于嗟麟兮！二章 麟之角，振振公族。于嗟麟兮！三章

右《麟之趾》三章，章三句。《小序》謂：「《關雎》之應。」《關雎》未必專咏文王，《麟趾》則實美周家子、姓、族，其何以云應也？即使其應，亦當應《益斯》，而不應《麟趾》。何者？以《麟趾》兼言子、姓、族，非專咏文王子也。顧何以《益斯》不云應而《麟趾》則云應乎？《大序》謂：「衰世之公子皆信厚如《麟趾》之時。」麟何以有時？其不通已爲歐陽氏、蘇氏所譏。即謂「衰世公子」亦殊謬戾。夫既謂《關雎》化行，則邇治時矣，而何以云「衰世」耶？《集傳》云：「麟性仁厚，故其趾亦仁厚」，尤可怪。分麟與趾爲二物，豈物性善而足或有不善乎？天下父賢而子不肖者有之，未有物善而足不善者。且以麟比文王，后

妃，以趾、定、角分配子、姓、族，則下文「于嗟麟兮」之麟又將誰屬？以爲美子、姓、族也，則現以麟爲文王、后妃矣；以爲美文王、后妃也，而下文云「是乃麟也」，何必磨身牛尾而馬蹄，然後爲王者之瑞？是又明明以之比子、姓、族，爲文王、后妃之應矣。一言而自相矛盾也如是，豈尚能得意旨哉？大凡詩家咏物，一意而分數層，體例然耳。非謂麟趾必公子，麟定必公姓，麟角必公族也。唯言子、姓、族，則由親及疏；言趾、定、角，則自下而上。至詩中大旨，則姚氏際恒云：「蓋麟爲神獸，世不常出，王之子孫亦各非常人，所以與比而歎美之耳。」杜詩云：「高帝子孫盡隆準，龍種自與常人殊」，可爲此詩下一注脚。夫文王爲開國聖主，其子若孫卽武王、周公、鄭叔、康叔輩，當時同在「振振公子」中，德雖未顯，而器宇自異。詩人窺之，早有以卜其後之必昌，故欲作詩以歎美其人，而非神獸不足以相擬，乃借麟爲比，口中雖美麟今不置，其實神注諸公子而不已也。

【眉評】三「麟兮」咏歎有神。

【集釋】麟，麋身，牛尾，毛蟲之長也。陸氏璣曰：麟，色黃，員蹄，音中鍾呂，行中規矩，行必擇地，詳而後處，不羣居，不侶行，不入陷阱，不罹羅網。王者至仁則出。〔趾〕足也。〔振振〕姚氏際恒曰：振振，起振興意。《毛傳》訓仁厚意，欲附會麟趾，不知振字豈是仁厚義乎？且其以趾之故，故訓振振爲仁厚。然則定與角又何以無解乎？《毛傳》于此訓振振爲仁厚，于《螽斯》亦然，是因此而遷就于彼也。《集傳》則于此訓仁厚，于《螽斯》訓盛貌，又兩爲其說，並可笑。〔定〕額也。孔氏穎達曰：定或作顙。《釋畜》云：「的顙曰顙。」顙亦額也。〔角〕《集傳》：麟，一角，角端有肉。

【標韻】趾四紙子同本韻 定二十五經姓二十四教通韻 角三疊族一屋通韻 麟十一真。無尾三麟字自叶韻。

以上周南詩凡十有一篇。《小序》章章牽合后妃，唯《漢廣》、《汝墳》及《文王》。《集傳》連之，以爲首五詩皆言

后妃之德，《桃夭》下則文王家齊國治之效，而天下亦漸平焉。宋仍本《序》，以爲《關雎》之應，后妃亦不爲無助。如此，是《周南》諸詩皆爲后妃作，直可曰《周頌》矣，而何以爲《風》？且可曰《太姒頌》矣，又何以爲《周南》？夫曰《風》，則必里巷歌謠，非朝廷《雅》、《頌》可知。曰《國風》，則必一國之風，非一家之俗又可見。今既篇篇歸美后妃，仍復謂之《周南》，豈不與命名義大相左乎？且文王修身齊家以治其國，而至于天下平，嚆不謂然？何必牽引《大學》以釋《風》詩，致使詞爲理障，旨被塵蒙，不得溫柔敦厚旨，而何以識風刺義耶？夫子說《詩》，曰興、曰觀、曰羣、曰怨，往往從言外以見意，非穿鑿附會以求之也。所謂言者無罪，聞之者足以戒，其意亦可想已。愚案：《周南》十一篇，皆周人自咏其國風，唯《蟋蟀》、《兔置》、《麟趾》及《公室》。蓋《蟋蟀》美后妃之多男，《兔置》喜文王之游獵，《麟趾》見公族之日盛，要皆假物咏嘆，未嘗顯言稱頌，所以爲《風》也。然既采之民謠，而又兼咏君妃者，何哉？夫民有民俗，國有國風，兼收並錄，得失斯見。首六章皆咏婦德，見風化起自家庭也。《兔置》游獵，《采芣苢》邶謳，《漢廣》樵唱，則郊外風焉。至於《汝墳》兼及境外，見遠人嚮化，爲天下歸心之漸。《麟趾》則歎美公族，乃發祥所自始，故以是爲終焉。編《詩》之意，大畧如此。至其音節優柔和順，中正溫敦，得天地太和翔洽氣，所以爲《風》之正。唯《漢廣》氣體差濶而肆，《汝墳》興中有怨，與前後諸詩小異。卽謂爲正風之變也亦宜。此亦天地自然元音，不可強而爲之者也。



# 詩經原始卷之二

## 國風二

### 召南

召，地名，與周邑皆在岐山陽，故南面地方最廣。武王得天下後，封旦於周，卽封奭於召，以爲采邑，周、召二公之號由此起。其所採民間歌謠，有與公涉者，有與公無涉者，均謂之召南，蓋皆召以南之詩，故亦南之而已。召與周近，地同俗同，故詩之音亦畧同。且先天下而被文王之化者，又莫不同，此所以與周南同爲國風之正，而居三百之首者也。若序謂南，言化自北而南，與集傳謂召公宣布於外，其詩得之南國，則謂之南者，均不可從。夫王者之化，自西自東，自南自北，無思不服，何以獨行於南歟？且文王時，上有商王，周、召未得分封，又何以有召公循行南國，宣布於外之事？天子在上，諸侯擅使大夫宣政列國，此何如臣？而諸儒乃以經文王耶？

### 鵲巢 昏禮告廟詞也。

維鵲有巢，維鳩居之。比。之子于歸，百兩御之。一章 維鵲有巢，維鳩方之。之子于歸，百兩將之。二章 維鵲有巢，維鳩盈之。之子于歸，百兩成之。三章

右《鵲巢》三章，章四句。《小序》云：「夫人之德也。」《大序》衍爲「國君積德累功以起家，德如鵲鳩，乃可配焉。」《集傳》更謂「南國諸侯被文王之化，其女子亦被后妃之化，故嫁於諸侯，而其家人美之。」三說均似可通。然詩本咏昏姻，而何以鵲鳩起興，終無定解。自序、傳來，說《詩》者無不以鵲巢鳩居況女居男室矣。夫男女同類也，鵲鳩異物也，而何以爲配乎？姚氏際恒最攻序、傳，力駁鵲巧鳩拙之說，至舉其附會者四，可謂痛切言之矣。乃其自解詩意，又以爲「言鵲鳩者，以鳥之異類況人之異類也。其言巢居者，況女之居男室也」，則與舊說何異？且謂「以鳥之異類況人之異類」，男女縱不同體，而謂之異類可乎哉？此不通之論也。然則何以爲鵲鳩辨？竊意鵲巢自喻他人成室耳，鳩乃取譬新昏人也。蓋新昏者必治室，所謂鳥革羣飛，蟬聯鵲起，無不極意輝煌以爲美觀。又況鵲善營巢，故以爲比；鳩則性慈而多子。《曹》之詩曰：「鵲鳩在桑，其子七兮。」凡娶婦者，未有不祝其多男，而又冀其肯堂肯構也。當時之人，必有依人大厦以成昏者，故詩人咏之，後竟以爲典要耳。否則，公族子姓，寵遇天王，得邀賜第，爲子娶婦其內。詩人既美其官室之富，又頌其子婦之賢，亦未可知。然細咏詩詞，與《關雎》雖同賦初昏，而義旨迥別。《關雎》似後世催妝、花燭等詩，此則語近祝詞。古昏禮

必告廟祝版，樂章當有用者，但無攷耳。而《左傳》曰：「國布几筵，告于莊共之廟。」既有告，則有文，既有文，即有歌，此亦禮之相因而致者。愚故疑其爲告廟詞也。

【附錄】姚氏際恒曰：鵲巢鳩居，自《傳》、《序》以來，無不附會爲說，失風人之旨。《大序》曰：「德如鵲鳩，乃可以配。」鄭氏因以爲「均壹之德」。嗟乎，一鳩耳，有何德，而且以知其爲均壹哉？此附會之一也。《毛傳》云：「鵲鳩不自爲巢，居鵲之成巢。」安見其不自爲巢而居成巢乎？此附會之二也。歐陽氏曰：「今人直謂之鳩者，拙鳥也，不能作巢，多在屋瓦間或於樹上架構樹枝，初不成窠巢，便以生子，往往墜驚、殞雛而死。鵲作巢甚堅，既生雛散飛，則棄而去。在於物理，容有鳩來處彼空巢。」按其謂鳩性拙既無據，且謂鳩性拙不能作巢者，取喻女子，然則可謂女性拙不能作家乎？女子從男配合，此天地自然之理，非以性拙不能作家而居男子之家也。且男以有女方謂之有室家，則作家正宜屬女耳。又謂在屋瓦間，幾曾見屋瓦間有鳩者？又謂或於樹上架構樹枝，夫樹上架枝，此卽巢矣，何謂不成巢乎？又謂鳩生子墜驚、殞雛而死，又謂鵲生雛散飛棄巢而去，今皆未曾見。此附會之三也。王雪山曰：「詩人偶見鵲有空巢而鳩來居，而後人必以爲常，此譚詩之病也。」若然，是既於道上見嫁女，而又適見鳩居鵲巢，因以爲興，恐無此事。其說名爲擺脫，實成固滯。此附會之四也。僅舉其說之傳世者數端，其他雜說不能殫述。按此詩之意，其言鵲鳩者，以鳥之異類況人之異類也。其言巢與居者，以鳩之居鵲巢況女之居男室也。其義止此。不穿鑿，不刻畫，方可說《詩》。一切紛紛盡可掃卻矣。案：此說駁人甚佳，自論未允，已見前論。讀者可共參觀。

【眉評】取譬只在首二語，餘皆敷衍。且美中含刺，不及《關雎》遠矣。 二南皆以昏詞爲首，如《易》

上經首《乾》、《坤》，下經首《咸》、《恒》，陰陽爲道所始也。

【集釋】《鵲》鳥名，性善營巢，而預識吉凶。《鳩》鳥名，一名布穀。《坤雅》云：鳩鳩性一而慈，祝鳩性一

而孝。《百兩》一車兩輪，故謂之兩。百舉成數，言其多也。《方》有之也。《將》送也。《盈》滿也。

《成》禮成也。

【標韻】居六魚御六御叶韻 方七陽將同本韻 盈八庚成同本韻

### 采芣 夫人親蠶事于公宮也。

于以采芣？于沼于沚。于以用之？公侯之事。一章 于以采芣？于澗之中。于以用之？公侯之宮。二章 被之僮僮，夙夜在公。 虛華親蠶人衆。被之祁祁，薄言還歸。 虛華蠶畢人歸。○三章

右《采芣》三章，章四句。《小序》以夫人奉祭祀爲「不失職」，故毛、鄭、孔三家皆主祭祀言。《集傳》既

從其說，又疑爲親蠶事，蓋泥「采芣」、「公宮」等字，以爲祭祀用耳。殊不知芣乃主蠶之物，陸氏佃云：「蒿

青而高，芣白而繁。《七月》之詩曰「采芣祁祁」，以生蠶也。今覆蠶種尚用蒿云。且詩卒章曰「薄言

還歸」，亦非祭祀意。夫曰祭，則必有一番敬謹以將事意。今曰「薄言」，豈禮也哉？《集傳》不得其解，

乃引《祭義》曰「及祭之後，陶陶遂遂，如將復入然」，不欲遽去，愛敬之無已也。讀者試咏「還歸」句，

夫豈「陶陶遂遂」之謂乎？抑尚有「愛敬無已」之心乎？何曲爲之說如是也？案《禮·祭義》：「古者天

子諸侯必有公桑蠶室，近川而爲之築宮，仞有三尺，棘牆而外閉之。及大昕之朝，君皮弁素積，卜三宮之夫人、世婦之吉者，使人蠶于蠶室，奉種浴于川，桑于公桑，風戾以食之。世婦卒蠶，奉繭以示于君，遂獻繭于夫人。夫人遂副褱而受之，因少牢以禮之。及良日，夫人繅，三盆手。遂布于三宮，夫人、世婦之吉者使繅。遂朱綠之，玄黃之，以黼黻文章。服既成，君服以祀先王先公。此詩正爲此賦也。曰「采蠶」者，以生蠶也。「于沼于沚」「于澗之中」者，以近川也。曰「事」者，蠶事也。曰「官」者，蠶室也。曰「公」者，公桑也。曰「夙夜」者，猶言朝夕以供蠶事也。曰「被」者，首飾也。曰「僮僮」者，「僕婦衆多也」。曰「祁祁」者，歸婦如雲也。蓋蠶事方興之始，三宮夫人、世婦皆入于室，其僕婦衆多，蠶婦尤盛，僮僮然朝夕往來以供蠶事，不辨其人，但見首飾之招搖往還而已。蠶事既卒而後，三宮夫人、世婦又皆各言還歸，其僕婦衆多，蠶婦亦盛，祁祁然舒容緩步，徐徐而歸。亦不辨其人，但見首飾之簇擁如雲而已。此蠶事始終景象如是，讀者可無疑義已。召地去周未遠，故風尚畧同。《周》有《葛覃》，《召》亦有《采蠶》，均之蠶桑爲本，女工是重。創業如此，流澤可知。嗚乎，此周之所以王且久也！後世有天下國家責者，其尚以此爲法乎哉！

【眉評】「一、二章」首二章事瑣，偏重疊咏之。「三章」末章事煩，偏虛摹之，此文法虛實之妙，與《葛覃》可謂異曲同工。

【集釋】「蠶」白蒿也。陸氏璣曰：凡艾白色爲蟠蒿。春始生，及秋香美，可生食，又可蒸。一名游湖，北海人謂之旁勃，故《大戴禮》·夏小正·傳曰：「蠶，游湖。」游湖，旁勃也。「沼」池也。「事」蠶事也。

〔澗〕山夾水曰澗。〔被〕《集傳》：被，首飾也，編髮爲之。〔僮僮〕《集傳》：訓練敬，無攷。姚氏亦不能詳。案：僮從人，蓋僮僕之僮。曰僮僮者，僕婦衆多之貌耳。〔夙〕早也。〔夜〕夕也，猶言朝夕也。〔公〕公桑也。〔祁祁〕《詩》：祁祁如雲，衆多貌。

【標韻】註四紙事四實通韻 中一東宮同本韻 僮東公同本韻 祁五微歸同本韻

### 草蟲 思君念切也。

嘒嘒草蟲，趯趯阜螽。未見君子，憂心忡忡。亦既見止，亦既覯止。嘒嘒有攸。我心則降。一章 陟彼南山，言采其蕨。未見君子，憂心惓惓。亦既見止，亦既覯止，我心則說。二章 陟彼南山，言采其薇。未見君子，我心傷悲。亦既見止，亦既覯止，我心則夷。三章 右《草蟲》三章，章七句。《小序》謂：「大夫妻能以禮自防。」《集傳》以爲：「南國被文王之化，諸侯大夫行役在外，其妻獨居，感時物之變，而思其君子如此。」《集傳》不過呆相，《小序》則節外生枝。細咏詩詞，何嘗有「以禮自防」意？卽一婦思夫，而必牽及「文王之化」者何哉？至有謂其惟恐爲淫風所染，因取此物以自警，無論草蟲至微，非自警之物，卽其夫偶一在外，而妻遂幾幾乎不自保其爲淫俗所染，此尚成婦道耶？姚氏謂：「前輩說《詩》至此，真堪一唾」，未免過激，然亦未爲過也。其餘紛紛異說尚多，有謂其爲未嫁之女言者，有謂其爲既嫁之婦言者，亦有謂其爲方嫁在途而言者，更無足道。此蓋詩人託男女情以寫君臣念耳。始因秋蟲以寄恨，繼歷春景而憂思。既未能見，則更設爲既見情形以自

慰其幽思無已之心。此善言情作也。然皆虛想，非真實觀。《古詩十九首》「行行重行行」、「蟬姑夕鳴悲」、「明月何皎皎」等篇，皆是此意。夫臣子思君，未可顯言，故每假思婦情以寓其忠君愛國意，使讀者自得其意於言外。則情以愈曲而愈深，詞以益隱而益顯。然後世之人從而歌咏之，亦不覺其忠君愛國之心油然而生，乃所以爲詩之至也。孔子云「詩可以興」者，非是之謂歟？不然，彼婦自思其夫，縱極工妙，何足爲《風》詩之正耶？

【眉評】「一章」秋景如繪。「二、三章」由秋而春，歷時愈久，思念愈切。本說「未見」，却想及「既見」情景，此透過一層法也。

【集釋】「嘒嘒」聲也。《草蟲》《集傳》：草蟲，蝗屬，奇音，青色。孔氏穎達曰：《釋蟲》云：「草蟲，負蟻。」郭璞曰：「常羊也。」陸璣云：「小大長短如蝗也，好在茅草中。」《趨趨》躍貌。《阜螽》蟻也。孔氏穎達曰：《釋蟲》云：「阜螽，蟻。」李巡曰：「蝗子也。」陸璣云：「今人謂蝗子爲螽子。」陸氏佃曰：「今謂之蜉蝣，亦跳亦飛，飛不能遠。草蟲鳴，阜螽躍而從之，故阜螽曰蟻，草蟲謂之負蟻。」《仲仲》猶衝衝也。《觀》遇也。《降》下也。《蕨》陸氏璣曰：周秦曰蕨，齊魯曰藟，初生似蒜，莖紫黑色，可食如葵。《薇》《集傳》：薇似蕨而差大，有芒而味苦，山間人食之，謂之迷蕨。陸氏璣曰：薇亦山菜也，莖葉皆似小豆，蔓生，其味亦如小豆。藟可作羹，亦可生食，今官園種之，以供宗廟祭祀。項氏安世曰：薇，今之野豌豆苗也，蜀人謂之巢菜，東坡改名爲元修菜也。《夷》平也。

【標韻】蟲一東螽仲並同降三江叶韻 蕨六月懷九屑說同通韻 薇五微悲四支夷同通韻

# 采蘋 女將嫁而教之，以告於其先也。

于以采蘋？南澗之濱。于以采藻？于彼行潦。一章 于以盛之？維筐及筥。于以湘之？維  
 錡及釜。二章 于以奠之？宗室牖下。誰其尸之？有齊季女。三章

右《采蘋》三章，章四句。《小序》謂「大夫妻能循法度」。於是《傳》、《說》皆因之，若未嘗讀「季女」句者。夫既謂之季女，則明明是未嫁少女，而乃以爲大夫妻者何哉？《序》、《傳》於《周南》，則章章牽合后妃，於《召南》，則章章牽合諸侯夫人及大夫妻，皆有意分屬《二南》於王者諸侯之說誤之，遂不顧其詞之自戾也如是。何玄子則又謂其「美邑姜也」，於是訓有齊之齊爲齊國之齊，又引《左傳》季蘭爲邑姜之名以實之，尤爲穿鑿臆斷，均不可從。唯《毛傳》云：「古之將嫁女者，必先禮之于宗室，性用魚，芼之以蘋藻」者得之。鄭氏亦引《禮·昏義》云：「古者婦人先嫁三月，祖廟未毀，教于公宮，祖廟既毀，教于公室。教以婦德、婦言、婦容、婦功。教成之祭，牲用魚，芼之以蘋藻，所以成婦順也。」二說極爲明晰，可無疑義。而愚則更謂此詩非咏祀事，乃教女者告廟之詞。觀其歷敘祭品、祭器、祭地、祭人，循序有法，質實無文，與《鵲巢》異曲同工。蓋《鵲巢》爲婿家告廟詞，此特女家祭先文耳。衆論紛紛，可無煩置喙其間已。

【眉評】「一、二章」祭品及所采之地，治祭品及所治之器。「三章」祭地及主祭之人，層次井然，有條不紊。《集釋》「湘」，《毛氏鳳枝》曰：「案「湘」，《韓詩》作「鵲」。「鵲」爲本字，「湘」爲同音假借字。《韓詩》



爲今文，「毛詩」多古文，古文多假借也。

【集釋】「蘋」萍也。嚴氏粲曰：「本草」水蘋有三種，大者曰蘋，中者曰荇菜，小者水上浮萍。毛氏以蘋爲大萍，是也。郭璞以蘋爲水上浮萍。蘋可茹，而萍不可茹。不可茹，豈可以供祭祀乎？「濱」厓也。【藻】陸氏璣曰：「藻」水草也。有二種：其一種，葉如雞蘇，莖大如箸，長四五尺。其一種，莖大如釵股，葉如蓬蒿，好聚生，謂之聚藻。二者皆可食。【行潦】流潦。【篚筥】皆竹器，方曰篚，圓曰筥。【湘】「集傳」：「湘，烹也。粗熟而淹以爲菹也。姚氏際恒曰：「湘，韓詩作醢。醢，烹也。似宜從韓。不然，湘之訓烹，恐未允。」「鑄釜」「集傳」：「鑄，釜有足曰鑄，無足曰釜。孔氏穎達曰：「鑄與釜連文，故知釜屬。」「說文」曰：「江淮之間謂釜曰鑄。」「陸氏德明曰：「鑄，三足釜。」「宗室」「集傳」：「宗室，大宗之廟也。大夫、士祭於宗室。」「牖下」「集傳」：「牖下，室西南隅，所謂奧也。姚氏際恒曰：「禮，正祭在奧，而此云「牖下」，案「士昏禮」：「尊于室中北牖下」，此婿家醕婦之禮，其婦饋舅姑亦「席于北牖下」。若然，父家嫁女之祭亦在牖下可知。又云：「集傳」謂「牖下爲室西南隅」，尤錯。既曰室西南隅，豈牖下乎？牖豈在室西南隅乎？古人之室，戶牖並列，故「爾雅」云：「戶牖之間謂之扆。」扆在戶西牖東也。李氏如圭曰：「堂屋五架，中脊之架曰楣。後楣之下，以南爲堂，以北爲室與房。大夫房東室西相連爲之室。又戶東而牖西，戶不當中，而近東，則西南隅最爲深隱，故謂之奧。而祭祀及尊者常處焉。」「戶」主也。【齊】敬也。【季】少也。

【標韻】蘋十一真濱同本韻 藻十九咍潦同本韻 筥六語釜七廢下二十一馬女語叶韻

### 甘棠 思召伯也。

蔽芾甘棠，勿剪勿伐，召伯所茇。 此層重。○一章蔽芾甘棠，勿剪勿敗，召伯所憩。 此層輕。○二

章蔽芾甘棠，勿剪勿拜，召伯所說。 此層尤輕。○三章

右「甘棠」三章，章三句。《集傳》謂「召伯循行南國，以布文王之政，或舍甘棠之下。其後人思其德，故愛其樹而不忍傷也。」夫召伯循行南國，已在武王時，非布文王政也。其所稅駕而言憩止者，何止甘棠一樹？人縱愛惜，亦不勝其保護而愛惜之矣。韓氏嬰又謂「召伯出就燕席於阡陌隴畝之間而聽斷焉，百姓大悅。」劉氏向所云亦畧同，均不知爲政大體也。召伯既爲天子大臣，而臨民治事必有公室，豈可出而就民於田隴之間，以博一時愛民勤政之譽？則其僞亦甚矣！安在其能久而不忘哉？愚謂召伯之政，其浹洽人心，深入肌髓者，固非一時一事。而人之所以珍重愛惜，而獨不忍傷此甘棠樹者，必其當日勸農教稼，或盡力溝洫時，嘗出而憩止其下。其後農享其利，人樂其蔭，每思召伯而不得見，唯此樹尚幢幢然繁陰茂葉，蔥蒨如故，故不覺睹樹思人，以爲此召伯常憩止處也，而忍伐而敗之哉？不唯不忍伐而敗之，即一屈抑之亦有所不忍，則其德之感人爲何如耶？夫民之不忍忘召伯者，一樹尚且如是，則其他更可知已。詩人咏之亦即小以見大耳。君子觀於此，其平日學道愛人之心尚不能勃然而興者，豈情也哉？

【眉評】他詩鍊字一層深一層，此詩一層輕一層，然以輕而愈見其珍重耳。

【集釋】「蔽芾」芾，茂盛。蔽，謂可蔽風日也。〔甘棠〕陸氏璣曰：甘棠，今棠梨也。陸氏佃曰：其子有赤白美惡，白色爲甘棠，赤色澀而酢，俗語澀如杜是也。〔翦〕翦其枝葉也。〔伐〕伐其條幹也。〔伯〕羅氏中行曰：伯，長也，爲諸侯之長也。〔芟〕《集傳》：芟，草舍也。羅氏中行曰：止於其下以自蔽，猶草舍耳，非謂作舍也。〔敗〕折也。〔憩〕休息也。〔拜〕屈也。施氏士丐曰：如人身之拜小低屈也。嚴氏粲曰：挽其枝以至地也。〔說〕舍也。王氏質曰：說或爲稅，止。《詩》稅意多通用說字。

【標韻】伐六日芟七萬通韻 敗十卦憩八萬通韻 拜十卦說萬通韻

### 行露 貧士卻昏以遠嫌也。

厭浥行露，豈不夙夜？謂行多露。一章 誰謂雀無角，何以穿我屋？奇語似民謠。誰謂女無家，何以速我獄？雖速我獄，室家不足。二章 誰謂鼠無牙，何以穿我墉？誰謂女無家，何以速我訟？雖速我訟，亦不女此讀汝字，上二女皆本字。從。三章

右《行露》三章，一章三句，二章章六句。自《大序》以「強暴侵陵貞女」爲言，說《詩》者莫不遵而從之。余嘗反覆詩詞而不得其解，不敢隨聲以附和。何也？大畧解此詩者，多執「室家不足」一語爲辭。《集傳》先云：「女子有能以禮自守，而不爲強暴所污者，自述己志，以絕其人。」後又云：「汝雖能教我於訟，而求爲室家之禮有所不足，則我亦終不汝從。」是所爭者，室家之禮耳。意蓋本康成「媒灼之言不和」及毛氏「昏禮財帛，不過五兩」之意，以爲禮也。果爾，則求爲室家之禮亦易備。使其既備而且

足，不必問其人之爲強暴與否，女亦將屈而從之乎？亦尚有所擇乎？姚氏際恒亦云，此「當是女既許嫁，而見其一物不具，一禮不備，因不肯往，以見此女之賢」。是又本劉向《列女傳》「申女許嫁於鄆，夫家禮不備，女以爲輕禮違制，不可以行，而致於訟。女終持義不往，君子以爲得婦道之儀，舉而揚之」之說也。夫昏嫁稱家有無，此女果賢，雖寄廬賃舂之士，亦當御裝飾，著布裙，操作而前以相從。茲乃以「室家不足」故，反生悔心，致興獄訟，而猶謂之爲賢，吾不知其賢果安在也？說《詩》至此，豈獨爲「高叟」之謂已乎！章氏潢云：「《行露》首章似爲比體，君子敬慎避禍，而禍猶不免，故下二章雖遭獄訟猶守正不從人，以守正屬君子，不屬貞女，其言尚爲有見。然亦只泛言其有懷刑遠禍之心，而其所以不能免禍之故，則未嘗明。愚細繹詩意，雖不敢妄有臆斷，而其中委曲致禍之由，似可得言者：大抵三代盛時，賢人君子守正不阿，而食貧自甘，不敢妄冀非禮。當時必有勢家巨族，以女強妻貧士。或前已許字於人，中復自悔，另圖別嫁者。士既以禮自守，豈肯違制相從？則不免有速訟相迫之事，故作此詩以見志。首章借行露爲比，懼其沾污而辱吾身也。後二章則直明己志以絕之。然立志雖嚴，而詞實婉。云雀本無角，尚穿我屋；鼠本無牙，尚穿我牆；人之自防，可不慎哉！此女果賢而尚無夫家也，何配不可擇，而必速我以獄乎？今既欲速我獄，是明明以獄訟懼我耳，我豈以獄訟是懼哉？雀無角而穿屋，不謂之有角不得也；女無家而速訟，不謂之有家者誰其信哉？似此非禮相迫，雖速之訟，其能違禮以相從乎？必不然矣。然女之有家與否，吾不可知。而吾之終不可以相從者，則以吾家素貧，不足與豪富爲禮耳。此詩人微意也。太史取之，以士處貧困而能以禮自持，不爲財

色所誘，不爲刑法所搖，足以風天下而勵後世，非俗之至美者歟？此召南所以媲美周風而爲十三國之首也。

【眉評】「一章」借行露比起，已將避嫌遠禍意寫足。以下乘勢翻入，毫不礙手。

【集釋】「厭浥」濕意。「行露」道間露也。「家」女之夫家也。「速」召致也。「獄」孔氏穎達曰：獄者，塿也。囚證於角核之處。「周禮」謂之圖土。囚證未定，獄事未決，繫之於圖土。囚謂圖土，亦爲獄。「牙」牡齒也。楊氏時曰：鼠無牡齒。陸氏佃曰：鼠有齒而無牙。輔氏廣曰：牡齒，謂齒之大者。「墉」將也。

【標韻】露七遇露同二字自爲韻 角三覺屋一屋獄二沃足同通韻 牙六麻家同本韻隔句叶 墉二冬訟二宋從冬叶 韻隔句叶。

### 羔羊 美召伯儉而能久也。

羔羊之皮，素絲五紵。退食自公，委蛇委蛇。一章 羔羊之革，素絲五緇。委蛇委蛇，自公退食。二章 羔羊之縫，素絲五總。委蛇委蛇，退食自公。三章

右羔羊三章，章四句。《小序》謂「鵲巢」之功效，不知何所取意。《大序》以爲「召南之國化文王之政，在位皆節儉正直，德如羔羊」。服羔羊則「德如羔羊」，服狐貉不將如狐貉乎？且羔羊亦何「節儉正直」之有？爲之解者曰：羊性柔順，逆牽不進，象士之難進易退，以爲正直。夫以倒退倔強之性爲

正直，固大可笑，而「節儉」二字，仍無著落，則其附會無理可知。而《集傳》乃承而用之者何哉？姚氏際恒曰：「此篇美大夫之詩，詩人適見其服羔裘而退食，即其服飾步履之間以嘆美之。而大夫之賢不益一字，自可於言外想見。此風人之妙致也。」其解「委蛇委蛇」之神，別有會心，較之諸家，似覺圓通。然「素絲五紕」、「五緘」、「五總」，究竟無說以釋其義。夫詩人措詞，必有指實，斷非虛衍。毛氏長曰：「紕，數也。古者數絲以英裘，不失其制。」意謂羔裘以黑素絲英縫，取其分明為不失制。試問羔裘露縫，豈尚成裘？凡製衣以無縫為妙，況羔裘純黑，尤不宜露縫，所謂「裁縫減盡針線迹」是也。茲乃以素絲英裘，成何制度？良可嗤也。愚意序言「節儉」二字，必有所本，特不能言其所以然，且又雜以「正直」字，並謂「德如羔羊」，遂不成語。案，郝氏敬曰：「織素絲為組，拵其縫際曰紕。」毛氏又曰：「緘，縫也。」胡氏一桂曰：「合二為一謂之總。」然則紕也，緘也，總也，皆縫之之謂也。羔裘本當日常制，諸侯視朝之服，大夫朝服亦用之，唯褒飾與君異。使凡在位者皆羔裘，而皆委蛇以退食，亦何足異，亦何足見其為賢哉？蓋此詩所咏，必有其人在，非泛然也。觀「五紕」、「五緘」、「五總」之言，明是一裘而五縫之矣。夫一裘而五縫之，仍不肯棄，非節儉何？晏子一狐裘三十年，人稱儉德，載在《禮經》，其是之謂乎？至於「委蛇委蛇」，則雍容自得之貌。使服五縫之裘而無雍容自得之貌，無以見其德之美，使服五縫之裘，雖有雍容之貌，而不於自公退食之地見之，且恒見之，亦無以見其德之純。茲則廷臣初見其服如是，其貌如是，繼見其服如是，其貌亦如是，久見之其服與貌仍無不如是：無所矜，亦無所掩，不矯強，亦不虛飾，但覺其舒容安度而自有餘裕焉。此雖外饒乎內德蘊焉矣，此雖末

節乎全德見焉矣。夫非道純德懋而臻乎自然境者，不足以語此。吾故謂必有其人在也。其召公之謂歟，其召公之謂歟！詩人所以一在咏之不已也。

【眉評】「一章」摹神。

「一、二、三章」三章迴環韻，有歷久無改厥度之意。

【集釋】「羔羊」小曰羔，大曰羊。「革」皮也。「縫」皮縫隙也。「總」合衆皮爲一也。

【標韻】皮四支蛇五歌蛇支叶韻 革十一陌絨十三職食同通韻 縫二冬總一東公同通韻

### 殷其雷 諷衆士以歸周也。

殷其雷，在南山之陽。何斯違斯？莫敢或遑。振振君子，歸哉歸哉！一章 殷其雷，在南山之側。何斯違斯？莫敢遑息。振振君子，歸哉歸哉！二章 殷其雷，在南山之下。何斯違斯？莫或遑處。振振君子，歸哉歸哉！三章

右「殷其雷」三章，章六句。「小序」謂「勸以義」，「大序」乃以爲「大夫遠行從政，不遑南處。其室家能閱其勤勞，勸以義也。」「集傳」因之，而更爲說曰：「又美其德，且冀其早畢事而還歸。」姚氏駁云：「按詩『歸哉歸哉』，是望其歸之辭，絕不見有『勸以義』之意。且冀其歸可也，何必美其德耶？二義難以合併，其爲支辭飾說無疑。」蓋「集傳」之云「美其德者」，以「振振」字訓信厚也。姚氏又駁之曰：「振爲振起、振興意，亦爲衆盛意。若衆盛，則婦人無思衆盛之夫之理。故『毛傳』、『集傳』皆訓信厚。於是後人反其思夫者，以爲臣之從君焉。『傳』曰：『召公宣布文王之命，諸侯歸焉。』『傳』說曰：『武王克商，

諸侯受命于周廟。『偁傳以『振振君子』指文王，猶如所言振作、振起意也。『偁說以振振爲衆多貌，指衆君子，其于振振固皆可通。然于『何斯遠斯』二句何？其意蓋謂『何斯遠斯』句似婦人思夫之辭，振振乃衆盛意，于思夫又不倫，故不敢直斷，以爲義當闕疑。嗟嗟！此姚氏泥解二句爲思夫辭耳。嘗讀『孟子』曰：『伯夷避紂，居北海之濱，聞文王作，興曰：『盍歸乎來？吾聞西伯善養老者。』』太公避紂，居東海之濱，聞文王作，興曰：『盍歸乎來？吾聞西伯善養老者。』』所謂『盍歸乎來』者，非『何斯遠斯』莫敢或違意乎？所謂『振振君子』者，非聞文王作，羣起而振興之士乎？曰『歸哉歸哉』者，則相招而來歸者之辭也。然則『殷其雷』，在南山之陽，『之側』，『之下』者，抑又何說？蓋雷震所以喻號令也。文王發政施仁，其號令由近而遠，猶雷震發聲自高而下。所謂南山者，岐周地近終南，故每以爲咏耳。當時文王政令方新，天下聞聲嚮慕，有似雷發殷殷，羣蟄啟戶。故詩人借以起興，而其振興起舞之意，則有不勝其來歸恐後之心焉。『偁傳與說雖非古訓，頗有所見，特以歸哉屬諸侯及受命于克商後則非。蓋此詩必爲伯夷太公輩作耳。觀『何斯遠斯』，莫敢或違，意是避難來歸之辭，非諸侯口吻。然亦近似而幾矣，不得以其『偁傳』而少之也。

【眉評】「一章」呼朋引類，相率來歸。如聞其聲，如見其人。

【集釋】「殷殷」雷聲。「何斯」斯，此事也。「遠斯」斯，此地也。「邊」暇也。「振振」興起也。又衆盛貌。

【標韻】雷十灰哉同本韻 首尾句叶陽七陽邊同本韻 側十三職息同本韻 下二十一馬處六語叶韻



## 標有梅 諷君相求賢也。

標有梅，其實七兮。求我庶士，迨其吉兮。全詩皆比。○一章標有梅，其實三兮。求我庶士，迨其今兮。二章標有梅，頃筐塋之。求我庶士，迨其謂之。三章

右《標有梅》三章，章四句。《小序》謂「男女及時也」，毛、鄭以下諸家莫不本之。然猶不過曰女求男，恐其嫁不及時已耳。及《集傳》則甚而言之曰：「懼其嫁不及時，而有強暴之辱也。」夫女嫁縱不及時，而何至有強暴之辱乎？女嫁縱欲及時，亦何至迫不能待乎？以迫不能待之女，而猶謂其能以貞信自守者，吾不信也。且強暴之辱貞女，恐非大無道之世，而又遇極兇暴之人，斷不至是。曾謂文王化行俗美之世，而猶煩貞女之亟亟自慮如是耶？此必無事也。亦嘗細玩此詩，不類男女詞者有三：咏昏姻不曰桃而曰梅，不曰華而曰實，比興殊多不倫，一也。求壻不曰「吉士」，而曰「我庶士」，加我字於庶士之上，尤爲親暱可醜，二也。亟亟難待，至於先通媒妁以自薦，情近私奔，三也。然此猶就其詞氣言之，而其大不合者，則以女求男爲有乖乎陰陽之義者也。然則詩意云何？姚氏際恒云「此篇乃卿大夫爲君求庶士之詩」也。章氏潢亦云「或者詩人傷賢哲之凋謝，故寓言標梅，使求賢者及時延訪之耳。」二說庶幾得之。何者？鹽梅和羹，《書》之喻賢也，非標梅之謂乎？碩果不食，《易》之象「剝」也，非「其實七」，「其實三」之謂乎？庶常吉士，則《周官》衆職之稱，故曰求士，而又曰「我庶士」，親之乃所以近之耳。「枚卜，曰吉」，左氏卜吉之語。今既迨吉，豈不可擇而用之？至於「今兮」「謂之」，

則又欲其及時而延訪之矣。蓋商、周之際，剝復之秋也。山林隱逸，借肥遯以緇光者，固自不少，然求其賢如太公、伯夷、太顛、閔天、散宜生輩，亦難數數觀。又況幾經喪亂，幾經沉淪，其能久而自存，不至爲時所搖落，如碩果之不食者，豈可多得乎哉？若不及早旁求而延訪之，則鹽梅和羹之士日漸剝落，有老死巖阿以至於盡焉耳。雖然，士之遇與不遇亦何足慮，而特如需材孔亟之世也何哉？詩人有念於此，故作詩以諷當時在位，使勿再事優游而有遺珠之憾云爾。

【眉評】一層緊一層。

【集釋】「標」落也。「梅」木名。「迨」及也。「今」今日也。「堅」取也。「謂」諮訪之意。

【標韻】七四實古同本韻 三十三覃今十二侵通韻 堅五未謂同本韻

校記

○「曰」，原作「卜」，據《通論》願校改。

### 小星 小臣行役自甘也。

嘒彼小星，三五在東。肅肅宵征，夙夜在公。寔命不同。一章 嘒彼小星，維參與昴。肅肅宵征，抱衾與裯。寔命不猶。二章

右《小星》二章，章五句。《小序》以爲「惠及下也」。《大序》謂「夫人無妒忌，惠及賤妾，進御於君。其命有貴賤，能盡其心矣」。《集傳》亦謹守其說而不敢背。然詩中詞意唯衾裯句近閨詞，餘皆不類。不

知何所見而云然也。且即使此句爲闕闕咏，亦青樓移枕就人之意，豈深宮進御於君之象哉？姚氏際恒解此詩，引章俊卿之言，以爲「小臣行役作」，因推廣其意云：「山川原隰之間，仰頭見星，東西歷歷可指，所謂『戴星而行』也。抱衾裯云者，猶後人言襁褓之謂。『實命不同』，則較『我從事獨賢』稍爲渾厚。若謂衆妾，則是乃其常分，安見爲后妃之惠及妾媵乎？然而詩旨原自分明，無如諸公之錯會其解者何哉？夫『肅肅宵征』者，遠行不逮，繼之以夜也。『夙夜在公』者，勤勞王事也。『命之不同』，則大小臣工之不一，而朝野勞逸之懸殊也。既知命不同，而仍克盡其心，各安其分，不敢有怨天心，不敢有忽王事，此何如器識乎？藉非文王平日用人有方，使之各盡所長，烏能令趨承奉公之士，勤勞而無怨？蜀漢諸葛武侯亦稱得人，嘗罷李平，廢廖立爲民。及亮卒，立垂泣曰：『吾終爲左袵矣！』平聞之，亦發憤死，度後人之不能復用己也。嗟嗟！用人而苟得其平，則雖廢棄終身，猶不敢怨，況于役乎？此詩雖以命自委，而循分自安，毫無怨讟詞，不失敦厚遺旨，故可風也。

【集釋】「嚙」微貌。〔三五〕「集傳」：「三五言其稀，蓋初昏或將旦時也。〔征〕行也。〔參昂〕西方二宿之名。毛氏甚曰：參，伐也。昂，留也。孔氏穎達曰：『天文志』云：『參，白虎宿三星直下有三星，銳曰伐。』《演孔圖》云：『參以斬伐，故言參，伐也。』昂，六星。昂之爲言留，言物成就繫留是也。〔衾〕被也。〔裯〕裯被也。

【標韻】東一東公、同並同本韻 昂十一尤。姚氏際恒曰：「毛傳云：『昂，留也。』疏引《元命苞》云：『昂之爲言留也。』《史·律書》云：『北至于留。』《素隱》云：『留即昂。』則此當音留。案：程氏《音韻攷》亦同，從之。裯、猶並同本韻。

校記

①「有」，原作「無」，據文義改。

### 江有汜 商婦爲夫所棄而無懟也。

江有汜，之子歸，不我以。不我以，其後也悔。一章 江有渚，之子歸，不我與。不我與，其後也處。二章 江有沱，之子歸，不我過。不我過，其嘯也歌。三章

右《江有汜》三章，章五句。《序》謂「嫡不以媵備數，媵無怨，嫡亦自悔」。是則然矣，然如「嘯歌」句何哉？蓋嫡之待媵，後悔容或有之，善處亦屬常情，唯處而樂，樂而至於「嘯且歌」，恐非嫡婦待妾意。且嘯者，悲歎之辭，非和樂意也。《列女傳》云「倚柱而嘯」，《王風》「條其嘯矣」，皆借悲歌以發鬱積氣，又安見其爲融融意哉？唯黃氏震曰：「岷隱云不我以，正是置之於無所與事之地，非遇勤勞也。己乃寬釋曰：久當自悔，且有以處我，嘯歌以俟時，不必過爲戚戚也。」以前二章作或然之想，以末一章寓無聊之心，庶幾乎得之矣。然又安知非棄婦詞而必爲媵妾作耶？諸儒之必爲媵妾作者，他無所據，特泥讀「之子歸」句作于歸解耳。殊不知妾婦稱夫，亦曰「之子」，如《有狐》詩云「之子無裳」，「之子無帶」之類，不必定婦人而後稱之。然則歸也者，還歸之歸，非于歸之歸也，又明矣。此必江漢商人遠歸梓里，而棄其妾不以相從。始則不以備數，繼則不與偕行，終且望其廬舍而不之過。妾乃作此詩以自歎而自解耳。否則詩人託言棄婦，以寫其一生遭際淪落不偶之心，亦未可知。然婦女爲人所

棄，而仍不忍忘其夫，猶幸其萬一自悔，有以處我，我且嘯歌以自遣，則詩人忠厚之旨也。與前《小星》篇同一命意，而詞之激切則更過之。嗚乎，讀此詩者可以怨矣！

【集釋】「汜」江決復人爲汜。邢氏曰：凡水歧流復還本水者名汜。〔渚〕小洲也。〔沱〕江之別者。

【標韻】汜四紙以同悔十賄通韻。渚六韻與、處並同本韻。沱五歌過、歌並同本韻。

### 野有死麕 拒招隱也。

野有死麕，白茅包之。有女懷春，吉士誘之。一章 林有樸檉，野有死鹿。白茅純束，有女如玉。二章 舒而脫脫兮，無感我帨兮，無使虬也吠。三章

右《野有死麕》三章，二章章四句，一章三句。自來解此詩者不一，其說以爲「惡無禮」者，古《序》也。以爲「凶荒禮殺，以死麕、死鹿爲昏禮」者，毛、鄭也。以爲「淫詩」者，季明德也。以爲「刺淫」詩者，歐陽氏也。以爲貞女「不爲強暴所污」者，《集傳》也。紛紛臆斷，原無一定。夫所謂「惡無禮」者，卽貞女「不爲強暴所污」說也。《詩》曰「吉士」，《傳》曰「強暴」，經與傳互相矛盾，可乎哉？女而懷春，尚稱貞女，天下有是貞女乎？至其拒暴之詞，則曰爾姑徐徐來，勿感我帨，勿吠我虬，言何婉而意何切也！而乃謂其爲凜然不可犯者，誰其信耶？若必謂爲淫詩與所謂刺淫之詩，則「白茅純束，有女如玉」，亦可謂爲失德女而有污潔白之體乎？姚氏際恒能知衆說之非，而不能獨抒所見，仍主山野爲昏之說。至謂「吉士」爲「赳赳武夫」，亦屬不倫。唯章氏潢云：「《野有死麕》，亦比體也。詩人不過託言

懷春之女，以諷士之炫才求用，而又欲人勿迫於己者，差爲得之。然謂懷春之女，其色且如玉也，吉士甯不誘之？又誤解「懷春」、「如玉」二語而爲一也。夫曰「懷春」，則其情近乎淫矣，曰「如玉」，則其德本無瑕矣。語意各別，斷斷不可相混。故范氏處義曰：「女子之德潔白如玉，不可犯以非禮。」白茅純束，亦以比德，與「生芻一束，其人如玉」同意。則其識過章氏遠矣。愚意此必高人逸士抱璞懷貞，不肯出而用世，故託言以謝當世求才之賢也。意若曰：惟野有死麕，故白茅得以包之。惟有女懷春，故吉士得而誘之。今也「林有樛櫟，野有死鹿」矣，然「白茅」則「純束」也，而誰其包之？「有女如玉」，質本無瑕也，而誰能玷之？爾吉士縱欲誘我，我其能禁爾以無誘哉？亦惟望爾入山招隱時，姑徐徐以云來，勿勞我衣冠，勿引我吠鹿，不至使山中猿鶴共相驚訝也云爾。吾亦將去此而他適矣。此詩意極深而詞又甚婉，故使讀者猝難領會。愚固未敢自信能窺詩旨，要之，循章會意，其大要亦不甚相遠也。或又謂文、武盛時，何勞肥遯？然巢、由並生堯、舜之世，何害其爲堯、舜？卽夷、齊同避文、武之朝，又何害其爲文、武？安知孤竹二子外，不更有名賢遺老高尚其志，不肯出而食粟者哉？天地之大，何所不容？聖德如天，亦何所不容？然正唯有此高人逸士而能容之，乃所以成文、武之世之大也。

【眉評】「一章」四句翻起，通篇全用比體。「二、三章」拍合正位，仍是比。以下言拒之之詞，意微而婉。

【集釋】「麕」獐也。陸氏德明曰：麕本亦作麕，又作麕，麕也。青州人謂之麕。案：麕有麕，可合香，故以

起下懷春意。〔樸橄〕小木也。孔氏穎達曰：「釋木云：『樸橄，心。』某氏曰：『樸橄，斛橄也。有心能溼，江河間以作柱。』」〔鹿〕獸名，有角。案：《史記》曰：「古者皮幣，諸侯以聘享。」又《小雅·鹿鳴》：「以宴嘉賓」，是嘉儀也，故以起下女如玉。〔脫脫〕舒緩也。〔感〕動也。〔悅〕巾也。〔龍〕犬也。

【標韻】廣十一真春同本韻隔句叶包三肴誘二十五有叶韻 橄一屋鹿同 束二沃玉同通韻 脫七曷 悅八霽 吠十一隊 轉韻

### 何彼穠矣 諷王姬車服漸侈也。

何彼穠矣？唐棣之華。曷不肅離？微詞。王姬之車。一章 何彼穠矣？華如桃李。平王之孫，齊侯之子。二章 其釣維何？維絲伊緡。齊侯之子，平王之孫。三章

右《何彼穠矣》三章，章四句。姚氏際恒云：「此篇或謂平王指文王，或謂即春秋時平王。凡主一說者，必堅其辭，是此而非彼。然按主春秋時平王說者居多，亦可見人心之同然也。」章氏潢亦云：「若必指爲文王時，非特不當作正義，而太公尚未封齊，則齊將誰指乎？」又謂「武王女，文王孫，不知邑姜乃武王元妃，果以姜女而下嫁於太公之子乎？」此皆至明至顯，無可疑者。」此論出，則衆說紛紛，可息喙矣。然此詩果如《集傳》諸家所云「美王姬之下嫁，不敢挾貴以驕其夫家，而又能敬且和乎？」曰，未也。詩不云乎，「何彼穠矣」，是美其色之盛極也；「曷不肅離」，是疑其德之有未稱耳。有穠艷之色，尤必有肅離之意以將之，然後德色雙美，可以相慶。今觀王姬下嫁，其色之豔如桃如李，何其如

彼之盛乎，而德雖未見，第卽所駕之車未見肅離氣象。彼王姬乎，曷不肅肅離離，以稱其如桃如李之穠豔而無所疵議乎？當姬下嫁日，從旁觀者，誰不曰此平王之孫，齊侯之子，色相配，年相若也。及溯其乃祖若父婚嫁時，車服非不甚盛，而琴瑟鐘鼓之中，不失窈窕好逑之意，芳容非不豔冶，而桃夭華葉之美，自具室家相慶之心。今則徒使人嘖嘖稱羨，以爲齊侯之子、平王之孫共此絲蘿之美而已矣。其所以能結此絲蘿之美者，豈不以王侯世胄互聯姻締，如絲之合而爲縈乎？由此觀之，美中含刺，其爲春秋之世也無疑。而何以能附二南後乎？章氏俊卿又云：「爲詩之時，則東周也。採詩之地，則召南也。」愚謂此時召南，亦非其舊，乃新遷之召南耳。故名雖如故，而地有變遷，風之淳漓，亦因之。使二南所收，盡關雎、麟趾之盛，則其盛亦何足貴？此詩所咏，雖未必卽於淫泆，然以視周初全盛時，則德意亦漸侈矣。編詩微意，固有在歟！

【集釋】「穠」盛也。石經作穠。陸氏德明曰：穠，如容反。《韓詩》作莢。莢，音戎。《唐棣》陸氏璣曰：唐棣，莫李也。一名雀梅，亦曰車下李。所在山中皆有，其華或白或赤，五月中成實，大如李，子可食。郭氏璞曰：江東呼夫移。《平王》卽平王宣曰。《齊侯》卽襄公諸兒。《春秋》：莊公十有一年，王姬歸于齊。《左傳》：齊侯來迎共姬。《緡》綸也，合絲爲之。

【標韻】穠二冬雖同本韻隔句叶。華六麻車同本韻。李四紙子同本韻。緡十一真孫十三元通韻。

騶虞 獵不盡殺也。



彼茁者葭，壹發五豝。于嗟乎，騶虞！一章 彼茁者蓬，壹發五豝。于嗟乎，騶虞！二章

右《騶虞》二章，章四句。《小序》謂「《鶴鳴》之應」。《毛傳》以騶虞爲義獸，皆有心附會文王化行之故。《集傳》更云：「是卽真所謂騶虞矣。」以獸比君，倫乎不倫，固不待辯而自明也。惟歐陽氏以騶爲騶，虞爲虞官，與韓、魯說「騶虞」，天子掌鳥獸之官及「禮·射義」合。是騶虞非獸名也審矣。《淮南子》與相如《封禪》等書，雖亦有以騶虞名獸者，而非《詩》之所謂騶虞也。《釋獸》云「牝豕」，《集傳》云「牝豕」，均無足辯。又謂「一歲曰豝，亦小豕也」。夫豕畜於家，不生於野，何獵之有？豈道生引《郊特牲》「迎虎謂其食田豕也」，以豝、豝爲田豕害稼之獸，似矣。然既曰害稼，則殺之正宜其多，何五豝而僅一發乎？若一發而中五豝，則仁心又安在乎？毛氏其曰：「虞人翼五豝以待君之發」，歐陽氏因之，以爲「獸雖五豝，矢唯一發，以見君心之仁愛及物，不忍盡殺」之意。愚案《周禮·大司馬》中「冬教大閱，曰鼓戒三闕，車三發，徒三刺，乃鼓退」。似一發之發，乃車一發而取獸五，非矢一發而中獸五，亦非獸雖五豝，矢唯一發之說也。夫天子農隙蒐狩，將以奉祭祀，致禽饌獸于郊，人獻禽以享烝，非徒陳師鞠旅以示威武也。故大獸則公之，小獸則私之，獲者取左耳，是一行圍而所射之獸不一類，所獲之禽非一種，乃可以享烝而奉祀。若沾沾以一發五豝爲節，恐以博仁愛之譽則有餘，而致誠敬之心或不足也。田獵之禮，天子不合圍，諸侯不掩羣，亦不過獵不盡物，物不盡殺之意也云爾。而豈以是爲名譽哉？然則「壹發五豝」之咏，《詩》固無足信歟？曰：此正詩人之辭，不可以辭害意。且舉豝、豝爲例，而餘獸可知耳。至末句不美國君而美虞人，亦如郝氏所云，不敢斥君而呼騶虞。騶虞之仁，卽

國君之仁，國君之仁，即文王之仁。指在虞人，而神注國君與文王。故曰澤及昆蟲草木，而以見化育之廣，爲王道之成也。

【眉評】末句與「于嗟麟兮」相似，而實不同。縱彼通章以麟爲比，故末句單歎「麟兮」不爲突，此詩發端未題「騶虞」，末句不得突出爲比，故知「騶虞」斷非獸名也。

【集釋】「苗」《集傳》：苗，生出壯盛之貌。「葭」嚴氏榮曰：葭，蘆葦，又名華，一物而四名。葭，葦之初生者。「蓬」許氏慎曰：蓬蒿也。

【標韻】葭六麻犯同本韻 乎七虞虞同本韻 二章同句自爲韻。姚氏既分「于嗟乎」爲句，而又謂之無韻者，何哉？蓬一東。縱同。本韻 虞姚氏際恒曰：《集傳》以上「虞」音牙，下「虞」音五紅反，一字兩音，謬甚。程氏以恬曰：末句與上音逼應，不入韻。《朱傳》「虞」字首章音牙，二音五紅反。顧氏《詩本音》云：「首章以葭、蘆、虞爲韻，二章以蓬、華爲韻，而「虞」字則合前章。」《集傳》不得其解，乃以首章之「虞」叶音牙，二章之「虞」叶五紅反。一詩之中而兩變其音。及至《秦詩·權輿》之篇，則無說矣。首章以蘆、虞爲韻，二章以蓬、華爲韻，而「與」字則合前章，正與此詩一律。雖有善叶者，不能以「與」而叶蘆、飽也。故愚以爲此古人後章韻前章之法，不得此說而強求之上句，宜其迷謬而不合矣。案：古人用韻甚活，有以隔句叶者，有一音疊用而自叶者，有三章然句爲韻者，有後章韻前章者。隔句叶甚多，不可枚舉。一字疊用，如《行露》首章兩「露」字是也。三章然句爲韻，《騶虞》之賦三章是也，且與章首三「麟」字應。後章應前章，則《權輿》與此是，然二詩皆本句自叶，非定後章韻前章。顧氏知之而未盡耳。蓋乎字與與、與虞皆本韻耳。若姚氏直以爲無韻者，何孟浪也。

以上召南詩凡十有四篇。《小序》謂：《鵲巢》、《騶虞》之德，諸侯之風，先王之所以教，故繫之召公。《集傳》

因之，以爲「鵲巢」至「采蘋」，言夫人大夫妻也。「甘棠」以下，由方伯能布文王之化，至是而所施者溥，所謂其民

諱晦而不知爲之者。」然其中言強暴欲侵陵女子而致訟者有之；女子懼嫁不及時，而有強暴之辱，竟迫不能待者有之；且女子拒暴不及，而曰爾姑徐徐來者，亦有之。詩僅十四篇，而言強暴者三，是何強暴之多也？以文王之世，而強暴徒在梗化也，如是謂之熙熙世得乎？爲之解者曰：女子陰柔易化，男子陽剛難馴，且商、周之際，紂之淫風流行，民初被化未純，故其俗如此。殊不知周家世德，人民服化已深，時至文王，豈尚有強暴侵陵事乎？前賢大儒說詩如此，必有所據；後生小子何敢妄議？但事關風化，道係人心者，亦不可以不辨。夫與其得罪先聖，而有誣經之誚；無甯獲咎後儒，而無附和之嫌。孔子教人學詩，必首「二南」，以爲「不爲周南、召南」，則猶正牆面而立。」「二南」所咏，不過夫婦昏姻、草木鳥獸，亦何至不爲之而猶面牆立歟？蓋昏姻者，夫婦之始，而夫婦者，倫行之基。人於此而未嘗學焉，則身且未修也，何有於家？家且未齊也，何有於國與天下？是一步不可行，非面牆而立之謂乎？「集傳」說多本此，其所見未嘗不是，然而腐矣。況章章牽合之歟？夫學詩者不可不有無邪之心，而作詩者未必先存無邪之念。即說詩者，亦求如詩之意爲己耳，詎可參以己意哉？愚觀「召南」十四篇，賦昏姻者五，託言男女詞以寓君臣義者四，供職事于公宮，思仁政于已往，及美儉德、嗟行役而頌收獵者又各一。其間有關乎文王者，有無關乎文王者；有係乎召伯者，亦有無係乎召伯者。關乎文王者，「殷其雷」、「標有梅」、「小星」、「鵲巢」是也。係乎召伯者，「甘棠」、「羔羊」是也。其餘則皆山林野夫、閭巷婦女之詞。然不必定咏文王，亦無非文王之化；不必定指召伯，固非召伯之功。故可與「周南」並列，爲萬世詩教祖。至其音節，較之「周南」稍迫而直，無輕颺和緩之致，故又爲「周南」亞也。

# 詩經原始卷之三

## 國風三

邶

邶、鄘、衛，三國名，在禹貢冀州，西阻太行，北踰衛漳，東南跨河，以及兗州桑土之野。及商之季，而紂都焉。武王克商，分自紂城朝歌而北謂之邶，南謂之鄘，東謂之衛，以封諸侯。邶、鄘始封及後何時并人於衛，諸家均未詳。衛則武王弟康叔之國也。衛本都河北朝歌之東，淇水之北，百泉之南，至懿公爲狄所滅，戴公東徙，渡河野處漕邑，文公又徙居於楚丘。朝歌故城在今衛輝府淇縣，所謂殷墟。衛故都卽今漕縣。漕，滑縣。楚丘則山東兗州府城武縣。大抵河北一帶皆衛境也。惟邶、鄘地既入衛，詩多衛詩，而猶繫其故國之名，且編之衛國前，序與傳都莫名其故。或謂因其詩所得之地而存之，或謂因其聲之異而存之，或又謂以寓存亡繼絕之心，如楚既滅陳，而九年經書「陳災」，穀梁以爲存陳意也。愚謂邶自有詩，特世無可攷，故詩難徵實。諸家又泥古序，篇篇以衛事實之，致令邶詩無一存者，而乃謂徒存其名也，豈不過哉！至編次在衛前，劉氏元城曰：以其地本商之畿內，故在王·黍離上。范氏處義曰：先邶而後鄘。

者，豈以其亡之先後歟？然皆無確論，姑仍之以存其舊云。

### 柏舟 賢臣憂讒憫亂，而莫能自遠也。

汎彼柏舟，亦汎其流。耿耿不寐，如有隱憂。微我無酒，以邀以遊。一章我心匪鑒，不可以茹。亦有兄弟，不可以據。薄言往愬，逢彼之怒。二章我心匪石，不可轉也。我心匪席，不可卷也。威儀棣棣，不可選也。三章憂心悄悄，愠于羣小。觀閔既多，受侮不少。靜言思之，寤辟有懷。四章日居月諸，胡迭而微？心之憂矣，如匪澣衣。靜言思之，不能奮飛。五章

右《柏舟》五章，章六句。《小序》曰：「言仁而不遇也。」《大序》遂以衛頃公實之，《集傳》更疑爲莊姜詩。今觀詩詞固非婦人語，誠如姚氏際恒所駁。然亦無一語及衛事，不過賢臣憂讒憫亂而莫能自遠之辭，安知非卽卹詩乎？卹既爲衛所并，其未亡也，國勢必辱。君昏臣曠，貪壬滿朝，忠賢受禍，然後日淪於亡而不可救。當此之時，必有賢人君子，目擊時事之非，心存危亡之慮，日進忠言而不見用，反遭讒譖。欲居危地而清濁無分，欲適他邦而宗國難舍。憂心如焚，「耿耿不寐」，終夜自思，惟有拊膺自痛。故作爲是詩，以寫其一腔忠憤，不忍棄君，不能遠禍之心。古聖編《詩》，既憫其國之亡，而又不忍臣之終沒而不彰，乃序此詩於一國之首，以存忠良於灰燼。亦將使後之讀《詩》者知人論世，雖不能盡悉邠事，猶幸此詩之存，可以想見其國未嘗無人，所謂寓存亡繼絕之心者，此也。而無如說

《詩》諸家不察其意，乃以爲衛詩，且以爲婦人作，則邴真亡矣！不然，邴國既入於衛，而詩又皆衛詩，何必徒存其名於十三國之上？以爲是存亡繼絕之意，又何賴有此存亡繼絕意哉？嗚乎，吾恐邴之忠臣義士，含冤負屈，雖數千年下，猶不能瞑目於九京也！

【眉評】「一章」借柏舟以喻國事，其汎汎靡所底極之形自見。【二章】用翻筆接人，勢捷而矯。【四

章】寫受譴，極沉鬱痛切之致。【五章】寫悵亂，極憤懣惶惑之心。

【集釋】「柏舟」以喻國也。舊說以爲自喻，下卽繼以「耿耿不寐」，未免傷於迫切，非仁人心也。惟舟喻國，汎汎然於水中流，其勢靡所底止，爲此而有隱憂，乃見仁人用心所在。【匪鑒】歐陽氏修曰：「我心匪石」四句，毛、鄭解云：「石雖堅尚可轉，席雖平尚可卷」者，其意謂石席可轉卷，我心匪石席，故不可轉卷也。然則鑒可以茹，我心匪鑒，故不可茹，文理易明。而毛、鄭反其義，以爲「鑒不可茹而我心可茹」者，其失在於以茹爲度也。《詩》曰：「剛亦不吐，柔亦不茹。」茹，納也。蓋鑒之于物，納景在內，凡物不擇妍媸，皆納其景。詩人謂衛之仁人，其心匪鑒，不能善惡皆納。善者納之，惡者不納。以其不能兼容，是以見嫉于衛之羣小而不遇也。此雖就衛事言，然解「匪鑒」二句甚明晰，故錄之。【選】《集傳》曰：「簡，擇也。何氏楷曰：古字「選」、「算」通用，《論語》：「斗筭之人，何足算也。」《漢書》「算」作「選」。故「不可選」之「選」當作「算」。亦通，存之。【悄悄】憂貌。【覲】見也。【閔】病也。王氏安石曰：「君子與小人異趣，其爲小人所慍，固其理也。故曰：『憂心悄悄，慍于羣小。』小人得志，則爲讒誣以病君子，君子既病矣，則又從而侮之。故曰：『覲閱既多，受侮不少。』其曰「既多」、「不少」者，以著

小人之衆也。〔辟〕拊心也。〔標〕亦拊心貌。孔氏穎達曰：寤覺之中拊心而手標然。〔日月二句〕嚴氏粲曰：微，不明也，日月食則不明。〔十月之交〕云：「彼月而微，此日而微。」姚氏際恒曰：喻君臣皆昏而不明之意也。〔匪澣衣〕姚氏曰：此句有二說，蘇氏謂「憂不去于心，如衣垢之不澣不忘澣也」，亦迂。嚴氏曰：我心之憂，如不澣濯其衣，言處亂君之朝，與小人同列，其忍垢含辱如此。此說爲是。

【標韻】舟十一尤流、憂、遊並同本韻 茹六御據同怒七遇通韻 轉十六統卷、選並同本韻 悄十七篠小同少、標並同本韻 微五微衣、飛並同本韻

### 綠衣 衛莊姜傷嫡妾失位也。

綠兮衣兮，綠衣黃裏。心之憂矣，曷維其已。一章綠兮衣兮，綠衣黃裏。心之憂矣，曷維其亡。二章綠兮絲兮，女所治兮。我思古人，俾無訖兮。三章絺兮綌兮，淒其以風。我思古人，實獲我心。四章

右「綠衣」四章，章四句。《小序》謂「衛莊姜傷己也」。《大序》云：「妾上僨，夫人失位而作是詩。」蓋指州吁之母而言也。《集傳》既從之，而又以爲「無所考，姑從《序》說，下三篇同」。姚氏際恒以爲此「數篇皆婦人語氣，又皆怨而不怒，是爲賢婦。則以爲莊姜作宜也」。其言極爲有見，今從之。莊姜之賢，詩之怨而不怒，諸家皆能言之，故不復贅，但擇其當者錄之而已。其解首二章，則孔氏穎達之言最善：首章曰間色之綠，不當爲衣，猶不正之妾，不宜嬖寵。今間色爲衣，而見正色反爲裏，而隱以

與妾蒙寵而顯，夫人反見疏而微。綠衣以邪干正，猶妾以賤陵貴，故心之憂矣，何時其可以止也？二章曰間色之綠今爲衣，綠而在上，正色之黃反爲裳而處下，以與妾蒙寵而尊，夫人反見疏而卑。前以表裏與幽顯，此以上下喻尊卑，雖嫡妾之位不易，而莊公禮遇有薄厚也。姚氏謂次章「不必與上章分深淺，仍主綠上其黃裳，但取協韻」而已。然其義既有可通，則亦何妨分也？唯其解第三章則大有會心，云「綠兮絲兮」，謂此綠也，本絲也，前此素潔之時，汝之所治，何爲而染成此綠也？猶墨子悲絲，謂其「可以黃，可以黑」之意。二句全是怨辭而不露意，若無端怨及于綠而追思及絲。此種情理，最爲微妙，令人可思而難以言。至末章則嚴氏舉曰：「絺綌暑服，今當淒然寒風之時，喻不適時而見棄。猶班婕妤秋扇捐篋之意也。『我思古人』，能處嫡妾，實得我心，言當於人心也。女子之情饒怨，此詩但刺莊公不能正嫡妾之分，其詞溫柔敦厚如此，故曰『詩可以怨』。」統觀諸說，詩之旨無餘蘊矣，定爲莊姜作亦無疑矣。而何以不編於衛詩之中，而序諸「邶風」之內，則其意又不可解，仍之以俟後攷。

【眉評】姚氏際恒曰：先從「綠衣」言「黃裳」，又從「綠衣」言「絲」，又從「絲」言「絺綌」，似乎無頭無緒，却又若斷若連，最足令人尋繹。

【集釋】「綠」間色。「黃」正色。「衣」上曰衣。「裳」下曰裳。《記》曰：「衣正色，裳間色。」「治」理也。「說」過也。

【標韻】裏四紙已同本韻 裳七陽亡同本韻 絲四支治同說十一尤，叶子其反。叶韻 風一東心十二侵叶韻



燕燕 衛莊姜送歸妾也。

燕燕于飛，差池其羽，之子于歸，遠送于野。瞻望弗及，泣涕如雨。一章燕燕于飛，頡之頡之。之子于歸，遠于將之。瞻望弗及，佇立以泣。二章燕燕于飛，下上其音。之子于歸，遠送于南。瞻望弗及，實勞我心。三章仲氏任只，其心塞淵。終溫且惠，淑慎其身。先君之思，以勗寡人。四章

右《燕燕》四章，章六句。《序》謂「莊姜送歸妾」，是也。卽證以史傳，亦無不合者。孔氏穎達曰：「隱三年《左傳》曰：『衛莊公娶于齊東宮得臣之妹，曰莊姜，美而無子。又娶于陳，曰厲嬀，生孝伯，早死。其娣戴嬀生桓公，莊姜以爲己子。』四年春，州吁殺桓公。由是其子見殺，故戴嬀于是大歸。莊姜養其子，與之相善，故作此詩。知歸是戴嬀者，經云『先君之思』，則莊公薨矣。桓公之時，母不當輒歸，雖歸，非莊姜所當送歸，明桓公死後，其母見子之殺，故歸。莊姜養其子，同傷桓公之死，故泣涕而送之也。」然莊姜之惓惓於戴嬀而不能置者，非獨其情可矜，而其德尤可慕。觀末章歷叙其賢可見。然則莊姜之涕泣而送之者，又豈尋常婦人女子離別之情所可同日並論哉？

【眉評】「四章」前三章不過送別情景，末章乃追念其賢，愈覺難舍。且以先君相勗，而竟不能長相保，尤爲可悲。語意沉痛，不忍卒讀。

【集釋】「燕」，鳥也。孔氏穎達曰：「《釋鳥》云：『鵲周、燕燕、鵲。』孫炎曰：『別三名。』舍人曰：『鵲周，名燕。」

燕，又名𪗇。」郭璞曰：「一名玄鳥，齊人呼𪗇曰燕，卽今之燕也，古人重言之。」《漢書》童謡云：「燕燕尾涎涎」是也。」「差池」不齊貌。《歸》大歸也。孔氏曰：大歸者，不反之辭。以歸寧者有時而反，此卽歸不復來，故謂之大歸也。《頌》頌，《說文》：頌，直項也。頌，舊說同亢。《釋鳥》曰：「鳥隴也。」何氏楷曰：鳥高飛直上，故見其項頸向上也，言有引吭高飛之意。《佇立》久立也。《上下》低昂高下之意。

【標韻】羽七庚野二十一馬，叶上與反。兩七庚叶韻。頌七陽將同本韻。及十四緝泣同本韻。音十二侵南十三覃，叶尼心反。心十二侵通韻。淵一先，叶一均反。身十一真入同通韻。

### 日月 衛莊姜傷己不見答於莊公也。

日居月諸，照臨下土。乃如之人兮，逝不古處！胡能有定，寧不我顧。一章日居月諸，下土是冒。乃如之人兮，逝不相好！胡能有定，寧不我報。二章日居月諸，出自東方。乃如之人兮，德音無良！胡能有定，俾也可忘。三章日居月諸，東方自出。父兮母兮，畜我不卒！胡能有定，報我不述。四章

右《日月》四章，章六句。此亦莊姜爲莊公而作。而《大序》乃以爲「遭州吁之難」者，何哉？《辯說》駁之，是已。夫仰日月而訴幽懷，見三光「照臨下土」，罔非地義天經之常。而不謂倫紀間乃有如是人，不以古夫婦之相處者以處我，日惟譁浪笑敖來相慢侮，是其心志同惑而無所定也，不知如何乃能使

之有定哉？然志雖無定，寧獨無伉儷情？絕不一我願而我報，俾我自忘其憂乎？「乃如之人兮」，是終不以古道相處乎？吾亦未如之何也已矣！一訴不已，乃再訴之；再訴不已，更三訴之；三訴不聽，則惟有自呼父母而歎其生我之不振。蓋情極則呼天，疾痛則呼父母，如舜之號泣于旻天、于父母耳。此怨極也，而篇終乃云「報我不述」，則用情又何厚哉？蓋君雖報我以無禮，我不敢以無禮答君，我惟以古夫婦之道相處而已。若莊姜者，可謂善處人倫之變，而不失為性情之正者也。

【集釋】「逝」發語辭。【胡寧】皆何也。【冒】覆也。【報】答也。【畜】養也。【卒】終也。【不述】言不欲稱述也。

【標韻】土七虞處六語願七遇，叶果五反。叶韻 冒二十號好、報並同本韻 方七陽良、忘並同本韻 出四質卒、述並同本韻

### 終風 衛莊姜傷所遇不淑也。

終風且暴，顧我則笑。譴浪笑敖，中心是悼。一章終風且霾，惠然肯來。莫往莫來，悠悠我思。二章終風且曠，不日有曠。寤言不寐，願言則嚏。三章曠曠其陰，魍魎其雷。寤言不寐，願言則懷。四章

右終風四章，章四句。序以爲「莊姜遭州吁之暴」。毛、鄭以後皆從之。朱子以爲詳味詩辭，有夫婦之情，未見母子之意，仍定爲爲莊公作。其說良是。若依序言，則「願我則笑」、「惠然肯來」等

語，豈子所宜加于母哉？州吁縱暴，當不至此，況非賢母所能出諸其口者。首二章寫莊公爲人狂蕩暴疾之象，殊非可以禮貌處。其言笑也無常，每顧人也則必笑，而笑又不出於正，徒見其爲「譴浪笑敖」，有似狂風終日疾暴而已。而予心安能無悼哉？其往來也亦無定，有時乎惠然而肯來，而其來也又不以時，則莫知其往，莫知其來，又似狂風終日陰晦而已。而予心能無悠然思哉？我之遇人也如是，我之自處也則又奚若？故下二章又云，驟雨迅雷有時而止，至於「終風且曠」，因而「曠曠其陰」，加以「飈飈之雷」，則殊未有開霽時也。我之度日亦若是乎？則何時始克見天日乎？中夜披衣，起而不寐，憂心抑鬱，結而成疾，則懷抱終無可解之一日矣。四章宜分兩面解，「終風」諸句作興不作比，詩意乃長，詩境乃寬，即詩筆亦曲而不直。否則專怒莊公，有何意味耶？《集傳》云，二詩宜在《燕燕》前，是。

【集釋】「終風」終日風也。「暴」疾也。「譴」戲言也。「浪」放蕩也。「悼」傷也。「霆」雨土蒙霧也。「惠」順也。「曠」陰而風，日曠。「有」又也。「飈」飈飈。《禮·月令》「民多飈飈」注：飈者，氣窒於鼻，噉者，聲發於口。「曠曠」陰貌。孔氏穎達曰：言曠復曠，則陰曠之甚也。「飈飈」雷將發而未震之聲也。「懷」徐氏光啟曰：懷，懷抱不釋之意。

【標韻】暴二十號笑十八號教即微字，二十號 悼同通韻 霆九佳來十灰思四支通韻 曠八齊噉同本韻 雷十灰懷九佳通韻

擊鼓 衛戍卒思歸不得也。

擊鼓其鐃，踴躍用兵。總提二句。土國城漕，陪。我獨南行。主。○一章從孫子仲，所從之節。平陳與宋。所伐之國。不我以歸，憂心有忡。此軍獨留，是以有憂。○二章爰居爰處，爰喪其馬。于以求之。于林之下。解散情形，不堪設想。○三章死生契濶，與子成說。執子之手，與子偕老。追憶敘別室家盟誓之言。○四章于嗟濶兮，不我活兮！于嗟洵兮，不我信兮！轉合當下不能如約之苦。○五章右擊鼓。五章，章四句。△小序△謂「怨州吁」。鄭氏以隱四年州吁伐鄭之事實之。雖《集傳》不能無疑，以爲「恐或然也」，故不敢確指其事，但以爲衛人從軍者自言其所爲而已。至姚氏際恒始駁之云：「按此事與經不合者六。」愚謂不必推論過細，但卽「平陳與宋」及「不我以歸」二語，已大不相符。夫所謂平者，平其禍亂也。州吁圍鄭，是要宋與陳、蔡同行，何以獨云陳、宋而不及蔡，亦何可謂之爲「平陳與宋」？圍鄭僅五日而還，何以謂之「不我以歸」？若云衛人惡州吁，故未出師豫爲喪亡之言以刺之，然則圍鄭還至秋再舉，未見其敗，此詩爲不實，刪之可也，又何存乎？故姚氏疑爲衛穆公背清丘之盟，救陳爲宋所伐，平陳、宋之難，數與軍旅，其下怨之而作，言頗近似。然細玩詩意，乃戍卒嗟怨之辭，非軍行勞苦之詩。當是救陳後晉、宋討衛之時，不能不戍兵防陞，久而不歸，故至嗟怨，發爲詩歌。始叙南行之故，繼寫久留懈散之形，因而追憶室家叙別之盟。言此行雖遠而苦，然不久當歸，尚堪與子共期偕老，以樂承平。不意諸軍悉回，我獨久戍不歸。是曩以爲濶別者，今竟不能生還也；曩所云「與子偕老」者，今竟不能共申前盟也。夫國家大役，無過「土國城漕」，然尚爲境內事。卽征伐敵國，亦尚有凱還時。惟此邊防戍遠，永斷歸期，言念室家，能不愴懷？未免咨嗟涕洟而不能自

已。此戍卒思歸不得詩也，又何必沾沾據一時一事以實之哉？

【眉評】四章有此一章追叙前盟，文筆始曲，與陳琳飲馬長城窟行機局相似。【五章】連用「于嗟」

字反轉上意，毫不費力。此種最宜學。

【集釋】「鐙」鼓聲也。【踊躍用兵】曾氏鞏曰：鐙然擊鼓，踊躍用兵，想見州吁好兵喜鬪之狀也。【土】土

功也。【漕】衛邑名。王氏應麟曰：通典：滑州白馬縣，衛國漕邑，戴公廬于漕卽此。【孫子仲】集

傳曰：孫氏子仲，字。時軍帥也。毛氏萇曰：孫子仲，謂公孫文仲也。姚氏際恒曰：衛穆公時有孫

桓子良夫，良夫子文子林父，相繼爲卿。所云孫子仲者，不知卽其父若子否也。存參。【爰】於也。

【契濶】隔遠之意。【成說】謂約誓有成言也。【活】生還也。【洵】信也。【信】與申同。

【標韻】鐙七陽兵八庚行七陽轉韻 仲一送宋二宋仲一東，叶敎聲反。叶韻 馬二十一馬下同本韻 濶七曷說九屑

轉韻 手二十五有老十九時，叶魯吼反。叶韻 濶、活並曷本韻 洵十一真信同本韻

### 凱風 孝子自責以感母心也。

凱風自南，吹彼棘心。棘心天天，母氏劬勞。一章凱風自南，吹彼棘薪。母氏聖善，我無令人。二章爰有寒泉，在浚之下。有子七人，母氏勞苦。三章睨睨黃鳥，載好其音。有子七人，莫慰母心。四章

右凱風四章，章四句。序、傳均以爲衛之淫風流行，雖有七子之母，猶不能安其室。諸家解

此，遂無異說。惟《集傳》以爲七子自責之辭，非美七子之作，較《序》差精。然何以見其爲淫風流行耶？孟子曰：「《凱風》，親之過小者也。」若爲淫風所染，則豈「小過」已哉？蓋古來婦人改嫁，原屬當然，故曰「小過」。乃一改適，遂目爲淫，恐天壤間無處而非淫風矣。夫七子自責，而母心遂安，子固稱孝，母亦不得謂爲不賢也。且子自責之心，原欲婉詞幾諫，未嘗顯彰親過，今乃以爲「淫風流行」，母難自守，是欲掩親之過者，乃適以彰親之惡也。又豈孝子所樂聞哉？況詩中本無淫詞，言外亦無淫意，讀之者方且徘徊沁心，歎爲純孝感人，更何必誣人母過，致傷子心？仁者之言，恐不其然。故愚謂七子之母猶欲改節易操者，其中必有所迫。或因貧乏，或處患難，故不能堅守其志，幾至爲俗所搖。然一聞子言，母念頓回，其惻然不忍別子之心，必有較子心而難舍者。而謂之爲淫也得乎？不然，慾心已動，詎能速挽？故知其斷非爲淫起見也。此詩之存，豈獨以美孝子，亦將以表賢母耳。

【眉評】言婉而意愈深。

【集釋】《凱風》李氏巡曰：南風長養萬物，萬物喜樂，故曰凱風。凱，樂也。《棘》小木。毛氏萇曰：棘，難長養者。《天天》蔡氏卞曰：棘非能順者，而凱風有母之道便能吹之，使其心天天然和以茂也。《棘薪》毛氏萇曰：棘薪，其成就者。《聖善》嚴氏粲曰：聖者，明達之稱；善者，賢淑之稱。《令》善也。《浚》衛邑。王氏應麟曰：《水經注》：濮水枝津，東逕浚城南，而北去濮陽三十五里。城側有寒泉岡，卽《詩》「爰有寒泉，在浚之下」。世謂之高平渠，非也。《睽睽》毛氏萇曰：睽睽，好貌。

【標韻】南十三覃心十二侵通韻 天二蕭勞四豪通韻 薪十一真入同本韻 下二十一馬，叶後五反。苦七廉叶韻  
音十二侵心同本韻

校記

〔一〕「萬物」二字，據《毛詩正義》補。

### 雄雉 期友不歸，思以共勗也。

雄雉于飛，雄飛興起。泄泄其羽。文采。我之懷矣，自貽伊阻。一章雄雉于飛，下上其音。聲音。展矣君子，實勞我心。二章瞻彼日月，往來歲月。悠悠我思。道之云遠，兼隔關山。曷云能來。三章百爾君子，不知德行。不忮不求，何用不臧。歸重不如修德，雖伏亦佳。至理名言。○四章

右《雄雉》四章，章四句。《小序》謂「刺衛宣公」。《大序》謂「淫亂不恤國事」。《集傳》則以爲婦人思夫從役于外之作，非國人所爲也。姚氏際恒云：「上三章可通，末章難通，不敢強說。」總因泥讀「雄雉」二字，故求其說而不得耳。蓋以爲友朋相勗之辭，則「雄雉」二字不可解。如以爲夫婦相思之作，則「百爾君子」實難通。殊不知「雄雉」者，雄飛之象也，而雉又有文采，可以章身，故取以喻丈夫之有志高齋而欲顯名當世者，非男女雌雄之謂也。《老子》曰：「知其雄，守其雌，爲天下谿。」是雄以喻高，雌以喻卑之意。且詩首章「泄泄其羽」者，喻文采之光輝也。「下上其音」者，喻令聞之廣譽也。而下云「自貽伊阻」，又曰「展矣君子」者，誠哉其爲君子也。但欲高齋，以致遠隔，誰實使之？乃自貽耳。何



則？吾人之所以自立者，名固當爭，實尤宜務。今以務名之故，蹉跎歲月，更阻隔關山，是徒馳逐於外而不反求諸內者之過也；是不知修德立行以爲實至名歸者之過也。誠能反求諸身，毋忿人而生嫉忌之心，毋枉己而敗貪求之念，則何人而不自得哉？即使雌伏，亦勝雄飛，又何必遠適他邦，廣求人譽，不知自返，使我勞心？此友朋相望而相勉之詞，不知諸儒何以認爲婦人作，且以爲刺宣公「淫亂不恤國事」作。淫亂詞固未嘗見，卽男女情亦何可信哉？讀古人詩，當眼光四射，不可死於句下者，此類是也。

【眉評】「一章」首章言遠行乃自取。

「二章」次言懷想之至。

「三章」三章言難來之故。

「四章」末

期自勉，亦以共勗。

【集釋】「雉」野雞雄者有冠，長尾，而其羽文明，可用爲儀。「泄泄」李氏樗曰：泄泄，自得也。「阻」隔也。

「展」誠也。「伎」害也。「求」貪也。「減」善也。

【標韻】羽七虞阻六語通韻 音十二侵心同本韻 思四支來十灰通韻 行七陽減同本韻

## 匏有苦葉 刺世禮義漸滅也。

匏有苦葉，匏葉興起。 濟有深涉。 深則厲，淺則揭。 知淺深是通篇主腦。○一章有淵濟盈，有鷺雉鳴。 濟盈不濡軌，不知淺深。 雉鳴求其牡。 因而不識倫類。○二章雝雝鳴雁，轉入正意，映帶雉鳴。 旭日始旦。 士如歸妻，迨冰未泮。 昏媾須時，不脫水字。○三章招招舟子，人涉卬否。 知淺深。 人涉

印否，印須我友。共濟宜得同心。○四章

右《匏有苦葉》四章，章四句。《序》謂刺宣公也，公與夫人竝爲淫亂。《辯說》云：「未有以見其爲刺宣公夫人之詩。」故《集傳》但泛指爲淫亂之人，所見亦是。但篇中「雉鳴求其牡」，又似非泛泛然者。故姚氏際恒亦以爲《序》說可從。而前後文義絕不相屬，則又以爲「四章各自立義，不爲連類之辭」。詩豈有四章各自立義，不相連類之理？凡此皆固執「雉鳴求其牡」，以爲實指宣公之說，故致前後文義自生轉輾，絕不可解。詳味詩詞，非不連屬，亦非不明顯，特其製局離奇變幻，措詞譎詭隱微，若規若諷，忽斷忽連，故難驟解。以愚所見，直是一篇諷世座右銘耳。首章借涉水以喻涉世，提出深淺二字作主，以見涉世須當有識量，度時務，知其淺深而後行，是全詩總冒。次章反承不識淺深，明明濟盈濡軌矣，而自以爲不濡，並帶出鳴雉求非其類而自以爲偶，以喻反常亂倫肆無忌憚之人，惟其不度世道淺深，故至越禮犯分而亦不知自檢也。「雉鳴」句引起鳴鴈歸妻意，「濟盈」句引起「人涉印否」意。一反一正，大開大合，章法脈絡，原自井然，一絲不亂。意以爲吾人處世，倫行爲重。夫婦之初不以禮合，他可知。士人應世，幹濟爲先。同舟之內苟無良朋，覆可立待。故不欲整綱飭紀則已，如欲整綱飭紀，則必自昏媾始。古之昏媾多在春前，「迨冰未泮」，此其時也。不欲涉身處事則已，如欲涉身處事，則必如濟川然。世之濟險必得同心，「印須我友」，詎可少哉？此雖刺世乎，實自警耳。詩人之意，未必專刺宣公，亦未必非刺宣公。因時感事，觸物警心，風詩義旨，大都如是。故謂之刺世也可，謂之刺宣公也可，謂之警世也可，即謂之自警也，亦無不可。是在乎善讀《詩》者。

觸處旁通，悠游涵泳，以求其言外意焉，斯得之耳。

【眉評】「一章」正起。「二章」翻承。「三、四章」正、轉分二層說，通篇以涉水喻處世。中間插入雄雁喻倫物，詞旨隱約，局陣離奇，忽斷忽連，若規若諷，極風人之意趣。

【集釋】「匏」陳氏子龍曰：匏，似瓠而圓，亦曰壺盧。性善浮，腰之可以涉水。《鵲冠子》：「中流失船，一壺千金。」《濟》渡處也。《涉》行渡水也。《厲揭》以衣而涉曰厲。褰衣而涉曰揭。《灞》水滿貌。《鸛》雄雉聲。《軌》車轍也。《求牡》《爾雅》：釋獸，正例，飛曰雌雄，走曰牝牡。今《詩》言求其牡，是不特以雌求雄，且以飛之雌求走之牡，其無倫也甚矣。以喻亂倫之人，不顧匹偶如是。《鴈》鳥名。鄭氏康成曰：鴈者，隨陽而處，似婦人從夫，故昏禮用焉。《冰未泮》姚氏際恒曰：古人行嫁娶必于秋冬農隙之際，故云「迨冰未泮」。《荀子·大略篇》云：「霜降迎女，冰泮殺內。」正解此詩語也。《招招》號召之貌。孔氏穎達曰：王逸云：「以手曰招，以言曰召。」《叩》我也。

【標韻】葉十六葉涉同揭九屑通韻 盈八庚鳴同本韻 軌四紙，叶居有反。牡二十五有叶韻 且十五幹泮同本韻 否二十五有友同本韻

## 谷風 逐臣自傷也。

習習谷風，以陰以雨。以陰陽失調興起。 眈眈同心，同心是夫婦常理。 不宜有怒。采葑采菲，無以下體。比。德音莫違，及爾同死。惟同心乃可同死。○一章行道遲遲，中心有違。入題簡捷，不忍遽

去。不遠伊邇，薄送我畿。望其短送。誰謂荼苦，其甘如薺。心苦逾甚。宴爾新昏，如兄如弟。奈爾新昏何。○二章涇以渭濁，借涇自喻。湜湜其沚。宴爾新昏，不我屑以。毋逝我梁，毋發我笱。不忘舊地舊物。我躬不閱，遑恤我後！旋又自歎自解。○三章就其深矣，方之舟之。就其淺矣，泳之游之。治事淺深皆宜。何有何亡，罔勉求之。家計有無不論。凡民有喪，匍匐救之。濟人之急。○四章不我能情，反以我爲讎。承上轉落有力。既阻我德，賈用不售。推原其故。昔育恐育鞠，及爾顛覆。昔頗有勞。既生既育，比予于毒。今乃相仇。○五章我有旨蓄，亦以御冬。無聊賴中忽念及瑣細事，愈覺可傷。宴爾新昏，以我御窮。有洗有潰，既貽我肄。不念昔者，伊余來塋。回應「同心」。○六章

右《谷風》六章，章八句。《小序》曰：「刺夫婦失道也。」今味詩詞，夫失道有之，婦則未見爲失。《大序》以爲「衛人化其上，淫於新昏而棄其舊室」。朱子《辯說》既云「未有以見化其上之意」，後又言「宣姜有寵而夷姜繼，是以其民化之，而《谷風》之詩作」。前後兩說，迥不相蒙，何也？此詩通篇皆棄婦辭，自無異議。然「凡民有喪，匍匐救之」，非急公嚮義、胞與爲懷之士，未可與言，而豈一婦人所能言哉？又「昔育恐育鞠，及爾顛覆」，亦非有扶危濟傾、患難相恤之人，未能自任，而豈一棄婦所能任哉？是語雖巾幗，而志則丈夫。故知其爲託詞耳。大凡忠臣義士不見諒於其君，或遭讒間遠逐殊方，必有一番冤抑難於顯訴，不得不託爲夫婦詞，以寫其無罪見逐之狀。則雖卑詞異語中時露忠貞

鬱勃氣。漢、魏以降，此種尤多。然皆有詩無人，或言近旨遠，借以諷世，莫非脫胎於此，未可遽認爲真也。至其文義，集傳及諸家訓之甚詳，故不再贅，茲僅發其大凡如此。

【眉評】「一章」通章全用比體。先論夫婦常理作冒。【二章】次言見棄，即從辭別起，省却無數筆墨。

【三章】三乃推言見棄之故，在色衰不在德失。【四章】四自道勤勞，見無可棄之理。【五章】五言

夫但念勞於貧苦之時，而相棄於安樂之後。【六章】末即瑣事見夫之忍且薄，因追憶及初來相待之

厚，掉轉作收，章法完密。

【集釋】谷風嚴氏粲曰：來自大谷之風，大風也，盛怒之風也。又習習然連續不絕，所謂「終風」也。又陰又雨，無清明開霽之意，所謂「嘒嘒其陰」也。皆喻其夫之暴怒無休息也。舊說谷風爲生長之風，以谷爲穀者非。【葑】蔓菁也。陳氏子龍曰：「埤雅云，燕菁似菰而小，有臺，一名葑，一名須，俗謂之臺菜。其紫花者謂之蘆蕪，一名萊蕪。所謂溫菰也。梗長葉瘦，高者謂菰，葉潤厚短者爲燕菁。【菲】蒿類也。郭氏璞曰：即土瓜也。【下體】根也。【畿】郊畿也。孔氏穎達曰：畿者，期限之名，故周禮九畿及王畿千里，皆期限之義。經云「不遠」，故云「薄送」，蓋望之之辭，非真送也。【集傳】以爲送之門內者，非。【茶】苦菜，蓼屬。邢氏曷曰：茶，味苦。【月令】「孟夏苦菜秀」，是也。【薺】陶氏弘景曰：薺，味甘。人取其葉作茹及羹，亦佳。【涇】水名，出今甘肅平涼府笄頭山，至高陵縣入渭。【渭】水名，出今甘肅渭源縣鳥鼠山，至陝西高陵會涇，亦入于河。【湜湜】清貌。涇濁渭清，然未與渭滙時，則亦覺其清也。【沚】渚也。【屑】潔也。【逝】之也。【梁】堰。石障水而空其中曰梁。【筍】竹器，承梁以

取魚者也。〔閔〕容也。〔方〕許氏慎曰：方，併船也。〔匍匐〕手足並行，急遽甚也。〔情〕養也。〔阻〕却也。〔鞠〕窮也。〔御〕當也。〔洗〕武貌。〔潰〕怒色。〔肆〕勢也。〔墜〕息也。黃氏一正曰：婦三月廟見，然後執婦功，故婦初來曰息也。

【標韻】兩七遇怒同本韻 體八齊死四紙通韻 遠五微幾同本韻 齊八齊弟同本韻 沚四紙以同本韻 笏二十五有後同本韻 舟十一尤游、求並同救二十六宥，叶居尤反。叶韻 鐸十一尤售同本韻 覆一屋毒二沃通韻 冬二冬窮一東通韻 肆四寘堅同本韻

### 式微 黎臣勸君以歸也。

式微式微，胡不歸？微君之躬，胡爲乎中路？  
式微式微，胡不歸？微君之躬，胡爲乎中路？  
中？二章

右《式微》二章，章四句。《序》云：「黎侯寓於衛，其臣勸以歸也。」此必有所據，故可從。而《辨說》又以無黎侯字疑之，則未免失之刻矣。《集傳》既從其說，又加「失國」二字，反較支離。蓋失國則不能歸，故《序》但云「寓於衛」耳。此必黎侯被逐後，不久狄亦自退，故可歸不歸，其臣因以勸也。夫既以是詩而屬之黎國臣子之詞，則律以主憂臣辱、君辱臣死之義，是今日之君，辱在泥塗之君也，今日之臣，不當周旋左右與共患難，而乃以此歸咎其君，不肯久事暴露乎？殊不知狄人既退，國虛無主，所謂當今之時，社稷爲重君爲輕也。使諸臣非爲君故，其誰肯久羈人國，徒爲此狼狽形乎？君乎君乎，尚

思早作歸計，共圖恢復，振此式微之世也乎！黎侯平素必優游頹懦以致被逐，迨至狄退仍無遠志，徒望人憐而人又不我憐。其臣憂之，故作此以勸其歸。其一片憂國愛君之心溢於言表，至今猶聞其聲也。

【眉評】語淺意深，中藏無限義理，未許粗心人鹵莽讀過。

【集釋】「式」發語辭。「微」衰也。「爾雅」：式微式微者，微乎微者也。「微」猶非也。「中露」猶言暴露也。「泥中」猶言泥塗也。毛氏甚曰：中露、泥中，衛邑也。此或後人因經而附會其說耳，不可從。

### 旄丘 黎臣勸君勿望救於衛也。

旄丘之葛兮，何誕之節兮？叔兮伯兮，何多日也？一章何其處也？必有與也。何其久也？必有以也。二章狐裘蒙戎，匪車不東。叔兮伯兮，靡所與同。三章瑣兮尾兮，流離之子。叔兮伯兮，裒如充耳。四章

右「旄丘」四章，章四句。《序》謂「黎臣責衛伯不能修方伯連率之職，以救之也」。愚謂已不自振，人又何咎？但望救之心至無可望，不能不以此勸君早歸耳。蓋其始猶有奢望之心，故雖時物變遷，待久不至，猶登高以望之曰：衛非必無意於我也，蓋其處也，必有所待與我以伐狄也。其久也，又必有所挾以安吾國也。迨至遲之又久，途窮裘敝，終不見來，始知其無意於我。我之不敢東向以求人者，正爲衛之諸臣無與同心故耳。我之流離尾瑣其矣，而人方且褒然盛服，袖手旁觀，置若罔聞，是真絕意

於我也。人既若此，我復何望？不如謀歸故國之爲愈矣。詞若責人，意實勸君。與前篇同一憂國愛君之心。若作責人觀，則忠臣之意泯矣！

【眉評】「二章」姚氏際恒曰：自問自答，望人情景如畫。

【集釋】「施丘」孔氏穎達曰：「釋邱」云：「前高後下曰施丘。」王氏應麟曰：「寰宇記：施丘在澶州臨河縣東。」「誕」姚氏炳曰：「毛傳」訓誕爲濶，無義。誕與覃通，猶「葛覃」之覃也。「書」之誕敷，亦作覃敷，可證。覃，延也。誕從延，有延長意。此說較優，從之。「與」姚氏際恒曰：與，與我伐狄也。義較優。「以」姚氏際恒曰：能左右之曰以。「狐裘」玉藻：君子狐青裘豹褱，玄綃衣以楊之。注：君子，大夫士也。「蒙戎」亂貌，言褻也。「不東」黎在衛西，故人衛必向東。言非我君之車不東來。「瑣」細也。「尾」末也。「流離」漂散也。「衰」姚氏際恒曰：衰當從「毛傳」，謂盛服貌。董氏漢策曰：「今大夫衰然爲舉首」。師古注曰：「衰然，盛服貌。」鄭氏謂「笑貌」，謬。「集傳」訓「多笑貌」，蓋本鄭也。「充耳」塞耳也。

【標韻】節九屑曰四質通韻 處六語與同本韻 久二十五有，叶舉里反。以四紙叶韻 戎一東東、同並同本韻 子四紙耳同本韻

簡兮 賢者自傷失位而抒所懷也。

簡兮簡兮，方將萬舞。日之方中，在前上處。分別舞人、舞名、舞時、舞地。○一章碩人俟俟，公庭



萬舞。有力如虎，執轡如組。武舞如是。○二章左手執籥，右手秉翟。文舞又如是。赫如渥赭，公言錫爵。均能盡職，故受榮寵。○三章山有榛，隰有苓。云誰之思？西方美人。彼美人兮，西方之人兮。然我之所懷，則別有在。所思爲誰？蓋西京聖王耳。反覆咏歎，神味無窮。○四章

右簡兮四章：三章，章四句，一章六句。從集傳。序、傳皆言「賢者仕於伶官」之辭。惟序則以爲「刺不用賢」，傳則以爲「賢者自作」，且有「輕世肆志之心」，立說各異。姚氏際恒亦主序言，以爲「玩世不恭，何以稱賢」，必非賢者自作，乃詩人贊美賢者耳。愚觀末章非賢者不能自道其胸臆，餘亦未見有玩世不恭意。乃集傳誤訓「簡兮簡兮」以爲「簡易不恭意」，故並下文亦疑其爲誇大詞。遂使才德兼優之士，變而爲輕狂傲慢之徒，如補正平羯鼓三搥、解衣磅礴一流人物。夫豈三代以上學歟？此皆傳注者之過，非經過也。觀其自敘，將欲習舞，先簡舞人，次定舞日，再擇舞地。而舞分文武，其武舞也，力必如虎，轡必如組，方爲稱職。其文舞也，籥必左手，翟必右手，乃能如儀。及其既事錫爵於公，無慢容，亦無忤色，顏如渥赭，裕如也，而可不謂之爲賢乎？又何嘗有一毫自恃其賢，玩世不恭，以致懈乃公事耶？特其抱負不凡，有不盡是而止者。蓋所挾者大，所見者遠，故不禁有懷西京盛世，而慨然想慕文武成康之至治不復得見於今日，因借美人以喻聖王，而獨寄其遐思焉。後儒不察，一見詩中有「碩人」「如虎」等句，遂指爲誇大詞。又見卒章忽追憶及於「西方美人」，更疑其爲思遇明主以見用。於是多方擬議，或以爲狂，或以爲賢，要非當日賢者所肯受，亦非當日賢者所能辭，可不慨哉？

【眉評】「一章」從將舞敘起。

【四章】慨然遐想，有高乎一世之志。

【集釋】「簡」姚氏際恒曰：簡，說文分別之也。謂方將萬舞，故先分別舞人，如「諸侯用六」是也。「萬舞」集傳曰：萬者，舞之總名。武用干戚，文用羽籥也。姚氏際恒曰：萬舞，商頌曰「萬舞有奕」，則其名已久。毛傳謂干羽，按干爲武舞，羽爲文舞，兼文武言。鄭氏謂「干舞」，則單指武舞，因引左傳「振萬」之言，以萬舞爲武舞，與諸說異存參。「日之方中」姚氏曰：孔氏引「月令」仲春之月，命樂正習舞人學，謂「二月日夜中」也，亦通。「碩人」碩，大也。朱氏道行曰：稱人而曰碩，重其品也。愚謂碩人不必重看，對下「有力如虎」可知。「侯侯」大貌。朱氏曰：指形體，亦帶威儀說。「鸞」鸞也。「組」織絲爲之，言其柔也。「籥」如笛而小。孔氏穎達曰：樂雖吹器，舞時與羽並執，故得舞名。賁之初筵云「籥舞笙鼓」是也。「翟」雉羽也。「赫」赤貌。「渥」孔氏穎達曰：渥者，浸潤之名。「赭」赤色，言其顏色之充盛也。「錫爵」徐氏鳳彩曰：工告樂備，則主人獻工。主人，宰夫也。然必錫之於君，故曰「公言錫爵」，重君命也。「榛」似栗而小。「隰」下濕曰隰。「苓」集傳曰：苓，一名大苦，葉似地黃，卽今甘草也。

【標韻】舞七庚處六通韻。

侯七庚舞、虎、組並同本韻

籥十葉翟十二錫，叶直角反。

爵十葉叶韻

榛十一真

苓九青人十一真通韻

泉水 衛媵女和載馳作也。

悲彼泉水，從衛地起。亦流于淇。有懷于衛，入衛事。靡日不思。變彼諸姬，聊與之謀。知諸姬

之無能爲，故曰聊與謀。○一章出宿于泚，飲餞于禰。夫人若行，我當祖餞。女子有行，遠父母兄弟。

但還須問我諸姑，遂及伯姊。直白如話，是商量語。○二章出宿于干，飲餞于言。載脂載率，還

車言邁。遄臻于衛，不瑕有害。此乃是勸其行，想亦無害。○三章我思肥泉，茲之永歎。思須與

漕，我心悠悠。自寫胸臆。駕言出遊，以寫我憂。四章。

右《泉水》四章，章六句。《序》言「衛女嫁于諸侯，父母終，思歸寧而不得，故作此詩以見志。」《集傳》因之。然詩詞未見有父母終意。何氏楷則以此篇及《竹竿》一例，與《載馳》爲許穆夫人不能救衛，思控大國之作。姚氏際恒駁之，以爲無證，而且多複句，非一人作。又疑爲許穆夫人媵妾之詞，而終不敢定。愚玩此詩與《竹竿》雖同爲思歸之詞，而意旨迥殊。《竹竿》不過想慕故國風景人物及當年遊釣之處，而此則直傷衛事，且爲衛謀，與《載馳》互相唱和也。《載馳》云「載馳載驅，歸唁衛侯」，此則云「飲餞于禰」，「飲餞于言」。《載馳》云「驅馬悠悠，言至于漕」，此則云「思須與漕，我心悠悠」。《載馳》云「控于大邦，誰因誰極」，此則云「變彼諸姬，聊與之謀」。《載馳》云「大夫君子，無我有尤」，此則云「問我諸姑，遂及伯姊」。詞鋒相對，語無虛設，非唱和而何？至其立言，亦各有體。嫡本欲咎大夫君子，媵則但問諸姑伯姊。嫡本欲控于大邦，媵則但謀彼諸姬。嫡欲馳至於漕，媵則但思須與漕。嫡欲歸唁衛侯，媵則但餞于禰、于言。嫡媵口吻，各如其分，絕不相陵。故又知其爲妾和，非夫人作也。蓋媵亦衛女，故同關心，亦人情之常耳。若但云「思歸寧不得而作」，則婦女之歸寧與不歸寧有何關係，

而必存之以爲後世法耶？姚氏既疑爲賸作，而又以爲「無證」，不知其何所謂證也？唯此詩既與「載馳爲唱和，則當序載馳」後，而乃編諸「邶風」內，則不可解。

【眉評】「一章」凡事勸謀外戚，是婦女聲口。然非爲衛，何謀之有？「二章」問及諸姑伯姊，不失妾媵身分。「三、四章」餞于櫛，又餞于言，是虛想餞地而已，非真餞也。餞既不成，則唯有思潛以寫我憂耳。

【集釋】「處」泉水出貌。「泉水」卽今輝縣百泉也。「淇」水名，出今彰德府林縣。「變」何氏楷引《說文》訓慕，可從。「諸姬」周同姓國也。衛，姬姓。故欲與謀，以復衛也。夫人欲控大邦，妾欲謀諸同姓，亦互相商酌語。若謂歸寧，則問我諸姑，並及伯姊可也，何必謀之同姓國耶？「洙」地名。王氏應麟曰：「《地理志》，禹貢導洙水東流爲洙，東郡臨邑有洙廟。」「櫛」亦地名。王氏曰：「《寰宇記》，大櫛溝在曹州冤句縣北七十里。」「諸姑伯姊」劉氏瑾曰：夫人之嫁必有姪娣二人爲媵，而同姓二國往媵之亦有姪娣，皆謂之媵，凡八人。案：此諸姑伯姊，則夫人之媵妾輩也。前云「謀彼諸姬」者，謀復衛于同姓之國也。此云問我諸姑者，商夫人之行於同輩也。語意絕不相侔，而《集傳》與姚氏均謂諸姬卽諸姑伯姊，詩豈如是之重複冗雜耶？「干言」二地名。王氏應麟曰：「《隋志》，邢州內邱縣有干言山。」李山緒曰：柏人縣有干山、言山。柏人，邢州堯山縣。「脂」以脂膏塗車牽，使滑澤也。「牽」陸氏明德曰：牽，車軸頭金也。「遘」疾也。「臻」至也。「瑕害」姚氏際恒曰：「不瑕有害。」謂我之歸不爲瑕過而有害。較鄭氏以害訓何，《集傳》又謂瑕卽何爲可通。但此是夫人可行語，非妾自道也。「肥泉」水名，

亦衛地。〔須漕〕孔氏穎達曰：「鄭云：『以廬於漕。』漕是衛邑，須與漕連，明亦衛邑。案：衛文公爲狄所逐時廬於漕，故所思在此。〔寫〕漕通，輸洩之意。」

【標韻】淇四支思同謀十一尤，叶讓悲反。叶韻 補八舞弟同姊四紙通韻。

千十四寒言十三元通韻 邁十卦害九

秦通韻 泉一先歎十四寒通韻 悠十一尤憂同本韻

### 北門 賢者安於貧仕也。

出自北門，憂心殷殷。終窶且貧，莫知我艱。已焉哉，天實爲之，謂之何哉。一章王事適我，政事一埤益我。我人自外，室人交徧謫我。已焉哉，天實爲之，謂之何哉。二章王事敦我，政事一埤遺我。我人自外，室人交徧摧我。已焉哉，天實爲之，謂之何哉。三章

右北門三章，章七句。此賢人仕衛而不見知於上者之所作。觀其王事之重，政務之煩，而能以一身肩之，則其才可想矣。而衛之君上乃不能體恤周至，使其「終窶且貧」，內不足以畜妻子而有交謫之憂，外不足以謝勸勞而有敦迫之苦。重祿勸士之謂何，而衛乃置若罔聞焉。此詩之所以作也。然則衛之政事不從可知哉？夫以國士遇我者，以國士報之；以庸衆遇我者，以庸衆報之，亦屬事所常然。而詩乃隨遇安之，盡心竭力，爲所當爲，行所得行而已。迨至無可奈何，則歸之於天，不敢怨懟於人，而可不謂之爲賢乎？若使朱買臣、蘇季子二人處此，不知如何揣摩時勢以求一售，必力爭夫世之所謂勢位富厚者，以誇耀於妻嫂，不洩其憤焉不止，詎肯終受室人交謫哉？以彼方此，則品誼之懸殊

爲何如也？然必曰「出自北門」者，抑又何故？抑在衛北，此或邶士所爲，亦未可知。

【眉評】「一章」莫知二字是主。【二章】室家勢利之情如畫，可謂摹寫殆盡。【三章】委之於天而已。

【集釋】「寔」孔氏穎達曰：「釋言」云：「寔，貧也。」則貧寔爲一。此「終寔且貧」爲二事之辭，故寔與貧別。寔謂無財可以爲禮，貧謂無財可以自給。何氏楷曰：「寔」，說文，無禮居也。【王事】范氏處義曰：「王事，上所命之事也。【政事】范氏曰：「政事，職所治之事也。【適】之也。【一】猶皆也。【埤】厚也。」

【適】實也。【敦】迫也。【摧】說文，擠也。猶云排擠。

【標韻】門十三元殷十二文貧十一真艱十五刪，叶居艱反。通韻 之四支哉十灰通韻 適十一陌益、謫並同本韻 敦十三元遺四文，叶夷回反。摧十灰叶韻

### 北風 賢者見幾而作也。

北風其涼，雨雪其雱。惠而好我，攜手同行。其虛其邪，既亟只且。一章北風其喈，雨雪其霏。惠而好我，攜手同歸。其虛其邪，既亟只且。二章莫赤匪狐，莫黑匪烏。姚氏曰：「變得峻峭，聽其不可解，亦妙。」惠而好我，攜手同車。其虛其邪，既亟只且。三章

右北風三章，章六句。姚氏際恒云：「此篇自是賢者見幾之作，不必說及百姓。」是。蓋見幾唯賢者乃早，百姓豈能及也。愚觀詩詞，始則氣象愁慘，繼則怪異頻興，率皆不祥兆，所謂國家將亡，必有妖

孽時也。赤狐黑鳥，當時或有其怪，或聞是謠，皆不可知。總之，敗亡兆耳。故賢者相率而去其國也。但不知其爲衛作乎，抑爲邶言乎？若以詩編邶風內，則當爲邶言爲是。與首篇《柏舟》憂謫憫亂之作相應。蓋彼知其將亂而不忍去，此則見其將亡而必速去。一明哲以保身，一忠貞而受禍，雖曰時位不同，亦各行其志焉已矣！

【眉評】「一章」氣象愁慘。「二章」妖孽頻興，造語奇闢，似古童謠。

【集釋】「雩」雪盛貌。「惠」愛也。「虛」寬貌。「邪」陸氏德明曰：「爾雅」作徐。「亟」急也。「只且」歐陽氏修曰：「其虛其邪，既亟只且」者，言無暇寬徐，當亟去也。「嗜」疾聲也。「狐」獸名。陸氏佃曰：舊說以狐有媚珠，善變化，其爲物妖淫，故詩以刺惡。「鳥」陸氏佃曰：鳥，一名鴉，其名自呼，體全黑。

【標韻】涼，七陽勢，行並同本韻。邪音徐，六魚。且同。本韻。嗜九佳霏五微歸同通韻。狐七虞烏同車六魚通韻。

### 靜女 刺衛宣公納伋妻也。

靜女其姝，俟我於城隅。愛而不見，搔首踟躕。華神。○一章靜女其變，貽我彤管。彤管有煒，說懌女美。○二章自牧歸荑，洵美且異。匪女之爲美，美人之貽。○三章

右《靜女》三章，章四句。《序》謂「刺時」。毛、鄭推原其意，謂「陳靜女之美德以示法戒」。《集傳》則從歐陽氏說，斥爲男女相期會之詞。夫曰「靜女」，而又能執彤管以爲誠，則豈俟人於城隅者哉？城隅何地，抑豈靜女所能至也？於是紛紛之論起。呂氏大臨曰：「古之人君，夫人媵妾散處後宮。城隅

者，後宮幽閒之地也。女有靜德，又處於幽閒而待進御，此有道之君所好也。」已屬勉強穿鑿。而呂氏祖謙更主之，以爲此「述古者以刺衛君」，至謂「搔首踟躕」與「關雎」之「寤寐思服」同爲思念之切，亦何無恥之甚耶！夫「搔首踟躕」何可與「寤寐思服」同日並語？說《詩》至此，真堪絕倒。且滕女進御君王，何煩搔首不見，必說不去。然主此論者甚多，雖橫渠張子亦所不免。觀其詩曰「後宮西北遼城隅，俟我幽閒念彼姝」可見。然則「城隅」、「靜女」，果何所指而何謂乎？曰「城隅」卽新臺地也，「靜女」卽宣姜也。何以知之？案《水經注》「鄆城北岸有新臺」，《寰宇記》「在濮州鄆城縣北十七里」。孔氏穎達曰：「假妻自齊始來，未至於衛，故爲新臺。待其至於河，而因臺以要之。此所謂城隅也，所謂「俟我於城隅」之「靜女」也。宣姜初來，未始不靜而且姝，亦未始不執彤管以爲法。不料事變至於無禮，雖欲守彤管之誠而不能，卽欲不俟諸城隅而亦不得也。然使非其靜而且姝，則宣公亦何必爲此無禮之極乎？詩故先述其幽閒窈窕之色，以爲納媳張本。當其初來，止於城隅之新臺以相俟，宣公只聞其美而未之見，已不勝其搔首踟躕之思。及其既見，果靜而且姝，則不惟色可取，性亦可悅，而女方執彤管以相貽，煌煌乎其不可以非禮犯，則此心亦自止耳。無如世間尤物殊難自舍，則未免有佳人難再得之意，竟不顧惜廉恥，自取而自納之，亦「悅懌女美」之一念陷之也。又況美人自外攜來土物以相貽贈，又不啻珍重而愛惜之。夫豈物之足重耶？亦重夫美人所貽耳。描摹宣公好色無禮、逆理亂倫醜態，可謂窮形盡相，不遺餘力矣。特其詞隱意微，不肯明斥君非，故難測識。迨至下章《新臺》，則直刺無隱。愚故知此亦爲宣公發也。



【眉評】「一章」城隅二字是題眼。【二章】女美二字是罪案。【三章】愜心滿意之至。

【集釋】「靜」閒雅之意。「姝」美色也。「城隅」指鄆城北建新臺地，不言新臺者，微詞也。「踟躕」黃氏一正曰：搔首，人煩急則手爬其首。踟躕，行不前也。「嬖」好貌。「彤管」毛氏莒曰：古者后夫人必有女史彤管之法，事無大小，記以成法。「煒」赤貌。「牧」郊外也。「歸」亦貽也。「蕢」茅之始生者。姚氏炳曰：蕢，茅也。古茅所以藉物，易曰「藉用白茅」。此茅其藉彤管者歟？「洵」信也。

【標韻】姝七虞隅、踟並同本韻 嬖十六錫管十四旱通韻 煒五尾美四紙通韻 異四寘貽同上本韻

### 新臺 刺齊女之從衛宣公也。

新臺有泚，河水瀰瀰。地。燕婉之求，籛條不鮮。醜喻。○一章新臺有洒，河水浼浼。燕婉之求，籛條不殄。二章魚網之設，鴻則離之。雅譬。燕婉之求，得此戚施。三章

右「新臺」三章，章四句。「小序」云：「刺衛宣公也。」「大序」謂「納伋之妻，作新臺於河上而要之。國人惡之，而作是詩。」事見「春秋傳」固無可疑，而「集傳」既引其說，又以爲「於詩未有考」，不知何意？愚謂此刺宣姜之作，非但宣公也。「靜女」篇以刺宣公爲主而帶及夫人，此篇以刺夫人爲主而愈醜宣公。何也？婦人從一而終，不可改行易節，宣姜豈未之聞歟？當其初聘，本爲伋也妻，迨至新臺，乃爲伋也母。此稍有廉恥者所不忍聞，尚顧然立於人世乎？使其執意不從，宣公雖暴亦無如何。而乃柔情懦志將順其惡，以至逆理亂倫爲千古笑。雖曰非其本意，亦豈能辭咎哉？故國人明指其臺與

地，直刺厥非。曰：此非新臺乎？何其明且峻也！其下河水淵淵，互相罨映，又得佳麗鎮貯其中，則山川尤爲生色，卽此臺中人亦覺燕婉可遂，而豈知其得此醜疾人乎？夫此醜疾之人，其俯仰固不足以對人，而爾夫人國色無雙，亦甘心遺臭，能無有媿於中？所謂「魚網之設，鴻則離之」，所得非所求，醜亦甚矣。吾恐河水雖盛，難洗君羞。千載下有從新臺過者，猶將掩鼻而去之也。詩人之意如此。蓋惡之之甚，故亦不暇爲之隱約其辭矣。

【眉評】談笑而道之。

【集釋】「新臺」說見前。《爾雅》：四方而高曰臺。《泚》劉氏彝曰：泚，水中臺影鮮明之貌。《淵淵》盛也。《燕》安也。《婉》順也。《蓬條》疾之醜者也。本竹席名，編以爲因狀，如人之擁腫而不能俯，故又以名疾也。《鮮》鄭氏康成曰：鮮，善也。《洒》高峻也。陸氏德明曰：洒，《韓詩》作濯，鮮貌。《浼浼》平也。陸氏曰：浼，《韓詩》作渥。渥，盛貌。《殄》鄭氏康成曰：殄，當作腴。腴，善也。孔氏穎達曰：腴與殄，古今字之異。故《儀禮注》云：「腴，古文字作殄。」是也。《鴻雁之大者》。《離》麗也。《戚施》亦醜疾名。《晉語》云：蓬除不可使俯，戚施不可使仰。歐陽氏修曰：蓬除偃人，不可使俯，戚施僂人，不可使仰。明其俯仰有媿云耳。

【標韻】泚四紙淵同鮮十六統，叶想止反。叶韻 浼十脂，叶美辯反。殄十六統叶韻 離四支施同本韻

二子乘舟 諷衛伋壽以遠行也。

二子乘舟，汎汎其景。願言思子，中心養養。何不乘舟遠逝，使無踪影可覓。我願如此，子心其無疑哉。

○一章二子乘舟，汎汎其逝。願言思子，不瑕有害。從此而更長往，可以遠禍，可以掩親惡，於理固無有

害。○二章

右《二子乘舟》，二章，章四句。《序》《傳》皆以爲伋、壽爭死事，國人傷之而作。是詩古今說者都無異詞，而姚氏際恒獨以爲事與詩不合，疑之曰：「夫殺二子于莘，當乘車往，不當乘舟。且壽先行，伋後至，二子亦未嘗並行。衛未渡河，莘爲衛地。皆不相合。」古人亦未嘗見不及此，但求其解不得，故多方附會以爲之說。或以乘舟爲比，歐陽氏說。或造僞《序》與詩合，劉向《新序》。皆不免「固哉」之謂。然此詩舍却二子，亦無他解。況《序》於《新臺》後，則其迹尤顯然可見。但詩人用意甚微而婉，不可泥詩以求事，尤不可執事以言詩。當迂迴以求其用心之所在，然後得其意旨之所存。詩非賦二子死事也，乃諷二子以行耳。意以爲孝子事親，當先揆理，苟有當於理，雖違親命，亦於天理人情無傷；若沾沾固守小節，不達權變，非徒有害於身，亦且陷親不義，其於理又何當哉？夫古之人有行之者，舜是也。焚廬浚井，非不極人倫之變，而卒能保身以格親心，所以爲孝之大。使二子能見及此，必乘舟同往，汎汎遠逝，共適他邦以避禍患。盜賊雖兇，亦無從要而殺之。奈何徒拘小節，同殉一死，與晉世子申生先後如出一轍，豈不痛哉？吾願二子之行也，二子其能無意哉？詩意若此，亦非甚隱。姚氏執事以案詩，固自不合；即諸家曲爲之說，亦豈能得意旨？唯其詩之作，或諷之於未行之先，或傷之於既死之後，則難臆定。蓋二義均有可通故也。

【眉評】情迫意切，無限事理包孕其中。指點情形，音流簡外。

【集釋】「二子」謂伋、壽也。〔乘舟〕渡河如齊也。王氏應麟曰：「水經注：京相璠曰：陽平縣北十里有莘亭，自衛適齊之道。縣東有二子廟，猶謂之孝祠。〔景〕古影字。劉氏瑾曰：葛洪始加多爲影字。〔養〕猶漾漾，憂不知所定貌。〔逝〕往也。〔不瑕〕見泉水姚氏說。」

【標韻】景二十三梗，叶舉兩反。養二十二養，叶韻。近八聲害九奉通韻。

以上邶詩，凡十有九篇。舊說云，邶既入衛，詩皆衛事，而仍存其名，且居變風之首。今細玩之，抵大皆忠

臣智士、孝子良朋、棄妻義弟之所爲。中間淫亂之詩，僅靜女、新臺二篇，又刺淫之作，非淫奔者比。不知何以居變風之首？蓋變風云者，時變事變，詩亦與之俱變，故其音與體不得不變也。而衛爲殷墟，邶又朝歌舊地，故以衛次周、召，而邶更居三國之首。首邶所以首殷，此編詩次第也。其十九首中，有可實指爲「衛詩」者，有不必皆「衛詩」而亦編入其中者。如莊姜四詩及擊鼓、靜女、新臺、二子八詩，的爲衛事無疑。而八詩中，又僅莊姜四首爲自作，餘四首尚不知爲誰氏筆。式微、旄丘，則外臣之歸於衛者，泉水則衛女之作於他國者，不唯非邶人，抑且非「衛風」，顧何以謂爲衛詩耶？舊說又謂邶既亡，不得有時，而衛人所作仍繫之邶者，存其音耳。邶雖滅而音存，故非衛所能亂。然則莊姜非邶產，亦非居於邶，其音豈可爲邶？不事惟是，黎臣偶寓於衛，不久當歸，衛女雖生於衛而嫁於許，詩亦作於許，其音與邶更不能同，而何以雜乎邶？而不嫌於亂乎？故愚謂邶詩十九首，除莊姜自作四首及黎臣二首、衛女一首外，餘皆可爲邶人作。或以邶人而歌「邶風」，或以邶人而咏衛事，抑或作之於其國未併人衛之先，或作之於其國既併人衛之後，均之邶音，均可謂之「邶風」。唯既別其音於邶與衛之分，而又以衛詩雜入邶音之內，且以他國之偶關乎衛者而亦亂乎其中，則不可解。秦火而

後，羣籍蕩然，<sup>△</sup>時豈獨全？諸儒過信「反魯樂正」之言，不敢妄生疑議，故曲爲之說。然古序尚可僞爲，篇次能無錯簡？觀於本風莊姜諸作已自顛倒錯亂也可知已，何必巧爲之辯歟？

# 詩經原始卷之四

## 國風四

### 鄘

說見前篇。王氏應麟曰：「通典：衛州新鄉縣西南三十二里有鄘城，卽鄘國。案：此則王肅、服虔所謂鄘在紂都西者，非。蓋西亦迫山也。」

### 柏舟 貞婦自誓也。

汎彼柏舟，在彼中河。髮彼兩髦，實維我儀。之死矢靡他！母也天只，不諒人只！言婉而摯。  
○一章汎彼柏舟，在彼河測。髮彼兩髦，實維我特。之死矢靡慝！母也天只，不諒人只！二章

右柏舟二章，章七句。序謂「衛世子共伯蚤死，其妻共姜守義，父母欲奪而嫁之」，故共姜作此以自誓。集傳及諸家悉從之。呂氏祖謙更因序疑史記，謂衛武公襲攻其兄共伯之言，以爲共伯既蚤死矣，武公卽位時年已四十餘，焉得而篡弑之？姚氏際恒又因此而更疑序之非，以爲史記

可憑，詩序無據。共伯爲武公襲攻，人盡侯義，墓道也。自殺，時年較武公長，亦四十餘，又烏得而謂之蚤死？且共伯時已爲諸侯，而猶謂之爲世子，則序言尤悖。愚謂共伯即使蚤死，共姜爲諸侯世子妃，恐無夫死再醮之理。然則詩將誰屬？姚氏又云：「此詩不可以事實之。當是貞婦有夫蚤死，其母欲嫁之，而誓死不願之作。」其言較妥。夫婦人貞吉，從一而終，無論貴賤，均可風世。序必以共姜事實之，則未免失之鑒與固。邶、鄘二國不幸早亡，事雖無考，而柏舟二詩，一爲賢臣憂讒憫亂之作，一爲烈婦守貞不二之詞，皆可以爲後世法，又皆冠於二風之首。嗚乎，二國得此二詩，然後可以不亡，豈漫然哉！

【眉評】「一章」邶之柏舟曰「汎汎其流」，則爲中流不繫之舟，以喻國勢之危也。此之柏舟曰「在彼中河」，則爲中流自在之舟，以喻人心之定也。然置此詩於靜女、新臺、牆茨之間，不可謂之「中流砥柱」乎！

【集釋】「髧」徒坎切，髮垂貌。「兩髦」翦髮夾凶也。凶，音信。親死然後去之。許氏慎曰：「頭會腦蓋也，象形。孔氏穎達曰：夾凶故兩髦也。」內則：「翦髮爲髧，男角女髦。」注：「夾凶曰角，兩髦也。午達曰：髦，三髧也。」喪大記：「小斂，主人脫髦。」注：「幼時翦髮爲之。年雖成人，猶垂於兩邊，若父死，脫左髦，母死，脫右髦。親沒不髦，謂此也。」儀匹也。諒信也。只語助辭。特陸氏德明曰：特，韓詩作直，云相當值也。黃氏佐曰：特，如萬人之特，蓋婦人稱夫之辭。惡邪也，以是爲惡，則絕之甚矣。

【標韻】河五歌儀四支，叶牛何反。他五歌叶韻 天一先，叶鐵因反。人十一真通韻 側十三職特、惡並同本韻

### 牆有茨 刺衛宮淫亂無檢也。

牆有茨，不可埽也。中冓之言，不可道也。所可道也，言之醜也。一章牆有茨，不可襄也。中冓之言，不可詳也。所可詳也，言之長也。二章牆有茨，不可束也。中冓之言，不可讀也。所可讀也，言之辱也。三章

右《牆有茨》三章，章六句。《大序》謂「公子頑通乎君母，國人刺之。」《集傳》謂「理或然也」。衛宮淫亂，未必卽止宣姜，而宣姜爲尤甚。其始既失節於宣公，而有《靜女》、《新臺》之誚，其繼又失身於公子頑，而爲《牆茨》、《偕老》之羞，其「中冓之言」，尚可道哉？蓋廉恥至是而盡喪，有詩人不忍道、不忍詳、不忍讀者，而聖人猶錄之以著於經也，何哉？楊氏時曰：「自古淫亂之君，自以爲秘於閨門之中，世無得而知者，故自肆而不反。聖人所以著之於經，使後世爲惡者，知雖閨中之言，亦無隱而不彰也。其爲訓戒深矣。」斯言不獨爲此發，凡淫亂之詩均可作如是觀。後世漢、唐呂雉、武曌之類，皆宣姜後塵，聖人早有以見及於此，故錄之以爲萬世戒。而不然者，風人所不道，而謂聖人取之耶？又一宣姜也，而非而刺之者，或在《邶》，或在《鄘》，《衛》詩中則無有，意者邶、鄘二國亡於衛，其人心不能無所憾，故多指其瑕而刺之。至衛本國人，不敢非其大夫，況顯彰君惡哉？此二國雖亡，是非未泯，不能不存其名之一證也。



【集釋】「茨」，《說文》：以茅蓋屋。《書》：「惟其塗墍茨。」《周禮》：「茨牆則翦園。」《中韓》：《說文》云：交積材也。蓋謂室中結構深密之處。

【標韻】埤十九略道同醜二十五有叶韻 襄七陽詳、長並同本韻 束一屋讀同辱二沃通韻

### 君子偕老 刺衛夫人宣姜也。

君子偕老，書法。副笄六珈。委委佗佗，如山如河。造語奇。象服是宜，子之不淑，云如之何。一章玼兮玼兮，其之翟也。鬢髮如雲，不屑髢也。玉之瑱也，象之掎也，揚且之皙也。胡然而天也，胡然而帝也！神光離合，乍陰乍陽。○二章嗟兮嗟兮，其之展也。蒙彼縹緇，是繼祥也。子之清揚，揚且之顏也。展如之人兮，邦之媛也。便有輕之之意。○三章

右《君子偕老》三章，一章七句，一章九句，一章八句。《序》與《集傳》皆言「刺宣姜」，而《辯說》又未盡以爲然，以爲「無可考」。愚謂此詩的刺宣姜無疑，但讀首一句卽知其爲宣姜，不可移刺他人。詩全篇極力摹寫服飾之盛，而發端一語忽提「君子偕老」，幾與下文詞義不相連屬。諸儒雖多方爲之解說，終覺勉強難安，非的然不易理也。豈知全詩題眼卽在此句，貞淫褒貶，悉具其中，何也？夫人者，與「君子偕老」之人也。與「君子偕老」，則當與君子同德；與君子同德，乃可與君子同服天子命服，以爲一國母儀。今宣姜之於君子也何如乎？其始也，爲伋子妻；其繼也，爲宣公妾；及其終也，又爲公子頑配。則其所與爲偕老之人尚不知誰屬，其不淑也亦甚矣。又將如此法服何哉？故當其嚴妝

而奉祭祀也，副笄以飾其首，闕翟以章其身，髮如雲而眉益秀，象作掩則玉爲瑱，不啻天人之下降，而帝子之來臨，何其盛也？望之者不儼然一國母儀乎？及其觀妝以見賓客也，則禮衣而蒙以綈絺，繼袪而爲之束素，目以清而愈朗，額加廣而彌豐，又不啻傾人城而傾人國，何其媚也？望之者又非復前日母儀之可重矣。則卽此服飾之間，一轉移而輕重不同也如是，則其人亦可知已。豈尚堪可與「君子偕老」乎？卽其君子欲與之偕老，抑豈可得乎？此非宣姜之謂而誰謂歟？是詩也，春秋法寓焉矣。至其藻采之工，音節之妙，則姚氏際恒謂爲「神女」、「感甄」之濫觴，山河天帝，廣攬遐觀，驚心動魄，傳神寫意，有非言辭所能釋者。

【眉評】「一章」先從象服說起，何等嚴重！末乃落到「不淑」，起下二章意。「二章」其嚴妝也如是，儼若天神帝女之下降。「三章」其淡妝也又如是，不過國色之嬌姿。二面對觀，褒貶自見。

【集釋】「副」祭服之首飾，編髮爲之。劉氏熙曰：王后首飾曰副。副，覆也，以覆首。亦言副，貳也。兼用衆物成其飾也。爾雅·釋詁：審也。注：副者，次長之稱。「笄」衡笄也。垂於副之兩旁，當耳，其下以紃懸瑱。馮氏復京曰：衡、笄二物，衡垂於當耳，笄橫於頭上，垂於副之兩旁，當耳，其下以紃懸瑱。孔氏穎達曰：以玉爲之，惟祭服有衡笄。「珈」毛氏甚曰：珈，笄飾之最盛者，所以別尊卑。鄭氏康成曰：如今步搖上飾。孔氏穎達曰：言六珈必飾有六，但所施不可知，據此言，侯伯夫人爲六，王后則多少無文也。姚氏際恒曰：鄭氏云珈，古之制所有，未聞。按，加于笄上，故曰珈。猶今之釵頭，以滿玉爲之，狀如小菱，兩角向下，廣五分，高三分。予家有數枚。漢時，三代玉物多殉土中，未出人間，

鄭故未見。鄭儒以鄭去古未遠，謂其言多可信，于此乃知真警說也。此言其製尚詳，存之。〔委委佗佗〕郝氏敬曰：委委，舒徐。佗佗，安重。〔如山如河〕郝氏敬曰：委委如河，佗佗如山。〔象服〕法度之服也。鄭氏康成曰：象服者，謂揄翟、闕翟也。人君之象服，則所謂「予欲觀古人之象，日月星辰之屬」。孔氏穎達曰：象鳥羽而畫之，故謂之象服也。〔淑〕善也。〔玼〕鮮盛貌。〔翟〕祭服，刻繒爲翟雉之形也。毛氏萇曰：揄翟，闕翟也。鄭氏康成曰：侯伯夫人之服，自揄翟而下，如王后焉。嚴氏粲曰：鄭氏云，江淮而南，青質五色，皆備成章曰揄。揄翟則畫揄雉，闕翟刻而不畫。〔黼〕黑也。〔如雲〕多而美也。〔不屑〕屑，說文：「動作切切也。」不屑，不切于用也。陳氏推曰：不屑，只薄之不用，猶云不消得整。〔集傳〕訓屑爲潔，非。〔鬢〕髮，鬢也，猶今之假髮。哀十七年左傳：「衛莊見己氏之妻髮美，使髡，以爲呂姜鬢是也。」〔瑱〕塞耳也。〔象〕象骨也。〔揄〕孔氏穎達曰：以象骨搔首，因以爲飾，名之曰揄。〔揚〕張氏彩曰：眉目以疏秀爲美，故以揚見稱。〔皙〕白也。〔胡然而天，胡然而帝〕言其服飾容貌之盛，見者驚爲天人帝女，胡爲而在此也。〔瑳〕亦鮮盛貌。〔展〕衣也。鄭氏康成曰：展衣宜白。展衣字誤，〔禮記〕作禮衣。孔氏穎達曰：〔玉藻〕云：「一命禮衣。」〔喪大記〕曰：「世婦以禮衣。」是〔禮記〕作禮衣也。展爲聲誤，從禮爲正。〔蒙〕覆也。〔縹緇〕當暑之服也。鄭氏康成曰：展衣，夏則裏衣縹緇。孔氏穎達曰：葛之精曰緇，其精尤細靡者縹也，質細而縹緇。〔繼祚〕束縛意。〔集傳〕曰：以展衣蒙緇，給而爲之繼祚，所以自斂飭也。〔清〕視清明也。〔頤〕頤角豐滿也。

【標韻】珈六麻，叶居何反。佗五歌，河同宜四支，叶牛何反。何五歌，叶韻。翟十二錫，叶去聲。黼八霽，揄、皙、帝並同叶。

韻 展十六饒，叶諸延反。 衿十三元，韻十五刪，媛十三元，叶韻。

### 桑中 刺淫也。

爰采唐矣，沫之鄉矣。云誰之思？美孟姜矣。期我乎桑中，要我乎上宮，送我乎淇之上矣。一章爰采麥矣，沫之北矣。云誰之思？美孟弋矣。期我乎桑中，要我乎上宮，送我乎淇之上矣。二章爰采葑矣，沫之東矣。云誰之思？美孟庸矣。期我乎桑中，要我乎上宮，送我乎淇之上矣。三章

右《桑中》三章，章七句。《小序》謂「刺奔」。《大序》謂「男女相奔，至于世族在位相竊妻妾，期于幽遠，政散民流而不可止」。《集傳》亦主其說，而惟以爲奔者所自作，則與《序》異。蓋其意以爲刺人之詩不應曰「期我」、「要我」、「送我」，又自陷其身於所刺之中。是誤讀詩詞而未嘗深探其旨耳。夫詩之所咏曰「唐」、「曰「麥」、「曰「葑」，匪一其采矣。曰「沫鄉」、「曰「沫北」、「曰「沫東」，又匪一其地也。曰「孟姜」、「曰「孟弋」、「曰「孟庸」，更匪一其人。而期、而要、而送之者，則必於「桑中」之「上宮」與「淇上」，豈一人一時所期，而三地三人同會於此乎？抑三人三時各期所期，而三地三人畢集於此乎？以一人而賦三時三地之人之事，則其人必不能分身以自陷於所刺之中可知矣。而猶謂之爲自咏其事也何哉？賦詩之人既非詩中之人，則詩中之事亦非賦詩人之事，賦詩人不過代詩中人爲之辭耳。且詩中事亦未必如是之巧且奇，同期於一日之中，即同會於一席之地。是詩中人亦非真有其人，真有其事，特賦

詩人虛想。所采之物，不外此唐與麥與葑耳；所遊之地，不外此沫之鄉、沫之北、沫之東耳；即所思之人，亦不外此姜之孟、弋之孟與庸之孟耳。而此姜與弋與庸，則尚在神靈恍惚、夢想依稀之際。即所謂期我、要我、送我，又豈真嫋嫋其來，冉冉而逝乎？此後世所謂無題詩也。李氏商隱詩云「來是空言去絕蹤」，又云「畫樓西畔桂堂東」，使真有其人在，則又何必爲此疑是疑非、若遠若近之詞，使人猜疑莫定耶？然則刺淫之詩亦謂之亡國之音者，則又何故？夫音由心生，詩隨時變。故必有是心而後成是俗，亦必因是俗而後爲是詩。詩與風爲轉移，時因心爲隆替。聞其音而知政治之得失，讀其詩尚不知其國之將亡乎？古來亡國之音，桑間與濮上動輒並稱，雖未必專指此詩，而此詩亦其類也。藉使空言亦關世運，聖人取以爲戒，固不徒爲淫者發，即作詩者亦不可不深長思也。

【眉評】三人、三地、三物，各章所咏不同，而所期、所要、所送之地則一，章法板中寓活。

【集釋】「唐」蒙萊也，一名兔絲。「沫」衛邑也。「書」所謂沫邦者也。「上宮」王氏應麟曰：「通典」：「衛州

衛縣有上宮臺。」「要」猶迎也。「弋」春秋定姒，公、穀作定弋，蓋杞女，夏后氏之後，亦貴族也。

「葑」蔓菁也。見前「谷風」篇。「庸」補傳曰：「鄭本庸姓之國，漢有庸光及膠東庸生，是其後也。傅

氏曰：孟庸當是鄭國之姓，鄭爲衛所滅，故其後有仕於衛者。」

【標韻】唐七陽鄉、美並同本韻。中一東宮同本韻下二章同。上二十三葉叶韻與上三韻叶，後二章應。麥十一陌北十

三職弋同通韻。葑二冬東東庸冬通韻。

鵲之奔奔 代衛公子刺宣公也。

鵲之奔奔，鵲之彊彊。人之無良，我以爲兄。一章鵲之彊彊，鵲之奔奔。人之無良，我以爲君。二章

右《鵲之奔奔》二章，章四句。《序》謂「刺衛宣姜」。《集傳》以爲衛人刺宣姜與頑非匹耦而相從，故爲惠公之言以刺之曰，人之無良，鵲鵲之不若，而我反以爲兄，反以爲君。君卽小君，指宣姜也。嗚呼！此言出，天理絕，人道盡矣。宣姜之于惠公，親生母也。親有過，子唯當泣涕而善諫之。諫之不能，諱之可也，逃之亦可也，而乃爲此惡言以刺之，有是理乎？雖曰國人所託，言之無傷，然必其人倫行先喪而後謂人之倫行無傷耳。且其詞義亦甚難解。以兄爲頑，則君無所指；卽上說解君爲「小君」，甚勉強。以君爲惠，則兄將誰屬？以人指宣公，而我爲君之弟。姚氏際恒曰：「均曰『人之無良』，何以謂一指頑，一指宣姜也？大抵人卽一人，我皆自我，而爲兄爲君，乃國君之弟所言耳。蓋刺宣公也。」兄與君似無所礙，而君之弟又何人？此皆難通之論也。詩必有所謂，但一時不得其解耳。且其詞意甚率，未免有傷忠厚。《鵲有茨》一章，雖曰直言無隱，而猶作未盡辭；此則直唾而怒罵之，尚可爲詩乎哉？或有別解，則未可知。存而不論焉可也。○卽使姑從姚說，亦必曰人雖無良，我不敢不以爲兄，不敢不以爲君，語方和平，不失溫柔之旨。且當作代衛公子刺宣公作，庶幾有合於詩耳。孔氏穎達曰：「言人行無一善者，我君反以爲兄，而不之禁也。」亦較《集傳》爲婉，唯「君」未有解。

【集釋】〔鵠〕鵠屬。寇氏宗奭曰：鵠初生謂之羅鵠，至初秋謂之早秋，中秋以後謂之白鵠，蓋一物而四名也。〔奔奔〕左傳作賁賁。〔彊彊〕居有常匹，飛則相隨之貌。陸氏德明曰：〔韓詩〕云：「奔奔彊彊，乘匹之貌。」

【標韻】彊七陽兄八庚轉韻 奔十三元君十三文通韻

### 定之方中 美衛文公再造公室也。

定之方中，月。作于楚宮。揆之以日，日。作于楚室。地。樹之榛栗，椅桐梓漆，樹木。爰伐琴瑟。器用。○一章升彼虛矣，以望楚矣。登高望遠，以察來脉。望楚與堂，景山與京。相其陰陽。降觀于桑。觀其流泉。卜云其吉，卜其後兆。終焉允臧。二章靈雨既零，醴雨。命彼倌人，星言夙駕，說于桑田。勸農。匪直也人，秉心塞淵，騋牝三千。富彊。○三章

右定之方中三章，章七句。〔序〕謂「美衛文公也」。〔集傳〕云：「衛爲狄所滅，文公徙居楚丘，營立宮室，國人悅之而作是詩。」與春秋傳合，固無疑義。而〔傳〕乃以魯僖公城楚丘、備戎事實之，則小人之好逞異說、惑世而誣民者也。文公亦宣姜子，乃能於流離播遷後痛自損抑，與民同勞，共圖恢復。史稱其大布之衣，大帛之冠，務材訓農，通商惠工，敬教勸學，授方任能。元年革車三十乘，季年乃三百乘，可謂盛矣。然究其所以致此之由，則〔詩〕云「秉心塞淵」一語，實爲致治根原。觀其卜築楚丘也，始則驗中星而重天時，繼則升墟隴而察地利，終則教樹畜而盡人力。規模宏遠，經營具備，

而尤不敢自暇自逸，躬親課農，星言稅駕，率以爲常。故不數年而戎馬寢強，蠶桑尤盛，爲河北巨邦。其後孔子適衛猶有庶哉之歎，則再造之功不可泯也。愚於是歎人生自有秉彝，非關氣類。衛之亡也以其母，而其與也在其子。雖曰天道福善禍淫，本自無常，亦足見人君撥亂反正，尤宜有要。不禁反覆咏歎，三致意於其際焉。

【眉評】「一章」總言建國大規。

「二章」追敘卜築之始。

「三章」終言勸勞，以致富庶。

「秉心」句

是全詩主腦。

【集釋】「定」星名。《集傳》云：定，北方之宿，營室星也。此星昏而正中，夏至十月也。於是時，可以營治宮室，故謂之營室。《楚宮》楚邱之宮也。孔氏穎達曰：《鄭志》：張逸問楚宮今何地？答曰：楚邱在濟河間，今東郡界中。杜預云：楚邱，濟陰成武縣西南，屬濟陰郡，猶在濟北，故曰濟河間也。《揆日》《集傳》云：揆，度也。樹八尺之臬，而度其日之出入之景，以定東西，又參日中之景，以正南北也。《椅桐》陸氏璣曰：梓實桐皮曰椅，大類同而小別也。桐有青桐、白桐、赤桐，白桐宜琴瑟。《梓》蕭氏炳曰：梓樹似桐而葉小，花紫。《漆》《集傳》曰：漆，木有液黏黑，可飾器物。蘇氏頌曰：漆，木高二三丈，皮白，葉似椿，花似槐，子若牛李。六七月以竹筒針入木中取之。《爰》於也。《虛》毛氏萇曰：虛，漕虛也。孔氏穎達曰：文公自漕徙楚丘，故知升漕墟。蓋地有故墟，高可登之以望，猶僖公二十八年《左傳》稱「晉侯登有莘之墟」也。《堂》毛氏萇曰：楚丘有堂邑者。傅氏寅曰：堂是今博州堂邑。博、濮二州連境。《景》《集傳》曰：景，測景以正方面也。與「既景迺岡」之景同。或曰景，山名，見《商頌》。《京》高邱也。《桑》蔡氏



卞曰：究地宜桑，如桑間、濮上可驗也。姚氏炳曰：舊謂桑木，按此章通是相地形勢，似不應夾入桑木。疑桑亦地名。《鄭風》「桑中」，舊謂沫鄉中小地，今意當在楚丘之傍，與潛墟相屬，而降觀之。且詩云「望楚」，亦第望之而已，猶未身歷楚丘，何緣便降至其下，察樹木而辨土宜哉？愚案：桑不惟地名，日似水名，如桑乾之類。蓋升望景皆遠觀山勢，降觀則近察流泉，如《公劉》「觀其流泉」之觀，故疑爲水也。《靈雨》黃氏一正曰：靈雨，瑞雨，降而應物者也。《信人》主駕者也。孔氏穎達曰：以命之使駕，故知主駕者。諸侯之禮亡，未聞信人爲何官也。《星》范氏處義曰：謂戴星命駕。姚氏際恒曰：星言，猶今人言星速、星夜，舊謂雨止見星，則言字無著落。《說》舍止也。《乘》操也。《塞》實也。《淵》深也。鄭氏泉曰：懷國家根本之圖，而不事乎虛文，所以爲塞實。建國家久遠之策，而不狃乎近慮，所以爲淵深。《駮》馬七尺以上曰駮。孔氏穎達曰：三千，言其總數，國馬供用，駮牡俱有，或七尺、六尺，舉駮以互見，故言駮馬與牝馬也。

【標韻】中一東宮同本韻 日四質室、栗、漆、瑟並同本韻 虛六魚，叶起昌反。楚六語叶韻 堂七陽京八庚桑、城並七陽轉韻 零九青人十一真田一先淵、千並同通韻

### 蠓螽 代衛宣姜答《新臺》也。

蠓螽在東，莫之敢指。女子有行，遠父母兄弟。一章朝隲于西，崇朝其雨。女子有行，遠兄弟父母。二章乃如之人也，懷昏姻也，大無信也，不知命也。三章

右《蠓螽》三章，章四句。《小序》謂「止奔也」。《大序》以爲「衛文公能以道化其民，淫奔之恥，國人不齒」。《集傳》本《小序》，而又疑《大序》之歸美文公爲未有考。《大序》固屬附會，《小序》亦未得其要。此詩若以刺淫爲辭，則「遠父母兄弟」及「大無信」、「不知命」之言終覺費解。何氏楷以爲刺宣公奪伋婦事，則「大無信」、「不知命」之言頗爲近似。然《邶風》已有《新臺》，此不當更又有詩。姚氏際恒駁之是矣。但此詩舍却宣姜，別無他解。蓋與《新臺》相爲唱答耳。唐人唱酬詩體，彼此意同者曰「和」，彼此意異者曰「答」。《新臺》以刺宣姜，故詩人又設爲宣姜之意代答《新臺》，互相解嘲，亦諷刺中之一體也。其意若曰：予之失節豈得已哉？予固一弱女子，而又遠自齊東，來嫁衛西，父母兄弟，均無所依。當其初來，亦以爲兩姓昏姻不爽夙約，詎料衛君其人心懷叵測，只戀新昏之美，罔顧倫常之重，竟奪子婦，是無信也，是不知天緣之自有命在也。予時雖欲無從，其如父母兄弟遠在他方，無所控告，何哉？亦如蠓螽之在天末，氣本淫邪而莫之敢指，一任其朝見西而暮見東，忽爲晴而忽爲雨，亦末如之何也已矣。依此解去，全詩豁然，毫無滯礙。特無實證，未敢遽定，故但申其意旨如斯而已。

【眉評】天地淫邪之氣，忽雨忽晴，東西無定，以比宣公，可謂巧譬而喻。

【集釋】《集傳》曰：蠓螽，虹也。日與雨交，倏然成質，似有血氣之類，乃陰陽之氣不當交而交者，蓋天地之淫氣也。在東者，暮虹也。虹隨日所映，故朝西而暮東也。陸氏德明曰：蠓螽，《爾雅》作蠓螽，音同。孔氏穎達曰：《釋天》云：蠓螽謂之蜺，蠓螽，虹也。郭璞曰：「俗名爲美人。」《音義》云：「虹雙出，

色鮮盛者爲雄，雄曰虹；闇者爲雌，雌曰霓。〔朝〕〔濟〕，升也。〔周禮〕十輝，九曰濟。注以爲虹。蓋忽然而見，如自下而升也。姚氏際恒曰：虹暮見于東則雨止，朝見于西則爲雨。〔崇〕終也，謂終朝雨也。鄭氏曰：「朝有升氣于西方，終其朝則雨，氣應。」〔孟子〕：「若大旱之望雲霓」，亦是此義。今人多見晚虹而雨止，若朝虹者，在日影初出時，多卧而未見，故誤認虹惟止雨。

【標韻】指四紙第八齊通韻 兩七虞母二十五有，叶滿補反。叶韻 人十一真烟同本韻 信十二震命二十四敬通韻

### 相鼠 刺無禮也。

相鼠有皮，人而無儀。人而無儀，不死何爲？一章相鼠有齒，人而無止。人而無止，不死何俟？二章相鼠有體，人而無禮。人而無禮，胡不遄死？三章

右《相鼠》三章，章四句。《序》以爲「刺無禮」。諸家皆然，唯舊說多云，鼠尚有皮，人而無儀，則鼠之不若。以人之儀喻鼠之皮，則未免輕視禮儀，獸皮之不若矣。夫麟鳳尚有威儀，龍馬必多精神，人之所以異於禽獸者，禮義以制心，威儀以飭躬也。倘去此威儀禮義而不之檢，則是卑污賤惡不過如鼠之徒有其皮與齒，以成其體而已矣。雖欲求爲禽獸之長而不可得，況人也乎？夫人也而禽獸之不若，則何以自立於天地之間？固不如速死之爲愈耳。若此解詩，語意方能圓到。或又謂此衛文公訓誥臣民之辭，亦頗近是，存之。

【集釋】《鼠》蟲之可賤惡者。陸氏佃曰：今一種鼠，見人則交其前兩足而拱，謂之禮鼠，亦或謂之拱鼠。

呂氏祖謙曰：韓愈《聯句》云：「禮鼠拱而立。」〔止〕容止也。〔邇〕速也。

【標韻】皮四支儀、爲並同本韻 齒四紙止、俟並同本韻 體八齊禮同死四紙通韻

### 干旄 美好善也。

孑孑干旄，在浚之郊。素絲紕之，良馬四之。彼姝者子，何以畀之？一章孑孑干旄，在浚之都。素絲組之，良馬五之。彼姝者子，何以予之？二章孑孑干旄，在浚之城。素絲祝之，良馬六之。彼姝者子，何以告之？三章

右《干旄》三章，章六句。《小序》以爲「美好善」，從之。惟《大序》謂爲「文公時作」，《集傳》與姚氏均有所疑。然史稱文公敬教勸學，授方任能，則以此詩屬之亦無不宜。惟《蠅螬》非是，此又不可不知也。夫人君朝夕所與圖議國政者，賢大夫也。而賢大夫所賴以贊襄國政者，二三有道仁人君子之深謀碩畫，相與以有成耳。而此二三有道仁人君子又不肯共立闕廷，或伏處城郭，或遠在郊畿，非有好善樂道之君，畧分下交之臣，不肯親詣而往訪之，則雖有深謀碩畫，亦無由達。此上下之情所以隔，而三代之風所以邇也。茲何幸文公之世，而有此樂取人善之君若臣。其賢大夫則乘車馬，建旌旄，遠適郊畿，近訪城邑，廣詢周諮，以臻上理。則其君之勵精圖治，孜孜不倦者，亦可知已。爾二三有道仁人君子，亦如西方美人之繫人懷思也久矣。其亦可以無事深秘，開誠而布告之也。但不知其將何策以獻耳。此詩人所爲深思而切盼之，不禁形爲歌詠，以紀一時深幸之心者也。蓋衛之君臣，至

是而慮事深，望治切，非復前日之淫亂無禮、耽于佚樂者比。故其終能恢復衛室而再造侯服者，亦有以哉！

【集釋】「子子」特出之貌。「干旄」，《集傳》曰：「干旄，以旄牛尾注於旗干之首，而建之車後也。」《後》衛邑名。「紕」織組也。孔氏穎達曰：「以素絲爲線縷，所以縫此旌旗之旒縷也。縷，謂繫於旌旗之體，旒，謂縷末之垂者，須以縷縫之使相連。」《四之》兩服兩驂。董氏道曰：「馬在車中爲服，在車外爲驂。」《姝》美也。子，指所見之人也。姚氏際恒曰：「邶風『靜女其姝』，鄭風『彼姝者子』，皆稱女子，今稱賢者以姝，似覺未安。案：『西方美人』，亦稱聖王，則稱賢以姝，亦無所疑。」《界》與也。《旗》《周禮·司常》：「鳥隼爲旗。」《考工記》：「鳥旗七旂，以象鷩火。」朱氏善曰：「鳥隼，於旗畫鳥隼爲飾。以其注旒於干首，謂之干旄，以其析夏翟之羽以爲綬，謂之干旌，其實皆旗也。」《都》下邑曰都。《五之六之》由少而多，言其盛極也。《祝》屬也。王氏安石曰：「組成而祝之，故初言紕，中言組，終言祝也。」

【標韻】旌四聲郊三音通韻 紕四聲四、界並同本韻 旗六魚都七虞通韻 組七麌五同予六語通韻 旌八庚城同本韻 祝一屋六同告二沃通韻

載馳 許穆夫人自傷其國不能救衛也。

載馳載驅，歸唁衛侯。驅馬悠悠，言至于漕。大夫跋涉，我心則憂。一章既不我嘉，不能旋

反。視而不臧，我思不遠。二章既不我嘉，不能旋濟。視而不臧，我思不閔。三章陟彼阿丘，言采其蕓。女子善懷，亦各有行。許人尤之，衆釋且狂。四章我行其野，芃芃其麥。控于大邦，誰因誰極？大夫君子，無我有尤。百爾所思，不如我所之。五章

右載馳五章，一章六句，二章、三章、四章、五章八句。從舊本。此詩爲許穆夫人自傷不能救衛之作。事見春秋傳，諸家能言之矣。然夫人之歸衛與未歸衛，及歸而未至爲許大夫所阻，又紛紛如聚訟然，真可笑也。夫宗國傾覆，疇不思恤？而禮有所制，事不得施，夫人寧未之聞？即使迫不暇思，遑遑而歸，其國已破，其家已殘，流離四散，野處漕邑，夫人雖至，將安止乎？此時欲歸故國，國無可歸；欲控大邦，邦將誰控？夫人雖愚，斷不至此。詎肯以一婦人忽遽而行，狼狽而歸，若無顧忌，成何事體？此皆未諳人事之言也。然則詩何以賦？曰：責許人不能救衛，又不能代控大邦，而因以自傷耳。首章言大夫跋涉，我心則憂，已見大意。蓋夫人初聞衛破，必遣其臣代已歸唁衛侯。雖馳驅以至於漕，而無能爲力爾。大夫縱極跋涉，而我憂方難釋也。使許國富兵強足以制狄，則率師赴難抑又何難？今既不能如願爲我所嘉，我又不能即時旋反以濟大河而救宗邦，此亦無可如何之勢。然而我之所思，則並非迂遠難行之事，亦非閔塞不通之謀。特視而大夫率多無謀，即謀亦不臧，我之憂思何時能忘耶？亦將「陟彼阿丘，言采其蕓」，以療鬱積之氣已矣。然吾雖弱女子，亦頗善懷，而各有道。無如爾許人之尤而非之也，何哉？以予所視，非釋即狂，何者？夫既不能馳驅赴義，是無能也，釋也；而又多言善謠，煽亂人心，非狂惑乎？使我而爲男子能行其野，於芃芃隴麥間，則雖無救

衛力，亦當爲控大邦，共扶危亡，以成霸業。但不知其誰可因依，而誰實至之耳。爾大夫君子，尚其無我尤哉。凡爾百計圖謀，終不如吾一女子所思，尚得其要也。此雖責許大夫乎，實責穆公耳。觀此，則穆公之柔懦無能而許人之好爲議論也可知。夫人雖處巾幗，實勝丈夫。聖人取之，以見義憤之氣雖不激於男子，而猶存於婦人，亦將以媿許之君若臣耳。其後齊桓果復衛而成霸，然後嘆夫人之所見者遠也。

【眉評】「一章」馳驅乃跋涉大夫，非夫人也。是倒裝文法。【二、三章】纏綿繚繞，含下無限思意，文勢

極佳。【四章】再開一筆，局尤舒展。【五章】至此乃說明主意，仍作虛想之詞。

【集釋】「唁」孔氏穎達曰：昭公二十五年，穀梁傳云：「弔失國曰唁。若對弔死曰弔，則弔生曰唁。」「跋

涉」集傳曰：草行曰跋，水行曰涉。【嘉】善也。【闕】閉也。【丘】偏高曰丘。【行】道也。【尤】過也。

【芄芄】蒲紅反，麥盛貌。【控】告也。【因】依也。【極】至也。

【標韻】侯十一尤漕四豪，叶祖侯反。憂十一尤叶韻。反十三阮遠同本韻。濟八霽闕四支通韻。嘉八庚行七陽狂同

轉韻。麥十一陌極十三職通韻。尤十一尤，叶尤其反。思四支之同叶韻。

以上《鄘風》凡十篇。案此册大半皆衛詩，即載馳雖作自許，而亦爲衛發，何以謂之鄘乎？或者事雖衛事，

詩則鄘詩。除載馳一篇外，餘皆鄘人作也。觀桑中盛稱孟庸之族，與姜、弋並列，則其詩爲鄘詩也無疑。且同咏衛事，而宣、惠以前多鄘風，宣、惠以後多鄘風。蓋文公廬漕城楚，地近於鄘，故鄘作較多。其詩尚廉厲而寡文，不及鄘風遠甚，惟君子惜老差奇麗，而又開後人繁縟一派。定之方中，甚典實不佻，千施亦雍容大

雅，其變風之正乎？至《載馳》沉鬱頓挫，感嘆唏噓，實出衆音上。然自許詩，非關鄭俗，附載《定中》後耳。

## 衛

王氏應麟曰：《地理志》，河內朝歌縣，紂所都，康叔所封，更名衛。《左傳》，祝佗曰：分康叔，封畛土，畧自武父以南，及圃田之北竟，封於殷墟。呂氏曰：衛自康叔受封，至君角凡四十世。《地理志》，成公徙於帝邱，今濮陽是也。秦并天下，猶獨置衛君。凡九百年，最後絕。

### 淇奥 美武公之德也。

瞻彼淇奥，綠竹猗猗。有匪君子，如切如磋，如琢如磨。虛寫功勳。瑟兮僩兮，赫兮咺兮。儀容。有匪君子，終不可諼兮。一章瞻彼淇奥，綠竹青青。有匪君子，充耳琇瑩，會弁如星。實寫服飾。瑟兮僩兮，赫兮咺兮。有匪君子，終不可諼兮。二章瞻彼淇奥，綠竹如簀。有匪君子，如金如錫，如圭如璧。虛擬成德。寬兮綽兮，猗重較兮。儀容妙旨。善戲謔兮，不爲虐兮。言語妙旨。○三章

右《淇奥》三章，章九句。此詩道學極矣。試問篇中有半點塵腐氣否？使宋人爲此，又不知作何妝點，乃能成篇。世之墨守宋學者，胡不取此而熟誦之？首章以綠竹興起斐然君子，言彼學問，切磋以究其實，琢磨而致之精。次章言威儀，冠弁以表尊嚴之象，充耳而飾光昌之容。三章言成德，金錫則



比其精純，圭璧而方茲溫潤，均各帶其儀容以贊美之。蓋德容根乎心性，內美既充，外容必盛，未有德成粹然而不見面盎背者。故但即威儀動靜間，已知其學之日進無疆也。始雖瑟僂赫叵，猶有矜嚴之心，終乃寬兮綽兮，絕無勉強之迹。故篇末又言及善謔，以見容止語默無不雍容中道。詩之摹寫有道氣象可謂至矣。即武公一生學術，次序本末不差，又何嘗有道學嫌疑哉？此古人用筆之妙也。史稱武公修康叔之政，百姓和集，佐周平戎，有勳王室。《國語》又稱其耄而咨儆於朝，受戒不怠。今觀詩詞，寧不信然？然則初年纂弒，晚成聖德，英雄聖賢，固一轉念間哉。

【眉評】「三章」寫儀容又變。

【集釋】「與」限也。《爾雅》：「厓內爲與，外爲限。」劉氏彝曰：「與謂水涯彎曲之地。」《猗猗》《集傳》曰：「猗猗，始生柔弱而美盛也。」《匪》「斐」通。王氏安石曰：「《考工記》曰：『且其匪色。』匪者，有文章之謂也。」《切韻》：「琢，皆裁物使成形質也。磋，皆治物使其滑澤也。切而復磋，琢而復磨，言治之有叙而益致其精也。」姚氏際恒曰：「切磋琢磨四字，大抵皆治玉、石、骨諸物之名，本不必分。」《爾雅》分之曰：「骨謂之切，象謂之磋，玉謂之琢，石謂之磨。」亦自有義。《集傳》則以切磋屬骨、角，琢磨屬玉、石，又以切磋與琢磨各分先後，並不可解。又全引《大學》之文以釋此詩。按《大學》釋切磋爲道學，琢磨爲自修，瑟僂爲恂慄，赫叵爲威儀，此古文斷章取義，全不可據。豈有切、磋、琢、磨四字平列，而知其分學與修之理？又瑟、僂、赫、叵，別爲贊儀容之辭，與上義不連，亦不得平釋爲四事也。《大學》非解《詩》，今以其爲解《詩》而用以解《詩》，豈不謬哉？《瑟》矜莊貌。曹氏粹中曰：「瑟，鎮密。」

也。如「瑟彼玉瓊」之瑟。「倜」威嚴貌。「咀」宜著貌。「緩」忘也。「充耳」瑱也。「琇瑩」美石也。天子玉瑱，諸侯以石。「弁」皮弁也。毛氏萇曰：皮弁所以會髮。鄭氏康成曰：會，謂弁之縫，中飾之以玉，皦皦而處，狀似星也。「簣」棧也。「禮記·檀弓」注：「簣謂牀第。」即牀棧也。「金錫」集傳曰：言其鍛鍊之精純。「圭璧」集傳曰：言其生質之溫潤。「寬」宏裕也。「綽」開大也。「猗」歎辭也。姚氏際恒曰：猗，倚也。亦通。「重較」卿士之車也。范氏處義曰：較高五尺五寸，式高三尺三寸。較既出於式上，故曰重較。呂氏大鈞曰：古人立乘，若平常則憑較，若應為敬，則落手憑下式，而頭得俯。

【標韻】猗四支，叶於何反。礎五歌磨同叶韻 倜十五潛咍十三元緩同叶韻 青九青瑩八庚星九青通韻 簣十一陌錫十二錫璧十一陌通韻 綽十藥較三覺譌十藥唐同通韻

### 考槃 贊賢者隱居自樂也。

考槃在澗，碩人之寬。獨寐寤言，永矢弗諼。一章考槃在阿，碩人之邁。獨寐寤歌，永矢弗過。二章考槃在陸，碩人之軸。獨寐寤宿，永矢弗告。三章

右「考槃」三章，章四句。此美賢者隱居自樂之詞。詩意甚明，無所謂怨，亦無所謂刺。不知「序」何以謂「刺」莊公不能繼先公之業，使賢者退而窮處，豈以其繼「淇奥」後歟？不知「淇奥」者，達而在上者之好學不倦也，「考槃」者，窮而在下者之自樂難忘也。窮則獨善其身，達則兼善天下，窮與達均不

外學。蓋唯學斯能善天下，亦唯學乃能善一身。能善其身，然後能樂其樂。故考槃之繼淇奥，兩相形，實兩相益耳。詩意若曰：結廬不在塵境，而在溪澗之間，陋且隘矣。卽或深傍曲阿，曠處平陸，亦不過老屋三間，風雨一牀，亦何適意之有？然自碩人視之，則甚寬也，可以爲吾之安樂窩矣。夫真人游神宇內，帝王駕馭六合，卽豪傑之士亦馳聘中原，陵厲無前，其志豈不甚壯？然非碩人所樂爲也。碩人之軸盤旋不過數畝之宮，運行實僅一室之內，其或游心象外，亦只息轍環中，總不出此在澗、在阿、在陸之際。故或獨寐而寤言，或獨寐而痛歌，更或獨寐而寤宿，均有以樂其天也。所樂在是，所安卽在是，雖終其身弗忘也，雖有他好弗踰也，雖有所得亦弗告也。非不欲告，乃無可與告者耳。碩人自處如是，未必無意蒼生，亦未必有望闕廷。窮無損，達亦何加？況敢有怨於人乎？諸儒紛紛擬議，或謂其不忘君惡，鄭氏。或謂其不忘君心，程子。皆以褊衷窺碩人，詎能識碩人之所以爲碩哉？

【眉評】【二章】守法。

【集釋】【考】成也。姚氏際恒曰：「左傳『考仲子之官』，雜記『路寢成則考之』，是也。」槃黃氏一正曰：槃者，架木爲屋，盤結之義也。【阿】曲陵曰阿。【邁】李氏曰：邁與窩同。【陸】高平曰陸。【軸】張氏彩曰：軸者，言其旋轉而不窮，猶所謂游於環中者也。亦有任其旋轉不出乎此之意。【弗告】朱氏善曰：弗告，謂不必以此樂告人，非不以告人也。得於心而難於言，人亦未必信也。姚氏曰：弗告，猶不以姓名告人之意。二義均可通。

【標韻】寬十四寒言十三元緩同通韻 阿五歌邁、歌、過並同本韻 陸一屋軸、宿同告一沃通韻

### 碩人 頌衛莊姜美而賢也。

碩人其頤，衣錦褰衣。齊侯之子，衛侯之妻，東宮之妹，邢侯之姨，譚公維私。一章手如柔荑，膚如凝脂，領如蝤蛴，齒如瓠犀，螭首蛾眉。巧笑倩兮，美目盼兮。傳神阿睹。○二章碩人敖敖，說于農郊。四牡有騶，朱幘鏤鏤，翟裼以朝。大夫夙退，無使君勞。三章河水洋洋，北流活活，施罝濊濊，鱸鮪發發，葭莢揭揭，庶姜孽孽，庶士有暵。淋漓盡致。○四章

右《碩人》四章，章七句。此衛人頌莊姜美而能賢，非閔之也。案《春秋傳》云：「初，衛莊公娶于齊東宮得臣之妹，曰莊姜，美而無子，衛人所爲賦《碩人》也。」《序》因襲《傳》意，而加一「閔」字於上。故《集傳》解此，於每章下必補閔莊姜而答莊公不見答之意。以爲莊姜族類有如是之貴，容貌有如是之美，車服腰送又如是之盛且備，而猶不見親於莊公，則莊公之爲人豈非狂惑人哉？嚴氏粲亦云：「此詩無一語及不見答事，但言其姻族容貌禮儀之盛，以深寓其閔惜之意云爾。」夫妻妻必於色，聯姻必於富與貴，此真流俗人之見，恐非詩人意也。使莊公之見莊姜卽驚其姻族容貌腰妾之盛，不禁心搖目炫，遂下氣柔聲以與之暱，卽可免狂惑誦乎？抑不然矣。又使莊姜之事莊公，僅恃此姻族容貌腰妾之盛，不覺趾高氣揚，遂恃美挾貴以驕其夫，卽可當《碩人》咏乎？更無當也。然則詩非爲莊姜咏乎？曰：是詩也，非莊姜之咏而誰咏耶？莊姜固不徒恃其貴，恃其美，恃其富，而自有餘於富與美與

貴之外，蓋美且賢焉者也。其富貴本其所自有，固不足爲之異。然則詩何以不咏其賢，而僅歎其爲貴與美與富，而若有餘慕耶？曰：詩之不咏其賢者，詩之所以善咏乎賢者也。托月者必滄雲，繪龍者必點睛，此繪事之妙也，詩亦通焉。且詩亦未嘗不言其賢也，而人不覺也。詩發端不曰「碩人其碩」乎？夫所謂碩人者，有德之尊稱也。曾謂婦之不賢而可謂之碩人乎？故題眼既標，下可從旁摹寫，極意鋪陳，無非爲此碩人生色。畫龍既就，然後點睛，滄雲已成，而月自現。詩固有言在此而意在彼者，此類是也。不然，莊姜亦不過一富貴美人耳，詩又何必浪費筆墨而爲之寫照耶？至不見答於莊公，皆後日事，非初來情。詩蓋咏其新婚時耳，安知其不見答而爲人所閑歟？

【眉評】「一章」閨閣之尊。

外戚之貴。

「二章」儀容之美。千古頌美人者無出此二語，絕唱也。

「三章」車服之盛。

體貼入微。

「四章」邦國之富，妾媵之多，到底不露一賢字，而賢字自在

言外。

【集釋】「頤」長貌。「錦」文衣也。「褰」褻也。姚氏際恒曰：錦衣，夫人用錦衣而嫁貴也。鄭氏曰：「國君夫人翟衣而嫁，今衣錦者，在塗之服也。」非也。褰衣，褻或作頤，或作綱，或作景，皆同，乃褻衣也。《士昏禮》云：女登車，姆爲加景，乃驅，卽此。古婦人平時盛服，必加褻衣于外。《中庸》「謂其文之著」是也。若嫁時加褻，則爲塗間辟塵也，又不同。《東宮》太子所居之宮。《邢侯》邢，周公之後。杜氏預曰：邢國在廣平襄國縣。《譚公》孔氏穎達曰：《春秋》「譚子奔莒」。則譚，子爵。蘇氏轍曰：譚近齊。《私》《集傳》曰：姊妹之夫曰私。《莢》茅之始生曰莢，言柔而白也。《凝脂》脂寒而凝，亦言白也。《頤》

頸也。〔蝓蟻〕孔氏穎達曰：孫炎曰：「關東謂之蝓蟻，梁益之間謂之蝓。」以在水中白而長，故以比頸也。蔡氏卞曰：蝓蟻，桑蟲也。蝓蟻食桑之腴，故色白而體柔。〔瓠犀〕〔集傳〕曰：瓠犀，瓠中之子，方正潔白，而比次整齊也。〔螭〕鄭氏康成曰：螭，謂螭也。〔蛾〕〔集傳〕曰：蛾，蠶蛾也。其眉細而長曲。〔倩〕〔集傳〕曰：倩，口輔之美也。〔盼〕黑白分明也。〔敖敖〕鄭氏康成曰：敖敖，猶頤頤也。〔說〕說駕也。〔鑣〕鑣節也。〔鑣〕〔集傳〕曰：鑣者，馬銜外鐵，人君以朱鑣之也。〔鑣〕盛也。〔翟〕翟車也。〔菲〕蔽也。孔氏穎達曰：婦人乘車不露見，車之前後設障以自隱蔽謂之菲。因以翟羽爲之飾，蓋厭翟也，次其羽使相迫也。〔夙退〕〔玉藻〕曰：君日出而視朝，退適路寢聽政，使人視大夫，大夫退，然後適小寢釋服。〔河〕孔氏穎達曰：齊所以得有河者，〔左傳〕曰：「賜我先君履西至於河」，是河在齊西北流也。衛境亦有河，知此是齊地者，以庶姜庶士類之，知不據衛之河也。〔施〕設也。〔魚〕魚罟。〔濊濊〕罟入水聲也。〔鱣〕〔集傳〕曰：鱣魚似龍，黃色銳頭，口在頤下，背上、腹下皆有甲，大者千餘斤。〔鮪〕孔氏穎達曰：陸璣云：鮪形似鱣，頭小而尖，似鐵兜鍪，口亦在頤下，其甲可以摩畫，大者不過七八尺，益州人謂之鱣鮪。大者爲王鮪，小者爲鮪鮪。〔發發〕陸氏德明曰：發，魚著網尾發發然。〔韓詩〕作蟻。〔莢〕〔莊〕亦謂之荻。孔氏穎達曰：荻、蘆、莢、〔莊〕，〔釋草〕文。李巡曰：「分別葦類之異名。」郭璞曰：「蘆葦也，亂似葦而小。」如李云，蘆、亂共爲一草，如郭云，則蘆、亂別草。〔揭揭〕長也。〔庶姜〕謂姪娣。〔騶騶〕盛飾也。〔庶士〕嬖臣。〔揭揭〕武貌。

〔標韻〕頤五微衣同妻八齊姨四支私同通韻 黃四支脂同蟻八齊犀同眉四支通韻 倩十七霰盼十六諫通韻 敖四豪

郊三有驕二蕭鑑、朝並同勞四豪通韻 活七曷濫同上發六月揭九屑擊、揭並同通韻

### 氓 爲棄婦作也。

氓之蚩蚩，抱布貿絲。匪來貿絲，來卽我謀。送子涉淇，至于頓丘。匪我愆期，子無良媒。將子無怒，秋以爲期。一章乘彼坳垣，以望復闌。不見復闌，泣涕漣漣。既見復闌，載笑載言。爾卜爾筮，體無咎言。以爾車來，以我賄遷。二章桑之未落，其葉沃若。比。于嗟鳩兮，無食桑葚！興起下二句。于嗟女兮，無與士耽！士之耽兮，猶可說也。女之耽兮，不可說也！三章桑之落矣，其黃而隕。自我徂爾，三歲食貧。淇水湯湯，漸車帷裳。女也不爽，士貳其行。士也罔極，二三其德。四章三歲爲婦，靡室勞矣。夙興夜寐，靡有朝矣。言既遂矣，至于暴矣。兄弟不知，咥其笑矣。靜言思之，躬自悼矣。五章及爾偕老，老使我怨。淇則有岸，隰則有泮。比。總角之宴，言笑晏晏。信誓旦旦，不思其反。反是不思，亦已焉哉。六章

右《氓》六章，章十句。此與《谷風》相似而實不同。《谷風》寓言，借棄婦以喻逐臣，此則實賦，必有所爲而作。如漢樂府《羽林郎》、《陌上桑》及《古詩爲焦仲卿妻作》之類，皆詩人所咏，非棄婦作也。觀其以氓直起，亦某甲某乙無知之人耳，特其事述之足以爲戒，故見諸歌咏，將以爲世勸焉。曰「子無

良媒」者，是其初亦未嘗不欲守禮以待媒。乃情不自禁，私訂昏姻，後要媒約，則違禮已甚，然其不敢顯然背禮之心，則又昭然而若揭。曰「送子涉淇」者，將送而未送之謀也。曰「至于頓丘」者，欲至而不至之心也。欲至不至，將送未送，故至愆期而不之顧。敢負約哉？亦無媒耳。媒若果至，則秋以爲期焉，未爲不可也。夫事既有約，則心自難待。遲久不至，則必至乘垣以相望。不見則憂，既見則喜，亦情之所不容已者。女殆癡於情焉者耳。故其自歎，則以桑之榮落喻色之盛衰，以見氓之所重在色不在情，己又未免爲情所累，以致一誤再誤，至於不可說。轉欲援情以自戒，則其情愈可矜已。

李白詩云：「以色事他人，能得幾時好？」況所事者又蚩蚩氓乎！宜其有「白頭吟」也。「三歲爲婦」，甘苦備嘗，而猶不免於見棄，此其咎誠不在己而在氓矣。然知我者其誰？兄弟雖親，亦將啞然相笑，以爲是婦德之不終也，而豈知其爲男子之無良乎？回憶總角，「信誓旦旦」，盟猶在耳，詎料其反復如是之速耶？夫淇水悠悠，亦尚有岸，原隰浩浩，未始無涯。斯人也而乃忽然相棄也！予之至是，予之不思耳。使其思之，豈尚至是？「亦已焉哉」，尚何言哉？雖然口縱言已，心豈能忘？此女始終總爲情誤，固非私奔失節者比，特其一念之差，所託非人，以致不終，徒爲世笑。士之無識而失身以事人者，何以異？是故可以爲戒也。

【眉評】「一章」直起，與「昔有霍家奴」同一起法。訂約。【二章】懷想一段。落到合諧。【三

章】色盛見憐一段，已有悔意。色衰愛弛一段，歸咎男子。【四章】歷敘勞苦，反遭見棄，自怨自

艾，如泣如訴，情至之文。【五章】跌宕語，極有致，付之一歎。



【集釋】「氓」民也。「蚩蚩」無知貌。「賈」買也。「頓丘」地名。王氏應麟曰：「地理志：『東郡頓丘縣。』與地廣志：『頓丘，本衛邑，在淇水南。』」愆過也。「將」願也。「堽」毀也。「垣」墻也。「復關」關名。王氏應麟曰：「寰宇記：『澶州臨河縣復關城，在南黃河北阜也。復關堤，在南三百步。』」卜龜卜。「筮」著筮。「體」兆卦之體也。「賄」財也。「沃若」潤澤貌。「葦」桑實也。鳩食葦多則致醉。「耽」相樂也。「說」解也。「隕」落也。「徂」往也。「漸」漬也。「帷裳」車飾。孔氏穎達曰：「丈夫之車立乘，有蓋無帷裳。此言帷裳者，婦人之車故也。以韓障車之傍，如裳以爲容飾，故或謂之韓裳，或謂之童容。」爽差也。「極」至也。「靡」不也。「啞」笑貌。「泮」涯也。「總角」孔氏穎達曰：「甫田云：『總角』，是男子總角未冠，則婦人總角未笄也。以無笄，直結其髮，聚之爲兩角。」晏晏和柔也。「旦」鄭氏康成曰：「以信相誓且旦耳，言其懇惻款誠。」

【標韻】蚩四支絲同本韻 謀十一尤丘同本韻 期四支媒十灰通韻 垣十三元關十五刪連一先言十三元遷一先通韻 落十寒若同本韻 甚二十六寢，叶知林反。耽十三覃，叶特林反。叶韻 說九屑二字自叶韻 隕十一軫，叶于貧反。貧十一真叶韻 湯七陽裳、行並同本韻 極十三職德同本韻 勞四豪朝二蕭通韻 暴二十號笑十八嘯悼二十號通韻 怨十四願岸十五輪泮同宴十七霰晏十六諫且十五輪反十三阮，叶孚鉤反。叶韻 思四支哉十灰通韻

### 竹竿 衛女思歸也。

籊籊竹竿，以釣于淇。豈不爾思？遠莫致之。一章 泉源在左，淇水在右。女子有行，遠兄弟父母。二章 淇水在右，源泉在左。巧笑之瑳，佩玉之儺。三章 淇水漣漣，檜楫松舟。駕言出遊，以寫我憂。四章

右「竹竿」四章，章四句。「小序」謂「衛女思歸」。「大序」增以「不見答」。何氏楷則謂「泉水」及此篇皆許穆夫人作。姚氏際恒以其語多重複，非一人筆，疑爲腰和夫人之詞。均未嘗細咏詩辭也。「載馳」、「泉水」與此篇，雖皆思衛之作，而一則遭亂以思歸，一則無端而念舊，詞意迥乎不同。此不惟非許夫人作，亦無所謂「不見答」意。蓋其局度雍容，音節圓暢，而造語之工，風致嫣然，自足以擅美一時，不必定求其人以實之也。詩固有以無心求工而自工者，迨至工時，自不能磨，此類是已。俗儒說「詩」，務求確解，則三百詩詞，不過一本記事珠，欲求一陶情寄興之作，豈可得哉？

【眉評】「三章」仙骨嫋嫋，風韻欲絕。

【集釋】「籊籊」《集傳》曰：「籊籊，長而殺也。」《泉源》即百泉也。「瑳」《集傳》曰：「瑳，鮮白色。笑而見齒，其色瑳然，猶所謂粲然，皆笑也。」《說文》云：「玉色鮮白也。」笑而見齒，其色似之。「巧」何氏楷曰：「巧，工也，猶好也。」《儺》，《說文》云：「行有節也。」徐鍇云：「佩玉所以節步。」嚴氏粲曰：「儺，柔緩也，腰身裊儺也。」《漣漣》流貌。陸氏德明曰：「漣，本亦作激。」《檜》木名，似柏。

【標韻】洪四支之同本韻 右二十五有母同本韻 左二十有母同本韻 游十一尤舟、遊、憂並同本韻

### 芄蘭 諷童子以守分也。

芄蘭之支，童子佩觿。雖則佩觿，能不我知。容兮遂兮，垂帶悸兮。一章芄蘭之葉，童子佩觿。雖則佩觿，能不我甲。容兮遂兮，垂帶悸兮。二章

右《芄蘭》二章，章六句。《小序》謂「刺惠公」。按《左傳》云：「初，惠公之即位也少。」杜註云：「蓋年十五六。」《序》即本《傳》而意逆之耳。然惠公縱少而無禮，臣下刺君，不應直以「童子」呼之。此詩不過刺童子之好躐等而進，諸事驕慢無禮，以見先進恂恂退讓之風無復存者。此亦世道人心之大轉關，非細故也。聖人存之，亦進闕黨童子而教之之意。《集傳》何至遽云「不知所謂，不敢強解」。蓋亦震於《序》言而無辭以爲之說耳。

【眉評】《集釋甲字條》毛氏鳳曰：案甲與狎同音，詩中借甲爲狎，甲即狎也。

【集釋】《芄蘭》草名。《集傳》曰：「一名蘿摩，蔓生，斷之有白汁可啖。支、枝同。沈氏括曰：支，莢也。芄蘭生莢，支出於葉間，垂之如觿狀。」《觿》雖也，所以解結。成人之佩，非童子之飾也。姚氏際恒曰：上古或用角，故字從角，後以玉爲之。今世有傳者，大小不等，其身曲而未銳，俗名解錐。《集傳》謂象骨爲之，蓋循《禮記》註之誤。然骨與角無大分別，既可以角爲之，何不可以骨爲之耶？《知》《集傳》曰：「知猶智也。言其才能不足以知於我也。」《容、遂、悸》毛氏甚曰：容儀可觀，佩玉遂遂然，垂其紳帶，

惇惇然有節度。嚴氏案曰：容，雍容也。《離騷》云：「遵赤水而容與。」《祭義》云：「及祭之後，陶陶遂遂，如將復入然。」蓋舒緩之狀。《韓》《集傳》曰：「韓，決也。以象骨爲之，著右手大指，所以鈎弦圍體。」姚氏際恒曰：「韓，毛傳謂琰。案，《士喪禮》『續極二』，《大射儀》『朱極三』，《詩》言『拾決』，大抵一物異名，上古必以韋爲之，故字從韋，後用玉。今世有傳者，俗名指機決，又非所佩之琰也。鄭氏謂沓，所以彌沓手指。蓋彷彿《儀禮》爲說，然實無沓名也。《甲》《集傳》曰：「甲，長也。言其才能不足以長於我也。」毛氏甚曰：「甲，狎也。姚氏以爲近是，其義亦通。」

【標韻】支四支綱、知並同本韻 遂四支惇同本韻 葉十六葉韓同甲十七洽通韻

### 河廣 宋襄公母思歸宋不得也。

誰謂河廣？一葦杭之。誰謂宋遠？跂予望之。一章誰謂河廣？曾不容刀。誰謂宋遠？曾不崇朝。二章

右《河廣》二章，章四句。《小序》謂「宋襄公母歸于衛，思而不止，故作是詩」。鄭氏因謂「襄公卽位，夫人思之」。嚴氏以其言「河廣」，則是衛未渡河之先，時宋襄公方爲世子，衛之戴、文俱未立也。從嚴說，則夫人於已出之後而爲復往之思，似覺其無謂。從鄭說，則爲母思其子，本乎慈，廟絕而不往，止乎義，於義較優。然桓公雖無義，夫人不可以無情，況有子乎？觀襄公之爲太子，請於桓公曰：「請使目夷立。」公曰：「何故？」對曰：「臣之舅在衛，愛臣，若終立，則不可以往。」子之念母，雖千乘而不顧，

母之念子，從一葦而難杭。襄公之心，安知非此詩有以動之耶？母也則止於慈，子也則盡乎孝，兩兩相望，難乎爲情，正在此際。若卽位後而始思往，又何以見爲慈乎？《集傳》從鄭說，則猶未免世俗之見云。

【眉評】「一章」飄忽而來，起最得勢，語亦奇秀可歌。

【集釋】「葦」兼葭之屬。「杭」度也。姚氏際恒曰：「杭、航通，方舟，後作航。」《史》秦始皇南遊至錢塘，浙江水惡，乃西百二十里中流，因置餘杭縣。餘杭，舟名，謂以餘杭渡也。餘、餘通。《左傳》：「吳國有餘皇。」一作「餘航」。隋因餘杭舊名，置杭州。乃航、航本字也。一蘆葦可渡，甚言其易，故爲奇語。或謂河方冰時，布一束之葦，便可履之而渡。如此說《詩》，呆哉！不特「固哉」矣。「刀」小船也。孔氏穎達曰：「刀，《說文》作𦨇。𦨇，小船也。」《釋名》云：「二百斛以上曰艇，三百斛曰刀。」嚴氏粲曰：「刀，𦨇，古字通用。姚氏際恒曰：亦作刁、𦨇。」

【標韻】杭七陽望同本韻 刀四豪朝二蕭本韻

### 伯兮 思婦寄征夫以詞也。

伯兮揭兮，邦之桀兮。伯也執殳，爲王前驅。一章自伯之東，首如飛蓬。豈無膏沐，誰適爲容？二章其雨其雨，杲杲出日。願言思伯，甘心首疾。三章焉得諼草？言樹之背。願言思伯，使我心痾。四章

右「伯兮」四章，章四句。此詩不特爲婦人思夫之詞，且寄遠作也，觀次章辭意可見。鄭氏曰：「衛宣公之時，蔡人、衛人、陳人從王伐鄭，故曰『爲王前驅』。曰『自伯之東』，鄭在王國之東，非衛東也。詩不過一婦人思夫作耳，何錄乎？」范氏曰：「居而相離則思，朝而不至則憂，此人之情也。文王之遣成役，周公之勞歸士，皆叙其室家之情，男女之思以閔之，故其民悅而忘死。聖人能通天下之志，是以能成天下之務。兵者，毒民於死者也，孤人之子，寡人之妻，傷天地之和，召水旱之災，故聖人重之。如不得已而行，則告以歸期，念其勤勞，哀傷慘怛，不啻在己。是以治世之詩，則言其君上閔恤之情，亂世之詩，則錄其室家怨思之苦。以爲人情不出乎此也。」此詩室家之怨切矣。始則「首如飛蓬」，髮已亂矣，然猶未至於病也。繼則「甘心首疾」，頭已痛矣，而心尚無恙也。至於「使我心痠」，則心更病矣，其憂思之苦何如哉！使非爲王從征，胡以至此？後之帝王讀是詩者，其亦以窮兵黷武爲戒歟？

【眉評】「二章」宛然閨閣中語，漢魏詩多襲此調。【四章】奇想。

【集釋】「伯」伯叔尊稱，或其夫字。【揚】武貌。【桀】英桀也。【父】范氏處義曰：父，長尋有四尺，在車之左，故曰前驅。【蓬】草名，叢生，風飛散亂。【杲杲】日色明也。【首疾】頭痛也。【媛】孔氏穎達曰：媛訓爲忘，非草名。案：此媛下接草者，猶言善忘之草耳。草斷不可以忘事，故曰焉得也。【毛傳】謂媛草令人忘憂者，非。【說文】以媛爲蕙者，尤非。詩家多用「斷腸忘憂」、「埋憂填恨」等字，皆寓言，非真物也。【背】姚氏際恒曰：背，堂背也。堂面向南，堂背向北，故背爲北堂。【瘳】病也。

【標韻】揚九屑桀同本韻 父七虞驅同本韻 東一東蓬同 容二冬通韻 曰四賈疾同本韻 背十一隊瘳同本韻

有狐 婦人憂夫久役無衣也。

有狐綏綏，在彼淇梁。心之憂矣，之子無裳。一章有狐綏綏，在彼淇厲。心之憂矣，之子無帶。二章有狐綏綏，在彼淇側。心之憂矣，之子無服。三章

右有狐三章，章四句。《小序》謂「刺時」。《大序》以爲「衛之男女失時，喪其妃耦焉」，已非詩意。

《集傳》竟以爲「有寡婦見鰥夫而欲嫁之」，不知何以見其爲寡婦，何以見其爲鰥夫，更何以見其爲「而欲嫁之」？夫曰「之子」，則明明指其夫矣。曰「無裳」「無帶」「無服」，則明明憂其夫之「無裳」「無帶」「無服」矣。以「有狐」作比者，狐性善疑，雖日在「淇梁」「淇厲」「淇側」，而終遲疑不渡，故曰「綏綏」也。此必其夫久役在外，淹滯不歸，或有所戀而忘返，故婦人憂之。以爲久羈逆旅，必至金盡裘敝而難歸耳。本無他義，亦少深情，聖人存之，不解何故。

《集釋》「狐」獸名，性淫而多疑。「綏綏」嚴氏榮曰：「綏本訓安，則綏綏，安綏之意也。狐性多疑，綏綏則獨行而遲疑也。」《梁》橋也。「厲」深水可涉處也。「帶」所以申束衣也。

《標韻》梁七陽寔同本韻 厲八霽帶九泰通韻 側十三職服一屋，叶蕭北反。叶韻

木瓜 諷衛人以報齊也。

投我以木瓜，報之以瓊琚。匪報也，永以爲好也。一章投我以木桃，報之以瓊瑤。匪報也，

永以爲好也。二章投我以木李，報之以瓊玖。匪報也，永以爲好也。三章

右木瓜三章，章四句。此詩本朋友尋常賤遺之詞，而序言「美齊桓公也」，辭意絕不相類。豈有感人再造之恩，乃僅以果實爲喻乎？故集傳反之，以爲「疑亦男女相贈答之辭」，又不知其何所謂。篇中並無男女情，安知其如靜女類？集傳於詩詞稍涉男女字，卽以爲淫奔之詩，說詩如此，未免有傷忠厚，恐非詩人意也。夫詩中固有淫奔者，然非實見其所以然，不可概指爲淫奔。如此詩絕無男女字，而何必指其爲靜女類耶？小序雖偏，必有所傳。以爲「美齊桓公」，非盡無因，蓋病在「美」字耳。此詩非美齊桓，乃諷衛人以報齊桓也。孔氏穎達曰：「以衛得齊桓之大功，思厚報之而不能，乃假小事以言。設使齊投我以木瓜，我報以瓊玖，猶非敢以此報齊之木瓜，欲令齊長以爲玩好，結我以恩情而已。況今救而封我，如此大功，知何以報之？」此言雖近似而未當。衛人始終並未報齊，非惟不報，且又乘齊五子之亂而伐其喪，則背德執甚焉？此詩之所以作也。明言之不敢，故假小事以諷之，使其自得之於言外意。詩人諷刺往往如此。故不可謂序言盡出無因也。

【集釋】木瓜，爾雅：楸，木瓜。蘇氏頌曰：木瓜，狀如柰，春末開花，深紅色，其實大者如瓜，小者如拳。瓊，集傳曰：瓊，玉之美者。嚴氏粲曰：傳云：瓊，玉之美者。疏云：瓊是玉之美名，非玉名也。說文云：瓊，赤玉也。姑並存之。琚，佩玉名。羅氏中行曰：琚，處佩之中，所以貫纁珠而上繫於珩，下維璫衡牙者也。瑤，集傳曰：瑤，美玉也。說文云：美石，存參。玖，集傳曰：玖，亦玉名也。陸氏德明曰：玖，玉，黑色。



【標韻】瓜六麻，叶亥平反。琚六魚叶韻。報二十號好同本韻。桃四豪瑤二蕭通韻。李四紙玖二十五有，叶舉里反。

叶韻

### 以上衛詩凡十篇。

說者謂鄭、衛之俗淫靡，今觀衛詩十篇，無一淫者。首篇美武公之德，爲列國所罕有。次贊

隱者自樂，三頌莊姜之美且賢，皆極一時之秀。卽宋桓夫人，雖被出歸衛，而慈淑守禮，不可謂非賢婦人。他如《伯兮》寄遠，《木瓜》報德，皆馴雅可歌，未見其爲靡靡之音也。其所謂淫靡者，豈以刺宣姜諸作及《桑中》數詩耶？然皆編入《邶》、《鄘》二國，非衛本國人詩。可知衛除宣姜、夷姜外，實多賢婦人。豈有淫亂國而有此賢婦人出乎其間哉？衛有宣姜，衛之大不幸也。可嘆也！

## 詩經原始卷之五

### 國風五

#### 王

《集傳》：王，謂周東都洛邑王城畿內六百里之地，在《禹貢》豫州大華、外方之間，北得河陽，漸冀州之南也。周室之初，文王居豐，武王居鎬，至成王，周公始營洛邑，爲時會諸侯之所，以其土中，四方來者道里均故也。自是謂豐鎬爲西都，洛邑爲東都。至幽王嬖褒姒，生伯服，廢申后及太子宜臼。宜臼奔申，申侯怒，與犬戎攻宗周，弑幽王於戲。晉文侯、鄭武公迎宜臼於申而立之，是爲平王。徙居東都王城。於是王室遂卑，與諸侯無異，故其詩不爲《雅》而爲《風》。然其王號未替也，故不曰「周」而曰「王」。姚氏際恒曰：此乃歷來相傳舊說也，孔子曰：「《雅》、《頌》各得其所。」夫《雅》之所得，則《風》之所亦得。《風》、《雅》自有定體，其體風卽系之《風》，其體雅卽系之《雅》。非以王室卑之故，不爲《雅》而爲《風》也。案：《風》、《雅》、《頌》本以詩體分，不以時勢別。其體頌，雖魯侯服亦有《頌》，其體風，雖周王城亦爲《風》。豈以時勢之盛衰，國家之強弱分《風》、《雅》、《頌》耶？《風》、《雅》、《頌》體且不辨，何以言《詩》？況義意宏深，尤爲難識，無怪其多謬誤也。然則《王》

何以不列於「二南」之後，而序於三衛之末？三衛者，殷故都也，首之見變風所由始。王城者，周東轍也，次之識王政所由衰。是二者皆變風之首，而世道之升降亦寓焉。

### 黍離 閔宗周也。

彼黍離離，彼稷之苗。行邁靡靡，中心搖搖。知我者謂我心憂，不知我者謂我何求。悠悠蒼天，此何人哉！一章彼黍離離，彼稷之穗。行邁靡靡，中心如醉。知我者謂我心憂，不知我者謂我何求。悠悠蒼天，此何人哉！二章彼黍離離，彼稷之實。行邁靡靡，中心如噎。知我者謂我心憂，不知我者謂我何求。悠悠蒼天，此何人哉！三章

右「黍離」三章，章十句。「小序」曰：「閔宗周也。」「大序」謂「周大夫行役至於宗周，過故宗廟宮室，盡爲禾黍，閔周室之顛覆，徬徨不忍去」，是爲得之。而姚氏猶以爲「偶中」，未免失之過刻也。及韓詩云「黍離」伯封作，則又怪誕無稽，不可從。惟是周轍既東，無復西幸。文、武、成、康之舊，一旦灰燼，蕩然無存。有心斯世者，所爲目擊心傷，不能無慨於其際焉。特無如當時之君臣苟且偷安，罔思自奮。以王室之尊，下等候服，甘心而不顧者，何哉？朱氏善曰：「周之王業，公劉開拓之於豳，太王創造之於岐，文王光大之於豐，武王成就之於鎬，皆在西都八百里之內。其土地，則先王之土地；其人民，則先王之人民也。爲子孫者，正當守之而不去，今乃舉舊都棄之，而卽安於東。行役之大夫既已見而憂之，且追怨之，豈容付之無可奈何而已耶？謂宜請於平王，號令諸侯，整師輯旅，光復舊物。」

諸侯見王之有志，孰不奔走而服從？當是時，晉之義和，鄭之掘突，既皆王室之舊勳，齊藉太公之故基，魯承周公之遺烈，衛憑康叔之威靈，亦皆足以左右王室。而王自棄之，爲之臣者又寂無一人以爲言。噫，周轍之不西有由矣夫！此又以恢復事實之行役大夫。持論未嘗不正，然當時情事，則必有難言焉者。故不得已而形諸歌咏，以寄其悽愴無已之心。觀其呼天上訴，一咏不已，再三反覆而咏歎之，則其情亦可見矣。詎得以千載下人追究千載上事，而得其實在情形哉？

【眉評】三章只換六字，而一往情深，低徊無限。此專以描摹虛神擅長，憑弔詩中絕唱也。唐人劉滄、許渾懷古諸詩，往迹襲其音調。

【集釋】「黍」《集傳》曰：黍，穀名。苗似蘆，高丈餘，穗黑色，實圓重。嚴氏粲曰：《說文》曰：「黍，禾屬而黏者也。以大暑而種，故謂之黍。」《本草》唐本注云：「黍似粟而非粟也。」黃氏一正曰：黍有丹、白、黃、黑四色，粒多而黏，穀之可爲酒者也。《離離》垂貌。《稷》《集傳》：稷亦穀也，一名穠，似黍而小。或曰粟也。《爾雅》曰：稌，稷也。《邁》行也。《靡靡》猶遲遲也。《穗》秀也。《噎》孔氏穎達曰：噎，咽喉閉塞之貌，言憂深也。

【標韻】苗二蕭同本韻 憂十一尤求同本韻 天一先，叶嫌因反。人十一真通韻 穗四真醉同本韻 實四質噎九屑通韻

君子于役 婦人思夫遠行無定也。

君子于役，不知其期，曷至哉？雞棲于埘，日之夕矣，牛羊下來。君子于役，如之何勿思！一章君子于役，不日不月，曷其有怙？雞棲于桀，日之夕矣，牛羊下括。君子于役，苟無飢渴！二章

右《君子于役》二章，章八句。《小序》謂「刺平王」，偽說以爲「成申者之妻作」，皆鑿也。詩到真極，羌無故實，亦自可傳。使三百詩人，篇篇皆懷諷刺，則於忠厚之旨何在？於陶情淑性之意又何存？此詩言情寫景，可謂真實樸至，宜聖雖欲刪之，亦有所不忍也。又況夫婦遠離，懷思不已，用情而得其正，即《詩》之所爲教，又何必定求其人以實之，而後謂有關係作哉？

《眉評》：「傍晚懷人，真情真境，描寫如畫。晉、唐人田家詩，恐無此真實自然。」

《集釋》：「《埘》《集傳》：鑿牆而棲曰埘。郭氏璞曰：今寒鄉穿牆棲鷄。《禽經》云：陸鳥曰棲，水鳥曰宿。」

《估》會也。《桀》杙也。《爾雅》：鷄棲於弋爲桀。李氏巡曰：弋，壓也。

《標韻》：期四支埘同本韻。來十灰思四支通韻。月六月桀九屑括七曷渴同轉韻。

### 君子陽陽 賢者自樂仕於伶官也。

君子陽陽，左執簧，右招我由房。其樂只且！一章君子陶陶，左執翫，右招我由敖。其樂只且！二章

右《君子陽陽》二章，章四句。姚氏際恒曰：「《大序》謂『君子遭亂，相招爲祿仕』，此據『招』之一字爲

說，臆測也。《集傳》謂「疑亦前篇婦人所作」，此據「房」之一字爲說，更鄙而稚。大抵樂必用詩，故作樂者亦作詩以摹寫之。然其人其事不可考矣。此種詩亦可無俟深考。蓋三代賢人君子，多隱仕於伶官，以其得節禮樂，可以陶情淑性而收和樂之功。故或處一房之中，或侍遊遊之際，無不揚揚自得，陶陶斯詠，有以自樂。其樂而何害其爲賢也耶？然爲國而使賢人君子樂處下位，不欲居尊以任事，則其時勢亦可想知。此詩之所以存而不削歟？

【集釋】「簧」嚴氏彙曰：簧，笙之舌也。陳氏暘曰：《樂記》云「絃匏笙簧」，則簧之爲物，笙竽有焉。其美在中，所以鼓中聲也。「只且」語助辭。「陶陶」和樂之貌。「翻」《釋言》云：翻，轟也。孫炎曰：轟，舞者所持羽也。「敖」同遊，遊也。

【標韻】陽七陽簧、房並同本韻 陶四豪翻、敖並同本韻 且六魚 二句自爲韻。

### 揚之水 戍卒怨也。

揚之水，不流束薪。彼其之子，不與我戍申。懷哉懷哉，曷月予還歸哉？一章揚之水，不流束楚。彼其之子，不與我戍甫。懷哉懷哉，曷月予還歸哉？二章揚之水，不流束蒲。彼其之子，不與我戍許。懷哉懷哉，曷月予還歸哉？三章

右《揚之水》三章，章六句。經文明明言戍申、戍甫、戍許，而《序》偏云「戍于母家」，致敝《集傳》忘譬逆理之論，是皆未嘗卽當日形勢而一思之耳。夫周轍既東，楚實強盛。京洛形勢，左據成臯，右控崤

函，背枕黃河，面俯嵩高。則申、甫、許實爲南服屏蔽，而三國又非楚敵，不得不成重兵以相保守，然後東都可以立國。觀於三國，吳、魏相持，兩家重鎮必屯襄、樊，則往事可知。平王此時不申、甫、許之是成而何成耶？其所以致民怨嗟，見諸歌咏而不已者，以徵調不均，瓜代又難必耳。夫徵調不均，則勢逸異勢，瓜代難必則生聚無期，不惟小民怨咨，亦足見秉國者之措置乖方，籌謀未善。若宗周形勝，則豈慮是哉？此東都之不再振而西轍之難歸者有由然矣。若沾沾謂其篤於母家，致令久戍不歸，則何異小兒夢囈，不識時務之甚，吾恐平王君臣竊相笑於地下也。

【集釋】「揚」悠揚也，水緩流之貌。「彼其之子」案：姚氏際恒曰：鄭氏謂「處鄉里者」，歐陽氏謂「國人怨諸侯不成申者」，皆可通。「集傳」謂指室家，則謬矣。「戊」屯兵以守也。「申」梁氏益曰：申，伯爵，初爲侯，平王母申姜國，楚靈王遷之今信陽之方城內也。「皇輿表」：鄧州屬南陽府，信陽軍屬汝寧府，並隸河南。「楚」木也。陸氏佃曰：楚者，楚地所出，其一名荆，故楚人春秋稱荆。而荊州亦以此木得名。「甫」「集傳」：甫卽呂也，亦姜姓。「書·呂刑」，「禮記」作「甫刑」，而孔氏以爲呂侯後爲甫侯，是也。王氏應麟曰：「史記」：「呂尚先祖爲四岳，佐禹治水有功，虞、夏之際，受封於呂。」「括地志」：「故呂城在鄧州南陽縣西四十里。」「呂氏春秋」：「呂在宛縣西。」「蒲」嚴氏粲曰：毛以爲草，鄭以爲蒲柳，皆通。案：蒲草見「陳·澤陂」，蒲柳見「陳·東門之楊」。「許」「集傳」：許，國名，亦姜姓。今潁昌府許昌縣是也。「皇輿表」：潁昌府許昌縣，今開封許州，隸河南。

【標韻】新十一真申同本韻 懷九佳歸五微轉韻 楚六語甫七虞通韻 蒲七虞，叶滂左反。許六語叶韻

### 中谷有蓷 閔嫠婦也。

中谷有蓷，嘆其乾矣。有女叱離，嘒其歎矣。嘒其歎矣，遇人之艱難矣。一章中谷有蓷，嘆其脩矣。有女叱離，條其歎矣。條其歎矣，遇人之不淑矣。二章中谷有蓷，嘆其濕矣。有女叱離，啜其泣矣。啜其泣矣，何嗟及矣。三章

右中谷有蓷三章，章六句。大序謂凶年饑饉，室家相棄。集傳因之，近是。惟小序謂爲閔周，未免小題大作。夫一夫不獲時予之辜，固王者之所以爲心，而荒政不講，以致小民流離失所，尤爲東周大病。然遽以此爲閔周，則周之可閔者正多也。集傳又謂婦人覽物起興，而自述其悲歎之詞。閔周嫠吟咏固自有人，而此云有女者，則非其自咏可知矣。杜詩此類甚多，何必定指爲自作？聖人刪詩，至此存之，以見王政之惡，人民之困，至於此極。則其無以爲國之故，亦大可悲。張子云：「凡天下疲癯殘疾，惇獨鰥寡，皆吾兄弟之顛連而無告者也。」世之讀中谷有蓷而無以動其悲憫之懷者，吾亦末如之何也已矣！

【集釋】蓷孔氏穎達曰：「釋草云：『蓷，蓷。』郭璞曰：『今荒蔚也。』陸璣疏云：『舊說及魏博士周元明皆云蓷，是也。』韓詩及三蒼說悉云益母。案本草，益母，荒蔚也。『嘆』孔氏穎達曰：『易曰：『燥萬物者莫熖乎火。』』叱別也，流離失所之狀。『脩』集傳：『脩，長也。』或曰乾也。『歎』聲口出聲。『不淑』集傳：『古者死喪饑饉皆曰不淑。姚氏際恒曰：『先言艱難，夫貧也。再言不淑，夫死也。』



「禮」問死曰「何如不淑」。「嘆」集傳：「嘆，溼者，旱甚則草之生於溼者亦不免也。」「嘔」泣貌。

【標韻】乾十四寒歎、難並同本韻 脩十一尤，叶式竹反。歎十八嘔淑二屋叶韻 濕十四緝泣、及並同本韻

### 兔爰 傷亂始也。

有兔爰爰，雉離于羅。我生之初，尚無爲，我生之後，逢此百罹。尚寐無吽！一章有兔爰爰，雉離于罌。我生之初，尚無造，我生之後，逢此百憂。尚寐無覺！二章有兔爰爰，雉離于罌。我生之初，尚無庸，我生之後，逢此百凶。尚寐無聰！三章

右《兔爰》三章，章七句。《序》謂：「桓王失信，諸侯背叛，搆怨連禍，王師傷敗，君子不樂其生。」《集傳》遂謂：「庶幾寐而不動以死耳。」夫逢時多難，縱欲無生，何至求死？所謂無吽、無覺、無聰者，亦不過不欲言，不欲見，不欲聞已耳。天下洶洶，時事日非。上則諸侯背叛，射王中肩，君臣之義滅矣；下則室家相棄，有女仇離，夫婦之情乖矣；中則謂他人昆，亦莫我聞，兄弟之親又遠矣。其始蓋由於申、甫是戍，忘讐黨惡，君無父子之恩，民亦鮮倫常之義。以致賢者退處下位，不欲居高以聽政；小人幸逃法網，反得肆志而橫行。於是狡者脫而介者烹，奸者生而良者死。所謂百凶並見，百憂俱集時也。詩人不幸遭此亂離，不能不回憶生初猶及見西京盛世，法制雖衰，紀綱未壞，其時尚幸無事也。迨東都既遷，而後桓、文繼起，霸業頻興，而王綱愈墜。天下乃從此多故。彼蒼夢夢，有如鸞鳳，人又何言？不惟無言，且並不欲耳聞而目見之，故不如長睡不醒之爲愈耳。迨至長睡不醒，一無聞見，而思愈

苦。古之傷心人能無爲我同聲一痛哭哉？此詩意也。何至如《集傳》云但求死耶？

【眉評】詞意悽愴，聲情激越，阮步兵專學此種。

【集釋】「爰爰」《集傳》曰：免性陰狡。爰爰，緩意。孔氏穎達曰：無所拘制，爰爰然而緩。《雉》《集傳》：雉性耿介。《離》麗也。《羅》網也。《權》憂也。《吡》黃氏震曰：古注，吡，動也。蓋動則憂，寐則不知，

故欲無吡。姚氏際恒曰：吡字從口，從言之訛亦同。《小雅》「或寢或訛」，卽此。吡，方寢動而有聲也。「無吡」，不言之意。後說較通。《罕》孔氏穎達曰：《釋器》云：「繫謂之罾。罾，罾也。罾謂之罕。

罕，覆車也。」孫炎曰：「覆車，網可以掩兔者也。」《造》亦爲也。《覺》寤也。《庸》用也。

【標韻】羅五歌爲四支，叶吾禾反。權同上，叶居何反。吡五歌叶韻。罕十一尤，叶步應反。造二十號憂十一尤，叶一笑反。

覺十九效叶韻。罾一東庸二冬。凶同聽一東通韻。

### 葛藟 民窮無所依也。

縣縣葛藟，在河之漘。終遠兄弟，謂他人父。謂他人父，亦莫我顧。一章縣縣葛藟，在河之漘。終遠兄弟，謂他人母。謂他人母，亦莫我有。二章縣縣葛藟，在河之漘。終遠兄弟，謂他人昆。謂他人昆，亦莫我聞。三章

右《葛藟》三章，章六句。此詩不必深解，但依《集傳》，謂「世衰民散，有去其鄉里家族而流離失所」之作，斯得之矣。若必謂「刺平王棄其九族」，則不惟「亦」字語氣不協，卽詩意亦甚索然，反無謂也。

葛藟本蔓生，必有所依而後附，今乃在河之漘與涘與漚，無喬木高枝以引其條葉，雖足自庇本根，而本根已失，奈之何哉？故人一去鄉里，遠其兄弟，則舉目無親，誰可因依？雖欲謂他人之父以爲父，而其父反愕然而不之顧；即欲謂他人之母以爲母，而其母亦怵然而不我親；父母且不可以僞託，況昆弟乎？則更澹焉如無聞也。民情如此，世道可知。誰則使之然哉？當必有任其咎者，即謂平王之棄其九族，而民因無九族之親者，亦奚不可？

【眉評】沉痛語，不忍卒讀。

【集釋】〔漘〕毛氏萇曰：水厓曰漘。〔涘〕孔氏穎達曰：「釋邱云：『涘爲厓。』」〔漚〕許氏謙曰：岸上面平夷，而下爲水洗蕩，習人若辱也。

【標韻】漘七慶父同顧七遇，叶果五反。叶韻 涘四紙母二十五有同叶韻 漚十一真昆十三元聞十二文通韻

### 采葛 懷友也。

彼采葛兮。一日不見，如三月兮。一章彼采蕭兮。一日不見，如三秋兮。二章彼采艾兮。一日不見，如三歲兮。三章

右《采葛》三章，章三句。此詩明明千古懷友佳章，自《集傳》以爲淫奔者所託，遂使天下後世士夫君子皆不敢有寄懷作也。不知此老何以好爲刻薄之言若是！至《小序》謂「爲懼讒」，尤不足與辯。夫良友情親，如同夫婦，一朝遠別，不勝相思，此正交情濃厚處，故有三月、三秋、三歲之感也。若泛泛

相值，轉面頓忘，或市利相交，勢衰即去，豈尚能作此語？故是詩之在衰朝，亦世情之中流砥柱也，而可無存乎？

【眉評】雅韻欲流，遂成千秋佳語。

【集釋】「蕭」荻也。孔氏穎達曰：「李巡曰：『荻，一名蕭。』陸璣云：『今人所謂荻蒿者是也。』」  
【郊特牲】：「既莫，然後燕蕭合馨香。」是蕭所以供祭祀也。  
【艾】蒿屬。  
【爾雅】：「艾，水臺。」注：「艾蒿。」  
姚氏際恒曰：「或云艾必三年方可治病，故言三歲，雖詩人之意未必如此，然亦巧合，大有思致。」

【標韻】葛七馬月六月轉韻 蕭二蕭秋十一尤叶韻 艾九泰歲八霽通韻

## 大車 征夫歎也。

大車檻檻，毳衣如旄。豈不爾思，畏子不敢。一章大車嘽嘽，毳衣如璫。豈不爾思，畏子不奔。二章穀則異室，死則同穴。謂予不信，有如皦日。三章

右「大車」三章，章四句。此詩若從「序」言，以爲「陳古以刺今」，則無以處「穀則異室」之言。蓋夫婦雖有別，亦何至異室而分居？如從「集傳」以爲「淫奔有所畏」，則無以釋「死則同穴」之語。蓋男女縱有情，誰爲收屍而合葬？此皆難以理論也。惟姚氏際恒云：「『偽傳』、『說』皆以爲周人從軍，訊其室家之詩，似可通。」此雖出於「偽說」，而詩意真切，詎得以其偽而少之歟？周衰世亂，征伐不一，周人從軍，迄無寧歲。恐此生永無團聚之期，故念其室家而與之訣絕如此。然其情亦可慘矣！

【集釋】「大車」姚氏際恒曰：大車，牛車。「毳衣」姚氏際恒曰：毳衣，毛布衣。「蒺」集傳曰：蒺，蘆始生也。「爾」指室家。「子」指主之者。「啍啍」重遲之貌。孔氏穎達曰：啍啍，行之貌，故爲重遲。上言行之聲，此言行之貌，互相見也。「璊」音門。孔氏穎達曰：璊，玉赭色也。禾之赤苗謂之璊，玉色如之。「穀」生也。「穴」擴也。「皦」白也。

【標韻】橙二十九聲，葵二十七聲，敢同通韻。啍十三元，璊、奔並同本韻。室四質，穴九屑，日四質，通韻。

### 丘中 招賢偕隱也。

丘中有麻，彼留子嗟。彼留子嗟，將其來施施。一章丘中有麥，彼留子國。彼留子國，將其來食。二章丘中有李，彼留之子。彼留之子，貽我佩玖。三章

右「丘中」三章，章四句。「小序」謂「思賢」，毛、鄭因之，且以子嗟、子國爲父子二人。惟「集傳」反其所言，以爲「婦人望其所與私者」之詞，殊覺可異。子嗟、子國既爲父子，「集傳」且從其名矣，則一婦人何以私其父子二人耶？此真逆理悖言，不圖先賢亦爲是論，能無慨然？惟是「序」、「傳」亦有所疑，子嗟、子國既爲人名，則「之子」又何所指？故姚氏以爲「嗟、國皆助辭」。「嗟」爲助辭可也，「國」亦可爲助辭乎？且有麻卽望其來施施，有麥卽望其來食，有李卽望其遺我以佩玖，上下文自相呼應，猶韓子云盤之士可稼而食之意。中間「彼留」、「彼留」云者，乃虛擬之辭耳。「嗟」固助辭，「國」卽「彼國」之「國」，猶言彼留子於其國耶？其國不可以久留也。何不就我？「丘中有麻」可以績而衣，有麥

可以種而食，並有李可以相餽遺，其樂孰甚焉？爾亦將有意其來以就食而互相爲禮耶？似此訓釋，又非思賢，乃招賢以共隱耳。周衰，賢人放廢，或越在他邦，或尚留本國，故互相招集，退處丘園以自樂，所謂桃花源尚在人間者是也。

【集釋】「麻」，「集傳」：麻，穀名，子可食，皮可績爲布者。「施施」，喜悅之意。呂氏祖謙曰：「孟子」曰：「施施從外來。」

【標韻】麻六麻嗟同施四支，叶時連反。叶韻 麥十一陌國十三質食同通韻 李四紙子同玖二十五有，叶舉里反。叶韻

以上王詩凡十篇。案，此冊詩皆亂離後作，故其音怨以怒，而又哀思無已，則其民之困且歎也可知。「兔爰」猶

及西周之盛，而「黍離」則但傷殘破之餘，以致室家相棄，兄弟不保，戍卒怨於前，征夫歎於後也。其始蓋由朝常素亂，國是日非。君子不樂仕進，或退處下位，或遠隱丘園，朝廷之上，無與爲國。於是小人得進而用事，如狡兔爰爰，無所忌憚。故東都一徙，王綱不復再振。國雖未亡，而下等列侯，其與覆亡者相去幾何哉？無怪其音之哀以思，不止怨而怒矣。後世杜甫遭天寶大亂，故其中有「無家別」、「垂老別」、「哀江頭」、「哀王孫」等篇，與此先後如出一轍。杜作人稱「詩史」，而此冊實開其先。讀「王風」者，能無俯仰慨嘆於其際哉？

## 鄭

【集傳】：鄭邑本在西都畿內咸林之地。宣王以封其弟友爲采地。後爲幽王司徒，而死於犬戎之難，是爲桓公。其子武公掘突，定平王於東都，亦爲司徒。又得虢、檜地，乃徙其封而施舊號於

新邑，是爲新鄭。咸林在今陝西西安府華州，新鄭卽今河南開封府新鄭縣。然何以次於「王」？胡氏紹曾曰：鄭初封在圻內，「風」所以次「王」。且周衰，鄭爲之也。桓公時王室多故，謀及史伯，寄帑於虢、櫓之間，以陰謀鬱成大國。然新鄭卽成臯、滎陽、虎牢之分，巖險聞天下，故春秋戰爭之多者無如鄭。案：鄭初封固在西周圻內地，卽新徙亦密邇東都，故觀「風」首殷、周三都外，卽次及於鄭焉。

### 緇衣 美鄭武公好賢也。

緇衣之宜兮，敝予又改爲兮。適子之館兮，還予授子之粢兮。一章緇衣之好兮，敝予又改造兮。適子之館兮，還予授子之粢兮。二章緇衣之席兮，敝予又改作兮。適子之館兮，還予授子之粢兮。三章

右「緇衣」三章，章四句。「序」傳皆謂「國人美武公」。「集傳」、「詩緝」悉從之，無異說。惟季氏本以爲「美武公好賢之詩」。姚氏謂爲後說勝前賢，不然「改衣」、「適館」、「授粢」，此豈臣下施於君上哉？無論鄭人不宜爲此言，卽周人亦不當出此詞。其說是矣。愚謂「改衣」、「授粢」非在上者之所難，特難於「適子之館」而不憚煩焉耳。夫使龍飛鳳翥之士日來吾前，而吾但爲之「改衣」、「授粢」，而不適其館，隆以禮貌之謂何？是徒以衣食餽國士，而國士且望望然去，尚得謂之好賢哉？武公則於「改衣」、「授粢」外，而又能折節下交，屢適賓館。居則虛衷以前席，出則憑軾而過門。羅賢以禮不以

貌，親賢以道尤以心。賢所以樂爲用、而共成輔國宏猷。國人好之，形諸歌咏，寫其好賢無倦之心，殆將與握髮吐哺、後先相映，爲萬世美談，此「緇衣」之詩所由作也。卽謂之「美武公」也，亦奚不可？惟不宜以「改衣」、「適館」、「授粢」屬之國人耳。

【集釋】「緇」黑色。《周禮·考工記》：「三人爲緇，五人爲緇，七人爲緇」注：「染纈者三人而成，又再染以黑，則爲緇，又復再染以黑，乃成緇。」「緇衣」孔氏穎達曰：「緇衣，卽士冠禮所云玄冠，朝服、緇帶、素鞶」是也。卿士旦朝於王，服皮弁，不服緇衣，退適治事之館，釋皮弁而服，以聽其所朝之政也。

「館」舍也。「粢」餐也。「蓆」大也。

【標韻】宜四支爲同本韻 館十四旱，叶古玩反。粢十五輪，叶韻 好二十號，造同本韻 蓆十一陌，叶祥篤反。作十葉叶韻

### 將仲子 諷世以禮自持也。

將仲子兮，無踰我里，無折我樹杞。豈敢愛之？畏我父母。仲可懷也，父母之言，亦可畏也。一章將仲子兮，無踰我牆，無折我樹桑。豈敢愛之？畏我諸兄。仲可懷也，諸兄之言，亦可畏也。二章將仲子兮，無踰我園，無折我樹檀。豈敢愛之？畏人之多言。仲可懷也，人之多言，亦可畏也。三章

右《將仲子》三章，章八句。《序》謂「刺莊公，不勝其母，以害其弟，祭仲諫而弗聽。」特以詩中有父母、



兄弟、仲子等字耳。《集傳》從鄭漁仲說，以爲無與莊公、叔段事，是矣。而又以爲淫奔詩，亦非。蓋女心既有所畏而不從，則不得謂之爲奔，亦不得謂之爲淫。姚氏知其然，仍不能斷，乃曰：「按此詩言鄭事多不合，以爲淫詩則合。」是其識亦尚游移未定耳。此詩難保非采自民間閭巷、鄙夫婦相愛慕之辭，然其義有合於聖賢守身大道，故太史錄之，以爲涉世法。夫使人心無所畏，則富貴功名孰非可懷而可愛？惟能以理制其心，斯能以禮慎其守。故或非義之當前，心雖不能無所動，而惕以人言可畏，即父母兄弟有所不敢欺，則慾念頓消，而天理自在，是善於守身法也。而謂之爲惡也得乎？故《左傳》子展如晉賦此詩，而衛侯得歸。使其爲本國淫詩，豈尚舉以自賦，而復見許於他國歟？此非淫詞，斷可知已。

【集釋】〔將〕請也。〔仲子〕男子之字也。〔里〕孔氏類達曰：「地官。遂人云：『五家爲鄰，五鄰爲里。』是二十五家爲里也。〔杞〕柳屬也。王氏應麟曰：杞有三，「無折我樹杞」，柳屬也。〔南山有杞〕，「在彼杞棘」，梓杞也。〔集于苞杞〕，「言采其杞」，「隔有杞桋」，枸杞也。〔檀〕《集傳》：檀，皮青滑澤，材彊韌，可爲車。

【標韻】里四紙杞同本韻 愛十一隊母二十五有，叶滿彼反。叶韻 懷九佳畏五來，叶於非反。叶韻

### 叔于田 刺莊公縱弟田獵自喜也。

叔于田，巷無居人。豈無居人，不如叔也，洵美且仁。一章叔于狩，巷無飲酒。豈無飲酒，

不如叔也，洵美且好。二章叔適野，巷無服馬。豈無服馬，不如叔也，洵美且武。三章

右《叔于田》三章，章五句。《小序》以爲「刺莊公」。《集傳》及諸家皆謂無刺莊公意。其實此詩的刺莊公無疑。叔之恃寵而驕，多行不義，誰則使之？莊公實使之也。詩人不必明斥公非，但極力摹寫叔之游獵無度，則其平日之遠君子而狎伍小人也可知。即叔之驕縱無忌，實莊公故縱其惡之意亦可見。不然，叔以國君介弟之親，京城大叔之貴，其所好者，不應在馳騁弋獵地也，其所交者，更不宜近飲酒服馬儔也。而何以日事田獵，至于巷無居人、飲酒，以及服馬之不足相勝乎？曰「美且仁」、「美且好」、「美且武」者，詩人故爲此誇大詞以動莊公，使其早爲之備。亦如公子呂所云「欲與大叔，臣請事之；若弗與，則請除之，無生民心」之意云耳。而謂此不義人真能得衆心歟？讀《詩》者慎勿泥其辭而昧其義焉可也。

【集釋】「田」，《白虎通義》曰：「四時之田總名爲田，爲田除害也。」「巷」里塗也。「狩」冬獵曰狩。杜氏預曰：「狩，圍守也。冬物畢成，獲則取之，無所擇也。」「服」乘也。孔氏穎達曰：《易》稱「服牛乘馬」，俱是駕用之義，故服馬猶乘馬也。

【標韻】田 一先人十一真 同通韻 狩 二十六宥酒二十五有好十九皓，叶許厚反。叶韻 野 二十一馬，叶上與反。馬 同上，叶滿補反。武 七麌叶韻

大叔于田 刺莊公縱弟恃勇而勝衆也。

叔于田，乘乘馬。執轡如組，兩驂如舞。叔在藪，火烈具舉。禮楊暴虎，獻于公所。「將叔無狙，戒其傷女。」一章叔于田，乘乘黃。兩服上襄，兩驂鴈行。叔在藪，火烈具揚。叔善射忌，又良御忌，抑磐控忌，抑縱送忌。二章叔于田，乘乘鵠。兩服齊首，兩驂如手。叔在藪，火烈具阜。叔馬慢忌，叔發罕忌，抑釋搆忌，抑鬯弓忌。三章

右「大叔于田」三章，章十句。案此詩與前篇同爲刺莊公縱弟游獵之作，但前篇虛寫，此篇實賦，前篇私游，此篇從獵，而愈矜其勇也。詩曰：「禮楊暴虎，獻于公所。」暴虎危事，太叔至親，而叔以此驕其兄，則恃勇無君之心已可概見。莊公時不惟不怒其無禮，而且勞而慰之曰：「將叔無狙，戒其傷女。」豈真愛之耶？實縱之以蹈於危耳！詩人窺破此隱，故特咏之，以爲誅心之論。如「春秋」書法，微意所在也。若謂國人愛之，而恐其或傷，則好勇不義之人，人又何愛之有耶？至其詞氣之工，則姚氏所謂「描摹工豔，鋪張亦復淋漓盡致，便爲「長楊」、「羽獵」之祖」，庶幾能識作者苦心云。

【集釋】「兩驂」車衡外兩馬曰驂。「如舞」董氏道曰：「五御之法，有舞交衢者，蓋詩所謂「如舞」也。驂與服諧和，然服制於衡，不得如舞，其言舞者，驂也。「藪」澤也。孔氏穎達曰：「鄭有圃田，此言在藪，蓋在圃田也。」禮楊「孔氏穎達曰：李巡曰：「禮楊，脫衣見體曰肉禮」。孫炎曰：「禮，去楊衣」。「狙」習也。「乘黃」陸氏佃曰：黃，馬之上色。「明堂位」曰：「周人黃馬蕃獻。」言吉事乘此。「兩服」孔氏穎達曰：「車有一轅而四馬駕之，中央夾轅者名服馬，兩邊名驂馬，亦曰驂馬」。「襄」駕也。「鴈行」集傳：「鴈行者，驂少次服後，如鴈行也。」「磐」語助辭。「抑」語助辭。「范氏處義曰：「磐，謂使之曲折如磐；控，謂控制不

逸。〔縱送〕《集傳》：舍拔曰縱，覆彌曰送。梁氏益曰：拔，矢末也，所謂括也。亦作筈，箭本受弦處。彌與簫同，弓之梢末，所謂弭也。《曲禮》：左手執簫，疏云：「弓頭稍刻，差斜似簫，故名曰簫，又謂之彌。」《鵠》《集傳》：彌，白雉毛曰鵠，今所謂烏鵠也。《阜》盛也。《慢》遲也。《發》發矢也。《罕》希也。〔釋〕解也。〔捫〕《集傳》：捫，矢箙蓋。《春秋傳》作冰。《鵠》《集傳》：鵠，弓囊也，與綴同。

【標韻】馬二十一馬，叶滿補反。組七虞舞同載二十五有，叶素苦反。舉六語虎七虞所六語狙二十五有，叶女古反。女六語叶韻。黃七陽襄、行、揚並同本韻。射二十一揭御六御，叶魚駕反。叶韻。控一送送同本韻。鵠十九略，叶補苟反。首二十五有手、藪、阜並同本韻。慢十六諫罕十四早，叶虛肝反。叶韻。捫十燕弓一東，叶姑宏反。叶韻。

### 清人 刺鄭文公棄其師也。

清人在彭，駟介旁旁。二矛重英，河上乎翱翔。一章清人在消，駟介廕廕。二矛重喬，河上乎逍遙。二章清人在軸，駟介陶陶。左旋右抽，中軍作好。三章

右《清人》三章，章四句。《序》本《左傳》：「高克棄師奔陳」，鄭人爲賦此詩。事有明文，固勿庸議。卽彭、消、軸，或以爲地名，或以爲非地名，皆不可考。惟鄭文公惡高克，而使之擁兵在外，此召亂之本也。幸而師散將逃，國得無恙，使其反戈相向，何以禦之？由斯以觀，高克亦無能輩耳，何以見惡於文公耶？詩曰「翱翔」，曰「逍遙」，曰「左旋右抽，中軍作好」，所謂霸上諸軍直同兒戲，卽使作亂亦易制服。詩人固早有以知其必不然也。若文公者則不能無所議焉，故刺之。

【集釋】清邑名。駟介四馬而被甲也。旁旁馳驅不息之貌。二矛酋矛夷矛也。酋矛長二丈，夷矛長二丈四尺，竝建於車上。英以朱羽爲矛飾，重疊而見。翺翔遊戲之貌。廕廕武貌。喬矛之上勾曰喬。陶陶樂貌。左旋右抽集傳：左，謂御，在將軍之左，執轡而御馬者也。旋，還車也。右，謂勇力之士，在將軍之右，執兵以擊刺者也。抽，拔刃也。中軍集傳：中軍，謂將在鼓下居車之中，卽高克也。好容好也。

【標韻】彭七陽旁同英八庚翔七陽通韻 消二蕭廕喬遙並同本韻 軸一屋叶音育 陶四豪叶徒侯反 抽十一尤叶職救反 好二十號叶韻

### 羔裘 美鄭大夫也。

羔裘如濡，洵直且侯。彼其之子，舍命不渝。一章羔裘豹飾，孔武有力。彼其之子，邦之司直。二章羔裘晏兮，三英粲兮。彼其之子，邦之彥兮。三章

右羔裘三章，章四句。序以爲「刺朝」，陳古以風今也。辯說謂詩意恐未必然，當時鄭之大夫，如子皮、子產之徒，豈無可以當此詩者？但今不可考耳。愚謂此詩非專美一人，必當時盈廷碩彥濟美一時，或則順命以持躬，或則忠鯁而事上，或則儒雅以聲稱，皆能正己以正人，不媿朝服以章身。故詩人卽其服飾之盛，以想其德誼經濟文章之美，而咏歎之如此。曰「舍命不渝」者，君子安命，雖臨利害而不變也。曰「邦之司直」者，大臣剛毅有力，獨能主持國是而不搖也。曰「邦之彥兮」者，學士文

采高標，足以黼黻猷爲而極一時之選也。有此數臣，國勢雖辱，人材實裕，故可以特立晉、楚大國之間而不致敗。此鄭之所以爲鄭也。不然，詩人縱極陳古以風今，亦何與於當時時務之要歟？

【集釋】「羔裘」大夫服也。〔如濡〕潤澤也。〔侯〕美也。姚氏際恒曰：此卽諸侯之侯，當時稱諸侯亦取美義也。〔含〕處也。〔綸〕變也。〔飾〕集傳：飾，緣袖也。禮，君用純物，臣下之。故羔裘而以豹皮爲飾也。〔孔〕甚也。〔晏〕鮮盛也。〔三英〕裘飾也。〔彥〕士之美稱。

【標韻】濡七虞侯十一元，叶洪鉤反。綸七虞叶韻。飾十三職力、直並同本韻。晏十六諫，彥十五翰，彥十七霰通韻。

### 遵大路 挽君子勿速行也。

遵大路兮，摯執子之祛兮。無我惡兮，不逮故也。一章遵大路兮，摯執子之手兮。無我讒兮，不逮好也。二章

右「遵大路」二章，章四句。此詩當從「序」言爲正。《集傳》謂「淫婦爲人所棄」者固非，卽姚氏以爲「故舊道左言情」者亦未是。蓋道左而挽留賢士，且殷殷勸以故舊朋好之心，則豈無故而云然哉？呂氏祖謙曰：「武公之朝，蓋多君子矣。至於莊公，尚權謀、專武力，氣象一變，左右前後無非祭仲、高渠彌、祝聃之徒也。君子安得不去乎？」「不逮故也」，「不逮好也」，詩人豈徒勉君子遲遲其行也，感於事而懷其舊者亦深矣。此雖無所據，而揆時度勢，據理言情，深得古風人意旨所在。不然，區區道故常情，何煩大聖人之刪而存哉？又曹氏粹中曰：「申公、白生強起穆生曰：『獨不念先王之德歟？』卽此

詩欲留君子之意。而詩不言念先王，但曰「無我惡」者，詞婉而意愈深耳。嗚乎！可以觀世道矣。

【集釋】「摻」擊也。〔祛〕袂也。孔氏穎達曰：袂是祛之本，祛是袂之末，俱是衣袖。〔遄〕速也。嚴氏粲

曰：猶言倉卒也。〔醜〕與醜同。

【標韻】祛六魚，叶起據反。惡七遇故同叶韻。手二十五有醜同好十九皓，叶許口反。叶韻

### 女曰鷄鳴 賢婦警夫以成德也。

女曰鷄鳴，士曰昧旦。子與視夜，明星有爛。將翱將翔，弋鳬與鴈。一章弋言加之，與子宜之。宜言飲酒，與子偕老。琴瑟在御，莫不靜好。二章知子之來之，雜佩以贈之。知子之順之，雜佩以問之。知子之好之，雜佩以報之。三章

右《女曰鷄鳴》三章，章六句。此詩人述賢夫婦相警戒之辭，人皆知之矣。而《序》以爲「陳古」以刺今，不知何所見而云然。彼其意蓋謂《鄭風》無美詞耳。夫使美者皆述古，而惡者皆刺今，則變風中無一可取之詩，而何以知政治得失耶？此詩不惟變風之正，直可與《關雎》、《葛覃》鼎足而三。何者？《關雎》新昏，《葛覃》歸寧，此則相夫以成內助之賢，房中雅樂，缺一不備也。觀其詞義，「子與視夜」以下，皆婦人之詞。首章勉夫以勤勞，次章宜家以和樂，三章則佐夫以親賢樂善而成其德。婦人之職於是乎盡，而可不謂之爲賢乎？不意鄭俗淫哇之際，乃有此中正和樂之音，堪與《關雎》、《葛覃》爲配。可見天理人心之善，未嘗或息於兩間。聖人刪《詩》，特標此一篇於舉世不爲之中，可謂障狂

瀾於既倒，砥中流以不移。必如序言，是一往無能回之人心矣，而何以爲世勸也？

【集釋】「昧旦」呂氏祖謙曰：「列子」曰：「將旦，昧爽之交，日夕，昏明之際。」（明星）「爾雅」：「釋天」：「明星謂之啓明。」嚴氏粲曰：「今俗所謂曉星也。」毛氏謂天將曉而小星不見，惟明大之星爛然，雖不指爲啓明，然將曉而明大者，惟啓明耳。「弋」許氏謙曰：「周禮」：「司弓矢」：「矰矢、莠矢，用諸弋射」注疏：「結繳於矢謂之矰。繳，繩也。矰，高也，取向上射飛鳥之義。莠之言刺也，以弋飛鳥。刺羅之，謂結繳以羅取而刺殺之也。」（鳧）水鳥，如鴨。李氏巡曰：「野曰鳧，家曰鶩。」（加）中也。（維佩）「集傳」：「維佩者，左右佩玉也。」上橫曰珩，下繫三組，貫以纁珠。中組之半貫一大珠，曰瑀。末懸一玉，兩端皆銳，曰衝牙。兩旁組半各懸一玉，長搏而方，曰瑱。其末各懸一玉，如半璧而內向，曰瑱。又以兩組貫珠，上繫珩兩端，下交貫於瑀，而下繫於兩瑱，行則衝牙觸瑀而有聲也。（順）愛也。（問）遣也。

【標韻】且十五輪爛同屬十六諫通韻 加六麻，叶居之反。宜四支叶韻 老十九略好同本韻 贈二十五徑順十二震 問十三問通韻 好二十號報同本韻

### 有女同車 諷鄭太子忽以昏齊也。

有女同車，顏如舜華。將翱將翔，佩玉瓊琚。彼美孟姜，洵美且都。一章有女同行，顏如舜英。將翱將翔，佩玉將將。彼美孟姜，德音不忘。二章

右「有女同車」二章，章六句。「小序」謂「刺忽也」。衍之者曰：「忽不昏於齊，後以無大國之援而見



逐，故國人刺之。《辨說》以爲「忽之辭昏，未爲不正。至其失國，以勢孤援弱，亦未有可刺之罪也。」故《集傳》又「疑爲淫奔之詩。」夫曰「同車」，則有御輪之禮；曰「佩玉」，則有矩步之節；曰「孟姜」，則本齊族之貴。淫奔而越國，有若是之威儀盛飾昭彰耳目乎？前人駁之，固已甚詳。且曰「德音不忘」，是豈淫奔之謂？又不待辯而自明矣。然則此詩謂何？曰：諷忽以昏齊，非刺忽以不昏齊也。曰：有辨乎？曰：有。刺忽以昏於齊者，從事後論之也。諷忽以宜昏於齊者，事前勸之也。事後論忽，固是勢孤援弱，以至失國，似不昏於齊者，爲忽失計。迨後文姜淫亂，幾覆魯國，則不昏於齊者，又未嘗不爲忽幸。事前勸忽，則不過爲援助計。是彼美孟姜者，又安知其後之淫亂如是乎？故首章言其「美且都」，次章言其「德音不忘」，蓋欲諷忽以速娶之耳。後世李延年歌於漢武帝曰：「北方有佳人，絕世而獨立。一顧傾人城，再顧傾人國。豈不知傾城與傾國，佳人難再得。」亦是此意。然忽已辭昏，而詩仍存者，一爲忽惜，一爲忽幸，而終以忽之辭昏爲有見也，而又何刺乎？

【集釋】「女同車」或謂同車爲親迎，又謂侄娣之從嫁者，皆非。無論同車非親迎禮，忽已辭昏，又何從嫁之有？此當是初議昏時，齊必盛飾數女以炫忽，詩人卽所見以咏之而已。《釋》陸氏璣曰：「舜，一名木槿，一名楓，一名檉，齊、魯之間謂之王燕。五月始華，故《月令》仲夏「木槿榮」。《孟姜》指文姜也。同車雖數女，而以文姜爲主，故特著之。《都》孔氏穎達曰：「都者，美好閑習之言。司馬相如《上林賦》云：「妖冶閑都。」」

【標韻】車六魚華六麻，叶芳無反。琚六魚都七虞叶韻 行七陽英八庚翔、將、姜、忘並七陽通韻

### 山有扶蘇 刺世美非所美也。

山有扶蘇，隰有荷華。不見子都，乃見狂且。一章山有橋松，隰有游龍。不見子充，乃見狡童。二章

右《山有扶蘇》二章，章四句。《小序》謂「刺忽」，無據。《大序》謂「所美非美然」，庶幾近之，然不必定指忽也。夫天下妍媸莫辨，是非顛倒，以至覆家亡國而自殺其身者，亦豈尠哉？詩人不過泛言流弊，舉以爲戒。故藉草木起興，以見山之高，固有扶蘇，亦有橋松，隰之卑，固有荷華，亦有游龍。大小互見，美惡雜陳，要在采之者辨之而已。子都、子充之美，與狡童、狂且較其妍媸，宜若易辨也。然有時亦見狡童、狂且爲美，而不見子都、子充之美者，則何以故？是非混則妍媸莫辨耳。有天下國家責者，尤當三復而細咏之。此亦目前至理，勿容穿鑿而附會者。《序》固謬執，涉於附會。然猶未至如《集傳》直以爲「淫女戲其所私者」之猥褻不堪也。

【集釋】《扶蘇》《毛傳》謂小木，非也。蓋枝葉扶蘇，乃茂木耳。《子都》季氏本曰：子都，古之美男子，借以爲喻。《狂》醜惡人也。《且》語辭。《橋松》《集傳》：上疎無枝曰橋，亦作喬。《游龍》張子曰：龍是葦草，其枝幹樛屈，著土處便有根如龍也。《本草》云：葦草一名鴻蘗，如馬蓼而大，卽水紅也。《子充》董氏道曰：子充不見於書，疑亦以美著也。《狡童》狡獪小兒也。

【標韻】蘇七虞華六麻，叶芳無反。都七虞且六魚叶韻。松二冬龍同充一東童同通韻。

薤兮 諷朝臣共扶危也。

薤兮薤兮，風其吹女。叔兮伯兮，倡予和女。一章薤兮薤兮，風其漂女。叔兮伯兮，倡予要女。二章

右《薤兮》二章，章四句。《序》謂「刺忽」，未始不可。然必曰「君弱臣強，不倡而和」，則非詩意。詩言「叔兮伯兮」，是以倡予者望諸叔伯大夫矣，而何以謂之爲忽耶？《集傳》則更以爲「淫女之詞」，天下行淫之女，豈有呼叔而又呼伯者？且叔伯何所倡，而女又何所和？言之不徒污人齒頰，詎可以之釋經？此詩解者雖多，要以嚴氏粲之言爲近。曰：「此小臣有憂國之心，呼諸大夫而告之。言槁葉風吹不能久矣，豈可坐視，以爲無與於己而不相與扶持之乎？叔伯諸大夫其亟圖之。患無其倡，不患無和之者。」蓋小臣有憂國之心，而無救君之力；大臣有扶危之力，而無急難之心。當此國是日非，主憂臣辱之秋，而徒爲袖手旁觀者盈廷皆是。以故義奮忠貞不見諸大臣而激於下位也。忽之世，權臣專擅，國君微弱，苟一煽動，如風吹殘薤，何能久存？然薤去而附諸薤以爲命者亦難自立，故不如早爲之備，先發以制人也。惜乎，小臣有是心而無是力，則不得不呼諸叔伯大夫而告之矣。故以是詩而屬忽世，其亦可矣。

【集釋】《薤》毛氏甚曰：薤，槁也。孔氏穎達曰：《七月》云：「十月隕薤。」《傳》云：「薤，落也。」然則落葉謂之薤。此云薤槁者，謂枯槁乃落也。〔要〕成也。

【標韻】吹四支和二十一箇，叶戶圭反。叶韻 漂二蕭要同本韻

### 狡童 憂君爲羣小所弄也。

彼狡童兮，不與我言兮。維子之故，使我不能餐兮。一章彼狡童兮，不與我食兮。維子之故，使我不能息兮。二章

右《狡童》二章，章四句。《序》謂「刺忽」。呼君爲狡童者無禮，固屬非是。卽或謂指祭仲，則祭仲在當時年已老，亦殊不類。昔人已辨之。《集傳》又謂「淫女見絕而戲其人之詞。曰悅己者衆，子雖見絕，未至於使我不能餐與息也。」則不惟「未至」之義，詩無其文，卽悅己之衆，詩亦並無其意，不知何以見爲淫女反言以戲其人也？大抵狡童者，僉壬宵小之謂。《扶蘇》章之狡童，狂且，卽此章之狡童也。國君所用非人，恃寵而驕，目無朝臣也久矣。言不屑與，況同食哉？大臣憂之而無如何，乃私相憤恨曰：彼狡童之不與我言且食也，無足爲怪，特所慮者君耳。吾爲君故，至不能餐，又不能息，是寢食俱廢矣。向非維君之爲而誰爲哉？詩意甚明，何至疑忽，又疑仲，而竟至疑爲淫女所私之人耶？特是作於何朝何代，則不可考。

【集釋】《息》安也。

【標韻】言十三元餐十四寒通韻 食十三職息同本韻

褻裳 思見正於益友也。

子惠思我，褻裳涉溱。子不我思，豈無他人。狂童之狂也且。一章子惠思我，褻裳涉洧。子不我思，豈無他士。狂童之狂也且。二章

右《褻裳》二章，章五句。《小序》曰：「思見正也」，而不言其見正之故。《大序》遂以忽、突爭國事實之，曰：「狂童恣行，國人思大國之正己也。」於是有以狂童指突者，亦有以狂童指祭仲者。《集傳》則云：「淫女語其所私者。」皆誤認狂童爲狂且、狡童耳。童而曰狡，則爲狡獪小兒也無疑。狂僅曰狂，則爲醜惡狂人也亦無疑。若夫狂童，何狡之有？亦何狂之足慮？子在陳曰：「歸與！歸與！吾黨之小子狂簡，不知所以裁之。」是狂童者，後生有才而未知所裁之稱。以其不知所裁，故思所以裁之，此名師益友之未可以一日無也。詩人有望於良友之裁成其子弟也，故遺之以詩曰：子弟之待正於君也久矣，子其惠然思我而來臨乎？溱、洧雖深，一褻裳可涉渡也。若其無意，則豈無他人之相觀益善乎？抑豈無他士之砥礪於成乎？而無如子弟輩之狂，日見其狂而未知所裁者，非子不能正其狂也。子慎勿辭焉也可。自來此詩無是解者，愚循文按義當如是耳。不然，《左傳》子大叔之歌是什以餞韓宣子，而宣子能無怪之耶？

【集釋】「惠」愛也。「溱」鄭水名。《水經》：「溱水出鄭縣西北，南入于洧水。」陸氏德明曰：《說文》：「溱，洧水出鄭，溱水出桂陽也。」《洧》亦鄭水名。梁氏益曰：《地理志》云：「洧水出陽城山東南，至溱，云溱水出鄭，溱水出桂陽也。」

長平人額，今汴梁之滑川縣也，近鄭州。」

【標韻】漆十一真同本韻 滑四紙士同本韻

### 丰 悔仕進不以禮也。

子之丰兮，俟我乎巷兮。悔予不送兮。一章子之昌兮，俟我乎堂兮。悔予不將兮。二章衣錦褰衣，裳錦褰裳。叔兮伯兮，駕予與行。三章裳錦褰裳，衣錦褰衣。叔兮伯兮，駕予與歸。四章

右《丰》四章：二章，章三句；二章，章四句。此詩斷非淫詩也。何則？以男之俟女也，則至乎堂上矣；女之歸男也，則與伯叔偕行矣。堂上非行淫地，叔伯豈送淫人耶？又況車馬禮服具備，則更非淫奔之際可知。以爲「女子于歸自咏之詩」，姚氏廉恒則俟巷、俟堂，歸竟歸耳，又何不送、不將之悔乎？是邪正二說均不可通。故《序》云：「刺亂也。昏姻之道缺，陽倡而陰不和，男行而女不隨。」然詩云「駕予與行」，「駕予與歸」，則又何嘗不和不隨耶？總之，詩意前悔不行，後被強歸，此中必有他故。詩既不言，事亦難考。愚意此必寓言，非咏昏也。世衰道微，賢人君子隱處不仕。朝廷初或以禮往聘，不肯速行，後被敦迫，駕車就道。不能自主，發憤成吟，以寫其胸中憤懣之氣。而又不肯顯言賈禍，故借昏女爲辭，自悔從前不受聘禮之優，以致今日而有敦促之辱。仕進至此，亦可矜已。不然，昏禮縱缺，亦何至男俟乎堂而女不行耶？

【集釋】「丰」豐滿，嘉其貌之揚也。「昌」盛壯貌。「將」亦送也。「褰」褻也。鄭氏康成曰：以褻褌爲之中衣。裳用錦，而上如褌褌焉。庶人之妻嫁服也。

【標韻】丰二冬，叶芳用反。卷三終，叶胡貢反。送一送叶韻 昌七陽堂、將並同本韻 裳七陽行同本韻 衣五微歸

同本韻

### 東門之墀 有所思而未得見也。

東門之墀，茹蘆在阪。其室則邇，其人甚遠。一章東門之栗，有踐家室。豈不爾思，子不我卽。二章

右《東門之墀》二章，章四句。此篇乍玩似淫詩，故自《序》、《傳》來，無不目爲淫矣。然有謂女奔男者，亦有謂男求女者。就首章而觀，曰室邇人遠者，男求女之詞也。就次章而論，曰「子不我卽」者，女望男之心也。一詩中自爲贈答，而均未謀面，則必非淫者自作可知。古詩人多託男女情以寫君臣朋友義。臣之望君，堂廉雖近，天威甚嚴，有不可以驟進者。君之責臣，則如唐玄宗云：「卿自不仕，奈何誣我？」是君又未嘗不有望乎臣也。至朋友兩相思念，更不待言。詩中有懷想情，而無男女字，又安知非朋友自相思念乎？且室邇人遠，頗有高人雅士跡邇市城，心出塵表氣象。故此詩雖不敢遽定爲朋友辭，亦不敢隨聲附和指爲淫詩。故但曰有所思而未得見之辭云耳。然有所思而不得見，遂無求見之心，則雖謂之發情止義也可，而何淫之有哉？

【集釋】「墀」，《集傳》：墀，除地叮叮者。梁氏益曰：墀，除地去草也。封土爲壇，除地爲墀。叮叮，言有町畦也。「茹蘆」，陸氏璣曰：茹蘆，蒨草也。齊人謂之茜。今國人或作畦種蒨。《貨殖傳》云：「卮茜千石，亦比千乘之家。」《阪》郭氏璣曰：阪陀不平。「踐」行列貌。

【標韻】墀十六銑阪十三阮遠同通韻 栗四質室同卽十三職通韻

## 風雨 懷友也。

風雨淒淒，鷄鳴喈喈。初號。既見君子，云胡不夷。一章風雨瀟瀟，鷄鳴膠膠。再號。既見君子，云胡不瘳。二章風雨如晦，天將明反晦。鷄鳴不已。三號。既見君子，云胡不喜。三章

右《風雨》三章，章四句。此詩自《序》、《傳》諸家及凡有志學《詩》者，亦莫不以爲「思君子」也。獨《集傳》指爲淫詩，則無良甚矣，又何辯耶？且鄭本國賢士大夫互相傳習，燕享之會，至賦以言志。使真其淫，似不必待晦翁而始知其爲淫矣。獨《序》以爲風雨喻亂世，遂使詩味索然，不可以不辯。夫風雨晦冥，獨處無聊，此時最易懷人。況故友良朋，一朝聚會，則尤可以促膝談心。雖有無限愁懷，鬱結莫解，亦皆化盡，如險初夷，如病初瘳，何樂如之！此詩人善於言情，又善於卽景以抒懷，故爲千秋絕調也。若必以風雨喻亂世，則必待亂世而始思君子，不遇亂世則不足以見君子，義旨非不正大，意趣反覺索然。故此詩不必定指爲忽、突世作，凡屬懷友，皆可以咏，則意味無窮矣。

【眉評】深宵風雨，聯床話舊，不覺情親，曉猶未已。此何如友誼耶？而乃以爲淫也，豈不冤哉？



【集釋】「啾啾」姚氏際恒曰：啾爲衆聲和，初鳴聲尚微，但覺其衆和耳。「夷」平也。嚴氏粲曰：「毛傳」以夷爲悅，心悅則夷平，憂則鬱結也。「膠膠」姚氏際恒曰：膠膠，同聲高大也。嚴氏粲曰：膠膠，擾擾，是雜之意，謂羣鷄之聲也。「瘳」集傳：瘳，病愈也。言積思之病，至此而愈也。「如晦」姚氏際恒曰：如晦，正寫其明也，故曰如晦。惟其爲如晦，則淒淒瀟瀟，時尚晦可知。詩意如此，無人領會可與心賞者，如何如何。「已」止也。姚氏際恒曰：鷄三鳴後，天將曉，相續不已也。

【標韻】淒八齊啾九佳夷四支通韻 瀟二蕭膠三肴瘳十一尤，叶憐蕭反。叶韻 晦十一隊，叶呼清反。已四紙喜同叶韻

### 子衿 傷學校廢也。

青青子衿，悠悠我心。縱我不往，子寧不嗣音？  
一章青青子佩，悠悠我思。縱我不往，子寧不來？  
二章挑兮達兮，在城闕兮。一日不見，如三月兮。  
三章

右「子衿」三章，章四句。「序」謂「刺學校廢也」。唐、宋、元、明諸儒，皆主其說。而「集傳」獨以爲淫詩。迨至「白鹿洞賦」，又云「廣青衿之疑問」，仍用「序」說，是是非之心終難昧矣。姚氏際恒以爲「刺學校無據，疑亦思友之詩」。「玩」縱我不往之言，當是師之于弟子也。愚謂「序」言原未嘗錯，特謂「刺學校」則失詩人語氣。此蓋學校久廢不脩，學者散處四方，或去或留，不能復聚如平日之盛，故其師傷之而作是詩。曰：學問之道未可孤陋自安也，今學校廢久矣，予不能再赴講席而廣教，思彼青青子衿者，相從有素，能無繫予心哉？然予縱不能與諸及門互相助益，諸及門尊聞行知，各有淵源，寧不

思日來吾前，以嗣吾德音耶？其所以不來者，吾知之矣。年少佚達，日事登臨，或城或關，遊縱自恣，則其志荒矣。此吾所以憂思，刻不能忘，則雖一日之暫違，不啻三月之久別。予之心念及門也，爲何如哉？

【集釋】「青青」純綠色。孔氏穎達曰：「衿色雖一青，而重言青青者，古人之復言也。下言「青青子佩」，謂青組綬耳。『都人士』，狐裘黃黃，謂裘色黃耳。『深衣』云：「具父母衣純以青，孤子衣純以素。」是無父母者用素。『衿』，爾雅：「衣皆謂之襟。」孫氏炎曰：「交領也。」孔氏穎達曰：「衿與襟音義同，衿是領之別名。」

【標韻】衿十二侵心、音並同本韻 佩十二隊，叶蕭屑反。思四支來十灰叶韻 達七曷關六月月同通韻

### 揚之水 闕疑。

揚之水，不流束楚。終鮮兄弟，維予與女。無信人之言，人實廷女。一章揚之水，不流束薪。終鮮兄弟，維予二人。無信人之言，人實不信。二章

右「揚之水」二章，章六句。此詩終不可解。『序』以爲「君子閔忽之無忠臣良士，終以死亡」。然詩云「終鮮兄弟，維予與女」，是兄弟二人自相告誡之辭，非言臣與士也。且忽兄弟甚多，不止二人，何以云「維予與女」？曹氏曰：「『左』莊十四年，忽與子儀、子晳皆已死，而原繁謂厲公曰：『莊公之子猶有八人』，不得爲鮮。然則非閔忽詩明矣。」至『集傳』則以爲淫女相謂其所私之言，其於「兄弟」字更不可

通。昔人辯之已詳，茲不多贅。竊意此詩不過兄弟相疑，始因讒間，繼乃悔悟，不覺愈加親愛，遂相勸勉，以爲根本之間不可自殘，譬彼弱水難流東逝。兄弟相猜，本實先撥，又況骨肉無多，「維予與女」，何堪再離？女豈謂人言可信哉？他人雖親，難勝骨肉。「人實迂女」，以遂其私而已矣。慎無信人之言，而致疑於骨肉間也。語雖尋常，義實深遠。故聖人存之，以爲世之凡爲兄弟者戒。若必求其人其事以實之，則當闕疑以俟知者。

【集釋】「迂」與誑同。杜氏預曰：迂，欺也。

【標韻】楚六韻女同本韻 薪十一真人、信並同本韻

### 出其東門 不慕非禮色也。

出其東門，有女如雲。雖則如雲，匪我思存。縞衣綦巾，聊樂我員。一章出其閭閻，有女如荼。雖則如荼，匪我思且。縞衣如蘆，聊可與娛。二章

右《出其東門》二章，章六句。《序》謂「閭閻也。公子互爭，兵革不息，男女相棄，民人思保其室家焉。」然詩方細咏太平遊覽，絕無干戈擾攘、男奔女竄氣象。《序》言無當於經固已。《集傳》云：「人見淫奔之女而作此詩。」是以「如雲」、「如荼」之女盡屬淫奔，亦豈可哉？晦翁釋《詩》，隨口而道，並未暇思，於此可見。此詩亦貧士風流自賞，不屑與人尋芳逐豔。一旦出遊，睹此繁華，不覺有慨於心，以爲人生自有伉儷，雖荆釵布裙自足爲樂，何必妖嬈豔冶，徒亂人心乎？故東門一遊，女則如雲，而

又如茶，終無一人，繫我心懷，豈矯情乎？色不可以非禮動耳。心爲色動，且出非禮，則將無所止。詩固知足，亦善自防哉。

【集釋】「縞」白縞也。孔氏穎達曰：「廣雅云：『縞，細縞也。』」戰國策云：「強弩之餘，不能穿魯縞。」然則縞是薄縞不染，故色白也。蕤者，青色之小別，青而微白，爲艾草之色。「巾」馮氏復京曰：案「禮記」左佩粉帨，粉帨卽巾也。此巾宜爲佩巾，或以爲婦人裹頭之巾。「員」與云同，語辭也。「闔」曲城也。陳氏飛鵬曰：門之外有副城回曲以障門者，謂之闔。「闔」城臺也。「茶」毛氏萇曰：茶，英茶也。孔氏穎達曰：茶是茅草秀出之穗，言英茶者，英是白貌。「吳語」：「黃池之會，白常、白旗、素甲、白羽之矜，望之如荼。」李氏樗曰：「漢·禮樂志」曰：「顏如荼」。應劭曰：「茶，野苳，白華也。」顏師古曰：「蒼，茅也。」言美色如茅茶之柔也。

【標韻】門十二文雲同存十三元巾十一真員文通韻 闔十虞茶同且六蘆同娛七虞通韻。

### 野有蔓草 朋友相期會也。

野有蔓草，零露漙兮。有美一人，青揚婉兮。邂逅相遇，適我願兮。一章野有蔓草，零露漙漙。有美一人，婉如清揚。邂逅相遇，與子偕臧。二章

右「野有蔓草」二章，章六句。「小序」曰「思遇時也」，庶幾得之。「大序」又衍爲「君之澤不下流，民窮於兵革，男女失時，思不期而會焉」，則明明附會說矣。迨至「集傳」，則言野田草露之間，男女邂逅，

私相苟合以適己願，愈解愈紛，愈不成語。然循文按義，男女邂逅，固似苟合，而「與子偕臧」，又豈苟合者所能言哉？況其詩兩見於《左傳》，鄭季趙孟，而子太叔賦此，趙孟以爲「受其惠」，鄭饒韓起，而子鯁又賦此，宣子以爲「孺子善哉，吾有望矣」。一見於《韓詩外傳》，孔子遭程木子於鄭，傾蓋而語，顧子路束帛以贈，子路對曰：「士不中道相見。」孔子乃詠此詩以曉之。是皆取士君子邂逅相遇爲義。「有美」云者，猶《簡兮》之稱「彼美」，《干旄》之咏「彼姝」云爾。若如晦翁所言，縱不爲鄭卿地，獨不爲孔子地乎？是知此詩必爲朋友期會之詩無疑。士固有一見傾心，終身莫解，片言相投，生死不渝者，此類是也。又何必男女相逢始適願哉？

【集釋】「邂逅」不期而會也。

【標韻】薄十四寒，叶上亮反。婉十三阮，願十四願，叶五遠反。叶韻 漢七陽揚、臧並同本韻

### 溱洧 刺淫也。

溱與洧方渙渙兮。士與女方秉蘭兮。女曰：「觀乎？」士曰：「既且。」「且往觀乎！洧之外，洵訏且樂。」維士與女，伊其相諶，贈之以勺藥。一章溱與洧瀏其清矣。士與女殷其盈矣。女曰：「觀乎？」士曰：「既且。」「且往觀乎？洧之外，洵訏且樂。」維士與女，伊其將諶，贈之以勺藥。二章

右《溱洧》二章，章十二句。《序》謂「刺亂」。兵革不息，男女相棄，淫風大行」。此詩及《出其東門》正

敍鄭俗游覽之盛，何以刺亂？使兵革不息，男女相棄，豈尚有采蘭贈勺事耶？故《辯說》以爲鄭俗淫亂，乃其風聲氣習流傳已久，不爲兵革不息，男女相棄而後然也。庶幾近之矣。然《集傳》又以爲「淫奔者自敍之詞」，則非。姚氏云：「篇中士女字甚多，非士與女所自作明矣。」蓋刺淫，非淫詩也。此詩人自敍其國俗如此，不必言刺而刺自在。想鄭當國全盛時，士女務爲游觀。蒔花地多，耕稼人少。每值風日融和，良辰美景，競相出游，以至蘭勺互贈，播爲美談，男女戲謔，恬不知羞。則其俗流蕩而難返也。在三百篇中別爲一種，開後世冶遊豔詩之祖。聖人存之，一以見淫詞所自始，一以見淫俗有難終，殆將以爲萬世戒。不然，「鄭聲淫」爲聖王所必放，而又何存乎？

【集釋】「渙渙」春水盛貌。陸氏德明曰：渙，《韓詩》作洹。《說文》作汎。王氏應麟曰：三月桃花水下之時。《秉蘭》陸氏璣曰：蘭卽蘭，香草也。姚氏際恒曰：秉蘭者，《禮·內則》「佩蜺、茝蘭」，「男女皆佩容臭」也。秉者，身秉之，不必定是手執也。《集傳》以秉蘭爲采蘭，尤誤。蘭生谷中，豈生水中乎？且手中既秉蘭，又秉勺以贈，亦不合矣。《勺藥》劉氏瑾曰：《本草注》曰：勺藥有二種，有草勺藥，有木勺藥。姚氏際恒曰：《集傳》又謂「勺藥，香草也」，亦謬。勺藥卽今牡丹，古名勺藥。自唐玄宗始得木勺藥于官中，因呼牡丹。其花香，根葉不香，何得混云香草乎？案：後說卽所謂木勺藥也。《澗》深貌。《殷》衆也。《將》相將也。

【標韻】渙十五翰，叶于元反。蘭十五刪叶韻。乎七虞且六魚。通韻。藥十藥諫、藥並同本韻。清八庚盈同本韻。

以上鄭詩凡二十一篇。案：《鄭風》古目爲淫，今觀之，大抵皆君臣朋友、師弟夫婦互相思慕之詞。其類淫詩

者，僅《將仲子》及《溱洧》二篇而已。然《將仲子》乃寓言，非真情也。即使其真，亦貞女謝男之詞。《溱洧》則刺淫，非淫者所自作，何得謂爲淫耶？然則聖言非欺，竊意《鄭風》實淫，但經刪定，淫者汰而美者存，故鄭多美詩，非復昔日之鄭矣。其《溱洧》一篇尚存不刪者，以其爲鄭實錄，存之篇末，用爲戒耳。此所謂「放鄭聲」也。宋儒不察，但讀「鄭聲淫」一語，遂不理會「放」字，凡屬鄭詩，悉斥爲淫。舉凡一切君臣朋友、師弟夫婦互相思慕之詞，無不以桑中、濮上之例例之。遂使一時忠臣賢士，義夫烈婦，悉含冤負屈於數千百載上，而無人昭雪之者。此豈一時一人之憾？愚故特爲標出，寧使得罪後儒，不敢冤經前聖。世之有志《風》《雅》者，當能諒予一片苦衷也。

# 詩經原始卷之六

## 國風六

### 齊

《集傳》：齊，國名。本少昊時爽鳩氏所居之地，在《禹貢》爲青州之域。周武王以封太公望，東至于海，西至于河，南至于穆陵，北至于無棣。太公，姜姓，本四岳之後，既封於齊，通工商之業，便魚鹽之利，民多歸之，故爲大國。今齊、淄、濰、德、棣等州是其地也。然則何以次於鄭？鄭爲畿內地，而齊其霸首也，故次鄭以齊。學者讀其詩，又當尚論乎其世者，此耳。

### 鷄鳴 賢婦警夫早朝也。

鷄既鳴矣，朝既盈矣。初寤，虛景。匪鷄則鳴，蒼蠅之聲。審聽，實情。○一章東方明矣，朝既昌矣。匪東方則明，月出之光。上章聽，此章視，視聽莫不關心。○二章蟲飛薨薨，甘與子同夢。此乃實景，進一層法。會且歸矣，無庶予子憎。倒字句。○三章

右《鷄鳴》三章，章四句。《序》謂「思賢妃，刺哀公。」朱鬱儀謂「美乙公之王姬。」僞《說》謂「衛姬勸桓



公」。衆說不一，皆無確據。故《集傳》但以爲古賢妃告戒於君之詞。姚氏際恒又謂爲賢妃作也可，卽大夫妻作也亦無不可。「總之，警其夫欲令早起，故終夜關心，乍寐乍覺，誤以蠅聲爲鷄聲，以月光爲東方明，真情實景，寫來活現。」可謂善於說詩矣。然愚謂賢妃進御於君，有夜漏以警心，有太師以奏誠，豈煩乍寐乍覺，誤以蠅聲爲鷄聲，以月光爲東方明哉？此正士夫之家鷄鳴待旦，賢婦關心，常恐早朝遲誤有累慎德，不惟人憎夫子，且及其婦，故尤爲關心，時存警畏，不敢留於逸欲也。至謂鷄聲與蠅聲大小不類，此又詩人之詞，多在可解不可解之間，不必以辭害意也。若必巧爲之辯，則與會索然矣。「會且歸矣」，亦心切早朝之意。前二章摹寫其以早爲遲，其實時尚早也。此章則真恐其遲，故進一層言，非不欲與子同夢，特恐朝會人歸，致召人咎耳。全詩純用虛寫，極回環摩盪之致，古今絕作也。

【集釋】「會」朝也。

【標韻】鳴八庚盈、聲並同本韻 明八庚昌七陽光同轉韻 薨十蒸夢一送，叶莫騰反。憎十蒸叶韻

### 還 刺齊俗以弋獵相矜尚也。

子之還兮，遭我乎狃之間兮。並驅從兩肩兮，揖我謂我儼兮。一章子之茂兮，遭我乎狃之道兮。並驅從兩牡兮，揖我謂我好兮。二章子之昌兮，遭我乎狃之陽兮。並驅從兩狼兮，揖我謂我臧兮。三章

右「還」三章，章四句。「序」謂「刺哀公」。然詩無「君」「公」字，胡以知其然耶？此不過獵者互相稱譽，詩人從旁微哂，因直述其詞，不加一語，自成篇章。而齊俗急功利，喜夸詐之風，自在言外，亦不刺之刺也。至其用筆之妙，則章氏潢云：「子之還兮，已譽人也。」謂我儂兮，人譽已也。並驅，則人已皆與有能也。寥寥數語，自具分合變化之妙。獵固便捷，詩亦輕利，神乎技矣！

【集釋】「還」便捷之貌。「獵」山名。許氏慎曰：「獵山，在齊地。」「從」逐也。「肩」陸氏德明曰：「肩，《說文》云：『三歲豕，肩相及者。』本亦作研，音同。孔氏穎達曰：『大司馬云：『大獸公之。』七月云：『獻豸于公。』則肩是大獸。」「儂」利也。「茂」美也。「昌」盛也。「狼」獸名，似犬。孔氏穎達曰：「舍人曰：『狼，牡名獾，牝名狼。』」「臧」善也。

【標韻】還十五刪問同肩一先儂同通韻 茂二十六宥道十九皓，叶徒厚反。牡二十五有奸十九皓，叶許厚反。叶韻 昌七陽陽、狼、臧並同本韻

### 著 刺不親迎也。

俟我於著乎而，充耳以素乎而，尚之以瓊華乎而。一章俟我於庭乎而，充耳以青乎而，尚之以瓊瑩乎而。二章俟我於堂乎而，充耳以黃乎而，尚之以瓊英乎而。三章

右「著」三章，章三句。「序」謂「刺不親迎也」，得之。而姚氏際恒則以爲「此本言親迎，必欲反之以爲刺，何居？」又謂「更可異者，呂氏祖謙『刺不親迎』之說，以爲『女至壻門，始見其俟已』，安見此著與

庭堂爲壻家而非女家乎？《鄭風·丰》篇亦有「俟我乎堂」句，解者皆以爲女家，又何居？愚竊謂爲不然，著庭、堂，女家固有，但觀其三俟我於著，於庭，於堂，以次而漸進，至於內室，則其爲壻家之著、庭、堂，非女家之著、庭、堂可知矣。至《丰》詩之「俟堂」又當別論，不可以此章例也。禮貴親迎而齊俗反之，故可刺。否則此詩直當刪也，又何存耶？

【集釋】《著》門屏之間也。孔氏穎達曰：《釋宮》云：「門屏之間謂之宁」。李巡曰：「門屏之間，謂正門內兩塾間。」著與寧音義同。《充耳》孔氏穎達曰：充耳用素絲爲統，以懸瓊華之石爲瑱。朱子曰：古人充耳以瑱，或用玉，或用象，看來是以線穿，垂在當耳處。《瓊華、瓊瑩、瓊英》姚氏際恒曰：瓊赤玉，貴者用之。華、瑩、英，取協韻以贊其玉之色澤也。《毛傳》分「瓊華」、「瓊瑩」、「瓊英」爲三種物，已自可笑，而又以「瓊華」爲石，「瓊瑩」、「瓊英」爲石似玉，又以分君卿大夫士，尤謬。《集傳》本之，皆以三者爲石似玉，亦不可解。案：此說甚有見，故錄之。然則漢儒之好附會而無識，卽此亦見一斑。

【標韻】著六御素七過華六麻，叶若無反。叶韻 庭九育青同瑩八庚通韻 堂七陽黃同英八庚轉韻

### 東方之日 刺荒淫也。

東方之日兮，彼姝者子，在我室兮。在我室兮，履我即兮。一章東方之月兮，彼姝者子，在我園兮。在我園兮，履我發兮。二章

右《東方之日》二章，章五句。此詩刺淫必有所指，非泛然也。故孔氏謂「刺哀公」，僞傳、說謂「刺莊

公」，何玄子謂「刺襄公」，雖皆無據，而寢闈之內，一任彼姝朝來暮往，則終日昏昏，內作色荒也可知。士庶之家尚且不可，況宮闈乎？此詩之作詎能無故？然言者雖不可考，而聞者正當以爲戒也。

【集釋】「履」躡也。「即」《集傳》：「即，言此女躡我之跡而相就也。」《闕》陸氏德明曰：「韓詩云：門屏之間曰闕。」《發》行去也。孔氏穎達曰：「行必發足而去，故以發爲行也。」《集傳》曰：「言躡我而行去也。」

【標韻】日四質室同卽十三職通韻 月六月闕七曷發六月通韻

### 東方未明 刺無節也。

東方未明，顛倒衣裳。顛之倒之，自公召之。一章東方未晞，顛倒裳衣。倒之顛之，自公令之。二章折柳樊圃，狂夫瞿瞿。不能辰夜，不夙則莫。三章

右《東方未明》三章，章四句。此詩刺無節，亦必有所指。但《序》無據，故不可考。蘇氏轍曰：「爲政必有節，及其節而爲之，則用力少而事舉。苟爲無節，緩急皆所以害政也。」夫「東方未明」，起而顛倒其衣裳，可謂急矣。然猶有以爲緩，而「自公召之」者，則政將何以堪之？此就急之無節者言之也。黃氏佐曰：「此雖只言其興之早，已見得他日不免又太晚意，故曰無節。」玩末章「不夙則莫」一句可見。此又就緩之無節者言之。總之，爲政無節，緩急均有所害。蓋奉令莫知所從，則玩心生，而怠氣亦乘，政於是乎不可爲矣。不然未明而起，爲政之常，何刺之有？詩固詳言其急，而緩自見焉耳。惟「折柳」二句插入不倫，故姚氏以爲難詳。

【集釋】「晞」明之始升也。孔氏穎達曰：「晞是日之光氣。」《湛露》云：「匪陽不晞」，謂見日之光而始乾，故以晞爲乾。《蒹葭》云：「白露未晞」，言露在朝旦未見日氣，故亦爲乾義。此無取於乾，故言明之始升，謂將旦時，日之光氣始升也。〔柳〕許氏慎曰：「柳，小楊也。」〔樊〕藩也。〔圃〕菜園也。郭璞曰：「謂藩籬也。種菜之地謂之圃，其外樊籬謂之園。」〔翟翟〕驚顧之貌。程子曰：「柳，柔脆之物，折之以爲藩籬，非堅固也。狂夫亦知其有限，見之則躍然而驚。晝夜之限非不明也，乃不能知，而不早則晏，言無節之甚。」

【標韻】明八庚裳七陽轉韻 倒二十號召十八嘯通韻 晞五微衣同本韻 頗一先令八庚轉韻 圃七遇翟、莫並同本韻

### 南山 刺襄公淫其妹，而魯不能禁也。

南山崔崔，雄狐綏綏。魯道有蕩，齊子由歸。既曰歸止，曷又懷止？一章葛屨五兩，冠綏雙止。魯道有蕩，齊子庸止。既曰庸止，曷又從止？二章藪麻如之何？衡從其畝。取妻如之何？必告父母。既曰告止，曷又鞠止？三章析薪如之何？匪斧不克。取妻如之何？匪媒不得。既曰得止，曷又極止？四章

右《南山》四章，章六句。此詩直刺文姜，事甚顯。而解者猶紛紛不一，豈不怪哉？《小序》謂「刺襄公」，只籠統言之。《集傳》分前二章刺齊襄，後二章刺魯桓。姚氏以爲「未免割裂，辭意不貫。」季明

德則謂「通篇刺文姜」，而雄狐句又無着。何玄子謂「首章首二句刺齊襄，首章懷字刺文姜，二章刺魯桓，下二章又追原其夫婦成昏之始」，則尤穿鑿不自然。惟嚴氏彙謂「通篇刺魯桓」，蓋謂齊人不當以「雄狐」目其君也。其曰「雄狐綏綏然求匹，喻魯桓求昏于齊也。」又曰「齊人不敢斥言其君之惡，而歸咎于魯之辭也。辭雖歸咎于魯，所以刺襄公者深矣。」姚氏取之，以爲如此，則辭旨歸一而意亦周匝。愚意殊不謂然。試問此事豈一人咎哉？魯桓、文姜、齊襄三人者，皆千古無恥人也。使其有一知恥，則其淫斷斷不至於此極。故此詩不可謂專刺一人也。首章言襄公縱淫，不當自淫其妹。妹既歸人而有夫矣，則亦可以已矣，而又曷懷之有乎？次章言文姜即淫，亦不當順從其兄，今既歸魯而成耦矣，則亦可以已矣，而又曷返齊而從兄乎？後二章言魯桓以父母命、憑媒妁言而成此昏配，非苟合者比，豈不有聞其兄妹事乎？既取而得之，則當禮以閑之，俾勿歸齊，則亦可以已矣。而又曷從其入齊，至令得窮所欲而無止極，自取殺身禍乎？故欲言襄公之淫，則以「雄狐」起興；欲言文姜成耦，則以冠履之雙者爲興；欲言魯桓被禍，則先以「藜麻」興告父母以臨之，「析薪」興媒妁以鼓之，而無如魯桓之懦而無志也，何哉？詩人之大不平也，故不覺發而爲詩，亦將使千秋萬世後，知有此無恥三人而已。又何暇爲之掩飾其辭而歸咎於一哉！

【集釋】「雄狐」狐，邪媚之獸，故以比襄公。孔氏穎達曰：對文則飛曰雌雄，走曰牝牡，散則可以相通。《左傳》曰「獲其雄狐」，亦謂牡爲雄也。《綏綏》求匹之貌。《魯道》適魯之道也。馮氏京曰：《水經注》汶水南逕鉅平縣故城東，西南流。城東有魯道，詩所謂「魯道有蕩」。今汶水上夾水有文姜臺。《齊子》

指文姜也。〔兩〕二屨也。孔氏穎達曰：屨必兩隻相配，故以一兩爲一物。曹氏粹中曰：「屨人」辨外、內命夫、命婦之命屨、功屨、散屨」注云：有編屨、黃屨、白屨、黑屨、散屨，所謂五兩也。姚氏際恒云：五、伍通，參伍之伍。葛屨相伍必兩，冠綬必雙。下句不用伍字，即承上意而以止字足之。亦通。〔綬〕冠上飾也。許氏謙曰：禮書，二組屬於笄，順頤而下結之謂之纓。纓之垂者謂之綬。〔庸〕用也。〔執〕樹也。〔衡從〕陸氏德明曰：衡，亦作橫。〔韓詩〕云：「東西耕曰橫」。從，〔韓詩〕作由，云「南北耕曰由」。曹氏粹中曰：「齊民要術」云：「種麻欲得良田，耕不厭熟。縱橫七遍以上，則麻生無葉。」〔衡從其畝〕，蓋古法也。〔鞠〕窮也。〔克〕能也。〔極〕亦窮也。又至也。

【標韻】崔十友綴四支歸五微懷九佳通韻 雙三江唐二冬從同通韻 欽二十五有母同本韻 告二沃鞠一屋通韻 克十三職得、極並同本韻

### 甫田 未詳。

無田甫田，維莠騶騶。無思遠人，勞心忉忉。一章無田甫田，維莠桀桀。無思遠人，勞心怛怛。二章婉兮孌兮，總角丱兮。未幾見兮，突而弁兮。三章

右甫田三章，章四句。此詩詞義極淺，盡人能識。惟意旨所在，則不可知。《小序》謂「刺襄公」。《大序》謂「無禮義而求大功，不修德而求諸侯」。率皆擬議之詞，非實據也。《集傳》不從，是矣。而順文敷義，又恐非詩人本旨。且前二章與後一章詞氣全不相類，此中必有所指，與泛言義理者不同。

〔集傳〕勉強申合，終非自然。故何玄子以爲「刺魯莊公」，末章似是，其如上二章何哉？姚氏以爲「未詳」，識過諸儒遠矣。從之。

〔集釋〕〔田〕耕治之也。孔氏穎達曰：「田甫田」，猶「多方」宅爾宅，田爾田。今人謂佃食，古之遺語也。

〔甫〕大也。〔莠〕害苗之草也。〔騶騶〕張皇之意。〔切切〕憂勞也。〔桀桀〕猶騶騶也。〔怛怛〕慘切貌。〔婉孌〕少好貌。〔邛邛〕兩角貌。〔弁〕冠名。

〔標韻〕騶二蕭切四泰通韻 桀九屑恒七曷通韻 變十七霰邛十六諫見十七霰弁同轉韻

### 盧令令 刺好田也。

盧令令，其人美且仁。一章盧重環，其人美且鬢。二章盧重鋤，其人美且偲。三章

右「盧令令」三章，章二句。〔小序〕謂「刺荒也」。〔大序〕曰：「襄公好田獵畢弋而不修民事，百姓苦之，故陳古以風焉。」襄公好田而死於田，事見「春秋傳」，故當刺。然此詩與公無涉，亦無所謂「陳古以風」意。蓋游獵自是齊俗所尚，詩人即所見以咏之，詞若歎美意實諷刺，與「還」略同。當以「集傳」爲是。但彼以馳逐爲能事，此以聲容爲美觀，作法又各不同耳。

〔集釋〕〔盧〕田犬也。孔氏穎達曰：犬有田犬、守犬。〔戰國策〕云：「韓國盧，天下之駿犬。東郭逵，海內之狡兔。韓盧逐東郭，俱爲田父之所獲。」是盧爲田犬也。〔令令〕犬領下環聲。董氏道曰：「韓詩」作「盧泠泠」。〔說文〕引「詩」作「獐」。〔重環〕子母環也。〔鬢〕〔說文〕髮好貌。〔鋤〕許氏慎曰：鋤，大鎖



也。〔偲〕《集傳》：偲，多鬚之貌。《春秋傳》所謂「于思」，卽此字，古通用耳。

【標韻】今八庚仁十一真通韻 環十五刪聲一先轉韻 鍾十灰偲四支通韻

### 敝笱 刺魯桓公不能防閑文姜也。

敝笱在梁，其魚魴鰈。齊子歸止，其從如雲。一章敝笱在梁，其魚魴鰈。齊子歸止，其從如雨。二章敝笱在梁，其魚唯唯。齊子歸止，其從如水。三章

右《敝笱》三章，章四句。《小序》曰：「刺文姜也。」《大序》謂：「齊人惡魯桓公微弱，不能防閑文姜，使至淫亂，爲二國患。」朱子曰：「桓當作莊。」蓋以文姜如齊多在莊公世，故《集傳》以此詩爲刺莊公不能防閑其母。豈知不能防閑其母之罪小，不能防閑其妻之罪大。且桓公時，文姜已歸齊，致公薨于齊，詩人不於此時刺桓公，豈待其子而後刺乎？姚氏主《序》說，而謂歸爲于歸，則又不可解。詩以敝笱不能制大魚比起，是明明謂魯桓不能制文姜，縱之歸齊，而已復從之，以致自戕其生，爲天下笑。若謂歸爲于歸，則魚方人笱，而何見其爲不能制耶？故知此詩當作於公與夫人如齊之頃，而未薨于車之先。曰「其從如雲」，「其從如雨」，「其從如水」，非歎僕從之盛，正以笑公從婦歸寧，故僕從加盛如此其極也。

【集釋】《敝》壞也。《笱》罾也。許氏謙曰：《說文》笱，曲竹，捕魚。《魴鰈》大魚也。孔氏穎達曰：《孔叢子》云：「衛人釣得鰈魚，其大盈車。」是則鰈爲大魚也。《歸》張子曰：「反歸于齊也。」《鰈》陸氏璣曰：「鰈

似魴，厚而頭大，魚之不美者。故里語曰：「網魚得魴，不如啗茹。」陸氏佃曰：「魴性旅行，故其字從與，亦謂之鯁也。」唯唯，陸氏德明曰：「唯唯，韓詩作遺遺，言不能制也。輔氏廣曰：唯唯，言其出人之自如也。」

【標韻】鯽十五刪雲十二文通韻 鱖六語兩七廢通韻 唯四紙水同本韻

### 載驅 刺文姜如齊無忌也。

載驅薄薄，簟茀朱幪。魯道有蕩，齊子發夕。一章四驪濟濟，垂轡瀟瀟。魯道有蕩，齊子豈弟。二章汶水湯湯，行人彭彭。魯道有蕩，齊子翱翔。三章汶水滔滔，行人儻儻。魯道有蕩，齊子遊敖。四章

右「載驅」四章，章四句。此詩以專刺文姜為主，不必牽涉襄公，而襄公之惡自不可掩。夫人之疾驅夕發以如齊者，果誰爲乎？爲襄公也。夫人爲襄公而如齊，則刺夫人卽以刺襄公，又何必如舊說「公盛車服與文姜播淫於萬民」而後謂之刺乎？且「碩人」云「翟茀以朝」，是婦人之車亦可言茀，不必以前二章上二句屬襄公也。案「春秋」魯莊公二年，「夫人姜氏會齊侯于禚」，四年，「夫人姜氏享齊侯于祝丘」，五年，「夫人姜氏如齊師」，七年，夫人姜氏「會齊侯于防」，又「會齊侯于穀」。蓋至是，而夫人之如齊肆無忌憚矣。詩曰「發夕」，曰「豈弟」，曰「翱翔」，曰「遊敖」，正其時也。上章在桓公之世，其歸寧也，不過言僕從之衆，如雲、如雨、如水而已。此詩在莊公之年，其會兄也，竟至樂而忘返，

遂翱翔遠遊，宜淫於通道大都，不顧行人訕笑，豈尚知人間有羞恥事哉？至今汶水上有文姜臺，與衛之新臺可以並臭千古。雖濯盡汶、濮二水滔滔流浪，亦難洗厥羞矣。

【集釋】「薄薄」疾驅聲。「簟」方文席也。「菲」車後戶也。孔氏穎達曰：「簟字從竹，用竹爲席，其文必方。車之蔽曰菲。」朱鄭《爾雅》：「與革前謂之輶，後謂之菲；竹前謂之輶，後謂之蔽。」郭璞注：「輶以韋鞮車軾，菲以韋鞮後戶，輶以簟衣軾，蔽以簟衣後戶。」陳氏祥道曰：「輶與菲皆革爲之。詩所謂「朱輶」是也。輶與蔽皆竹爲之，詩所謂「簟菲」是也。」《驪》馬黑色也。毛氏萇曰：「四驪，言物色盛也。孔氏穎達曰：「夏官·校人云：「凡軍事，物馬而頒之。」注云：「物馬齊其力。」言「四言驪」，道其物色俱盛也。」《濟濟》美貌。《漙漙》柔貌。毛氏萇曰：「垂簪，簪之垂者。漙漙，衆也。」《豈弟》樂易也。嚴氏粲曰：「樂易，安舒恬然，無慚恥之色。」《汶》水名。曹氏粹中曰：「汶水有二，許氏以爲出琅邪朱虛縣東泰山，東至安邱，入海。桑欽以爲出泰山萊蕪縣西南，入濟。說者主欽義，以爲在齊南魯北。」

【標韻】薄十藥韻同夕十一陌，叶祥僉反。叶韻 濟八齊韻、弟並同本韻 湯七陽彭、翔並同本韻 滔四豪儵二蕭敖四豪通韻

### 猗嗟 美魯莊公材藝之美也。

猗嗟昌兮，頤而長兮。抑若揚兮，美目揚兮。巧趨踰兮，射則臧兮。一章猗嗟名兮，美目清兮。儀既成兮，終日射侯，不出正兮。展我甥兮。二章猗嗟變兮，清揚婉兮。舞則選

今，射則貫兮，四矢反兮，以禦亂兮。 三章

右「猗嗟」三章，章六句。此齊人初見莊公而歎其威儀技藝之美，不失名門子，而又可以爲戡亂材。誠哉，其爲齊侯之甥也！意本贊美，以其母不賢，故自後人觀之而以爲刺耳。於是紛紛議論，並謂「展我甥兮」一句以爲微詞，將詩人忠厚待人本意盡情說壞。是皆後儒深文苛刻之論有以啟之也。愚於是詩不以爲刺而以爲美，非好立異，原詩人作詩本意蓋如是耳。至詩中言射，錯綜入妙，有目可以共賞，故不再煩辭費。

【眉評】「一章」描摹莊公，如見其人。

【集釋】「射」古者諸侯相朝，則有賓射。故是詩所言，皆以賓射爲主。案：「春秋」莊四年冬，「公及齊人狩于槎」。此詩疑卽狩槎事，蓋公朝齊而因以狩也。「名」猶稱也。「侯正」劉氏瑾曰：「周禮：梓人，有皮侯、采侯、獸侯。天子大射用皮侯，賓射用采侯，燕射用獸侯。鵠以皮爲之，正則布爲之。」射義注：「畫布曰正，棲皮曰鵠。」是也。「展」誠也。「甥」姊妹之子曰甥。「選」異於衆也。「四矢」鄭氏康成曰：「禮，射三而止，每射四矢，皆得其故處，此之謂復射。必四矢者，象其能禦四方之亂也。」

【標韻】昌七陽長、揚、賡、減並同本韻 名八庚清、成、正、甥並同本韻 變十七霰婉十三阮，叶許願反。選十七霰貫十五輪，叶廣縣反。反十三阮，叶孚鈞反。亂十五輪，叶靈卷反。叶韻

以上齊詩凡十一篇。

案此冊詩僅十一，而咏魯事者四，皆以襄公故也。襄公縱淫，與衛宣同爲世大惡，非尋常比。一則以父納子媳，一則以兄淫己妹，皆千古罕有事。詩人播爲歌咏，聖人載在葩經，皆有關於倫常大故，不

僅係乎風化已也。然衛詩衆目爲淫，齊風人不以爲怪，何哉？且淫無過乎鄭，鄭俗不過采蘭贈勺，爲士女游觀之常，而齊何如乎？吾不能不於此三致慨焉！

## 魏

《集傳》：魏，國名。本舜、禹故都，在禹貢冀州雷首之北，析城之西，南枕河曲，北涉汾水。其地陝隘，而民貧俗儉，蓋有聖賢之遺風焉。周初以封同姓，後爲晉獻公所滅，而取其地。今河中府解州卽其地也。蘇氏曰：魏地入晉久矣，其詩疑皆爲晉而作，故列於唐風之前，猶邶、鄘之於衛也。今案篇中公行、公路、公族皆晉官，疑實晉詩。又恐魏亦嘗有此官，蓋不可考矣。案：晉至獻公，國已強大，政漸奢侈。而魏詩每刺其君儉勤，與晉氣象迥乎不侔，必非晉詩無疑。且邶、鄘之咏衛事，其詩確有可指，此則不著時君世系，亦不得比邶、鄘之於衛，殆亦檜、鄭例耳。然則何以編之齊、秦間乎？繼齊而霸，先秦而強者，晉也。魏既入晉，則爲晉地，故與唐同居齊、秦之間。且其地爲舜、禹故都，與他國不同，先之所以見聖帝遺風猶未盡泯，霸圖盛業於此方新云爾。

## 葛屨 刺褊也。

糾糾葛屨，可以履霜。摻摻女手，可以縫裳。要之襍之，好人服之。一章好人提提，宛然左

辟，佩其象揅。維是褊心，是以爲刺。二章

右「葛屨」二章，一章六句，一章五句。儉，美德也，何可刺？然儉之過則必至於嗇，嗇之過則必至於褊，今不惟嗇而又褊矣，故可刺。詩言本自分明，而「序」與「傳」乃混而釋之，致啟後人疑議。此不善說「詩」者過也。夫履霜以葛屨，縫裳以女手，若在士庶之家，亦何足異？惟以象揅之好人爲而服之，則未免近於趨利，下與民同，其規模狹隘固不必言，而心術之鄙陋爲何如哉？故儉亦當有節焉，乃爲貴耳。

【眉評】「二章」明點作意，又是一法。

【集釋】「糾糾」毛氏甚曰：糾糾，猶絲絲也。「葛屨」集傳：夏葛屨，冬皮屨。「摻摻」猶纖纖也。「要」裳要。「褊」衣領。「好人」集傳：好人猶大人也。黃氏佐曰：猶今言大人不當親細事也。姚氏際恒曰：好人，猶美人，指夫人也。以見其服事之勤如此。亦通。「提提」安舒之意。「宛然」讓之貌也。「左辟」徐氏鳳彩曰：古人以右爲尊，故讓者辟右就左，大人之儀容也。「揅」集傳：揅所以摘髮，用象骨爲之，貴者之飾也。

【標韻】霜七陽裳同本韻 褊十三職服一屋，叶蕭北反。叶韻 辟四寘揅八霽刺四寘通韻

汾沮洳 美儉德也。

彼汾沮洳，言采其莫。彼其之子，美無度。美無度，殊異乎公路。一章彼汾一方，言采其

桑。彼其之子，美如英。美如英，殊異乎公行。二章彼汾一曲，言采其蕢。彼其之子，美如玉。美如玉，殊異乎公族。三章

右《汾沮洳》三章，章六句。前篇刺褊，此篇美儉，二詩互證，義旨乃明。蓋儉無可議，褊乃足刺。故既刺其褊，復美能儉也。《小序》不知，乃以爲刺，《大序》更謂「其君儉以能勸，刺不得禮」，豈不謬哉？且詩言公路、公行、公族，明是爲卿大夫發，《序》何以刺及其君？魏君縱勸與儉，斷不至親手采蕢，以失其度。卽卿大夫，亦不過於汾水彎環間課農樹桑，爲子孫計，已足見其爲勸儉也。此必公族子姓，各有賜莊，躬親樹畜。詩人於采蕢、采桑、采蕢之際，得睹勸勞而歎美之。以爲「彼其之子」，身居貴冑，德復粹然，而又能勸與儉，毫無驕奢習氣，殊異乎公族輩也。蓋世祿之家，鮮克由禮，而此獨超出流品，則其德詎可量耶？若毛、鄭及《集傳》諸解，以爲此人美則美矣，然其儉奮褊急之態，殊不似貴人。既儉奮褊急矣，又何云美？方美而忽刺，上下語氣必不相貫。卽姚氏所云，詩人「託言采物」以美公族之人，其所美者何在？亦甚忽突，故不足以服羣議也。

【眉評】「一章」「殊異」是美詞，非刺詞，上下文語意方貫。

【集釋】「汾」水名，出太原晉陽山，西南入河。王氏應麟曰：「水經」：汾水，西至汾陰縣北，西入于河。」入河之處，卽魏之舊國。「沮洳」水浸處，下濕之地。「莫」菜也。陸氏璣曰：「莫，莖大如箸，赤節，節一葉。今人纔以取蘭結，其味酢而滑。五方通謂之酸迷，河、汾之間謂之莫。」《無度》《集傳》：「無度，言不可以尺寸量也。度，限也。」《公路》《集傳》：「公路者，掌公之路車。晉以卿大夫之庶子爲之。」《公行》

《集傳》：公行，卽公路也。以其主兵車之行列，故謂之公行也。孔氏穎達曰：公路與公行，一也。宣二年《左傳》云：「晉成公立，乃宦卿之適，以爲公族。其庶子爲公行。趙盾請以括爲公族，公許之。冬，趙盾爲耗車之族。」是其事也。趙盾自以爲庶子，讓公族而爲公行。服虔云：「耗車，戎車之倅。」杜預云：「公行之官是也。」《賈》水鳥也，葉如車前草。孔氏穎達曰：郭璞云：「水鳥如續斷，寸寸有節，拔之可復。」陸璣疏云：「今澤蓂也。」《公族》《集傳》：公族，掌公之宗族，晉以卿大夫之適子爲之。孔氏穎達曰：成十八年《左傳》曰：「晉荀會、欒黶、韓無忌爲公族大夫，使訓卿之子弟。」是公族，主君之同姓也。此公族、公行，諸侯之官，故魏、晉有之。《周禮》六官皆無公族、公行之官，是天子諸侯異禮也。

【標韻】泐六御莫七遇度、路並同通韻 方七陽桑同英八庚行七陽轉韻 曲二沃賈、玉二沃族一屋通韻

校記

「一」盾，原作「質」，據《左傳》及《毛詩正義》改。

### 園有桃 賢者憂國政日非也。

園有桃，其實之殽。興起。心之憂矣，急接心憂，省却無數筆墨。我歌且謠。不知我者，謂我士也驕。以下純以清空之氣行之。彼人是哉，子曰何其？心之憂矣，其誰知之？舉世皆然，更無如何。其誰知之，蓋亦勿思。一章園有棘，其實之食。心之憂矣，聊以行國。不知我者，謂我



士也罔極。搔首問天，合眼放步，有世人皆醉而我獨醒之慨。彼人是哉，子曰何其？心之憂矣，其誰知之？其誰知之，蓋亦勿思。二章

右「國有桃」二章，章十二句。魏之失不在儉，而在奢與褻；且不在卿大夫之儉，而在國君之褻與急。觀前二詩可見。夫士夫之能勤且儉，俗之美者也，雖周家王業始基，不過如是，而何以煩賢者之切切慮哉？豈知爲國貴遠圖，不貴小利；內能節儉，外務宏施，乃可以收人心而立國本。禹之菲飲食而致孝乎鬼神，惡衣服而致美乎黻冕，卑宮室而盡力乎溝洫，乃所以爲儉之善，故聖人歎爲無間然也。竊意魏君非儉，乃奢耳。舉國不知，以爲美德，從而和之，相率以奢。計較瑣屑，務簡省而不適宜，謀小利而不中節，以至人心日刻，而國勢愈孱，尚不自知其失。故賢者憂之，發爲歌詠，亦望當國者有以矯其失而正之耳。○「國有桃」，或以爲興，或以爲比，或以爲賦。朱子亦不能定，以爲詩固有一章而三義者。其實主興者居多，而語氣終未得。程子曰：「國有桃，亦用其實以爲穀，興國有民雖寡，能用則治，今不能用，故心憂之。」姚氏際恒云：「桃、棘，果實之賤者。國有之，猶可以爲食，興國之無人也。故直接以『心之憂矣』云云。」均就詩論詩，未嘗卽當日情事而一思之耳。至《集傳》謂「國必有桃，則其實之穀矣。心之憂，則我歌且謠矣」，尤含國滑過，毫無意義。愚謂詩人之意若曰：「國必有桃而後可以爲穀，國必有民而後可以爲治。今務爲刻鵠，剝削及民，民且避頽鼠而遠適樂國，君雖有土，誰與興利？旁觀深以爲憂，而當局乃不以爲過。」此詩之所以作也。

【眉評】「一章」姚氏際恒曰：「詩如行文，極縱橫排宕之致。」「二章」此詩與《黍離》、《兔爰》如出一手，

所謂悲愁之詞易工也。

【集釋】「穀」食也。【其】語辭。張氏彩曰：「何其，猶『檀弓』言『何居』，蓋述譏己者反問之詞，言不喻其志也。」【棘】集傳：「棘，棗之短者。」

【標韻】桃四聲穀三音韻二蕭驕同通韻 哉十灰其四支知、思並同通韻 棘十三職食、國、極並同本韻

校記

【一】「不」字，據文義加。

### 陟岵 孝子行役而思親也。

陟彼岵兮，瞻望父兮。父曰：「嗟！予子行役，夙夜無已。上慎旃哉，猶來無止。」一章陟彼岵兮，瞻望母兮。母曰：「嗟！予季行役，夙夜無寐。上慎旃哉，猶來無棄。」二章陟彼岡兮，瞻望兄兮。兄曰：「嗟！予弟行役，夙夜必偕。上慎旃哉，猶來無死。」三章

右「陟岵」三章，章六句。人子行役，登高念親，人情之常。若從正面直寫己之所以念親，縱千言萬語，豈能道得意盡？詩妙從對面設想，思親所以念己之心，與臨行勗己之言，則筆以曲而愈達，情以婉而愈深。千載下讀之，猶足令羈旅人望白雲而起思親之念，況當日遠離父母者乎？其用意尤重在「上慎旃哉」一語。親以是祝之子，子以是體夫親。其能以親心爲己心者，又不僅在思親之貌與親之情而已，而可不謂之爲賢乎？

【集釋】「帖」爾雅·釋山：「多草木，帖。」「上」猶尚也。「無止」謂無止于彼而不來也。「紀」爾雅·釋山：「無草木，岐。」紀同。「無棄」謂無棄我而不歸也。「必偕」謂必與同役者偕，無獨行也。「無死」較無止，無棄而加切耳。

【標韻】帖七庚父同本韻 已四紙止同本韻 紀四紙母一十五有，叶蒲彼反。叶韻。 寐四寔同本韻 岡七陽兄八庚轉韻 偕九佳，叶舉里反。死四紙叶韻

### 十畝之間 夫婦偕隱也。

十畝之間兮，桑者閑閑兮，行與子還兮。一章十畝之外兮，桑者泄泄兮，行與子逝兮。二章

右「十畝之間」二章，章二句。自來解此詩者，皆謂賢者不樂仕於其朝，而思與其友歸於農圃。惟姚氏際恒以爲「類刺淫之詩」，蓋以桑者爲婦人，古稱採桑皆婦人，無稱男子者。若爲君子思隱，則何爲及于婦人耶？又云：「古西北地多植桑，故指男女之私者必曰『桑中』也。」姚氏最惡《集傳》指美詩爲淫詩，此詩絕無淫意而乃以爲淫，則何異惡人之狂而反自陷狂疾者哉？後又曰：「不然，則夫之呼其妻，亦未可知也。」此語庶幾得之。蓋隱者必挈眷偕往，不必定招朋類也。賢者既擇地偕隱，則當指桑茂密處，婦女之勤於蠶事者相爲鄰里，然後能妥其室家，以成一代淳風。故語其婦曰：「世有此境，吾將與子長往而不返矣。」此隱者微意也。姚氏不識，指以爲淫，豈不冤哉？

【集釋】「十畝」姚氏際恒曰：「孟子云：『五畝之宅，樹之以桑。』此十畝者，合兩宅而言，故曰之間也。」

閑〔集傳〕閑閑，往來者自得之貌。〔行〕猶將也。〔泄泄〕猶閑閑也。〔逝〕往也。

【標韻】同十五刪閑、還並同本韻 外九泰泄八霽逝同轉韻

### 伐檀 傷君子不見用於時，而又恥受無功祿也。

坎坎伐檀兮，寘之河之干兮。河水清且漣漪。三句比起。不稼不穡，胡取禾三百廛兮？不狩不獵，胡瞻爾庭有懸貆兮？四句反襯「不素餐」，筆極噴薄有力。彼君子兮，不素餐兮！點明正意。

○一章坎坎伐輻兮，寘之河之側兮。河水清且直猗。不稼不穡，胡取禾三百億兮？不狩不獵，胡瞻爾庭有懸特兮？彼君子兮，不素食兮！二章坎坎伐輪兮，寘之河之漘兮。河水清且淪猗。不稼不穡，胡取禾三百困兮？不狩不獵，胡瞻爾庭有懸鵝兮？彼君子兮，不素殮兮！三章

右《伐檀》三章，章九句。此詩解者不一，皆就其一二句以爲言，未嘗卽全詩而會通之也。《小序》謂「刺食」，《大序》謂「在位貪鄙無功而受祿，君子不得進仕爾」。謂「刺食」者，指「不稼」以下而言也。謂「不得進仕」者，指章首三句而言也。刺食與不得進仕，各自爲義，兩不相蒙，天下豈有此文義？又首三句，或以爲賦，或以爲比，或以爲興，亦無定解。以爲賦者，毛、鄭解《集傳》從之。則以伐檀爲實事，一似君子必如小人力作而後食。夫君子之不耕而食也久矣。孟子云：「其君用之，則安富尊榮，其子弟從之，則孝弟忠信。」「不素餐兮」，孰大於是？豈必伐檀、稼穡、狩獵而後食哉？即使伐檀，亦何至寘

之河干而無用？此不通之論也。以爲興者，姚氏際恒云：「興體不必盡與下所咏合，只是咏君子者適見有伐檀爲車，用置于河干，而河水正清且漣漪之時，即所見以爲興。」此求其解而不得，姑爲是影響之論以釋之，則又可笑之甚。惟蘇氏轍云：「伐檀宜爲車，今河非用車之處」一語，差爲得之，蓋以爲比體也。然仍主君子不得進仕爲言，與下義終隔。且「河水」一句，亦無着落。《毛傳》云：「若俟河水清且漣」，強添「若俟」二字，則尤失之愈遠。殊不知河干伐檀，非喻君子不得進仕，乃喻君子仕於閒曹之秩也。君子食祿必有所報，今但尸位，無所用力，故又以素餐爲恥。一如伐檀爲車，而乃寘之河干之地，但見河水清且漣漪，則雖車也將焉用之？「不稼」四句，正姚氏所云：「借小人以形君子，亦借君子以罵小人。」乃反觀不素餐之義，非刺貪也。此必魏廷貪婪充位比比皆是，間有一二賢人君子清操自矢者，衆共排之，俾居閒散無爲之地。彼君子者，又恥無功受祿，將有志而他適，則國事愈不可問。故詩人傷之，作此以刺時。詞意甚明，事亦易見，何至二千餘年紛紛無定解哉？

【集釋】「坎坎」伐木聲。「檀」木名。「寘」與置同。「干」厓也。「漣」風行水成文也。「猗」與兮同。語辭也。「稼穡」許氏慎曰：「禾之秀實爲稼，穀可收曰穡。孔氏穎達曰：以稼穡相對，皆先稼後穡，故知種之曰稼，斂之曰穡。若散則相通。」《大田》云：「曾孫之稼」，非唯種之也；《湯誓》云：「舍我穡事」，非唯斂之也。「胡」何也。「廬」孔氏穎達曰：「一夫之居曰廬，謂一夫之田百畝也。」《地官·遂人》云：「夫一廬，田百畝。」揚子云：「有田一廬。」與此同也。「狩」鄭氏康成曰：「冬獵曰狩，宵田曰獵。」《豳》「貉子也。」《素》「空也。」《餐》「食也。」《輻》季氏本曰：「輻在車輪中輳穀者。」《老子》所謂「三十輻共一轂」也，亦伐檀

爲之。〔直〕蘇氏轍曰：水平則流直。〔億〕十萬曰億。〔特〕獸三歲曰特。〔淪〕小風水成文，轉如輪也。或曰，相次有論理也，亦通。〔困〕圓倉也。〔鵠〕鵠屬。〔殽〕熟食曰殽。孔氏曰：《說文》：「殽，水澆飯也。」

【標韻】檀十四寒干同連一先應同韻十四寒餐同轉韻 輻一屋側十三職直、億、特、食並同叶韻 輪十一真潛、淪、困、鵠並同殽十三元轉韻

### 碩鼠 刺重斂也。

碩鼠碩鼠，無食我黍。三歲貫女，莫我肯顧。逝將去女，適彼樂土。樂土樂土，爰得我所。  
一章碩鼠碩鼠，無食我麥。三歲貫女，莫我肯德。逝將去女，適彼樂國。樂國樂國，爰得我真。  
二章碩鼠碩鼠，無食我苗。三歲貫女，莫我肯勞。逝將去女，適彼樂郊。樂郊樂郊，誰之永號。 三章

右《碩鼠》三章，章八句。此詩見魏君貪殘之效，其始皆由錯悞以畜爲儉之故，其弊遂至剗削小民而不知足，以致境內紛紛逃散，而有此咏。不久國亦旋亡。聖人著之，以爲後世刻畜者戒。有國者曷鑒諸？

【集釋】《碩》大也。孔氏穎達曰：《釋獸》於鼠屬有鼯鼠。孫炎曰：「五技鼠。」郭璞曰：「大鼠，好在田中食粟豆。」舍人、樊光同引此詩，以鼯鼠爲彼五技之鼠也。許慎云：「鼯鼠五技，能飛不能過屋，能游不能渡。」

谷，能緣不能窮木，能走不能先人，能穴不能覆身。」陸璣疏云：「今河東有大鼠，食人禾苗，亦有五技，或謂之雀鼠。其形大，故《序》云大鼠也。魏國，今河北縣是也。言其方物，宜謂此鼠，非鼯鼠也。」案，此經作碩鼠，訓之爲大，不作鼯鼠之字，其義或如陸云。「三歲」言其久也。「貫」習熟也。「顧」念也。「爰」於也。「德」歸恩也。「直」猶宜也。「永號」長呼也。

【標韻】黍六韻女同願七遇，叶果五反。土七庚所六語叶韻 麥十一陌德十三職國、直並同通韻 苗二蕭勞四豪郊三肴號四豪通韻

### 以上魏詩凡七篇。

說者謂魏以地陋而褊急，故傳世不永。其說大謬。湯以七十里，文王以百里，足以致

王。魏地縱陋，何止百里？蓋其失在貪殘且迫急耳。若謂國小無人，抑又不然。《陟岵》思親，孝子也；恥食素餐，志士也。《國有桃》，則思深慮遠；《十畝之間》，則高尚偕隱。而且《汾沮洳》之公路與公族，皆貴而能勸，富而能儉，德美如玉。誠能信而用之，則此數人者同心爲國，將民風丕變，政令一新，則雖舜、禹遺風，不難再振於今日，又何至爲區區之晉所滅亡哉？惜乎，其有人而不能用耳。

## 唐

《集傳》：唐，國名。本帝堯舊都，在《禹貢》冀州之域，太行恒山之西，太原、太岳之野。周成王以封弟叔虞爲唐侯。南有晉水，至子燮乃改國號曰晉。後徙曲沃，又徙居絳。其地土瘠民貧，勤儉質樸，憂深思遠，有堯之遺風焉。其詩不謂之晉而謂之唐，蓋仍其始封之舊號耳。唐叔所都，

在今太原府。曲沃及絳，皆在今絳州。劉氏瑾曰：叔虞封唐，變侯號晉，十七傳至晉侯緡，爲曲沃武公所并。然武公能滅晉之宗而不能滅唐之號，能冒晉之號而不能繼唐之統。君子欲絕武公於晉而不可，故總名其詩爲唐以寓意焉。案：唐詩多作於曲沃并晉之世，兩晉相吞，一興一亡，其名無所專繫，故黜晉號而係之以唐，惡之深故絕之甚也。國有無詩而名存，聖人閱其君之無罪見滅，存之所以寓興亡繼絕之心者，邨、鄆是也。亦有有詩而名滅，聖人惡其君之得國不正，黜之所以見并族滅宗之罪者，晉是也。然則詩雖咏事，春秋之法寓焉矣。《孟子》云：「《詩》亡然後《春秋》作。」觀此則《春秋》褒貶，豈待《詩》亡而後著哉？

### 蟋蟀 唐人歲暮述懷也。

蟋蟀在堂，歲事其莫。今我不樂，日月其除。無已大康，職思其居。好樂無荒，良士瞿瞿。  
一章蟋蟀在堂，歲事其逝。今我不樂，日月其邁。無已大康，職思其外。好樂無荒，良士蹶蹶。  
二章蟋蟀在堂，役車其休。今我不樂，日月其慆。無已大康，職思其憂。好樂無荒，良士休休。  
三章

右《蟋蟀》三章，章八句。此真唐風也。其人素本勤儉，強作曠達，而又不肯過放其懷，恐耽逸樂，致荒本業。故方以日月之舍我而逝不復回者爲樂不可緩，又更以職業之當修勿忘其本業者爲志不可荒。無已，則必如彼瞿瞿良士好樂而無荒焉可也。此亦謹守見道之人所作。聖人取之，冠於《唐風》。



之首，以爲唐堯舊俗固如是耳。而「序」以爲「刺晉僖公儉不中禮」，今觀詩意，無所謂「刺」，亦無所謂「儉不中禮」，安見其必爲僖公發哉？「序」好附會，而又無理，往往如是，斷不可從。

【集釋】「蟋蟀」陸氏璣曰：蟋蟀，一名蜚，一名蜻蛚，幽州人謂之趨織，里語曰「趨織鳴，懶婦驚」，是也。【事】遂也。【莫】晚也。孔氏穎達曰：「七月」之篇說蟋蟀云「九月在戶」，此言在堂，謂在室戶之外，與戶相近。時當九月，歲未爲暮，而言「歲事其莫」者，言其過此月後，則歲遂將暮耳。【除】去也。【大康】過於樂也。【職】主也。【黜黜】卻顧之貌。【邁】去也。【外】蘇氏轍曰：既思其職，又思其職之外。【蹶蹶】「釋詁」，蹶，動也。「釋訓」，蹶蹶，敏也。【役車】孔氏穎達曰：「春官·巾車」注云：「役車，方箱，可載任器以供役。」然則收納禾稼亦用此車，故役車休息，是農工畢也。【惛】安閑之貌。季氏本曰：休休以安爲念，亦懼意也。

【標韻】莫七遇除六魚居同韻七庚叶韻 逝八霽邁十卦外九泰蹶八霽通韻 惛四毫，叶佗侯反。憂十一尤叶韻

### 山有樞 刺唐人儉不中禮也。

山有樞，隰有榆。子有衣裳，弗曳弗婁。子有車馬，弗馳弗驅。宛其死矣，他人是愉。一章  
山有栲，隰有杻。子有廷內，弗洒弗掃。子有鐘鼓，弗鼓弗考。宛其死矣，他人是保。二章  
山有漆，隰有栗。子有酒食，何不日鼓瑟？且以喜樂，且以永日。宛其死矣，他人入室。三章

右「山有樞」三章，章八句。此諷唐人富者徒儉而不中禮之詩，與前篇針鋒相對。蓋前作唐人自以爲憂深思遠，樂得當矣，而豈知其適成唐人面目而已。故詩人作此以謂之曰：子以好樂無荒爲戒者，不過爲子孫長保此富貴計耳。豈知富貴無常，子孫易敗，轉瞬之間，徒爲人有。則何如及時行樂之爲善乎？此類莊子委蛇，釋氏本空一流人語，原不足以爲世訓。然以破唐人吝嗇不堪之見，則誠對症良藥。故二詩可以並存也。「序」說紛紛，或以爲「刺昭公」，「小序」或以爲「答前篇之意而解其憂」，「集傳」又或以爲「刺時君之敗亡者」，姚氏所主。何異夢中說夢！時君將亡，必望其急早修政，以收拾人心爲主，豈有勸其及時行樂，自速死亡乎？至前詩之憂，亦無煩待人解者。詞氣抑揚之間，意旨迥別，在人善會之而已。

【集釋】「樞」莖也。陸璣疏云：樞，其針刺如柘，其葉如榆，爲茹，美滑於白榆也。榆之類有十種，葉皆相似，皮及理異耳。「榆」白榆也。「爾雅」疏曰：榆之皮色白者名粉。「婁」亦曳也。「宛」坐見貌。「榆」樂也。「樛」山樛也。郭璞曰：樛似樛，生山中，亦類漆樹。俗語曰：「樛、樛、樛、漆，相似如一。」「柎」櫨也。陸氏璣曰：柎，枝葉茂好，二月中葉，疏華如棟而細葉，正白。今官園種之，正名曰萬歲。「考」擊也。

【標韻】樞七虞榆、婁、驅、榆並同本韻 樛十九皓柎二十五有，叶女九反。考、保並同叶韻 漆四質栗、瑟、日、室並同本韻

## 揚之水 諷昭公以備曲沃也。

揚之水，白石鑿鑿。素衣朱襮，從子于沃。既見君子，云何不樂？一章揚之水，白石皓皓。素衣朱繡，從子于鵠。既見君子，云何其憂？二章揚之水，白石粼粼。我聞有命，不敢以告人。三章

右「揚之水」三章、二章六句，一章四句。詩人諷刺他人多意在言外，不肯明言。況此詩發人隱謀，有關君國禍福，豈敢直言，自取滅亡？「小序」不知，以爲「國人將叛歸沃」之詞。「集傳」更謂不敢告人者，「民爲之隱」，而欲其事之成也。既形諸歌咏，遍傳國中矣，而猶謂「爲之隱」哉？嚴氏粲云：「時沃有篡宗國之謀，而潘父陰主之，將爲內應，而昭公不知。此詩正發潘父之謀，其忠告於昭公者，可謂切至。若真欲從沃，則是潘父之黨，必不作此詩以泄漏其事也。」二說大相反。從嚴氏說，則此詩爲忠告；從「集傳」說，則此詩爲叛黨。是非不言而自見。讀者可以識刪存微意矣。

【集釋】「鑿鑿」峻露貌。姚氏際恒曰：「揚之水」，水之淺而緩者。「白石鑿鑿」，喻隱謀之彰露也。劉氏敞曰：非「揚之水」，不能使「白石鑿鑿」，非昭公微弱，不能驅百姓歸沃，沃以強盛。案：此說以水喻昭公，以石喻桓叔，亦通。「朱繡」孔氏穎達曰：「釋器」云：「繡領謂之繡。」孫炎曰：「繡刺繡文以褱領。」是繡爲領也。「郊特牲」云：「繡黼、丹朱中衣，大夫之僭禮。」知諸侯當服之。中衣者，朝服、祭服之裏衣也；大夫中衣亦用素，不必以繡黼爲領。繡黼唯諸侯乃得服之耳。「子」嚴氏粲曰：「子指叛者。」「君子」姚

氏際恒曰：君子指桓叔。〔朱熹〕即朱穆也。〔鵲〕《集傳》：鵲，曲沃邑也。〔命〕聞其事已成。將有成功也。〔不敢告人〕嚴氏彙曰：蓋反辭以見意，故泄其謀，欲昭公知之也。

【標韻】鑿十藥澤二沃沃同樂十藥通韻 皓十九皓續二十六有，叶先妙反。鵲二沃，叶居號反。憂十一尤，叶一笑反。

叶韻 邶十一真人同本韻

### 椒聊 憂沃盛而晉微也。

椒聊之實，蕃衍盈升。彼其之子，碩大無朋。椒聊且，遠條且。一章椒聊之實，蕃衍盈掬。彼其之子，碩大且篤。椒聊且，遠條且。二章

右《椒聊》二章，章六句。此詩爲沃盛晉弱而發無疑。惟輔氏廣謂「當時民情棄舊君而樂桓叔，以見其俗之薄」，則大非詩意。詩不云乎：「彼其之子，碩大無朋。」以桓叔爲彼，則必以昭公爲君。憂晉之弱，不得不極言沃之盛以警之也，而何以謂其爲叛晉哉？案《春秋》惠二十四年，昭公封成師於曲沃，至莊十六年，曲沃伯始爲晉侯，中間幾七十年。此詩之作，亦遠在三四十年之間。事未至而慮已周，非見微知著之君子不足以爲此。其所以忠於昭公者何如乎？聖人存之，正以見其識之遠而慮之深耳。若謂民罔常懷，懷於有仁，盡將詩人忠厚視同叛黨，可乎哉？

【集釋】〔椒〕《集傳》：椒，樹似茱萸，有針刺，其實味辛而香烈。〔聊〕何氏楷曰：聊，舊以爲語助辭，似非文理。按《爾雅》云：「机，檠梅。机者，聊。」檠梅名机，其机者名聊也。机，《說文》：「高木也。」聊即机之

高者。姚氏際恒曰：案，此說是。則是「椒聊且」，嘆其枝之高也，「遠條且」，嘆其條之遠也。

【標韻】升十蒸朋同本韻 聊二蕭條同本韻 郊一星篇二沃通韻

### 綢繆 賀新昏也。

綢繆束薪，三星在天。今夕何夕？見此良人。子兮子兮，如此良人何？一章綢繆束芻，三星在隅。今夕何夕？見此邂逅。子兮子兮，如此邂逅何？二章綢繆束楚，三星在戶。今夕何夕？見此粲者。子兮子兮，如此粲者何？三章

右《綢繆》三章，章六句。此賀新昏詩耳。「今夕何夕」等詩，男女初昏之夕，自有此愜悅情形景象。不必添出「國亂民貧，男女失時」之言，始見其爲欣慶詞也。《詩》咏新昏多矣，皆各有命意所在。唯此詩無甚深義，只描摹男女初遇，神情逼真，自是絕作，不可廢也。若必篇篇有爲而作，恐自然天籟反難索已。

【集釋】「三星」姚氏際恒曰：三、參通。《毛傳》謂參，是也。案：參星中三星最明，俗通謂之三星。「良人」馮氏復京曰：《儀禮》鄭注云：婦人稱夫曰良。「粲」美也。張氏彩曰：粲者，華美之意。意以女之服貌爲言。《集傳》：此爲夫語婦之詞也。「子兮」姚氏際恒曰：一章子兮指女，二章子兮合指，三章子兮指男。

【標韻】新十一真天一先人十一真通韻 芻七虞隅同返二十六宥，叶狼口反。叶韻 楚六語戶七麌者二十一馬，叶章與

反。叶韻

### 杕杜 自傷兄弟失好而無助也。

有杕之杜，其葉湑湑。獨行踽踽。豈無他人，不如我同父。嗟行之人，胡不比焉？人無兄弟，胡不依焉？一章有杕之杜，其葉菁菁。獨行踽踽。豈無他人，不如我同姓。嗟行之人，胡不比焉？人無兄弟，胡不依焉？二章

右《杕杜》二章，章九句。姚氏際恒云：此似不得於兄弟而終望兄弟比助之辭。言我獨行無偶，豈無他人可共行乎？然終不如我兄弟也。使他人而苟如兄弟也，則嗟彼行道之人胡不親比我，而人無兄弟者胡不依助我乎？『行之人』即上『他人』，以見他人莫如我兄弟也。即《常棣》『凡今之人，莫如兄弟』之意。解此詩者，義止於是，不可別生枝節。如《大序》所云『君不能親其宗族，骨肉離散獨居而無兄弟，將焉沃所并』，徒形附會而無當詩意。《集傳》不用《序》言是矣，而釋詩語氣又多不合。如詩言『不如我同父』，明明是有兄弟人語，而《傳》乃曰『自傷孤特』之類，與經乖反，豈能信從？愚故舍彼而錄姚說，不復更爲之詞也。

【集釋】『杕』特也。『杜』赤棠也。『湑湑』盛貌。『踽踽』無所親之貌。『比』輔也。『依』助也。『菁菁』亦盛貌。『畏畏』無所依貌。曹氏粹中曰：『說文』云：『畏，目……驚視也。』獨行多懼，故畏畏也。

【標韻】湑六韻踽七虞父同通韻 比四食飲同本韻 菁八庚景同姓二十四韻，叶桑經反。叶韻

## 羔裘 刺在位不能恤民也。

羔裘豹祛，自我人居居。豈無他人，維予之好。一章羔裘豹褻，自我人究究，豈無他人，維予之好。二章

右《羔裘》二章，章四句。此篇「羔裘豹祛」，指卿大夫而言也無疑。即下云「豈無他人，維予之好」，亦其民欲去而不忍去之意也，亦無疑。民欲去其大夫而不忍去，則其大夫之賢否可知，即民情亦大可見。居居、究究，義雖難詳，理實可參。且見《爾雅》，自足爲據。而朱子乃謂《爾雅》是集諸儒訓詁成書，其間容或有誤，遂廢斯篇而不釋。夫訓詁原集古訓以爲詁，既以《爾雅》爲不足信，則又何所信乎？即此亦見其矯強自用。輔氏以爲得闕疑意，恐不免有門戶回護之見也。

【集釋】「羔裘豹祛」，《集傳》：君純羔，大夫以豹飾祛祛也。孔氏穎達曰：祛是袖之大名，祛是袖頭之小稱，其通皆爲祛也。「自我人居居」毛氏甚曰：自用也。居居，懷惡不相親比之貌。「褻」猶祛也。「究究」毛氏甚曰：究究，猶居居也。《釋訓》云：居居、究究，惡也。

【標韻】祛六魚居同故七遇，音叶古慕反。叶韻 褻二十六宥，究同好二十號，叶呼候反。叶韻

## 鵲羽 刺征役苦民也。

肅肅鵲羽，集于苞栩。王事靡盬，不能蓺稷黍。父母何怙？悠悠蒼天，曷其有所？一章肅

肅鵠翼，集于苞棘。王事靡盬，不能蓺黍稷。父母何食？悠悠蒼天，曷其有極？二章肅鵠行，集于苞桑。王事靡盬，不能蓺稻粱。父母何嘗？悠悠蒼天，曷其有常？三章

右「鵠羽」三章，章七句。此詩「序」謂「刺時。晉昭公之後大亂五世，君子下從征役，不得養其父母」之作。何氏楷以篇中有「蓺黍稷」等語，似與君子不類而疑之。姚氏際恒又以詩中有「王事」二字而信其說。總之，此等議論無關風人要旨。勤勞王事，詎分君子小民？不得養親，同此呼天籲地。人不傷心，何煩泣訴？始則痛居處之無定，繼則念征役之何極，終則恨舊樂之難復。民情至此，咨怨極矣。而爲之上者猶不知所以體恤而安輯之，則養生送死之無望，仰事俯育之難酬，民又何樂此邦而不他適？而詩但歸之於天，不敢有懈王事，則忠厚之心又何切也？論者謂唐人質朴，猶有堯之遺風，不於此可見歟？

【集釋】「肅鵠」羽聲。「鵠」集傳：鵠，鳥名，似鴈而大，無後趾。陸氏璣曰：鵠鳥連啼，性不樹止，樹止則爲苦。「集」止也。「苞」叢生。「羽」集傳：羽，祚櫟也。其子爲皂斗，殼可以染皂者是也。陸氏璣徐州人謂櫟爲杼，或謂之爲羽。「鹽」孔氏穎達曰：鹽爲蠱，字異義同。「左傳」云：「於文皿蟲爲蠱，穀之飛亦爲蠱。」然則蟲害器敗穀者皆謂之蠱，是鹽爲不攻牢不堅緻之意也。「蓺」樹也。「枯」恃也。「行」列也。陸氏佃曰：「說文」曰：「鵠相次也。」蓋鵠性羣居如雁，自然而有行列，故從鵠。「詩」曰「鵠行」，以此故也。「梁」粟類也。王氏逢曰：「本草」注：凡云梁米皆是粟類。青梁，殼穗有毛，粒青，米亦微青，而細於黃白梁。黃梁，穗大毛長，穀米俱麤於白梁。「嘗」食也。「常」復其常也。



【標韻】羽七虞翔同泰六麻估七虞所六脂通韻 翼十三職棘、稷、食、極並同本韻 行七陽桑、梁、嘗、常並同本韻

## 無衣 代武公請命于王也。

豈曰無衣七兮？不如子之衣，安且吉兮。一章豈曰無衣六兮？不如子之衣，安且燠兮。

### 二章

右《無衣》二章，章三句。《序》謂「美晉武公始并晉，其大夫爲之請命天子之使而作是詩。」朱子辯之，以爲武公弑君篡國，爲王法所必誅，《序》乃以爲美之，其顛倒順逆，亂倫悖理，未有如此之甚者。故特正之。其說是矣。然《集傳》以此詩爲武公所自作則非。詩詞傲慢無禮已甚，武公縱極跋扈，當其請命天子，亦將斂神抑氣、矜重其辭，然後可飾美觀而杜衆口。豈有直稱天王爲子，而欲請命服於朝乎？然則此爲詩人美武公詞乎？亦非也。大凡頌禱君上，必揚其美而掩其惡，似此無禮惡詞以爲頌美其上，是欲美之而適以醜之也，烏在其爲美哉？此蓋詩人窺見武公隱微，自恃強盛，不惟力能破晉，而且目無天王，特以晉人屢征不服，不能不藉王命以懾服衆心。故體其意而爲是詩。曰吾非不能爲是七章之衣，而必待命于子者，特以子之所賜衆心始服，而吾服之庶安且吉，可以傳世永遠耳。稱君爲子，詩人蓋著其惡，使後之人知其有無君之心也。《小序》不識，乃以爲美。晦翁駁之，又以爲武公自作，均兩失之。詩意深微難讀如此，無怪紛紛臆說，莫測其旨矣。有以子指武公者，有以子屬天子之使者，皆節外生枝，杜撰費解，悉不可從。武公賂王，王卽錫命。故武公得而輕之，王綱至此，

埽地極矣。

【眉評】「一章」起勢飄忽。

【集釋】「七」《集傳》：侯伯七命，其車旗衣服皆以七爲節。「子」天子也。「六」《集傳》：天子之卿六命，變七言六者，謙也。不敢以當侯伯之命，得受六命之服，比於天子之卿，亦幸矣。案：此特變文以成章耳，意不重此，不可執泥。「煖」煖也，亦安意耳。

【標韻】七四賀吉同本韻 六一屋煖同本韻

### 有杕之杜 自嗟無力致賢也。

有杕之杜，生于道左。彼君子兮，噬肯適我。中心好之，曷飲食之？一章有杕之杜，生于道周。彼君子兮，噬肯來遊。中心好之，曷飲食之？二章

右《有杕之杜》二章，章六句。《集傳》以爲「此人好賢而恐不足以致之」，其說固是。然詩中具有二義，本意云，吾勢雖不足以致賢，而心則誠好之，但不知如何而後能飲食致敬，聊表好賢之誠，使天下賢俊顧我而來遊乎？言外見彼有勢力足以致賢者，富貴而尊顯之，爲顧所適，無施不可，而又不肯禮賢下士，以致仁人君子居貞遠避，不肯來遊，是誰過歟？天下事好者無力，而有力者不好，則亦末如之何也已矣。故《序》以爲「刺武公不求賢以自輔」，雖未必遽見爲然，而凡爲武公者，可以反己自思矣。

【集釋】「嗟」發語辭。【曷】何也。【周】曲也。孔氏穎達曰：「言道周繞之，故爲曲也。」

【標韻】左二十舒我同本韻 好二十發食四實叶韻 周十一尤遊同本韻

### 葛生 征婦怨也。

葛生蒙楚，薺蔓于野。予美亡此，誰與獨處。一章葛生蒙棘，薺蔓于域。予美亡此，誰與獨息。二章角枕粲兮，錦衾爛兮。予美亡此，誰與獨旦。三章夏之日，冬之夜，百歲之後，歸于其居。四章冬之夜，夏之日，百歲之後，歸于其室。五章

右「葛生」五章，章四句。「序」以爲刺晉獻公好攻戰，則國人多喪。朱子謂「未見此詩之果作於其時」，然亦安知此詩之非必不出其時耶？然此等處無關詩旨緊要，可置而弗辯，但以爲征婦怨可也。征婦思夫，久役于外，或存或亡，均不可知，其歸與否，更不能必。於是日夜悲思，冬夏難已。暇則展其衾枕，物猶粲爛，人是孤棲，不禁傷心，發爲浩嘆。以爲此生無復見理，惟有百歲後返其遺骸，或與吾同歸一穴而已，他何望耶？唐人詩云：「可憐無定河邊骨，猶是深閨夢裏人。」可以想見此詩景況。說「詩」諸老不察其情，或以爲思存，或以爲悼亡，已極可嘆。又或謂枕衾粲爛，其嫁未久，更覺腐論難堪。三百篇多少好詩，純被此種迂儒說壞，能不令人扼腕！

【眉評】「四、五章」二章句法只一互換，覺時光流轉，瞬息百年，人生幾何，能不傷心？

【集釋】「薺」集傳：「薺，草名，似栝樓，葉盛而細。」「蔓」延也。「予美」婦人指其夫也。「域」塋域也。

【標韻】楚六韻野二十一馬，叶上與反。處六韻叶韻 棘十三韻域、息並同本韻 桑十五韻爛、旦並同本韻 夜二十

二韻，叶羊茹反。居六魚叶韻 日四質室同本韻

### 采苓 刺聽讒也。

采苓采苓，首陽之巔。人之爲言，苟亦無信。舍旃舍旃，苟亦無然！人之爲言，胡得焉？一章采苦采苦，首陽之下。人之爲言，苟亦無與。舍旃舍旃，苟亦無然！人之爲言，胡得焉？二章采葑采葑，首陽之東。人之爲言，苟亦無從。舍旃舍旃，苟亦無然！人之爲言，胡得焉？三章

右采苓三章，章八句。序謂「刺晉獻公好聽讒言」，蓋指驪姬事也。然詩旨未露其意，安知其必爲驪姬發哉？自古人君聽讒多矣，其始由於心之多疑而好察，數數訪刺外事於左右，故小人得乘機而進讒，勢至順而機又易投也。若夫明哲聖主，未嘗不察邇而兼聽，但其心虛，故人之爲言未敢遽信爲然，必審焉而後聽。其心公，故人之進言亦必姑舍其然，詳察焉而後信。造言者既有所憚而難入，則讒不遠而自息矣。詩意若此，所包甚廣，所指亦非一端，安見其必爲驪姬發哉？但驪姬則讒之尤者，晉獻公則尤聽讒之甚者，故足以爲戒也。朱子不以序言爲然，置焉可也，而必排而斥之，過矣。【集釋】首陽山名。孔氏穎達曰：首陽之山，在河東，蒲坂縣南。李氏樛曰：亦名雷首山。劉氏瑾曰：《集傳》以「首」爲山名，「陽」爲山之南。《春秋傳》亦曰「趙宣子田于首山」，然此詩下章又云「首陽之東」，

則似「首陽」二字同爲山名。《論語集注》亦嘗指「首陽」爲山名矣。豈泛名其山則曰「首山」，主山南而言則又獨得「首陽」之稱乎？愚案：山陽有一名而數易其稱者，此山既名首陽，又名雷首，則何不可單名首山？但詩明言「首陽之巔」矣，則陽字必屬山名，不當更釋南也。《巔》山頂也。《集傳》既釋巔爲山頂，又訓陽爲山之南，豈曰首山之南之頂，成何語乎？《旃》之也。《苦》苦菜也。《從》聽也。

【標韻】苓九青巔一先言十三元信十一真通韻 旃一先然、焉並同本韻 苦七麌下二十一馬，叶後五反。與六語叶韻 蕝二冬東一東從二冬通韻

### 以上唐詩凡十二篇。

朱氏公遷曰：憂深思遠，《唐風》之厚。《秋杜》好實，蓋亦知所崇尚者；聽讒有刺，征役有怨，亦無責於變風時，惟武公之元惡大憝，則《國風》中所無有也。愚案：《唐風》之厚，於《羔裘》不恤民而民不忍去，《鶉羽》苦役民而民但呼天，而且《葛生》思婦，無怨讟之言；《椒聊》智士，有憂深之慮，即《揚之水》聞人奸謀，未嘗不反辭以動君，數者畧見大概。即《采芣》刺讒於浸潤易人之中，勸以姑舍其言，無遽信從，亦非深於道而有體驗者不能，此其所以爲憂深思遠之實歟！

## 詩經原始卷之七

### 國風七

#### 秦

《集傳》：秦，國名。其地在禹貢雍州之域，近鳥鼠山。初，伯益佐禹治水有功，賜姓嬴氏。其後中涵居西戎以保西垂。六世孫大駱生成及非子。非子事周孝王，養馬於汧、渭之間，馬大繁息。孝王封爲附庸而邑之秦。至宣王時，犬戎滅成之族。宣王遂命非子曾孫秦仲爲大夫，誅西戎，不克，見殺。及幽王爲西戎、犬戎所殺，平王東遷，秦仲孫襄公以兵送之。王封襄公爲諸侯，曰：「能逐犬戎卽有岐、豐之地。」襄公遂有周西都八百里之地。至宣孫德公又徙於雍。秦，卽今之秦州。雍，今京兆府與平縣是也。案：秦詩始於秦仲世，其時僅爲大夫，比於附庸之國。吳、楚大國尚無詩，秦小國何以有風？蓋秦實繼齊、晉而霸焉者也。故齊、晉後卽繼以秦。或謂夫子定書，以秦誓綴周會之後，知周之必爲秦也。卽其刪詩也亦然。此皆事後擬議之論，並非確解。況詩次非定自孔子，季札前而已然乎。

【眉評】毛氏鳳枝曰：案，漢右扶風雍縣，本秦雍城地。《方輿紀要》云：「秦故雍城在今鳳翔府城南七里。」

秦德公元年，初居雍城大鄭宮是也。」是秦之雍城在今鳳翔，不得云在興平。秦莊公常居犬邱，在今興平，與德公所徙之雍，自係兩地。犬邱亦名廢邱，項籍封秦將章邯爲雍王，都廢邱。《朱傳》遂謂德公所徙之雍亦在興平，蓋考之未審也。宜從《紀要》爲是。

### 車鄰 美秦君簡易易事也。

有車鄰鄰，有馬白顛。未見君子，寺人之令。一章 阪有漆，隰有栗。既見君子，並坐鼓瑟。「今者不樂，逝者其盡」。述秦君之詞。○二章 阪有桑，隰有楊。既見君子，並坐鼓簧。「今者不樂，逝者其亡」。三章

右《車鄰》三章：一章四句，二章，章六句。此詩《序》謂「美秦仲」。劉公瑾疑爲「美襄公」，以秦仲初爲大夫，寺人等官非所宜有也。總之，秦君開創之始，法制雖備，禮數尚寬。且其人必恢廓大度，不飾邊幅。如光武初見馬援，祖幘而坐迎之，非復公孫述之盛陳陸衛而後見，故臣下樂其簡易而歎美之，以爲真吾主也。曰：秦君富貴而尊嚴豈勝述哉？車則鄰鄰，馬則白顛，日處深宮，非傳宣不能入，可謂盛矣！及其觀面乃又不然。君臣相與，歡若平生。鼓瑟者可以並坐而調音，鼓簧者亦可相依而度曲。不事惟是，君勸臣曰：「失今不樂，逝者將盡，而盡者將亡，如此歲月何哉？」則是其心之推誠相與，毫無箝制也可知。若如諸儒所云：「是時秦君始有車馬及此寺人之官，國人創見而誇美之。」則何異馬援所云：「子陽乃井底蛙耳。」何以能開創宏業耶？即秦士大夫雖曰鄙俗，亦斷斷不至如此。唯其

君臣相得，不務經綸，日事宴樂。開創若此，後效可知。聖人存之，以見嬴秦始基固若是耳。

【眉評】「一章」未見時如此嚴肅。【二、三章】既見時如此簡易，不惟盡寬禮數，且能備極宴樂。

【集釋】「鄰鄰」衆車聲。「白顛」集傳：「白顛，顛有白毛，今謂之的顛。」寺人：內小臣也。孔氏穎達曰：

「左傳：齊有寺人貂，晉有寺人披，是諸侯之官有寺人也。寺人是在內細小之臣。」並坐：黃氏佐曰：並坐者同坐，非並肩而坐也。案，並坐者乃鼓瑟者並坐耳，非與君並坐也。

【標韻】鄭十一真類一先令八庚通韻 漆四質栗、瑟並同蓋九屑通韻 桑七陽楊、簣、亡並同本韻

### 駟驥 美田獵之盛也。

駟驥孔阜，六轡在手。公之媚子，從公于狩。一章奉時辰牡，辰牡孔碩。公曰左之，舍拔則獲。二章遊于北園，四馬既閑。輶車鸞鑣，載獫狁驕。三章

右「駟驥」三章，章四句。此詩「序」謂「美襄公始命，有田狩之事，園囿之樂。」然時代無可考，詩詞亦不露「始命」意。惟既曰公，則必襄公以後詩也。田獵亦時君恆有事，奚足異？孟子不云乎：「今王田獵於此，百姓聞王車馬之音，見羽旄之美，一舉欣欣然有喜色而相告曰：『吾王庶幾無疾病與，何以能田獵也？』此無他，與民同樂也。」今秦始有田狩事，其與民同樂可知也。即民之欣欣然有喜色而相告者亦可知也。惟初膺侯命，舉行大典，其相率以從于狩者，不聞腹心干城之寄，而乃曰「公之媚子」，則嗜好爲何如耶？君子讀「詩」至此，不禁有懷「免置」野人，知周之所以王而久，秦之所以帝而



促者，其由來蓋有素已。

【集釋】「駟驥」陸氏佃曰：「說文」曰：「馬深黑色驥，馬赤黑色驥。」非特有取於色，蓋亦取其堅壯如鐵也。〔孔〕甚也。〔阜〕肥大也。〔六轡〕孔氏穎達曰：每馬有二轡，四馬當八轡矣。言六轡者，以駟馬內轡納之於軾，故在手者惟六轡耳。〔媚子〕朱氏道行曰：媚子，指左右便嬖。〔時〕是也。〔辰〕時也。〔牡〕曹氏粹中曰：祭祀之牲不用牝，皆以牡爲貴。〔辰牡〕集傳：冬獻狼，夏獻麋，春秋獻鹿豕之類。〔奉〕孔氏穎達曰：奉是時牡，謂虞人也。獸人獻時節之獸以供膳，故虞人亦驅時節之獸以待射耳。〔碩〕肥大也。〔左之〕何氏士信曰：御者從右以逐之，君從左以射之。公羊傳：解第一殺，第二殺，第三殺，皆自左驢射之達於右，則左當人君之左，指禽獸之左驢而言。案：射必左出，故左之乃易中耳。〔拔〕矢括也。〔閑〕調習也。〔轄〕輕也。〔鸞〕鈴也。〔鑣〕馬銜也。〔獫狁驥〕集傳：獫、狁、驥，皆田犬名，長喙曰獫，短喙曰狁。以車載犬，蓋以休其足力也。

【標韻】阜二十五有手同狩二十六有叶韻 牡二十五有碩十一兩獲同叶韻 圖十三元閑十五通韻 鑣二蕭驥同本韻

#### 校記

〔一〕「施」，原作「毛」，據《孟子》改。

# 小戎 懷西征將士也。

小戎賤收，車箱。五瑟梁輶。馭兩服者。游環脅驅，陰刺鑿鑿。馭兩驂者。文茵暢轂，駕我騏驎。車內外兼寫。言念君子，溫其如玉。此下懷駕車西征之人。在其板屋，亂我心曲。念其居處之非。○一章四牡孔阜，六轡在手。承上「駕我」句。騏驎是中，駟驥是驂。此方言兩服兩驂。龍盾之合，車蔽。鑿以鰲輶。騶轡飾。言念君子，溫其在邑。方何爲期，胡然我念之？念其歸期之遠。○二章賤駟孔羣，馬甲。公矛鑿鑿。矛。蒙伐有苑，盾。虎輶鎮膚。弓室。交轡二弓，弓。竹閉緄。弓。言念君子，載寢載興。厭厭良人，秩秩德音。念其德音之美。○三章

右「小戎」三章，章十句。《序》謂「美襄公。備其兵甲以討西戎，國人則矜其車甲，婦人能閱其君子焉。」一詩兩義，中間並無遞換，上下語氣全不相貫，天下豈有此文義？惟《傳》以爲「勞大夫征戎」之詩，得之。鄭氏箋敘曰：「凡勞詩，或代爲其人言，或代爲其室家言。而此詩『言念君子』，則襄公自念其臣子也。」愚案：宋全斌伐蜀，屬汴大雪，太祖衣紫貂裘帽坐種帷中，謂左右曰：「我被服如此尚覺寒，念西征將士衝冒霜雪，何以堪處？」即解裘帽賜全斌，仍諭諸將不能徧及也。全斌拜賜感泣，故所向有功。今詩云：「在其板屋，亂我心曲」，以如玉之君子，身處板屋，而歸期又未能必，偶一念及，其何以堪？襄公能作是詩，即宋祖之賜裘帽於全斌也。無怪其能承君命以復父讎，獨雄長於西方者有由然已。後儒不察，又以爲從役者之家人所言，將秦人第一關係文字下屬厮役走夫之徒，則襄公勞

士一片苦衷，不幾爲其所沒，千載下誰復能諒之耶？

【眉評】「一章」首章寫車制，章末兼及懷人。下二章同一幾軸，而寫法各異。【二章】次章寫駕車。

【三章】三章寫戎器，刻劃典奧瑰麗已極，西京諸賦迴不能及，況下此者乎！

【集釋】「小戎」兵車也。【餽】淺也。【收】軫也。【集傳】謂車前後兩端橫木，所以收斂所載者也。凡車

之制，廣皆六尺六寸，其平地任載者爲大車，則軾深八尺，兵車則軾深四尺四寸，故曰「小戎餽收」也。

【梁輶】陳氏鵬飛曰：輶，車輶也。其前駕於服馬之衡之上，其後則乘前軾直逼後軾。梁輶則穹其上，

以便服馬之進退。車之進退以輶爲主，懼輶之不堅也，故一輶則五分其穹，每分以皮束之使堅，是謂

五發。【游環】【集傳】游環，鞵環也。以皮爲環，當兩服之背上，游移前却無定處。引兩驂馬之外轡

貫其中而執之，所以制驂馬，使不得外出。【左傳】曰：「如驂之有靳」是也。【齊驅】【集傳】齊驅，亦以

皮爲之，前係於衡之兩端，後係於軾之兩端，當服馬脊之外，所以驅驂馬使不得內入也。曹氏粹中

曰：兩服馬駕勾衡之下，旁有兩驂馬，齊於服馬之頸。懼驂之外出也，故以環貫驂外轡，以禁其出，欲

出，則此環牽之。懼驂之內人亂服馬也，故以韋二條繫衡與軾，護服馬脊以止驂之人，欲入，則此皮

從而約之也。【陰】【集傳】陰，揜軌也。軌在軾前，而以板橫側揜之。以其陰映此軌，故謂之陰也。

【鞵】【集傳】鞵，以皮二條前繫驂馬之頸，後繫陰板之上也。【鑿鑿】【集傳】鑿鑿，陰板之上有鑿鞵

之處，消白金沃灌其環以爲飾也。嚴氏粲曰：鞵端作環相接謂之鑿。【文茵】范氏處義曰：以虎皮爲

車中之褥，有文之可觀，故謂之文茵。【暢轂】【集傳】暢，長也。轂者，車輪之中，外持輻內受軸者

也。大車之轂一尺有半，兵車之轂長三尺二寸，故兵車曰暢轂。〔騏驎〕《集傳》：騏，騏文也。馬左足白曰驎。〔君子〕指西征大夫也。〔聊〕《集傳》：赤馬黑鬣曰聊。何氏楷曰：《爾雅》謂聊曰駁，蓋馬有聊色，有白色，故曰駁。上章曰驎，因其白之在足也，此章曰聊，因其白之在體也。〔中〕兩服馬也。〔駟驎〕《集傳》：黃馬黑喙曰駟。驎，黑色也。〔盾〕干也。《集傳》：畫龍於盾，合而載之，以爲車上之衛。必載二者，備破毀也。〔轡〕環之有舌者。〔鞞〕驎內轡也。〔伐駟〕馬甲以薄金爲之，欲其輕易，便於旋習也。〔孔〕甚也。〔羣〕調和也。〔公矛〕三隅矛也。〔鑿鐔〕矛底端平曰鐔，鑿則以白金爲飾也。〔蒙〕雜也。〔伐〕中干也，盾之別名。〔苑〕文貌，畫雜羽於盾之上也。〔虎輶〕《集傳》：虎輶，以虎皮爲弓室也。〔鑲膚〕《集傳》：鑲膚，鑲金以飾馬當胸帶也。〔交輶〕《集傳》：交輶，交二弓於輶中，謂顛倒安置之。必二弓以備壞也。〔閉〕《集傳》：閉，弓桡也。《儀禮》作鞞。陳氏道祥曰：桡以竹爲之，狀如弓然。約於弓裏，命之曰桡，所以備損傷也。〔緼〕繩也。〔膝〕約也。〔載寢載興〕起居不寧也。〔厭厭〕安也。〔良人〕何氏楷曰：先秦之世，良人爲君子通稱。《呂氏紀·序意》曰：秋甲子朔，朔之日，良人請問十二紀。注：「良人，君子也。」案：本《風·黃鳥》哀三良，亦曰「殲我良人」，《雅》之《桑柔》，亦曰「維此良人，作爲式穀」，皆以良人爲君子也。〔秩秩〕有序也。

【標韻】收十一尤轉同本韻 續二沃轂一屋驎七遇，叶之錄反。玉二沃屋一屋曲二沃叶韻 阜二十五有手同本韻 中一東驎十三覃叶韻 合十五合軛同邑十四緡通韻 期四支之同本韻 羣十二文鐔十一真膚十一燕弓一東，叶始宏反。膝十燕與同人十一真音十二侵叶韻

## 蒹葭 惜招隱難致也。

蒹葭蒼蒼，白露爲霜。興起。所謂伊人，在水一方。虛點其地。遡洄從之，道阻且長。展一筆。遡游從之，宛在水中央。實指居處，仍用虛活之筆。妙！妙！○一章蒹葭淒淒，白露未晞。所謂伊人，在水之湄。遡洄從之，道阻且躋。遡游從之，宛在水中坻。二章蒹葭采采，白露未已。所謂伊人，在水之渚。遡洄從之，道阻且右。遡游從之，宛在水中沚。三章

右蒹葭三章，章八句。此詩在秦風中，氣味絕不相類。以好戰樂門之邦，忽遇高超遠舉之作，可謂鶴立雞羣，儵然自異者矣。然意必有所指，非泛然者。序謂刺襄公，未能用周禮，呂氏祖謙遂謂「伊人猶此理」，鑿之又鑿，可爲噴飯。蓋秦處周地，不能用周禮。周之賢臣遺老，隱處水濱，不肯出仕。詩人情之，託爲招隱，作此見志。一爲賢惜，一爲世望。曰「伊人」，曰「從之」，曰「宛在」，玩其詞，雖若可望不可即，味其意，實求之而不遠，思之而即至者。特無心以求之，則其人側乎遠矣！序本有指，辭不能達，故致紛紛議起也。

眉評三章只一意，特換韻耳。其實首章已成絕唱。古人作詩多一意化爲三疊，所謂一唱三嘆，佳者多有餘音，此則與盡首章，不可不知也。

集釋：蒹葭集傳：蒹似菰而細，高數尺，又謂之蘆。陸氏佃曰：今人以爲蘆箔，因以得名。葭蘆也。陸氏佃曰：孔氏云，初生爲葭，長大爲蘆，成則爲葦。遡洄逆流而上也。遡游順流而下也。晞

乾也。〔湄〕水草之交也。〔騰〕升也。〔采采〕盛而可采也。〔右〕言其迂迴也。

【標韻】蒼七陽精、方、長、央並同本韻。漢八齊咍五微湄四支坻四支通韻。采十賄已四紙洩同右二十五有，叶羽軌反。泚四紙叶韻。

### 終南 祝襄公以收民望也。

終南何有？有條有梅。君子至止，錦衣狐裘。顏如渥丹，其君也哉！一章終南何有？有紀有堂。君子至止，黼衣繡裳。佩玉將將，壽考不忘。二章

右《終南》二章，章六句。《序》謂「戒襄公」。姚氏又以爲「有美無戒」。今玩詩辭首章末句，嚴氏案云：「其者，將然之辭；哉者，疑而未定之意。」愚案：末章末句亦云「壽考不忘」，則是勸戒也無疑。此必周之舊舊，初見秦君撫有西土，皆膺天子命以治其民，而無如何，於是作此以頌禱之。曰：崇嶺者終南，其何有乎？條與梅耳，所以成此山之高也。君子至止，衣服之盛，容貌之美，固不待言，非將以君臨一邦乎？君此邦則必德此民，如山之有木而後成山之高，乃無負山之名耳。然終南形勢尊嚴宏敞，爲天下冠，君此者可以雄視六合，不獨號令一方也。君其脩德以副民望，百世毋忘周天子之賜也可。蓋美中寓戒，非專頌禱。不然，秦臣頌君，何至作疑而未定之辭，曰「其君也哉」，此必不然之事也。

【集釋】《終南》山名。毛氏甚曰：終南，周之南山中南山也。孔氏穎達曰：昭四年《左傳》曰：「荆山、中南，九

州之險。是此一名中南也。案：山在今鄆郭諸境，以其幹屬天下之中，故曰中，勢踞鎬京之南，故曰南，合而言之曰中南也。〔條〕山楸也。材美可作車版。〔錦衣狐裘〕諸侯之服也。〔玉藻〕曰：君衣狐白裘，錦衣以裼之。〔渥丹〕季氏本曰：渥丹，猶〔簡兮〕所謂〔渥赭〕，言其有樂意而顏色赤澤也。〔紀〕〔集傳〕：紀，山之從角也。〔堂〕〔集傳〕：堂，山之寬平處也。〔戲鵲〕毛氏甚曰：黑與青謂之鵲，五色備謂之繡。〔將將〕佩玉聲。

【標韻】梅十灰裘十一尤，叶莫悲反。丹十四寒哉十灰叶韻 堂七陽裳、將、忘並同本韻

### 黃鳥 哀三良也。

交交黃鳥，止于棘。誰從穆公？子車奄息。維此奄息，百夫之特。臨其穴，惴惴其慄。彼蒼者天，殲我良人！如可贖兮，人百其身。一章交交黃鳥，止于桑。誰從穆公？子車仲行。維此仲行，百夫之防。臨其穴，惴惴其慄。彼蒼者天，殲我良人，如可贖兮，人百其身。二章交交黃鳥，止于楚。誰從穆公？子車鍼虎。維此鍼虎，百夫之禦。臨其穴，惴惴其慄。彼蒼者天，殲我良人！如可贖兮，人百其身。三章

右〔黃鳥〕三章，章十二句。此詩事見〔左傳〕，鑿鑿有據，自不必言。或以三良從死，命出穆公，或以馬康公迫死，或又以爲秦俗如此，非關君之賢否。總之，古人封建國君，得以專制一方，生殺予奪，惟意所欲。似此苛政惡俗，天子不能黜，國人不敢違。哀哉良善，其何以堪！若後世大一統，人命至

重，非天子不得擅生殺。雖無知愚民，猶自矜恤，況賢人乎？封建固良法，封建亦虐政。秦、漢後竟不能復，雖曰時勢，亦人心爲之也。聖人存此，豈獨爲三良悼乎？亦將作萬世戒耳！

【集釋】「交交」飛而往來之貌。「從穆公」從死也。「子車」氏也。孔氏穎達曰：「左傳」作子與。與、車，字異義同。「奄息」名也。「特」傑出之稱。「六」壙也。「惴惴」懼貌。「防」集傳：防，當也。言一人可以當百夫也。「禦」猶當也。

【標韻】棘十三職息、特同六九屑慄四質通韻 天一先人十一真身同轉韻 桑七陽行、防同本韻 楚六語虎七虞禦六語通韻

### 晨風 未詳。

欵彼晨風，鬱彼北林。未見君子，憂心欽欽。如何如何，忘我實多。一章山有苞櫟，隰有六駁。未見君子，憂心靡樂。如何如何，忘我實多。二章山有苞棣，隰有樹檟。未見君子，憂心如醉。如何如何，忘我實多。三章

右《晨風》三章，章六句。《序》謂康公「棄其賢臣」。《傳》謂「秦君遇賢，始勤終怠」。二說未甚相遠。惟《集傳》則以爲婦人念其君子之詞，又引《廢廖歌》以證秦俗，與古《序》大相反。今觀詩詞，以爲「刺康公」者固無據，以爲婦人思夫者亦未足憑。總之，男女情與君臣義原本相通，詩既不露其旨，人固難以意測。與其妄逞臆說，不如闕疑存參。且其詩無甚精義，置焉可也。



【集釋】「歛」疾飛貌。〔晨風〕鷗也。〔鬱〕茂盛貌。〔歛歛〕憂而不忘之貌。〔駮〕《集傳》：駮，梓榆也，其

色青白如駮。〔榘〕郭氏璞曰：今楊榘也。《集傳》：榘，赤羅也，實似梨而小，酢可食。

【標韻】風一東，叶乎情反。林十二侵欽同叶韻。何五歌多同本韻。櫟十二錫，叶奪各反。駮二覺樂十葉叶韻。棣

八霽榘四寘醉同通韻。

### 無衣 秦人樂爲王復仇也。

豈曰無衣？與子同袍。王于興師，修我戈矛，與子同仇。一章豈曰無衣？與子同澤。王于興師，修我矛戟，與子偕作。二章豈曰無衣？與子同裳。王于興師，修我甲兵，與子偕行。三章

右《無衣》三章，章五句。《序》謂「刺用兵」。秦人以「其君好攻戰，亟用兵，而不與民同欲。」意是而辭不能達。故朱子以爲《序》意與詩情不協。然《集傳》亦未喻詩意也。夫秦地爲周地，則秦人固周人。周之民苦戎久矣，逮秦始以禦戎有功，其父老子弟欲修敵愾，同仇怨於戎，以報周天子者，豈待言而後見哉？而無如周王之絕意西征也。康公好戰，又皆私怨，徒逞小忿而忘大營，非民所欲。溯自公之二年與晉戰于武城，報令狐役也。六年，戰于河曲，報取少梁也。十年，又與楚人滅庸。連年動衆，詎皆君父同仇，而爲臣子者所難已哉？夫與其興師無名，何如報復得所？故作是詩以明志。曰：朋友無衣尚可同袍，況君父乎？王誠于此而能興師以伐戎也，我秦人願修戈矛與子周師共伸同仇大

義，豈不善哉？此謝氏枋得所謂「春秋二百四十餘年，天下無復知有復仇志，獨『無衣』一詩毅然以天下大義爲己任」者也。然則『序』所謂刺，固不獨秦君，兼及周王矣。蓋民有勤王心，君無討賊意，伸在此則不能不屈在彼也，故曰刺也。

【眉評】「一章」起極矯健。

【集釋】「袍」孔氏穎達曰：「玉藻云：『纁爲滿，緇爲袍。』」純著新綿名爲滿，雜用舊絮名爲袍。『澤』【集傳】澤，裏衣也。以其親膚近於垢澤，故謂之澤。陸氏德明曰：澤，如字。『說文』作澤，云「袴也」。『載』車載也。

【標韻】袍四聲，叶步謀反。矛十一尤仇同叶韻。澤十一陌，叶徒洛反。載同，叶乾約反。作十葉叶韻。裳七陽兵八庚行八庚轉韻。

### 渭陽 康公送別舅氏重耳歸晉也。

我送舅氏，曰至渭陽。何以贈之？路車乘黃。一章我送舅氏，悠悠我思。何以贈之？瓊瑰玉佩。二章

右『渭陽』二章，章四句。見舅思母，人情之常。姚氏謂「非惟思母，兼有諸舅存亡之感」。蓋「悠悠我思」句，情真意摯，往復讀之，徘徊動人，故知其有無限情懷也。然此種深情，觸景卽生，稍移易焉已不能及。『大序』謂「及其即位，乃思而作」，豈真知詩情者哉？雖然，康公此詩可謂孝矣。乃未幾而

脩怨於晉，既戰武城，又戰河曲，昏姻之好，變爲仇讎。則念母之心，不知何往，又何故耶？論者謂怨欲害其良心耳。使循是良心，養其端而充之，則怨欲可消，而兵革自息矣。惜乎，其智不及此也！此亦事後論人則然。若當其攜手渭陽，樽酒惜別，雖曰甥情，實奉父命。穆公之爲重耳也，且與以紀綱僕三千，然後晉可定而霸業以成。故春秋於秦、晉交戰，每主晉而客秦，多抑揚焉。此詩之存，其亦春秋意也夫？

【眉評】詩格老當，情致纏綿，爲後世送別之祖，令人想見攜手河梁時也。

【集釋】「渭」水名。王氏應麟曰：「水經：『渭水逕長安城北。』」注：「卽咸陽也。」  
【郡縣志】：「京兆府咸陽縣，本秦舊縣，渭水南去縣三里，秦咸陽在今縣東二十二里。」  
【路車】：諸侯之車也。  
【乘黃】：四馬皆黃也。

【標韻】陽七陽黃同本韻 思四支，叶新齊反。佩十一隊，叶蒲眉反。叶韻

### 權輿 刺康公待賢禮殺也。

於我乎，夏屋渠渠。居。今也每食無餘。食。于嗟乎！不承權輿。一章於我乎，每食四簋。今也每食不飽。單承上食。于嗟乎！不承權輿。二章

右「權輿」二章，章五句。賢者去就，只爭禮貌間耳。而此詩所較，不過區區安居鋪歡事，恐非賢者志也。然孟子不云乎：「孔子爲魯司寇，不用，從而祭，燔肉不至，不稅冕而行。不知者以爲爲肉也，其

知者以爲爲無禮也。」是詩之作，亦猶是哉！蓋賢者每欲微罪行，不欲爲苟去，恐彰君過耳。康公之失，當不止是故，賢者藉是乘幾而作也。不然，食至無餘，而且不飽，康公禮貌縱衰，何至此極耶？

【眉評】起似居食雙題，下乃單承，側重食一面，局法變換不測。於此可悟文法化板爲活之妙。

【集釋】「夏」大也。「渠渠」深廣貌。案：夏屋，毛無明訓，鄭則以爲大具以食我。王肅以爲屋室之屋，而朱子從之，是。「承」繼也。「權輿」始也。胡氏一桂曰：作量自權始，以準量由此而生，造車自輿始，以蓋軫由此而起，故謂始曰權輿。「簋」集傳：簋，瓦器，容斗二升。方曰簠，圓曰簋。簠盛稻粱，簋盛黍稷。四簋，禮食之盛也。

【標韻】渠六魚餘同乎七虞與六魚通韻 簋四紙，叶已有反。飽十八巧叶韻

以上秦詩凡十篇。案，是册、車鄰、鸛鳴、小戎諸詩，武勇甚矣，而兼葭一時又何澹哉！使非賢人君子，烏能爲是？蓋西京舊治，大有人在也。惜秦俗尚武，有賢而不能用耳。以故黃鳥致三良之哀，權輿有無食之嘆，其爲國大可想見。秦之爲秦與周之爲周，其薄厚不甚相遠哉！

陳

【集傳】陳，國名。大皞伏羲氏之墟，在禹貢豫州之東，其地廣平，無名山大川，西望外方，東不及孟諸。周武王時，帝舜之胄有虞閼父爲周陶正，武王賴其利器用，與其神明之後，以元女大

姬妻其子滿，而封之於宛丘之側，與黃帝、帝堯之後共爲三恪，是爲胡公。大姬，婦人尊貴，好樂巫覡歌舞之事，其民化之。今之陳州卽其地也。案：陳、檜、曹皆小國，故居諸國之末。而陳爲伏羲舊治，又帝舜後裔，故在二國前。說者謂檜、曹、匪風、下泉二詩有思治心，未便居於陳國先，蓋亂極則思治，理或然也。若謂變風託於陳靈，恐非序詩本意。夫變風中不能無正，亦由正風中必有變也。此冊、墓門、株林等詩變亂極矣，而「衡門之下」乃有棲遲賢者，又不能不謂變中之正矣。則又何以解其此耶？

### 宛丘 刺上位游蕩無度也。

子之湯兮，宛丘之上兮。洵有情兮，而無望兮。一章坎其擊鼓，宛丘之下。無冬無夏，值其驚羽。二章坎其擊缶，宛丘之道。無冬無夏，值其驚翾。三章

右宛丘三章，章四句。此詩刺游蕩意固昭然。然小序謂「刺幽公」，姚氏以爲「子字恐未安」，朱子亦以爲未敢信。故集傳泛指「游蕩人」，固是慎重解經之意。但樂舞非細民所宜，威望亦於庸衆無關，使閭巷鄙夫終歲執羽舞翻於宛丘之上，亦屬常然，何煩詩人諷詠，重勞大聖人錄而冠夫陳風之首，以爲游蕩者戒耶？此必陳君與其臣下不務政治，相與游樂，君擊鼓而臣舞翻，無冬無夏，威儀盡失。故過宛丘下者，相與指而誚曰：「子之游蕩，洵足爲樂，奈失儀何？其何以爲民望乎？」蓋在上者，下民之所瞻望者也，今乃不自檢束如是，無怪其民視而輕之。曰「子」者，外之之辭，亦輕之意。

耳。然小民未必敢輕君上，故泛指游蕩人而言，使終日游蕩者聞而知所警戒焉足矣。若必明辯「子」字爲君爲臣，或下指人民，終屬呆相，豈免「固哉」之誚歟？

【集釋】「子」毛氏莒曰：子指大夫。鄭氏康成曰：子者，斥幽公也。孔氏穎達曰：隱四年，公子翬謂隱公曰：「百姓安子，諸侯說子。」則諸侯之臣亦呼君曰子。傳：「箋互異，說已見前論。」【湯】蕩也。宛丘【集傳】：四方高中央下曰宛丘。王氏應麟曰：郡縣志：宛丘在陳州宛丘縣南三里。括地志：縣在陳城中，古陳國。洵信也。望人所瞻望。坎擊鼓聲。值植也。鷺羽以鷺羽爲舞者之翳也。缶瓦器，可以節樂。翺翺也。

【標韻】湯二十三漾上，望並同本韻。鼓七庚下二十一馬，叶後五反。羽七庚叶韻。缶二十五有道十九略翻二十號叶韻。

### 東門之枌 巫覡盛行也。

東門之枌，宛丘之栩。子仲之子，婆娑其下。一章穀旦于差，南方之原。不績其麻，市也婆娑。二章穀旦于逝，越以驅邁。視爾如荍，貽我握椒。三章

右東門之枌三章，章四句。此詩分明刺陳俗尚巫覡，而序泛云：「男女棄其舊業，亟會於道路，歌舞於市井。」集傳從之，但不信爲「刺幽公」耳。夫男女縱極淫亂，何至歌舞市井，會於道路，成何世界？姚氏際恆引漢王符潛夫論曰：「詩刺不績其麻，女也婆娑，今多不修中饋，休其蠶織，而起學

巫覡，鼓舞事神，以欺誑細民。」以爲「足證詩意」。是則然矣。然豈必盡學巫覡事哉？亦不過巫覡盛行，男女聚觀，舉國若狂耳。東門、宛丘，其地也。粉、栩相蔭，可以游息其下也。「子仲之子」，男覡也。「不績其麻」，女巫也。婆娑鼓舞，神弦響而星鬼降也。「穀旦于差」，諫吉期會也。「越以騶邁」，男婦畢集以邁觀也。視如蒺而貽之椒，則又覡者互相愛悅也。此與《鄭·溱洧》之采蘭贈勺大約相類，而鄙俗荒亂，則尤過之，在諸國中又一俗也，故可以觀也。舊傳云「大姬，婦人尊貴，好樂巫覡歌舞之事，其民化之」，蓋謂此也。爲民上者，可不知謹所尚歟？

【集釋】「子仲之子」，《集傳》作子仲之女。姚氏際恆云：「下市字果爲女字，則「子仲之子」當作男。」案：績麻乃婦女事，不必改市爲女也。蓋女巫亦恆舞于市耳。此子當作男覡也無疑。《婆娑》舞貌。《穀》善也。《差》擇也。《市》解見上。《逝》往也。《越》於也。《騶》衆也。《邁》行也。《蒺》《集傳》：蒺，花菜也，又名荊葵，紫色。羅氏願曰：荊葵比戎葵葉小，花似五銖錢大，色粉紅，有紫文縷之，一名錦葵，大抵似蘆葦花。《椒》芬芳之物也。

【標韻】栩七麌下二十一馬叶韻 差六麻差五歌轉韻 逝八霽通韻 蒺二蕭椒同本韻

### 衡門 賢者自樂而無求也。

衡門之下，可以棲遲。泌之洋洋，可以樂飢。一章豈其食魚，必河之魴？豈其取妻，必齊之姜？二章豈其食魚，必河之鯉？豈其取妻，必宋之子？三章

右《衡門》三章，章四句。此賢者隱居甘貧而無求於外之詩。不知《序》何以云「誘僖公也？」夫僖公，君臨萬民者也，縱願而無立志，誘之以政焉而進於道也可，奈何以無求於世之志勸之？豈非所誘反其所望乎？《陳》之有《衡門》也，亦猶《衡》之有《考槃》，《秦》之有《蒹葭》，是皆從舉世不為之中而已獨為之，可謂中流砥柱，挽狂瀾於既倒，有關世道人心之作矣。然衡雖淫亂，實多君子；秦雖強悍，不少高人。陳則委靡不振，巫覡盛行，其狂惑之風，尤難自拔。而此獨澹焉無欲，超然自樂，所處者不過衡茅陋室，所飲者不過泉水悠洋，食不必鯉與魴，妻不必宋子而齊姜，則其為志也何如哉？聖人刪《詩》，此種詩不可多得，亦斷不可少。而《序》者不喻其意，反引而他屬，可慨也夫！

【集釋】《衡門》橫木為門也。孔氏穎達曰：衡，古文橫，假借字也。衡、橫義同。門惟橫木為之，言其淺也。《棲遲》遊息也。《泌》泉水也。《洋洋》水流貌。《姜》齊姓。《子》宋姓。

【標韻】遲四支飢同本韻 魴七陽姜同本韻 鯉四紙子同本韻

### 東門之池 未詳。

東門之池，可以漚麻。彼美淑姬，可與晤歌。一章東門之池，可以漚紵。彼美淑姬，可與晤語。二章東門之池，可以漚菅。彼美淑姬，可以晤言。三章

右《東門之池》三章，章四句。此詩終不可解。《序》謂「刺時。疾其君之淫昏，而思賢女以配君子。」《集傳》則以為「男女會遇」之詞。姚氏又「疑即上篇之意，取妻不必齊姜、宋子，即此淑姬，可與晤



對。說各不一。從「序」說，則君有惡，當思賢臣以佐政，乃反思淑女以配君，亦奇想哉。從朱說，則男女會遇，豈有「淑姬」？斷無是理。至於姚說則尤謬戾，衡門隱士，甘貧樂道，乃忽睹彼淑姬，即欲思與晤對，合曲而歌，尚得爲賢乎哉？前云取妻不必朱子、齊姜者，設爲是詞以見心不外求之意耳。詎料姚氏認以爲真，竟欲取東池淑姬以配衡門隱士，豈非千秋笑柄？故此詩闕疑可也。卽或詩人寓言，以淑女比賢士未爲不可，然其辭意淺率，終非佳構，不必再煩多辯已。

【集釋】「溫」漬也。【紵】麻屬。【蒼】《集傳》：蒼，葉似茅而滑澤，莖有白粉，柔輒宜爲索也。濮氏一之曰：「左傳」云：「雖有絲麻，無棄蒼蒯。」蒯與蒼謂蒼也。黃華者，俗名黃芒，卽蒯也。白華者，俗名白芒，卽蒼也。

【標韻】「麻」六麻歌五歌轉韻 紵六語語同本韻 蒼十五刪言十三元通韻

### 東門之楊 未詳。

東門之楊，其葉牂牁。昏以爲期，明星煌煌。一章東門之楊，其葉肺肺。昏以爲期，明星晢晢。二章

右「東門之楊」二章，章四句。「序」謂「昏姻失時，親迎女猶有不至者。」詩未見昏姻字，亦未見其爲女不至之意。「集傳」改爲「男女期會，而有負約不至者」，尤無謂。玩其詞頗奇奧，隱約難詳，故闕之。

【眉評】辭意閃爍，似古迎神曲，非淫詞，亦非昏姻詩也。

【集釋】「群群」盛貌。「明星」啟明也。「煌煌」大明貌。「肺肺」集傳：「肺肺，猶群群也。」「哲哲」猶煌煌也。

【標韻】群七陽煌同本韻 肺十一隊，叶音計反。哲十二錫叶韻

### 墓門 刺桓公不能早去佗也。

墓門有棘，斧以斯之。夫也不良，國人知之。知而不已，誰昔然矣。一章墓門有梅，有鴉萃止。夫也不良，歌以訊之。訊予不顧，顛倒思予。二章

右「墓門」二章，章六句。此詩史也。陳國小，君臣無事可書，只此數詩，歌詠事實，聊備採錄，以當信史。朱晦翁必欲疑而闕之，不惟詩人苦心埋沒無傳，亦將使亂臣賊子得以倖逃公論，其可乎哉？案「左傳」：陳侯鮑卒，文公子佗殺太子免而代之，於是陳亂。「序」因以此詩爲「刺佗」，謂其無良師傅，以至於不義。雖無實據，而詩與事合，固自可信。然詩非刺佗無良師傅，乃刺桓公不能去佗耳。蘇氏轍曰：「桓公之世，陳人知佗之不臣矣，而桓公不去，以及於亂。是以國人追咎桓公，以爲桓公之智不能及其後，故以「墓門」刺焉。」夫「指佗也。佗之不良，國人莫不知之者，知而不之去，昔者誰爲此乎？」案此乃釋首章次章「歌以訊之」等句，則必有忠言直諫，早悟桓公。奈公迷而不悟，以至亂作乃思良言，夫何益哉？二章皆刺桓公，始不知人，次又拒諫，無所謂不置良師傅意。「序」之解經，

往往得其大概，而措辭又非，故詩旨反因之而晦。須爲細審，乃知其得失也。

【集釋】「斯」析也。孔氏穎達曰：「釋言云：『斯，離也。』孫炎曰：『斯，析之離。』是斯爲析義也。濮氏一之曰：「斯，」莊子「斯而析之」。「鴉」陸氏璣曰：「鴉，大如斑鳩，」綠色，人人家凶。賈誼所賦鴉鳥是也。其肉甚美，可爲羹臠，又可爲炙。濮氏一之曰：「楚辭」注：「鴉鴉二物。」又云：「鴉似鴉。」本章云，其實一耳。莊子「見彈而求鴉炙」，是也。「萃」集也。「訊」告也。「顛倒」狼狽之狀。

【標韻】斯四支知同本韻 已四紙矣同本韻 萃四寘訊程氏以恬音韻攷曰：「釋文云：『本又作粹，徐音息粹反。』」廣韻、

「正韻」許字雖遂切，引「詩」曰：「歌以辭止」。今案：此及下句「訊」字，皆「粹」之訛，此句「之」字亦「止」字之訛，顧、江諸家皆詳辨之。

顧七遇予六魚叶韻

校記

「一」「斑鳩」，原作「斑鳩」，據陸璣「草木蟲魚疏」改。

### 防有鵲巢 憂讒賊也。

防有鵲巢，邛有旨苕。誰侑予美？心焉忉忉。一章中唐有鸛，邛有旨鵲。誰侑予美？心焉惕惕。二章

右「防有鵲巢」二章，章四句。此詩憂讒無疑，惟「序」以宜公實之，則不得其確。蓋鵲本巢木，而今則曰「防有鵲巢」矣。若生下隰，而今則曰「邛有旨苕」矣。而且中唐非鸛所生，高丘豈旨鵲所生？人

皆可以偽造而爲謠，又況無根浮詞，不僞張予美，而生彼攜貳之心耶？予是以常懷憂懼，中心惕惕而不能自解也。程子曰：「予美，心所賢者。」一言下之，誑君以讒人；一言奸之，誣善以害人，皆作詩者憂患之意。可謂深得風人義旨矣。而朱子乃謂「予美」指所私者，定此詩爲「男女有私，而憂其或聞之之詞」，豈不異哉？夫《風》詩託興甚遠，凡屬君親朋友，意有難宣之處，莫不假託男女夫婦詞婉轉以達之。詩人之遇晦翁，詩人之大不幸也，可慨也！

【集釋】「防」隄也。《周禮·稻人》：「以澮畜水，以防止水。」《邶》「邱」也。孔氏穎達曰：「土之高處草生尤美，故邶爲邱。」《旨》美也。《若》若饒也，好生下溼。《俯》俯張也，與諱同。《切切》憂貌。《中唐》毛氏甚曰：「中，中庭也。唐，堂塗也。孔氏穎達曰：『以唐是門內之路，故知中是中庭。』孫炎云：『堂塗，堂下至門之逕也。』《鸛》鸛也。郭氏璞曰：「鸛，鸛也，今江東呼爲鸛。」《鸛》《集傳》：「鸛，小草，雜色如綬。」董氏道曰：「鸛舊作鸛。劉氏瑾曰：『案《埤雅》，鸛本鳥名，亦名綬鸛，咽下有囊如小綬，具五色。』《傳》所釋鸛，草之名，豈因其似鸛而取義乎？」《揚揚》猶切切也。

【標韻】巢三肴若二蕭切四豪通韻 鸛十二鸛鸛、揚並同本韻

### 月出 有所思也。

月出皎兮，佼人僚兮。舒窈糾兮，勞心悄兮。一章月出皓兮，佼人儻兮。舒憂受兮，勞心慄兮。二章月出照兮，佼人僚兮。舒天紹兮，勞心慘兮。三章

右《月出》三章，章四句。此詩雖男女詞，而一種幽思牢愁之意，固結莫解。情念雖深，心非淫蕩。且從男意虛想，活現出一月下美人。並非實有所遇，蓋巫山、洛水之濫觴也。不料諸儒認以爲真，豈不爲詩人所哂？使充是心於君親朋友之間，則忠臣孝子，義弟良朋，必有情難自己之處。此《風》詩之旨深微幽遠，託興無端，含蘊有意，固非迂儒俗士所能窺也。至其用字聲牙，句句用韻，已開晉、唐幽峭一派。東萊不識，以爲方言，豈非少見多怪歟？

【集釋】「皎」月光也。「佼人」佼與皎同，美人也。「僚」好貌。「窈」幽遠也。「糾」愁結也。「悄」憂也。王氏安石曰：「悄言不說而靜默。」「慄」好貌。「優受」俱憂思也。「慄」猶悄也。「僚」明也。「天紹」糾緊之意。「慘」憂也。

【標韻】皎十七篠僚同糾二十五有悄慄皓十九皓慄有受同僚四豪照十八曠紹篠慘，集傳：慘當作僚，九皓。通章叶韻。

### 株林 刺靈公也。

胡爲乎株林？從夏南。匪適株林？從夏南。一章駕我乘馬，說于株野。乘我乘車，朝食于株。二章

右《株林》二章，章四句。靈公與其臣孔寧儀行父淫於夏姬，事見《春秋傳》。而此詩故作疑信之謂，非特詩人忠厚，不肯直道人隱，抑亦善摹人情，如見忸怩之態。蓋公卿行淫，朝夕往從所私，必有從旁指而疑之者。卽行淫之人，亦自覺忸怩難安，故多隱約其辭，故作疑信言以答訊者而飾其私。詩

人卽體此情爲之寫照，不必更露淫字，而宣淫無忌之情已躍然紙上，毫無遁形，可謂神化之筆。然羞惡之心，人皆有之。使陳靈君臣知所羞惡而檢行焉，則何至有微舒射廐之難？卽楚亦可不必入陳也。女戎召亂，足爲炯戒。聖人存此，亦信史歟！

【集釋】「株林」夏氏邑也。王氏應麟曰：「郡國志：陳縣」。注：「陳有株邑，蓋朱襄之地。」「寰宇記」：「陳州南頓縣西南三十里有夏亭城，城北五里有株林。」「郡縣志」：「宋州柘城縣，本陳之株邑。」「詩」：「株林」是也。「夏南」孔氏穎達曰：「微舒，字子南，以氏配字，謂之夏南。」「說」：「舍也。」

【標韻】林十二侵南十三覃通韻 馬二十一馬野同本韻 駒七虞株同本韻。

### 澤陂 傷所思之不見也。

彼澤之陂，有蒲與荷。有美一人，傷如之何。寤寐無爲，涕泗滂沱。一章彼澤之陂，有蒲與蘭。有美一人，碩大且卷。寤寐無爲，中心悁悁。二章彼澤之陂，有蒲菡萏。有美一人，碩大且儼。寤寐無爲，輾轉伏枕。三章

右「澤陂」三章，章六句。「序」謂「刺時，男女相悅」。「集傳」謂「與月出相類」，誠然。然「月出」非淫詞，此亦必非淫詩也。曰「碩大且卷」，曰「碩大且儼」，豈淫女貌乎？曰「傷如之何」，曰「涕泗滂沱」，縱極相思，亦何至是？故姚氏以爲傷逝作，或又謂傷泄洩之見殺，均與興意不合。蓋起極幽黯，繼乃傷感，故知爲思存作，非悼亡篇也。大抵臣不得於其君，子不得於其父，皆可藉此以抒懷。詩人所

言，或實有所指，或虛以寄興。興之所到，觸緒卽來。後世《江南曲》、《子夜歌》此類甚多，豈篇篇俱有所爲而言耶？但陳靈荒淫，國亂極矣，豈無賢人君子思治不得，假此以自鳴者？如必見一美人字卽以爲淫，則天下後世之文，爲美人所冤者多矣！

【集釋】《陂》澤障也。《蒲》水草，可爲席者。《荷》芙蕖也。《涕泗》自目曰涕，自鼻曰泗。《蘭》蘭也。

【卷】鬢髮美也。《惓惓》猶悵悵也。《菡萏》荷華也。《儼》矜莊貌。

【標韻】荷五歌何、沱並同本韻。蘭十五刪卷一先同通韻。菡二十七感儼二十八琰枕二十六寢通韻。

以上陳詩凡十篇。案《春秋傳》吳季札請觀周樂，至陳曰：「國無主，其能久乎？」今讀《宛丘》至《澤陂》凡十

篇，而刺君者三：《宛丘》則見其游蕩無度，《墓門》則譏其除惡不力，《株林》則刺其荒淫殺身。其君相無一可歌之善，謂之「無主」，不亦宜乎！又況巫覡盛行，讒賊浸潤，皆大姬之好尚所遺。其開國已有偏嗜，繼起又無善政，無怪子孫縱淫，以至亡國。世之創業垂統者，始基不可不正，俗尚不可不端者，其以此也歟？然中間未嘗無高人賢士，如《衡門》之安貧樂道，《墓門》之忠言直諫，自足相助爲理，無如其君若臣之置而不問焉，何也？此則《詩》者之所爲扼腕嘆息而不能自己也！

# 詩經原始卷之八

## 國風八

### 檜

陸氏德明曰：檜，本作鄒。王氏應麟曰：《左傳》、《國語》作鄒，《地理志》作會。

《集傳》：檜，國名。高辛氏火正祝融之墟，在禹貢豫州外方之北，滎波之南，居漆、洧之間。其君妘姓，祝融之後。周衰爲鄭桓公所滅，而遷國焉。案：檜實滅於鄭武公，非桓公也。然則國亡在東轍之初，何以《詩序》於春秋之後？國小而又無事可表耳。嚴氏粲曰：檜世次莫考，詩不言何君，曰夷、厲之間者，《鄭譜》也。平王初，鄭武始滅檜，前乎平，何以知其非幽也？當幽之時，仲爲檜君，言不刺仲也。前乎幽，又何以知其非宣也？周道復興之時，不得有《匪風》之思也。非幽非宣，夷、厲當之矣。然愚讀檜詩，實仲亡國事，因重訂其詩如左。

羔裘 傷檜君貪冒，不知危在旦夕也。

羔裘逍遙，狐裘以朝。豈不爾思？勞心忉忉。一章羔裘翱翔，狐裘在堂。豈不爾思？我心



憂傷。二章羔裘如膏，日出有曜。豈不爾思？中心是悼。三章

右《羔裘》三章，章四句。《小序》云：「大夫以道去其君也。」《大序》以爲「國小而迫，君不用道，好絮其衣服，逍遙游燕而不能自強於政治，故作是詩。」《集傳》從之，無異辭，惟不言大夫去耳。夫國君好絮衣服，過之小者也，何必去？即云國小而迫，正臣子相助爲理之秋，更不必去。此必國勢將危，其君不知，猶以寶貨爲奇，終日游宴，邊幅是脩，臣下憂之，諫而不聽，夫然後去。去之而又不忍遽絕其君，乃形諸歌詠以見志也。案《國語》，鄭桓公爲周司徒，問於史伯。史伯對曰：「子男之國，虢、鄆爲大。虢叔恃勢，鄆仲恃險，皆有驕侈怠慢之心，加之以貪冒。君若以周難之故，寄帑與賄，虢、鄆受焉。是驕而貪，必將背君。君以成周之衆，奉辭罰罪，無不克矣。」桓公從之，乃東寄帑與賄，虢、鄆受焉。其後武公卒取二國地以爲鄭有，詩之作正其時也。曰「羔裘」，曰「狐裘」，而且曰「如膏」，「有曜」，非徒好絮，實貪侈耳。曰「逍遙」，曰「翱翔」，非惟游惰，又冒昧也。此與虞公受晉璧、馬而不知其人之將襲己也，又何以異？然當是時，安知其臣不有官之奇其人者，犯顏而直諫？又安知其臣不有百里奚其人者，潔身而遠去？玩味詩詞，「豈不爾思，中心是悼」，則百里奚輩也。唯其心戀戀故主，雖去國而猶不敢無憂國念，此詩之所以存耳。惜其世次微茫，姓氏無考，《序》又不能抉發隱衷，遂使忠臣智士一片苦心，隱而不彰。不惟說詩不精，論世亦欠其詳也。

【集釋】《羔裘》《集傳》：緇衣羔裘，諸侯之朝服。《狐裘》《集傳》：錦衣狐裘，其朝天子之服也。

【標韻】遙二蕭朝同切四豪通韻 翔七陽堂、傷並同本韻 齊二十二蟹曜十八嘯悼號通韻

### 素冠 傷檜君被執，願與同歸就戮也。

庶見素冠兮，棘人樂樂兮，勞心博博兮。一章庶見素衣兮，我心傷悲兮，聊與子同歸兮。二章庶見素韠兮，我心蘊結兮，聊與子如一兮。三章

右《素冠》三章，章三句。《小序》謂「刺不能三年」。後之說者莫不遵從，以詩中有「素冠」等字耳。殊不知素冠，古人常服。《孟子》：「許子冠素。」又「皮弁」，尊貴所服，亦白色也。素衣則《論語》云：「素衣麤裘。」《士冠禮》云：「主人玄冠、朝服、緇帶、素韠。」《玉藻》云：「韠，君朱，大夫素。」經傳所載，不一而足。今何乍見一「素冠」，即以爲三年喪乎？無論素冠之爲喪服與非爲喪服，今僅憑一素色之冠，何以別其喪之長短乎？豈三年之喪乃素冠，短喪之服不素冠乎？此必不可通之說也。至於「棘人」，姚氏際恆云：「其人當罪之時，《易》坎六爻曰『係用徽纆，寘于叢棘』是也。樂樂，拘樂之意。」然則棘人乃罪人之稱，非喪者之號明矣。卽素冠非喪者之服亦明矣。姚氏又云：「考喪禮始終，從無素冠、素衣、素韠之文。說長不短。據《玉藻》：『緇冠、素紕，既祥之冠也。』詩思三年之喪，何不直言齊衰等項，而必言祥後之際服，如是之迂曲乎？且思其人卽得見其人，則當幸見之，下直接以我心喜悅之句方合，今乃云「勞心博博」，以及「傷悲」、「蘊結」等語，何哉？其駁《小序》之非，可謂詳且明矣。然亦不敢定此詩所指爲何人何事，但云「或如諸篇以爲君子也可，以爲婦人思男也可」。是其心亦尚游移無據，不能直斷所以然。竊以爲棘人素服，必其人以非罪而在縲紲之中，適所服者素服耳，而幸而

見之，以至於傷悲，願與同歸如一者，非其所親，即素所愛敬之人，故至「勞心博博」而不能自己也。然律以首篇之義，或檜君國破被執，拘於羣棘，其臣見之不勝悲痛，願與同歸就戮，亦未可知。惜其國史無徵，言不足信，姑存一解於此云。

【集釋】「庶」幸也。「素冠」說見篇中。「棘人樂樂」並同見篇中。「博博」憂貌。「輯」集傳：輯，蔽膝也。以韋爲之，冕服謂之韋，其餘曰輯。孔氏穎達曰：古者田漁而食，因衣其皮。先知蔽前，後知蔽後。後王易之布帛，而猶存其蔽前者，重古道，不忘本也。

【標韻】冠十四寒樂、博並同本韻 衣五微悲四支歸微通韻 輯四質結九屑一質通韻

### 隰有萋楚 傷亂離也。

隰有萋楚，猗猗其枝。比。天之沃沃，樂子之無知。一章隰有萋楚，猗猗其華。天之沃沃，樂子之無家。二章隰有萋楚，猗猗其實。天之沃沃，樂子之無室。三章

右「隰有萋楚」三章，章四句。此遭亂詩也。「小序」之誤不必深辯，即「集傳」以爲「政煩賦重，民不堪其苦」者，亦未爲得。以賦重不必怨及室家也。此必檜破民逃，自公族子姓以及小民之有室有家者，莫不扶老攜幼，挈妻抱子，相與號泣路歧，故有家不如無家之好，有知不如無知之安也。而公族子姓之爲室家累者則尤甚。合觀前二篇，當是爲公室發者居多。如杜老之「哀王孫」、哀江頭等篇，舉其重而輕者自見耳。

【集釋】「長楚」《集傳》：「長楚，銑弋，今羊桃也。子如小麥，亦似桃。陸氏璣曰：葉長而狹，華紫赤色，其枝莖弱，引蔓於草上也。」《猗儺》：「柔順也。」《天》：「少好貌。」呂氏祖謙曰：「天，如厥草惟天之天。」《沃沃》：「光澤貌。」《子》：「指長楚也。」

【標韻】枝四支知同本韻 華六麻家同本韻 實四質室同本韻

### 匪風 傷周道不能復檜也。

匪風發兮，匪車偈兮。顧瞻周道，中心怛兮。一章匪風飄兮，匪車嘒兮。顧瞻周道，中心弔兮。二章誰能亨魚？溉之釜鬻。誰將西歸？懷之好音。三章

右《匪風》三章，章四句。此詩諸儒皆泛作思周之作，未嘗卽檜時勢而一論之。則是詩可以作，可以不作。采風者亦可以存，可以不存，何也？以其言中無物，則所存亦不久耳。檜當國破家亡、人民離散，轉徙無常，欲往無家，欲逃何往？所謂中心慘怛，妻孥相弔時也。凡物不能自發，因風而發；行不能遽偈，因車而偈。今也匪風而物自發矣，匪車而行自偈矣。而且物之發也，旋轉不定；行之偈也，漂搖難安。此何如景況乎？果誰爲之咎也？非周轍之東不至此。奚以見其然耶？曰鄭桓公之謀伐虢與檜也久矣，然未幾而旋亡。使周轍不東，檜亦未必受迫於鄭。其或王綱再振，鄭必不敢加兵於檜。而今已矣，悔無及矣！不能不顧瞻周道而自傷也。雖然，文、武、成、康之靈，昭然在天，周之興也，豈能無望哉？蓋周興則我小國亦與之俱興矣。搔首茫茫，其誰能亨魚乎？有則我願爲之溉其釜

鬻也。其誰將西歸乎？有則我願慰之以好音也。特恐思之殷然，遇之漠然，不能無慨於其際，則真末如之何也已矣！此檜臣自傷周道之不能興復其國也。不料諸儒但以爲思周道之陵遲，則豈詩人意旨哉？

【集釋】「發」飄揚貌。「偈」疾驅貌。「周道」說見篇中。《集傳》作適周之路，亦通。「但」傷也。「飄」回風曰飄。「漂」漂搖不安之貌。「漚」漚也。「鬻」釜屬。陸氏德明曰：《說文》云：「大釜也。一曰鼎大上小下若甑曰鬻。」孔氏穎達曰：《釋器》云：「甗謂之鬻。」孫炎曰：「關東謂甑曰鬻。」然則鬻是甑，烹魚用釜不用甑，雙舉者，以其俱是食器，故連言耳。案：鬻非釜非甑，腹形若鼎，上有鋸，別架三足於下，可烹可蒸，俗名釣鍋之說爲近。

【標韻】發六月偈九屑但七曷通韻 飄二蕭叶匹妙反。漂並同弔十八嘯叶韻 鬻十二侵音同本韻

以上檜詩凡四篇。案是册僅四篇，諸儒以爲亂極思治之作。殊不知檜亡在東轍之初，時有作於西京之際者，蓋

亂始也，何以云「亂極思治」耶？讀書如此粗率，烏能論世？總之，迂儒拘士，未易與談《風》《雅》。彼第見《匪風》有「願瞻周道」懷之好音等語，遂不同其所懷者何人，所瞻者何事，而直謂之曰「思周」也。後之人又從而益之，以爲「亂極思治」，何異隔靴搔癢？縱極論說，於詩緊要，毫不相關。愚故別爲訂正，與舊說又大異，考古者或不無所取焉。

## 曹

《集傳》：曹，國名。其地在禹貢兗州陶邱之北，雷夏、荷澤之野。周武王以封弟振鐸。今之

曹州，卽其地也。陳氏傳良曰：「檜亡，東周之始也，曹亡，春秋之終也。夫子之刪《詩》，繫《曹》、《檜》於《國風》之後，於《檜》之卒篇曰：「思周之道也」，傷天下之無王也。於《曹》之卒篇曰：「思治也」，傷天下之無伯也。愚案：此論似聖人編《詩》以《檜》、《曹》殿《國風》之後，皆有意於二詩也。但季札觀樂時，《詩》之次序已如此，非定自夫子也。且使二詩具有深意，季札當歎美而深長思之，何以云：「《檜》以下無譏焉？」此可見其國小事微，詩亦無足重輕。采風者錄之，聊以備一國之俗云爾。至二詩之有念周京，各有意在。編而存之，偶與相符，非有深意也。不然，亂極思治，何國蔑有，豈獨二小國爲然乎哉？愚故備論之，以見說《詩》者之好附會也如此。

### 蜉蝣 未詳。

蜉蝣之羽，衣裳楚楚。心之憂矣，於我歸處。一章蜉蝣之翼，采采衣服。心之憂矣，於我歸息。二章蜉蝣掘閱，麻衣如雪。心之憂矣，於我歸說。三章

右《蜉蝣》三章，章四句。《序》謂「刺奢也」。《集傳》改爲「時人有玩細娛而忘遠慮者」，均於詩旨未當。蓋蜉蝣爲物，其細已甚，何奢之有？取以爲比，大不相類。天下刺奢之物甚多，詩人豈獨有取於掘土而出、朝生暮死之微蟲耶？卽以爲玩細娛而忘遠慮，亦視乎其人之所關輕重爲何如耳。若國君則所係匪輕，小民又何足爲重？但曰時人，詩豈必存？曹既無徵，難以臆測，闕之可也。

【集釋】《蜉蝣》《集傳》：蜉蝣，渠畧也。似蜉蝣，身狹而長，有角。黃黑色，朝生暮死。陸氏璣曰：蜉蝣，

方土語也，通謂之渠畧。似甲蟲，有角，大如指，長三四寸，甲下有翅，能飛。夏月陰雨時，地中出。  
〔楚楚〕鮮明而整齊貌。〔采采〕華飾也。〔掘閱〕朱氏鬱儀曰：「管子」云：「掘閱得玉。」閱，穴，字通也。  
〔麻衣〕鄭氏康成曰：深衣也。姚氏際恆曰：古禮服、喪服，布皆是麻，未有木棉也。吉凶唯以升數爲別。

【標韻】羽七庚楚六語處同通韻 翼十三職服一屋，叶補北反。息職叶韻 閱九屑雪，說並同本韻

### 候人 刺曹君遠君子而近小人也。

彼候人兮，何戈與祿。彼其之子，三百赤芾。一章維鵜在梁，不濡其翼。彼其之子，不稱其服。二章維鵜在梁，不濡其味。彼其之子，不遂其媾。三章蒼兮蔚兮，南山朝隲。比小人。婉兮孌兮，季女斯饑。比君子。○四章

右候人四章，章四句。大序謂「共公遠君子而近小人」，與左氏傳合。案：僖二十八年春，晉文公伐曹。三月，入曹。數之以其不用僖負羈，而乘軒者三百人，即詩所謂「三百赤芾」是也。曰蒼蔚「朝隲」，言小人衆多而氣饒盛也。曰婉孌「斯饑」，言賢者守貞而反困窮也。夫所謂賢者，非僖負羈而何？晉文之數曹罪，安知非爲此詩而來？而朱子辯說猶云，但以「三百赤芾」有合於傳，而疑之曰「未知然否」？不亦甚哉？

【集釋】候人，集傳：候人，道路迎賓送客之官。〔芾〕集傳：芾，冕服之韠也。一命，組芾黼珩；再

命，赤芾黼珩，三命，赤芾蔥珩。大夫以上，赤芾乘軒。〔鵽〕《集傳》：鵽，洿澤水鳥也，俗所謂洿河也。孔氏穎達曰：郭璞曰：「鵽，鵽好羣飛，入水食魚，故名洿澤。」陸璣《疏》云：「鵽形如鸚而極大，喙長尺餘，領下胡大如數升囊。若小澤中有魚，便羣共抒水，滿其胡而棄之，令水竭盡，魚在陸地，乃共食之，故曰洿河也。」〔梁〕水中魚梁也。〔喙〕喙也。〔鵽〕鵽也。〔朝隋〕雲氣升騰也。

【標韻】殺九聲芾五物叶韻 翼十三職服一屋，叶肅北反。喙二十六肴鵽同本韻 隋同隋，八齊。鵽五微通韻

### 鵽鵽 追美曹之先君德足正人也。

鵽鵽在桑，其子七兮。與。淑人君子，其儀一兮。其儀一兮，心如結兮。一章鵽鵽在桑，其子在梅。淑人君子，其帶伊絲。其帶伊絲，其弁伊騏。二章鵽鵽在桑，其子在棘。淑人君子，其儀不忒。其儀不忒，正是四國。三章鵽鵽在桑，其子在榛。淑人君子，正是國人。正是國人，胡不萬年！四章

右《鵽鵽》四章，章六句。《小序》謂「刺不壹」。詩中純美無刺意。或謂「美振鐸」，或謂「美公子臧」，皆無確據。何玄子謂「曹人美晉文公之復曹伯」，亦以周王策命中有「王謂叔父，敬服王命，以綏四國」之語耳。姚氏取之，以爲「意雖鑿，頗有似處」。然愚案，詩詞寬博純厚，有至德感人氣象。外雖表其儀容，內實美其心德，非歌頌功烈者比。晉之霸，晉之功耳，何德之有耶？且文公諱而不正，其復曹伯，亦因疾爲筮史所誑，豈真有德於曹者哉？此詩專重內德，以頌晉文，何謂相似？至《集傳》則又



謂「美君子之用心均平專一」，而不指爲何人，似亦不必深考之意。然詩卒章云「正是國人，胡不萬年」，則明明有其人在，非虛詞也。回環諷詠，非開國賢君，未足當此，故以爲「美振鐸」之說者，亦庶幾焉。惜其編詩失次，爲前後三詩所混，故啟人疑。若移置本風之首，如「衛之淇奥」，「鄭之緇衣」，則義自明矣。否則，後人因曹君失德而追述其先公之德之純以刺之，故曰「胡不」者，疑而問之之詞也，以爲爾能「正是國人」，胡不福爾子孫於億萬斯年？不然，頌其德矣，何云「胡不」？「小序」蓋得其影響而未知其所以然也，故特正之。

【眉評】「四章」全詩皆美，唯末句含諷刺意。

【集釋】「鴈鳩」《集傳》：鴈鳩，結鞠也，亦名戴勝，今之布穀也。飼子朝從上下，暮從下上，平均如一也。

〔如結〕金氏履祥曰：如結，言心不放。〔弁〕皮弁也。〔騏〕《集傳》：騏，馬之青黑色者。弁之色亦如此也。

【標韻】七四質一同結九屑通韻 梅十灰絲四支騏同通韻 棘十三職忒、國並同本韻 榛十一真人同年一先通韻

### 下泉 傷周無王，不足以制霸也。

冽彼下泉，浸彼苞稂。比。愴我寤歎，念彼周京。一章冽彼下泉，浸彼苞蕭。愴我寤歎，念彼京周。二章冽彼下泉，浸彼苞菁。愴我寤歎，念彼京師。三章芃芃黍苗，陰雨膏之。四國有王，郇伯勞之。四章

右「下泉」四章，章四句。此與「匪風」同被大國之伐，而傷周王之不能救己也。夫天下有道，則禮樂征伐自天子出；天下無道，則禮樂征伐自諸侯出。今晉文入曹，執其君，分其田，以釋私憾，寧能使曹人帖然心服乎？此詩之作，所以念周衰傷晉霸也。使周而不衰，則「四國有王」，彼晉雖強，敢擅征伐？又況承王命而布王恩者，有九州之伯以制之。昔者，郇國之君嘗承是命治諸侯而有功矣，而今不然也。不能不慨然寤歎，以念周京，如苞稂之見浸下泉，日蕪沒而自傷耳。詩意若此，而「序」謂「共公侵削」，已屬懸揣；至「集傳」又謂「王室陵夷，而小國困弊」，尤爲泛泛，皆未嘗卽其時勢而一論之也。夫「詩」可以觀，讀其詩不知其人，不論其世，而何觀之有哉？

【集釋】「列」寒也。「下泉」泉下流者也。孔氏穎達曰：「釋水」：「沃泉縣出。縣出，下出也。」李巡曰：「水泉從上溜下出。」此言下泉，是「爾雅」之沃泉也。「苞」草叢生也。「稂」童梁，莠屬也。陸氏璣曰：「禾秀爲穗而不成，崩巖然謂之童梁，今人謂之宿田翁，或謂守田也。孔氏穎達曰：此稂是禾之秀而不實者，故非灌漑之草，得水而病。」「愴」歎息之聲也。「周京」天子所居也。「蕭」蒿也。「著」筮草也。許氏慎曰：「著，蒿屬，生千歲三百莖，易以爲數。天子著九尺，諸侯七尺，大夫五尺，士三尺。陸氏璣曰：似蕭，青色，科生。」「芄芄」美貌。「郇伯」：「集傳」：「郇伯，郇侯，文王之後，嘗爲州伯，治諸侯有功。季氏本曰：郇雖文王之子所封，而郇伯則其後也，故鄭氏謂其爲文王子，而「集傳」則改爲文王之後，亦不知其爲何時人矣。王氏應麟曰：「春秋釋地」曰：「解縣西北有郇城。」「左傳」：「盟于郇。」「說文」：「國在晉地。李氏樛曰：「王制」：「謂二百一十國爲州，州有伯，是九州中有九伯也。」

【標韻】稂七陽京八庚通韻 蕭二蕭周十一尤叶韻 著四支師同本韻 膏二十號勞同本韻

### 以上曹詩凡四篇。

案：是册亦止四篇，其一未詳，可讀者三篇而已。候人則刺其君遠君子而近小人，陂鳩則追美其先公德足以正人，匪風則傷周無王，不足以制霸（一）。是時晉文正盛，而陳氏乃謂曹之卒篇傷天下之無伯也，何哉？大抵曹、檜二國，形勢畧同，其亡也亦相似。匪風、下泉均傷天下無王，不足以制霸，小國受害，亦不能望其救。采風者每於此觀世變焉。讀詩者亦當於此反覆玩味，則作詩者之真意出，即刪詩者之微義亦無不顯矣。

### 校記

〔一〕曹無匪風，而於下泉方氏序云：「傷周無王，不足以制霸也。」疑此匪風乃下泉之誤。

### 幽

《集傳》：幽，國名。在禹貢雍州岐山之北，原隰之野。虞、夏之際，棄爲后稷而封於邠。及夏之衰，棄稷不務，棄子不窋失其官守，而自竄戎狄之間。不窋生鞠陶，鞠陶生公劉，能復修后稷之業，民以富實。乃相土地之宜，而立國於幽谷焉。十世而太王徙居岐山之陽，十二世而文王始受天命，十三世而武王遂爲天子。武王崩，成王立，年幼不能蒞阼。周公旦以冢宰攝政，乃述后稷、公劉之化，作詩一篇以戒成王，謂之幽風。而後人又取周公所作，及凡爲周公而作之詩以附焉。幽，在今邠州三水縣。邠，在今京兆府武功縣。案：《幽》僅七月一篇，所言皆農桑稼

稽之事，非躬親離畝久於其道者，不能言之親切有味也如是。周公生長世胄，位居冢宰，豈暇爲此？且公劉世遠，亦難代言。此必古有其詩，自公始陳王前，俾知稼穡艱難並王業所自始，而後人遂以爲公作也。至《鴉鵲》、《東山》二詩，乃爲公作。《伐柯》、《破斧》、《九罏》、《狼跋》則又衆人爲公而作之詩。以其無所繫屬，故並附《七月》後，而統而名之曰《豳》，凡以爲公故也。當季札請觀周樂時，篇次本居《齊》後《秦》前，不知何時移殿諸國之末。意者夫子正樂，手所親訂歟？蓋夫子一生，志欲行周公之道而不能，故凡典籍之關於公者，恆三致意焉。且詩以《風》名，有正不能無變，既漓又當返淳。天下淳風，無過農民，此《七月》之詩所以必居變風之末者也。其餘紛紛議論，或謂豳公爲諸侯，故不得入《周》、《召》之正風，非美成王，亦不得入成王之正雅，又或謂君臣相誚，不得爲正，故爲變風，居變風之末，言變之可正也。皆無稽妄談，悉不可從。

### 七月 陳王業所自始也。

七月流火，天時。九月授衣。人事。一之日鶩發，二之日栗烈。無衣無褐，衣何以卒歲？三之日于耜，四之日舉趾。同我婦子，饁彼南畝。食。田峻至喜。一章七月流火，九月授衣。春日載陽，有鳴倉庚。物。女執懿筐，遵彼微行，爰求柔桑。治蠶。春日遲遲，點綴風景。采芣苢。女心傷悲，殆及公子同歸。兼寫閨情。○二章七月流火，八月萑葦。蠶月條桑，取彼斧斯，以伐遠揚，猗彼女桑。七月鳴鵲，八月載績。紡績。載玄載黃，染絲。我朱孔陽，爲公子

裳。爲衣。○三章四月莠蓂，五月鳴蜩。八月其穫，十月隕穽。一之日于貉，田獵。取彼狐狸，爲公子裘。成裘。二之日其同，載績武功。言私其縱，獻豝于公。四章五月斯螽動股，六月莎鷄振羽。七月在野，八月在宇，九月在戶，十月蟋蟀，人我牀下。穹窒熏鼠，塞向墐戶。嗟我婦子，曰爲改歲，人此室處。 饗寒。○五章六月食鬱及薁，七月亨葵及菹。食譜細碎，逐月嘗新，妙！八月剥棗，十月穫稻。爲此春酒，以介眉壽。造語華貴。七月食瓜，八月斷壺。九月叔苴，采荼薪樗，食我農夫。六章九月築場圃，十月納禾稼。黍稷重穋，禾麻菽麥。穀譜。嗟我農夫，我稼既同，上入執官功。晝爾于茅，宵爾索綯。亟其乘屋，其始播百穀。七章二之日鑿冰沖沖，三之日納于淩陰。 併及藏冰，上言禦寒，此言避暑，文法變換。四之日其蚤，獻羔祭韭。九月肅霜，十月滌場。朋酒斯饗，曰殺羔羊。躋彼公堂，稱彼兕觥，萬壽無疆！結語堂皇，莊重不饒。○八章

右《七月》八章，章十一句。此詩之佳，盡人能言。其大旨所關，則王氏云：「仰觀星日霜露之變，俯察昆蟲草木之化，以知天時，以授民事。女服事乎內，男服事乎外。上以誠愛下，下以忠利上。父父子子，夫夫婦婦，養老而慈幼，食力而助弱。其祭祀也時，其燕饗也簡。」數語已盡其義，無餘蘊矣！唯《周禮·籥章》「豳雅豳頌」之說，一詩而分三體，無人能言。鄭氏乃三分此詩以當之，以其道情思者爲風，正禮節者爲雅，樂成功者爲頌。自一章至二章，風也。自三章、四章、五章至六章之半，雅也。

又自六章之半至七章、八章，頌也。天下豈有此文義，亦豈有此「篇章」？無文義則無音節，無音節則不成「篇章」，故王氏不取，朱子亦疑之，是矣。然又以爲，或者但以「七月」全篇，隨事而變其音節，或以爲風，或以爲雅，或以爲頌；如又不然，則「雅」、「頌」之中，凡爲農事而作者，皆可冠以「豳」號。愈疑愈遠，愈辯愈支，愈無是處。總以誤讀「周禮」之過。「周禮」僞書，本不足信。諸儒又泥其辭而不敢辯，至謂本有是詩而亡之，則無中生有，滋人以疑謬執甚焉。夫「詩」之分風、雅、頌，三體本不相混，而「七月」一詩，實兼風、雅、頌三體而無或遺，但非截然判而爲三之謂，乃渾然合而成一之謂也。何以言之？曰風者，諷也；上以風化下，下以風刺上，言者無罪，聞者足戒。今「七月」所述，皆幽俗，而陳於王前則足以知戒，非風體乎？曰雅者，正也。言王政之所由廢興也。今「七月」所陳，又農功之緩急，即王政之先務，非有近於雅乎？至於頌，則曰美盛德之形容，以其成功告於神明者也。今「七月」卒章，農功既畢，獻羔祭韭，騶堂稱觥，其頌禱君親，以致敬神明者，何如不又可以爲頌乎？此一詩而兼三體之說，在「風」詩中實爲變體，故又曰變風。詩以體變，非風因俗變也。厥旨甚明，格亦易辨。何至三千餘年，竟無一人道及此耶？夫「詩」有變體，不獨「風」爲然也，「雅」、「頌」亦未嘗不有之。「小雅」：「蓼蕭」、「湛露」，雅兼乎風者；「魯頌」：「有駜」、「泮水」，頌又兼乎風也。雅、頌可兼風體，風詩獨不可兼雅、頌乎？知乎此，可以讀雅、頌變體，亦可以讀風詩變體矣。可以讀風詩變體，然後可以讀一詩而兼三體之變風矣。獨是此體在「三百篇」中，不可多觀。非惟雅、頌所無，即風體亦絕無而僅有者也。故以一詩而別爲一冊者，未爲過也。今玩其辭，有樸拙處，有疏落處，有風華處，

有典核處，有蕭散處，有精緻處，有淒婉處，有山野處，有真誠處，有華貴處，有悠揚處，有莊重處。無體不備，有美必臻。晉、唐後，陶、謝、王、孟、韋、柳田家諸詩，從未見臻此境界。姚氏際恆云：「鳥語蟲鳴，草榮木實，似《月令》。婦子入室，茅絢升屋，似風俗書。流火寒風，似《五行志》，養老慈幼，賸堂稱觥，似庠序禮。田官染職，狩獵藏冰，祭獻執功，似國典制書。其中又有似《采桑圖》、《田家樂圖》、《食譜》、《穀譜》、《酒經》。一詩之中，無不具備，洵天下之至文也。」此雖末節，無關要旨，然亦足見三代聖哲胸羅萬象，筆有化工，不求奇而自奇云。

【眉評】「一章」首章衣食雙起，爲農民重務。「二章」以下四章，皆跟衣字。此章先言蠶事，爲女功之始。問着懷婉之詞，何等風韻！「三章」此言紡績成裳，仍帶定「公子」字，妙！「四章」此兼言田事，集腋以成裘，而「獻豸于公」，忠愛之忱可見矣。「五章」此言卒歲，可以禦寒完衣一面事。而自五月以至十月，一氣說下，機直之至。然其體物微妙，又何精緻乃爾！「六章」以下專言食。「七章」此章稿事正面，後半兼及治屋。「八章」至此農功既畢，可以獻羔薦廟，登堂稱觥，田家之樂無踰此矣。

【附錄】姚氏際恆曰：此篇首章言衣食之原，前段言衣，後段言食。二章至五章終前段言衣之意，六章至八章終後段言食之意，人皆知之矣。獨是每章中，凡爲正筆閒筆，人未必細檢而知之也。大抵古人爲文，正筆處少，閒筆處多。蓋以正筆不易討好，討好全在閒筆處。亦猶擊鼓者注意于旁聲，作繪者留心于畫角也。古唯《史記》得此意，所以傳于千古。此首章言衣食之原，所謂正筆也。二章至五

章言衣。中唯「載玄載黃，我朱孔陽」二句爲正筆，餘俱閒筆。二章從春日鳥鳴，寫女之採桑，自「執懿筐」起，以至忽地心傷，描摹此女盡態極妍，後世咏採桑女、作閨情詩，無以復加。使讀者竟忘其爲言「衣食爲王業之本」正意也。三章曰「條桑」，曰「遠揚」，曰「女桑」，寫大小之桑，並採無遺，與上章始「求柔桑」，境界又別，何其筆妙！雖正寫「玄黃」帛成，曰「爲公子裳」，仍應上「公子」，閒情別趣，溢于紙上，而章法亦復渾然。「八月載績」一句，言麻。古絲麻並重也。此又爲補筆。四章則由衣裳以及裘，以及田獵，閒而又閒，遠而益遠。五章終之以「改歲」「人室」，與衣若相關若不相關。自五月至十月，寫以漸寒之意，筆端尤爲超絕。妙在只言物，使人自可知人，物由在野而至入室，人亦如此也。兩「人」字正相照應。六章至八章，言食。中唯「九月築場圃，十月納禾稼，黍稷重穋，禾麻藿麥」四句爲正筆，餘俱閒筆。六章分寫老壯食物，凡菜豆瓜果，以及釀酒取薪，靡不瑣細詳述，機趣橫生。然須知皆是佐食之物，非食之正品也。故爲閒筆。七章「稼同」以後，併及公私作勞，仍點「播百穀」三字以應正旨。八章併及藏冰之事，與食若不相關若相關，而終之以田家歡樂，尊君親上，口角津津然，使人如見幽民忠厚之意，至今猶未泯也。以上總論全篇用筆作法。孔氏穎達曰：「民之大命在溫與飽，八章所陳皆論衣服飲食。首章爲其總要，餘章廣而成之。絲麻布帛，衣服之常，故蠶績爲女功之正，皮裘則其助，黍稷菽麥，飲食之常，故禾稼爲男功之正，菜果則其助。養蠶時節易過，恐失其時，殷勤言之，故二章、三章皆言養蠶之事。耕稼者，一年之事，非時月之功，民必趨時，不假深戒。首章已言其始，七章畧言其終，不復說其芟耨耘耕之事。故男功之正少，女功之正多也。絲麻之外，唯



有皮裘，可衣者少；黍稷之外，果瓜之屬，可食者多。故男功之助多，女功之助少也。先公之教，急於衣食。四章之末，說田獵習戎；卒章之初，說藏冰禦暑。非衣食之事而言之者，廣述先公禮教具備也。閒於政事，然後饗燕。卒章說飲酒之事，得其次也。以上統論全詩賓主次序，詳畧之殊。首章。朱氏善曰：三陰之月，陰氣始盛，故於是而預爲禦寒之備。三陽之月，陽氣始盛，故於是而豫爲治田之備。先衣而後食，故以七月爲首也。大寒之候，在於丑月，而圖之於建申之時。收成之候，在於酉月，而慮之於建寅之日。其爲豫備可知。若寒至而後索衣，飢至而後索食，則其爲計亦晚矣。三章。朱氏善曰：上章於春日而求桑以養蠶，爲今年授衣計也。此章於八月菹葷既成，而豫蓄之以爲曲薄，爲明年養蠶計也。上章求蠶桑以養其始生者，采白蒿以洗其未生者，此蠶事之始也。此章於桑之大者條取之，桑之小者猗取之，蠶盛而大小畢取，此蠶事之成也。蠶事既成，又於鳴鵲之候而續其麻以爲布。蓋蠶之所成者，可以供老疾，給婚嫁，奉君上而已；非續麻以爲布，則固無以爲少者壯者之供也。蠶績皆成，然後染之，且以供上而爲公子之裳。其風俗之厚如此，豈一日之積哉？五章。朱氏善曰：感時物之屢變，盡人事之當爲。黜民於衣食之奉，必先老而後幼，先貴而後賤。獨於「改歲」「入室」，則老幼貴賤同之，所以廣其愛也。六章。朱氏善曰：果酒嘉蔬，非不可以及少也，而供老疾，奉賓祭之意多。瓜瓠苴荼，老者未必不食也，而不可以爲常，於以見食稻食肉，乃老者之常，而果酒嘉蔬，則又於常食之外，專以此致其助。有常食以養之，而又有美味以助之，此黜人之老所以無凍餒也歟？七章。朱氏善曰：稼之既同，若可以少休也，而卽念夫邑居之當脩，屋之方乘，若可以

少緩也，而復念夫農功之當始。於其築而納之也，有以見其歡欣鼓舞之意；於其亟而乘之也，有以見勸勉戒飭之意。事有始終，而其憂勤艱難則無間於始終，此所以爲厚也歟？八章。朱氏善曰：鑿冰藏冰，其供上役也爲甚勤；肅霜滌場，其畢農功也爲甚速。故開冰也，獻羊祭韭，以薦寢廟，君既得以致其誠孝於神。其務閑也，殺羊舉酒而祝其壽，民復有以致其忠愛於君。可謂上下相親之甚矣！輔氏廣曰：「以介眉壽」，祝其親也；「萬壽無疆」，祝其君也。周之先公以農桑教民，而使民給足於衣食，然未嘗以爲惠也。周之民亦自力於農桑之事以樂其生，至於歲終休暇之時，殺羊爲酒，祝君之壽，以致其尊君親上之誠，亦未嘗以爲是足報其上也。上以誠愛下，下以誠事上，而兩不知其所以然，此所謂皞皞也。以上分論各章義旨。

【集釋】「七月」《集傳》：七月，斗建申之月，夏之七月也。後凡言月者放此。章氏潢曰：「七月流火」之詩，周公訓告成王而作也。注云，夏七月也。蓋火，心星，退於七月，萬古不易。雖欲不謂之爲夏正，不可得也。但以「七月流火」爲夏之七月，則《三百篇》凡所云時日，皆當謂爲夏正，而《詩》即謂之爲「夏時」斯可矣。如以周之詩咏夏之時，此章歸諸邠公猶近似也。然則「二月初吉」，「四月維夏」，「六月徂暑」，「六月棲棲」，「十月之交」，將以爲夏之時乎？抑周之時乎？要皆因周正建子之說誤之也。非周正不建子也，特改歲于建子之月，以易乎朝會之期耳，而其時與月未之改也。春不可以爲冬，秋不可以爲夏，天固不能改乎時與月，而聖人曆象，日月星辰，敬授人時，雖欲改月與時以令臣民，而有不能也。曾謂武王周公是有是事哉？且不必他有所證，試卽「七月」一章觀之：「三之日于耜，四之日舉

「趾」，春日載陽，「趾」，月條桑，「四月秀麥，五月鳴鵙」，「六月食鬱及薁，七月亨葵及藿」，「八月載績」，「九月築場圃，十月納禾稼」，「一之日于貉」，「二之日其同」，十二月中，天時人事，恐前乎周而唐、虞、夏、商，後乎周而秦、漢、唐、宋，莫不然也。曾謂周而獨不然乎？先儒固以此爲夏之時也，然第五章「日爲改歲，入此室處」，夫以十月而入執官功，將入此室處，想夏時亦然。豈夏時亦改歲于十月之終歟？咏而玩之，似不必謂夏正也明矣。知周特改歲于十一月，而未嘗改月與時，豈特「七月流火，九月授衣」不當謂之爲夏正，而「三百篇」如「六月棲棲」，「十月之交」諸篇，俱可無疑也。案：此說論周改歲不改月，頗有見。然詩所咏自夏正也。其曰「火星退於七月，萬古不易」，亦非。解見後。

「流火」，「集傳」：「流，下也。火，大火，心星也。以六月之昏加於地之南方，至七月之昏則下而西流矣。」劉氏瑾曰：「堯典」云：「日永星火，以正仲夏」。蓋堯時仲夏日在鶉火，故昏而大火中。及周公攝政時，凡一千二百四十餘年，歲差當退十六七度，故六月而後，日在鶉火，大火昏中；七月則日在鶉首，而昏時大火西流於地之未位。然此詩上述幽俗，乃當夏、商之時，而言「七月流火」者，蓋據周公時所見而言耳。案：此則章氏「火星退於七月」之說大謬。「一之日」，「集傳」：「一之日，謂斗建子，一陽之月。」「二之日」，「集傳」：「二之日，謂斗建丑，二陽之月也。變月言日，言是月之日也。後凡言日者放此。」（「鸛鳴」）風寒也。「栗烈」，氣寒也。「褐」，毛布也。「卒歲」，歲之終，即二之日也。「于」，往也。「相」，田器也。「于相」，言往修田器也。「舉趾」，舉足而耕也。「饁」，餉田功也。「田畯」，田官也。孔氏穎達曰：「釋言」云：「畯，農夫也。」孫炎曰：「農夫，田官也。」郭璞曰：「今之耆夫是也。然則官選俊人主田謂之田畯，典農

之大夫謂之農夫。以王者尤重農事，知其爵爲大夫也。〔倉庚〕黃鸝也。〔懿〕深美也。〔遵〕循也。〔微行〕小徑也。〔紫〕白蒿也。〔祈祈〕衆多也。〔公子〕《集傳》：公子，幽公之子也。蓋是時公子猶娶於國中，而貴家大族連姻公室者，亦無不力於蠶桑之務。故其許嫁之女，預以將及公子同歸而遠其父母爲悲也。輔氏廣曰：舊說以「女心傷悲」爲感春陽之氣而然，則失之褻。以「殆及公子同歸」爲欲與公之女同歸，則又失之僭。且於下「爲公子裳」、「爲公子裘」有碍，故先生不取，而以爲許嫁之女預以將及公子同歸爲憂，而遠其父母爲悲也。不唯見當時風俗之厚，而又於下文皆可通也。姚氏際恒曰：公子，幽公之子，乃女公子也。此採桑之女在幽公之宮，將隨女公子嫁爲媵，故治蠶以備衣裝之用。而于採桑時，忽然傷悲，以其將及公子同于歸也。如此則詩之情境宛合。從來不得其解，且寫小兒女無端哀怨，最爲神肖。或以爲春女思男，何其嫫媧！或以爲悲遠離父母，又何其板腐哉！案：數說皆泥讀「公子」字而未嘗體會「殆及」神吻也。以公子爲女公子，是女字爲後人所添，非詩之所謂公子也。以此女爲許嫁之女，則「采繁祁祁」，女子衆多，焉知其誰爲許嫁，而誰非許嫁人耶？且恐其將與女公子同賦于歸，則所與者不過一二人，豈舉國採桑諸女盡爲媵妾哉？諸儒欲求其解不得，於是多方擬議，婉轉以求合經文，皆以辭而害意也。曰「公子」者，詩人不過代擬一女心中之公子其人。曰「殆及」者，或然而未必然之詞也。女當春陽，閒情無限，又值採桑，倍惹春愁，無端而念及終身，無端而感動目前，不知後日將以公之公子爲歸耶？抑別有謂子歸者在耶？此少女人心中所有事，並不爲褻，亦非爲僭。王政不外人情，非如後儒之拘滯而不通也。且著此句於田野樸質之中，愈

見丰神摇曳，可以化舊爲新，而無塵腐氣，亦文章中之設色生姿法耳。又何必沾沾辯其爲男爲女公子耶！〔萑葦〕卽蒹葭也。毛氏甚曰：亂爲萑，葭爲葦。豫畜萑葦，可以爲曲也。〔蠶月〕治蠶之月，三月也。劉氏瑾曰：蠶月雖不可指定某月，然其既條取大桑，復猗取女桑，大約當在建辰之月，蠶盛之時。先儒或疑此詩獨闕三月，蓋已具於蠶月之間矣。〔條桑〕枝落之采其葉也。〔斧斨〕〔集傳〕：斧，隋蠶。斨，方蠶。陸氏德明曰：隋，孔形狹而長。蠶，〔說文〕云：「斧孔也」。孔氏穎達曰：斨，其斧也，唯蠶孔異耳。案：隋，駝、妥二音。蠶音穹。〔遠揚〕遠枝揚起者也。〔猗〕取葉存條曰猗。〔女桑〕小桑也。〔鵲〕伯勞，卽鵲鳩也。〔績〕緝也。〔玄〕黑而有赤之色。〔朱〕赤色。〔陽〕明也。〔蓼〕草名。王氏應麟曰：「四月秀蓼」，諸儒不詳其名。惟〔說文〕引劉向說以爲苦蓼，曹氏以〔爾雅〕、〔本草〕證之，知其爲遠志。〔嫫〕嫫也。孔氏穎達曰：「方言」曰：「楚謂嫫爲嫫，宋、衛謂之嫫嫫，秦、晉謂之嫫」。是嫫、嫫一物，方俗異名耳。〔獲〕禾之早者可獲也。〔隕〕墜也。〔薜〕落也。〔于貉〕音鶴，本作貉。〔正字通〕：貉似狸，銳頭尖鼻，斑色，毛深厚溫滑，可爲裘。〔淮南子〕：「纏貉爲曲穴」。姚氏際恒曰：「于貉，猶上下之「于相」「于茅」。先言于貉者，往取貉也。鄭氏謂搏貉以自爲裘，狐狸以其尊者，是也。〔集傳〕曰：「貉，狐狸也。」不惟貉非狐狸，狐與狸亦別，稚子皆知，乃以貉、狐、狸三者爲一物，有此「格物」否？且若曰「往取狐狸」，又曰「取彼狐狸」，亦無此重疊文法也。〔公子裘〕姚氏際恒曰：「爲公子裘」，應上「爲公子裳」。按：此二公子與上「公子同歸」之公子微有不同。蓋上虛擬公子名色，此實指公家衆公子也。爲裘爲裳，何不以奉君公而必以奉公子？蓋公子爲公所鍾愛者也，言公子，則公心尤悅。

且野人獻忱，不敢直達君上，聊以奉諸公子，其口吻固如是耳。〔續〕繼也。〔穢〕一歲豕也。〔豸〕三歲豕也。〔斯蠡莎雞蟋蟀〕毛氏長曰：斯蠡，蛤蟬也。莎雞羽成而振訊之。陸氏璣曰：莎雞如蝗而斑色，毛翅數重，其翅正赤，六月中飛而振羽，索索作聲。嚴氏粲曰：蟋蟀，促織也。解見《唐·蟋蟀》。〔集傳〕：斯蠡、莎雞、蟋蟀，一物隨時變化而異其名。動股，始躍而以股鳴也。振羽，能飛而以翅鳴也。姚氏際恒曰：〔集傳〕云：「斯蠡、莎雞、蟋蟀，一物隨時變化而異其名。」按陸璣云：「斯蠡，蝗類，長而青，或謂之蚱蜢。莎雞，色青褐，六月作聲如紡絲，故又名絡緯。」今人呼紡績娘。若夫蟋蟀，則人識之，幾曾見三物爲一物之變化乎？且《月令》：六月「蟋蟀居壁」，詩言「六月莎雞振羽」，二物同在六月，經傳有明文，何云變化乎？依其言，則必如詩五月之斯蠡，六月變爲莎雞，七月變爲蟋蟀，整整一月一變乃可。世有此「格物」之學否？案：三蟲皆眼前微物，何格物家竟不能格耶？〔穹〕空隙也。〔窻〕塞也。〔向〕北出牖也。〔墻〕塗也。〔改歲〕案：改歲之說已見上「七月」章氏注。然愚謂周不惟不改時與月，且並不改歲，蓋改建於孟春之月耳。夫時首孟春，萬古不易，斗柄指辰，隨時變更。周孟春，斗未指子，而遽建子，故不得爲時之正。若改正於仲冬，不獨時令不合，即農功亦錯，何以敬授人時耶？而此之云「改歲」，則姚氏際恒云：「改歲者，以冬成也。今人于孟冬便有徂年傷暮之思，古今一也。」其說近是，餘俱穿鑿附會，不可從。〔鬱〕棣屬。〔萸〕萸萸也。孔氏穎達曰：鬱，棣屬者，是唐棣之類屬也。其樹高五六尺，其實大如李，正赤，食之甜。萸萸者，亦是鬱類而小別耳。二者相類而同時熟，故言鬱萸也。〔葵〕菜名。〔菽〕豆也。〔剥〕擊也。〔介〕助也。〔眉壽〕豪眉也。人年老者，

必有豪眉秀出者，故知眉謂豪眉也。〔壺〕瓠也。〔菽〕《集傳》：叔，拾也。姚氏際恒曰：叔當訓收，聲之轉也。〔苴〕麻子也。〔荼〕苦菜也。〔樗〕惡木，可爲薪也。〔禾〕《集傳》：禾者，穀連穗結之總名。禾之秀實而在野曰稼，先種後熟曰重，後種先熟曰穠。再言禾者，稻秫苽粱之屬皆禾也。孔氏穎達曰：禾是大名，非徒黍、稷、重、穠四種而已。麻與菽麥則無禾稱，故於麻麥之上更言禾字以總諸禾也。許氏謙曰：麥非納於十月，蓋總言農事畢耳。〔同〕聚也，猶言所納之備也。〔宮功〕姚氏際恒曰：「上人執宮功」，治邑居也。「亟其乘屋」，治野廬也。《集傳》：謂二畝半爲廬在田，二畝半爲宅在邑，非。梁氏益曰：《周禮》：地官·均人職：「凡均力政以歲，上下豐年則公旬用三日焉，中年則公旬用二日焉，無年則公旬用一日焉。」案：後說亦可參觀。〔索〕繩索也。〔綯〕《爾雅》：絞也。〔乘〕升也。〔鑿冰〕《集傳》：鑿冰，謂取冰於山也。沖沖，鑿冰之意。《周禮》：「正歲十二月，令斬冰」，是也。〔納〕《集傳》：納，藏也，藏冰所以備暑也。〔凌陰〕冰室也。蘇氏轍曰：古者藏冰，發冰以節陽氣之盛。夫陽氣之在天地，譬如火之著於物也，故常有以解之。十二月，陽氣蘊伏，鋼而未發，其盛在下，則納冰於地中。至於二月，四陽作，蟄蟲起，陽始用事，則亦始啟冰而廟薦之。至於四月，陽氣畢達，陰氣將絕，則冰於是大發，食肉之祿、老病、喪浴，冰無不及。是以冬無愆陽，夏無伏陰，春無凄風，秋無苦雨，雷出不震，無災霜雹，癘疾不降，民不夭札也。〔蜃〕蜃朝也。〔韭〕菜名。《獻羔》：「月令仲春，獻羔開冰，先薦寢廟是也。〔朋酒〕姚氏際恒曰：朋酒，《毛傳》曰：「兩樽曰朋」。以《鄉飲酒禮》云：「尊兩壺于房戶間，有玄酒」，是用兩樽也。案：殷世質朴，不知已有此禮否？而邵民尤處田野，亦未必備設兩樽。其云「朋

酒」，當是朋儕爲酒，乃「歲時伏臘，田家作苦」之意耳。「公堂」姚氏際恒曰：公堂，毛傳謂學校，近是。蓋殷曰序，幽公國中亦必有之。農人賸堂稱觥，以慶君上，非必至幽公之堂也。

【標韻】火二十舒衣五微，叶上聲。叶韻 發六月烈九肩褐七鳥歲八舞，讀如雪。叶韻 相四紙趾、之、喜並同本韻

陽七陽庚八庚僅、行、桑並七陽轉韻 遲四支祈五微悲支歸微通韻 火見上革五尾叶韻 桑陽斯、揚、桑並同

本韻 鵲十二錫續同本韻 黃七陽陽、裳並同本韻 蓼二蕭綱同本韻 穫十藥擇、貉並同本韻 狸四支裘十

一尤叶韻 同一東功、發、公並同本韻 股七庚羽同野二十一馬宇庚戶同下馬鼠六語戶同上子四紙處語叶韻

莫一屋菽同本韻 棗十九咍稍同本韻 酒二十五有壽二十六宥叶韻 瓜六麻，叶音孤。壺七虞苴六魚樛同夫虞叶

韻 圖慶稼二十二禡叶韻 穆一屋，叶六直反。麥十一兩叶韻 同東功同本韻 茅三肴絢四豪通韻 屋一屋穀

同本韻 冲東陰十二侵，叶於容反。叶韻 蚤十九咍非二十五有叶韻 霜陽場同饗叶虛良反。羊陽堂同觥庚虞

陽叶韻

### 鵲鵲 周公悔過以儆成王也。

鵲鵲鵲鵲，既取我子，無毀我室。恩斯勤斯，鬻子之閔斯。一章迨天之未陰雨，徹彼桑土，綢繆牖戶。今此下民，或敢侮予。全詩主意在此二句。○二章予手拮据，予所捋荼，予所畜租，予口卒瘁，曰予未有室家。三章予羽譙譙，予尾脩脩，予室翹翹，風雨所漂搖，予維音嘒嘒。

此詩純用比。○四章



右《鷦鷯》四章，章五句。《序》謂「周公救亂也。成王未知周公之志，公乃爲詩以遺王。」蓋本《金縢》爲文。《辨說》以爲最有據而從之。唯「弗辟」之說，初依古注，後《覆蔡沈書》又改從鄭氏，讀辟作辯，云：「三叔方流言，周公處骨肉之間，豈應以片言半語遽然興師以征之？」又謂「成王方疑周公，公固不應不請而自誅之，請亦未必見從」，未又引「舜避堯之子」，「禹避舜之子」，以證此避字。無論《金縢》偽書不足信，即使足信，亦無周公退避之說。夫周公之攝政也，以成王幼未能行政故也。三叔流言乃以殷畔後事，非未畔之初卽有流言也。使未畔而有流言，公豈尚使以監殷乎？起而征之，公但知誅畔者耳，非爲流言遽誅懿親也。公之東征，安知非請命而後行耶？觀後漢諸葛武侯兩次出師，表而後行，卽知公必非不請而擅自出征也。以後主庸材，不敢致疑武侯，豈成王睿知，又有姜、召二公夾輔其間，乃反致疑於公乎？乃知「王未知公志，公乃爲詩以遺王」者，皆後人以私意測聖心而爲此不經之談者也。又況王方襁褓，政攝自公，東征還後，仍秉國政，歐陽氏辯之詳矣。至於舜、禹之避，時勢迥不相同，詎得以例周公？蓋一處順境，故讓以成德；一處危時，故勞以建功。豈以區區退避爲聖德之大歟？若夫《金縢》僞書，其可疑者大要有三：袁氏枚云：「孔子曰：『不知命，無以爲君子。』又曰：『某之禱久矣。』」三代聖人，天壽不貳，武王不豫，命也，豈太王、王季、文王之鬼神需其服事哉？以身代死，古無此法。後世村巫里媼之見則有之矣。廣陵王胥曰：「死不得取代，庸身自逝。」周公豈廣陵之不若哉？一也。又曰：「周公既不告廟而私禱矣，武王已薨，己身無恙，公之心已安，公之事已畢。此私禱之冊文焚之可也，藏之私室可也，乃納之於太廟之金縢，預爲日後邀功免罪之計，其居心尚可

問乎？禮祝嘏詞說，藏於宗祝，是謂幽國。豈周公有所不知而躬蹈之乎？二也。又曰：「爾汝者，古人挾長之稱，而圭璧者，所以將敬之物也。公呼先王爲爾，不敬。自夸材藝，不謙。終以圭璧要之，不順。若曰：許我則以璧與圭，不許我則屏璧與圭，如握果餌以劫嬰兒，既驕且吝，慢神蔑祖。而太王、王季、文王甘其爾汝之稱，又貪其圭璧之誘，於昭於天者，何其啟寵納侮之甚也？」三也。其餘稱名築壇，諸多違禮悖德之事，又可勿論。然則公之誅管、蔡，亦非信史歟？曰：曷可以無信也？昔者王孫賈嘗以是問諸孟子矣（一），孟子應之曰：「然」。然則周公實錄莫（二）孟子（三）若也（四），《金縢》蓋竊其文而益以祝詞，並雷風感悟之說，以新人耳目耳。而豈知其誣公之甚耶？夫天下唯聖人爲能知聖人也，孟子不云乎：「周公，弟也；管叔，兄也。周公之過，不亦宜乎？」周公之誅管、蔡，周公之不得已也。我知公心既傷且悔，唯有引咎自責，並望成王以戒將來。勿謂罪人斯得，遂可告無罪於先王也。蓋骨肉相殘，不祥孰甚；叛服無常，可慮方深。今此下民，或尚有能悔予如前日事者，予可不倍加憂懼，爲未雨之綢繆耶？此《鴟鴞》之詩所由作也。故其詞悲而志苦，情傷而戒切，託爲鳥言，感人愈深。王之迎公，固不待天雨反風，禾則盡起而後悟矣。何諸儒所見從未逮此？予不能不反覆吟咏，致慨於其際焉。

【眉評】「一章」首章悔已往之過。「二章」次章戒未來之禍。「三、四章」以下極言締造平亂之難，如聞羈鳥悲鳴，恆有毀巢破卵之懼，其自警者深矣。

【集釋】《鴟鴞》《集傳》：鴟鴞，鴞鵂，惡鳥，攫鳥子而食者也。《爾雅·釋鳥》：鴟鴞，鴞鵂。郭璞注：鴟類。

呂氏大臨曰：鷦鷯，惡聲之鷦鳥也。「有鷽萃止」，「鷽」，鷽鳥爲鷽，「鷽」，鷽鳥之類。「恩」，情愛也。「勤」，篤厚也。「鷽」，養也。「閔」，憂也。「迨」，及也。「徹」，取也。「桑土」，桑根也。「綢繆」，纏綿也。「拮据」，手口共作之貌。「將」，取也。「茶」，萑荻，可藉巢者也。「蓄」，積也。「租」，王氏安石曰：與租賦之租同，蓋鳥食也。「卒」，盡也。「瘠」，病也。「譙譙」，殺也。「條條」，散也。「翹翹」，危也。「嘒嘒」，急也。

【標韻】子四紙室四質叶韻 勤十二文閔十一暮，叶周食反。叶韻 雨七虞土，戶並同予六語通韻 据六魚茶七虞租、瘠並同家六麻，叶古胡反。叶韻 譙二蕭條、翹、搖、嘒並同本韻

校記

【一】「王孫賈」，孟子：公孫丑下，爲「陳賈」。

## 東山 周公勞歸士也。

我徂東山，惓惓不歸。我來自東，零雨其濛。我東曰歸，我心西悲。虛冒下文一筆。制彼裳衣，勿士行枚。蜎蜎者蠋，烝在桑野。敦彼獨宿，亦在車下。此言夫念婦。○一章我徂東山，惓惓不歸。我來自東，零雨其濛。果臝之實，亦施于宇。伊威在室，蠨蛸在戶。叮嚀鹿場，熠燿宵行。亦可畏也，伊可懷也。二章我徂東山，惓惓不歸。我來自東，零雨其濛。鸛鳴于垤，婦嘆于室。此言婦念夫，皆爲末章地。洒掃穹窒，我征聿至。有敦瓜苦，烝在栗薪。自我不見，于今三年。頓住，鎖上一筆，情韻悽然。○三章我徂東山，惓惓不歸。我來自東，零雨

其濛。倉庚于飛，熠熠其羽。之子于歸，皇駁其馬。親結其禭，九十其儀。其新孔嘉，其舊如之何？  
姚云：應前「獨宿」、「婦嘆」。○四章

右《東山》四章，章十二句。此周公東征凱還以勞歸士之詩。《小序》但謂「東征」，則與詩情不符。《大序》又謂士大夫美周公而作，尤謬。詩中所述，皆歸士與其室家互相思念，及歸而得遂其生還之詞，無所謂美也。蓋公與士卒同甘苦者有年，故一旦歸來，作此以慰勞之。因代述其歸思之切如此，不啻出自征人肺腑，使勞者聞之，莫不泣下，則平日之能得士心而致其死力者，蓋可想見。朱氏善曰：「聖人之所以能感人者，以其以己之心度人之心，而天下之人亦樂於效力，而不患上之不我知也。」《東山》之詩，述其歸而未至也，則凡道途之遠，歲月之久，風雨之陵犯，饑渴之困頓，裳衣之久而垢敝，室廬之久而荒廢，室家之久而怨思，皆其心之所苦而不敢言者，我則有以慰勞之。及其歸而既至也，則睹天時之和暢，聽禽鳥之和鳴，而人情和悅，適與景會。舊有室家者，其既歸而相見固可樂，未有室家者，其既歸而新昏尤可樂。此皆其心之願而不敢言者，我則有以發揚之。莫苦於歸而在途之時，而上之人能與之同其憂，莫喜於歸而相見之時，而上之人能與之同其樂。樂以天下，憂以天下，然而不王者，未之有也，其是之謂歟。此可謂善說《詩》矣。然非公曲體人情，勸恤民隱，何能言之親切如此？而姚氏謂非公作。嗚乎！非公之作而執作之乎？假使此詩出於旁代之手，則不過一篇《從軍行》、《漢鵲歌》而已，烏足以見聖德之感人於無間哉？

【眉評】「二章」歷寫未歸景物，荒涼已甚。『四章』既歸情事，室家團圓，幽豔乃爾。

【集釋】「東山」嚴氏粲曰：「三監在周之東，周公自西徂東以征之，軍屯必依山爲固，故以東山言之。」「惛惛」言久也。「零」落也。「濛濛」微雨也。「裳衣」程子曰：「治歸裝也。」「勿士行枚」鄭氏康成曰：「士，事也。枚如箸，銜之，有縫結項中以止語也。」「蝸蝸」動貌。「蝸」集傳：「蝸，桑蟲如蠶者也。」「烝」發語辭。「敦」獨處不移之貌。「果臝」枯樓也。「施」延也。「伊威」鼠婦也。陸氏佃曰：「爾雅曰：『伊威，委鼠。』一名鼠婦，亦曰鼠負。因溼化生，今俗謂之溼生。」「蟪蛄」小蜘蛛也。陸氏佃曰：「釋蟲云：『蟪蛄，長跖。』郭璞曰：『今小蜘蛛長股者，俗呼喜子。亦如蜘蛛布網垂絲，著人衣當有親客至。荊州、河內之人謂之喜母。』」「町疃」董氏道曰：「區種法曰：伊尹作爲區田，一畝之中地長十八丈，分十八丈作十五町，町間分十四道，通人行。種爲田里所聚。」「鹿場」町疃無人，故鹿得以爲場。「熠燿宵行」姚氏際恒曰：「熠燿，螢也。宵行，夜行也。人人知之。」集傳：「因下『熠燿其羽』，遂疑熠燿非蟲，而以宵行當之。既以蟲名爲辭語，而又自造一蟲名，甚奇。楊用修已極駁之，謂下『熠燿其羽』言倉庚，猶『小雅』『交交桑扈』，『有鶯其羽』用字法也。案：宵行固非蟲，熠燿亦非螢，乃螢之光耳。舉其光而螢自見，亦以爲眼前物人易知耳。不料諸老先生之竟不知也，豈不爲詩人所暗哂耶？」「鸛」水鳥也。陸氏璣曰：「鸛，鸛雀也。似鴻而大，長頸赤喙，白身黑翅。」「埳」小丘也。「皇」馬色黃白曰皇。「駸」馬色駢白曰駸。「縞」孔氏穎達曰：「釋器云：『婦人之褱謂之縞。縞，緩也。』孫炎曰：『褱，帨巾也。』案：昏禮言結縞，則縞當是褱。」（九十其儀）集傳：「言其儀之多也。」

【標韻】山十五刪歸五微二句無韻。東一東濛同本韻。歸微悲四支衣微枚十灰通韻。蝸二沃野二十一馬宿一屋

下馬叶韻 字七虞戶同本韻 場七陽行同本韻 畏五未，叶於非反。懷十灰叶韻 埵九屑室四質室同至四質叶韻 薪十一真年一先通韻 飛轍歸同縷支儀同通韻 嘉六麻何五歌通韻

### 破斧 美周公伐罪救民也。

既破我斧，又缺我斨。比。周公東征，四國是皇。哀我人斯，亦孔之將。一章既破我斧，又缺我斨。周公東征，四國是吡。哀我人斯，亦孔之嘉。二章既破我斧，又缺我斨。周公東征，四國是邁。哀我人斯，亦孔之休。三章

右《破斧》三章，章六句。此四國之民望救於公，如大旱之遇雲霓也。蓋三叔挾殷以畔，其民陷於叛逆，莫能自拔也久矣。一旦得睹旌旗，拯民水火，非惟四國疆土有所匡固，卽我小民亦保全良多。使非公奉辭伐罪，親賦《東征》，烏能收功立效之速如是乎？夫罪人肆毒，何所不至？既播流言，破毀我周公，又將犯關，危逼我嗣王。如彼盜器者然，破我斧矣，又缺我斨，是先損我利器，使無所用其力而業自廢耳。則其爲罪可勝誅哉？此固四國人民歸美周公，形爲歌詠之作。然而公之心則大公無我，只知惟逆是誅，非爲流言啟釁。奈何後世儒者，動以被謗東征，師出有名爲議，自謂能得公心之大。嗚乎，是豈知公心之大者哉？

【集釋】《斧斨》解見《七月》篇。《四國》姚氏際恒曰：四國，商與管、蔡、霍也。毛氏謂管、蔡、商、奄，非也。其時奄已封魯矣。《集傳》謂「四方之國」。何玄子曰：《書·多方篇》曰：「告爾四國多方」，既于

四國之下復言多方，則四國非泛指四方明矣。「皇」匡也。董氏道曰：齊詩作「四國是匡」，賈公彥引以爲據。「將」大也。「錡」鑿屬。「叱」化也。李氏樗曰：化其惡而使知之爲善也。「嘉」善也。「錄」木屬。「道」孔氏穎達曰：道訓爲聚，亦堅固之義。「釋詁」云：「道，斂聚也。」言四國之民於是斂聚不流散也。「休」美也。

【標韻】折七陽皇、將並同本韻 錡四支，叶匡何反。叱五歌嘉六麻叶韻 錄十一尤道同休同本韻

### 伐柯 未詳。

伐柯如何？匪斧不克。取妻如何？匪媒不得。一章伐柯伐柯，其則不遠。我觀之子，籩豆有踐。二章

右「伐柯」二章，章四句。此詩未詳，不敢強解。「序」以爲「美周公，周大夫刺朝廷之不知也」。夫周公之德之美，他人不知，姜、召二公豈未之知乎？況東征三年，罪人斯得，心已大白於天下。雖在四國，且有「是皇是叱」之嘆，獨於朝廷，乃多疑議，恐無是理，斷不可信。且當日公雖東征，權猶在手。一朝凱撤，朝廷奉迎之不暇，何至遲留未歸，猶煩周大夫之作詩以刺朝廷耶？朱子初說，亦用「序」義，後以此詩難曉，而「我觀之子」一句又與下章同，故推求其意，以爲東人欲見周公，始難而終易，而爲是深喜之詞。然總作比看，則與「九戩」之「我觀之子」一賦一比又相戾，且皆非詩詞中所有意也。姚氏際恒又以爲周人喜公還歸之詩。曰：「籩豆有踐」者，言周公歸，其待之之禮如此也，亦含糊不可

曉。總之，諸儒之說此詩者，悉牽強支離，無一確切通暢之語，故事闕之以俟識者。

【集釋】「柯」斧柄也。「籩」竹豆也。「豆」木豆也。

【標韻】克十三職得同本韻 遠十三阮踐十六統通韻

### 九罭 東人送周公西歸也。

九罭之魚，鱗魴。興。我觀之子，袞衣纁裳。一章鴻飛遵渚。公歸無所，於女信處。二章鴻飛遵陸。公歸不復，於女信宿。三章是以有袞衣兮，無以我公歸兮，無使我心悲兮。四章

右「九罭」四章，一章四句，三章章三句。此東人欲留周公不得，心悲而作是詩以送之也。其意若曰：九罭之魚乃有鱗魴，朝廷之士始見袞裳，今我東邑何幸而睹此袞衣纁裳之人乎？無怪其不能久留於茲也。夫鴻飛在天乃其常，然時而遵渚遵陸，特其暫耳。公今還朝，以相天子，豈無所乎？殆不復東來矣。其所以遲遲不忍去者，特爲女東人作信宿留也。公於東人如此其誠，東人於公當更何如？夫是以想我東人之得觀此袞衣也，我東人之大幸也。然則何策而使朝廷無以我公西歸乎？我東人庶得長睹冠裳，不至臨歧而心悲耳。此與宋民之遮道擁留司馬相公，曰「公無歸洛，留相天子，活百姓者」，同一出於至誠也。使非上下交孚，何以得民若是乎？詩意甚顯，「序」乃不知，殊可怪耳。朱晦翁雖能見及，而訓釋詩義亦未暢明，故特正之。

【集釋】「九罭」九囊網也。孔氏穎達曰：「釋器」云：「罭謂之九罭。九罭，魚網也。」孫炎曰：「謂魚之所」



人有九囊也。〔鱗〕許氏謙曰：「爾雅翼」，鱗魚，目中赤色一道橫貫瞳，多獨行，見網輒避。〔魴〕見「汝墳」。〔袞衣繡裳〕「集傳」：袞，衣裳九章：一曰龍，二曰山，三曰華蟲，雉也；四曰火，五曰宗彝，虎也，皆續於衣；六曰藻，七曰粉米，八曰黼，九曰黻，皆繡於裳。天子之龍一升一降，王公但有降龍，以龍首卷然，故謂之袞也。〔遵〕循也。〔渚〕小洲也。〔信〕再宿曰信。

【標韻】魴七陽裳同本韻 渚六語所、處並同本韻 陸一屋復、宿並同本韻 衣五微歸同悲四支通韻

## 狼跋 美周公也。

狼跋其胡，載寔其尾。 比。公孫碩膚，赤烏几几。 一章狼寔其尾，載跋其胡。公孫碩膚，德音不瑕。 二章

右「狼跋」二章，章四句。解此詩者多牽涉成王不信周公，愚殊不取，已數辯之矣。唯朱氏善曰：「物之累於形者，其進退跋寔，無所往而不病。聖人之周於德者，其進退從容，無所往而不宜。蓋臨大難而不懼，處大變而不憂，斷大事而不疑。非道隆德盛者，固不足以語此，非常人所能及也。」數語頗能道得三代聖人氣象出，乃是周公本色。詩亦善於形容盛德，曰「公孫碩膚」，「赤烏几几」，令人想見諸葛君綸巾羽扇，指揮羣材，從容得意時，有此氣度也。

【集釋】「跋」躓也。〔胡〕領下懸肉也。〔載〕則也。〔寔〕哈也。李氏巡曰：「哈御頓曰寔。」說文曰：「哈，蹟也。」集傳：「老狼有胡，進而躓其胡，則退而哈其尾。」〔孫〕音遜，讓也。〔碩〕大也。〔膚〕美也。

〔赤鳥〕冕服之鳥也。鄭氏康成曰：鳥有三等，赤鳥爲上。冕服之鳥，則諸侯與王同。〔几几〕安重貌。

【標韻】尾五尾几四紙通韻 胡七虞瑕六麻，叶拱孤反。叶韻

以上幽詩凡七篇。案：《幽風》僅《七月》一篇，其餘皆附存耳。文中子以《幽》爲變風，遂並謂周公諸詩君臣相

誚，不得爲正。非惟不知《風》詩變體，且並不識聖人苦心。夫幽詩之所以爲變者，以其一時而兼三體，非《風》正格，故曰變也。其變在格，非變在事。且《七月》與《鸛鳴》以下，兩不相涉，何一概論之耶？至於東征，事之變者也，然非公之所及料也。三叔懿親，不使監殷，孰與爲監？其流言毀謗，乃畔者之常，何損於公？使成王終疑不悟，公豈尚能東征以討其罪乎？迨至三年，罪人斯得，縱有疑亦當釋然。而猶謂終疑不悟，必待雷風之變，始感泣而迎公于郊者，有是事哉？吾不知諸儒之視成王爲何如王，而論周朝爲何如朝？皆《金縢》僞《書》有以誤之也。孟子曰：「盡信《書》，則不如無《書》。吾於《武成》，取二三策而已矣。」孟子之世，《武成》尚不可全信，況《金縢》之出自秦火後乎？吾願諸儒讀《書》，當以孟子爲法，則可無疑於周公之事，而幽詩亦可讀矣。若編次在《雅》前《風》後，冀變之可以爲正，危之可以復安，有非周公不可者，則不刊之論云。

# 詩經原始卷之九

## 小雅一

雅有大小正變之分，自來諸儒未有確論。故或主政事，或主道德，或主聲音，皆非。唯嚴氏粲云，雅之大小特以其體之不同耳。蓋優柔委曲，意在言外者，風之體也；明白正大，直言其事者，雅之體也。純乎雅之體者爲雅之大，雜乎風之體者爲雅之小。其言似是而幾矣，然而未盡其旨也。夫風、雅、頌三詩各有其體，原不相混。其或雜而相兼者，卽其體之變焉者也。故凡詩皆有正變，不獨小雅爲然。如今之時藝有正鋒，則必有偏鋒；有正格，則必有變格，均因體裁而定。體裁分則音節亦異。其體裁之所以分者，或因事異，或以人殊，或由世變，則無定局。采風者亦視其詩之純雜以定格之正變而已矣。故不可專主政事、道德、聲音一端而言也。然則大小之分究何以別之？曰，此在氣體輕重，魄力厚薄，詞意淺深，音節豐殺者辨之而已。太史公曰：「小雅怨誹而不亂」，若大雅則必無怨誹之音矣。知乎小雅之所以爲小雅，則必知乎大雅之所以爲大雅，其體固不可或雜也。大略小雅多燕饗贈答，感事述懷之作，大雅多受釐陳戒，天人奧蘊之旨。及其變也，則因事而異，且有非作詩人自知而自主者。亦如十二律之本乎天地陰陽，正變相生，循環無間，變乎其所不得不變耳。而姚氏願謂雅之大小必有正而無變者，豈理也哉？

## 鹿鳴之什

《集傳》云，《雅》、《頌》無諸國別，故以十篇爲一卷而謂之什，猶軍法以十人爲什也。仍之。

### 鹿鳴 燕羣臣也

呦呦鹿鳴，食野之苹。興起。我有嘉賓，鼓瑟吹笙。吹笙鼓簧，承筐是將。人之好我，示我周行。一章 呦呦鹿鳴，食野之蒿。我有嘉賓，德音孔昭。視民不忒，君子是則是效。我有旨酒，嘉賓式燕以敖。二章 呦呦鹿鳴，食野之芩。我有嘉賓，鼓瑟鼓琴。鼓瑟鼓琴，和樂且湛。我有旨酒，以燕樂嘉賓之心。三章

右《鹿鳴》三章，章八句。《序》謂「燕羣臣嘉賓」。夫嘉賓卽羣臣，以名分言曰臣，以禮意言曰賓。文武之待羣臣如待大賓，情意既洽而節文又敬，故能成一時盛治也。傳曰：「賓臣者帝，師臣者王。」周之賓臣，周之所以王耳。若後世則直以奴隸視之，何賓之有？無怪其治不古若矣。雖賜宴飲賓，錫爵賦詩，未嘗不仿古遺意，而上下之情則多隔而不通矣。且其所賦之詩，非沉酣卽貢諛，求如周之賓臣，望其周行示好，則傲不忒者蓋寡。君子讀《詩》至此，不能無時世升降，臣道隆污之感焉！至其音節，一片和平，盡善盡美，與《關雎》同列四詩之始，殆無貽議云。

【集釋】《呦呦》聲之和也。〔苹〕嚴氏粲曰，《釋草》苹有二種，一云「苹，薺，其大者蘋」。此水生之萍也，解

見「采蘋」。一云「苹，蘋蕭」。此陸生之苹也，卽鹿所食是也。「承」奉也。「筐」所以盛幣帛者也。「周行」姚氏際恒曰：周行，大路也。「毛傳」訓「至道」，「集傳」訓「大道」，皆非。此與「大東」行彼周行之「周行」同，猶云指我途路耳。「蒿」集傳：蒿，藎也，卽青蒿也。「視」姚氏際恒曰：視，鄭氏謂古示字。按：上有示字，不應又作視。蓋視民猶民視，謂小民視之，不敢習爲偷薄之行，而君子則是則「是傲」也。案：視民之視卽視事之視，臨事可云視事，故臨民亦可云視民也。姚說雖通，未免又費周折矣。「桃」偷薄也。「敖」游也。「芣」集傳：芣，草名，莖如釵股，葉如竹，蔓生。「湛」樂之久也。「燕」安也。

【標韻】「莘」八庚賓十一真笙庚通韻 簣七陽將、行並同本韻 蒿四豪昭二蕭桃同傲十九效，叶胡高反。敖產叶韻 芣十二侵琴、湛、心並同本韻

## 四牡 勤王事也

四牡騤騤，周道倭遲。豈不懷歸？王事靡盬，我心傷悲。一章四牡騤騤，嘽嘽駉馬。豈不懷歸？王事靡盬，不遑啟處。二章翩翩者騅，載飛載下，集于苞栩。王事靡盬，不遑將父。三章翩翩者騅，載飛載止，集于苞杞。王事靡盬，不遑將母。四章駕彼四駉，載驟駉駉。豈不懷歸？是用作歌，將母來諗。五章

右「四牡」五章，章五句。「序」謂「勞使臣之來」。蓋本「左傳」襄公四年穆叔曰：「四牡，君所以勞使

臣也。」故後世解詩者，因作「君探其情而代之言」。然詩云「是用作歌」，則明明使臣自咏，非探情之所宜言矣。姚氏際恒云：「試將此詩平心讀去，作使臣自咏極順，作代使臣咏極不順。」亦因「作歌」句橫隔其間也。然則傳言非歟？姚氏又云：「王者採後，或因以爲勞使臣之詩。」其言亦頗近理。故儀禮・燕禮、鄉飲酒禮皆歌此詩，則又以爲上下通用之樂矣。是古來先有此詩，後乃採以爲樂。非因勞臣而後作是詩，故愈引而愈泛，此又不可不知其弊之所以失也。至詩之所以次鹿鳴者，以上章君之待臣以禮，故此章臣之事君以忠，上下交感，乃成泰運。然勤勞王事，固人臣所當忠，而「不遑將母」，又人子所宜孝。故不敢以將母之情而來告，然後忠孝可以兩全。此聖王之所以深嘉其情而樂予焉，且用其詩以勞使臣，亦將以爲使臣勸。所謂求忠臣必於孝子之門者，此也。何諸儒泥傳言，而以爲「代探其情」，如是之迂折難解歟！

【集釋】「駢駢」行不止之貌。【周道】大路也。【倭遲】回遠之貌。【鹽】集傳：鹽，不堅固也。董氏道曰，說文：煮海爲鹽，煮池爲鹽。鹽苦而易敗，故傳以不堅訓之。【嘒嘒】衆盛之貌。【駘】白馬黑鬣曰駘。【遑】暇也。【敝】跪也。項氏安世曰：古者席地，故有跪有坐，跪卽起身，居卽坐也。【處】居也。【雞】集傳：雞，夫不也，今鷄鳴也。凡鳥之短尾者皆雞屬。羅氏中行曰：夫，方扶反。不，方浮反；又如字。爾雅：作「鳩鳩」，音同。毛氏萇曰：雞，壹宿之鳥。陸氏佃曰：壹宿，壹於所宿之木。雞性慈孝慈謹。【將】養也。【杞】枸櫞，今枸杞也。【殷駸】驕也。【諗】告也。

【標韻】遲四支悲同本韻 馬二十一馬，叶滿補反。處六韻叶韻 下二十一馬，叶後五反。翺七虞父同叶韻 止四紙

杞同母二十五有，叶滿彼反。駘十二侵餘二十六疑，又音深。叶韻

### 皇皇者華 遣使臣也。

皇皇者華，于彼原隰。首章興起。駘駘征夫，每懷靡及。一章我馬維駒，六轡如濡。載馳載驅，周爰咨諏。二章我馬維駒，六轡如絲。載馳載驅，周爰咨謀。三章我馬維駒，六轡沃若。載馳載驅，周爰咨度。四章我馬維駒，六轡既均。載馳載驅，周爰咨詢。五章

右皇皇者華五章，章四句。此遣使臣之詩。上章臣知盡瘁，此故可以使也。然而使臣一人，知識有限，故又戒以「每懷靡及」之心。於是周諮博訪，乃無負職，庶可副朝廷望耳。夫天下至大，朝廷至遠，民間疾苦，何由周知？惟賴使者悉心訪察以告天子。故膺茲選者，凡修廢舉墜之在所當議，邊防水利之在所當籌，興利除害之在所當酌，遺逸耆舊之在所當詢者，莫不殷殷致意。上之德欲其宣，下之情欲其達，故不可以不重也。詩曰「咨諏」，又曰「咨謀」，曰「咨度」，曰「咨詢」者，意固各有所在，非徒叶韻而已。學者當於此等處求之，則異日之使於四方亦可專對，即授以政而無不達之誦矣。又豈徒循誦習傳爲博雅君子已哉？

【眉評】「二、三、四、五章」諏、謀、度、詢四字卽從「每懷靡及」一句生出，又須細玩，四字無一虛下，通經乃可致用也。

【集釋】「皇皇」猶煌煌也。「華」草木之華也。「原」高平曰原。「隰」下溼曰隰。「駘駘」衆多疾行之貌。

〔征夫〕使臣與其屬也。〔懷〕思也。〔如濡〕鮮澤也。〔周〕徧也。〔爰〕於也。〔譖〕聚議也。〔如絲〕朱氏公遷曰：猶言和柔也。〔謀〕計畫也。〔度〕酌量也。〔駟〕陰白雜毛曰駟。〔均〕調也。〔詢〕究問也。

【標韻】隔十四緝及同本韻 駒七虞濡、譖並同本韻 駟四支絲同謀十一尤，叶莫悲反。叶韻 駟十藥若、度並同本韻 駟十一真均、詢並同本韻

### 常棣 周公燕兄弟也

常棣之華，鄂不韡韡。興起。凡今之人，莫如兄弟。總冒一筆。○一章死喪之威，人事變。兄弟孔懷。原隰裒矣，兄弟求矣。只用變起二章思難中之兄弟。○二章脊令在原，兄弟急難。比。每有良朋，壹言、良朋。〔一〕。況也永歎。三章兄弟閱于牆，外禦其務。〔左、國〕俱作侮。每有良朋，兩言、良朋，反應上兩「兄弟」。烝也無戎。四章喪亂既平，既安且寧。雖有兄弟，不如友生。轉入亂平後之兄弟，是進一層法。○五章饋爾簋豆，飲酒之饌。兄弟既具，和樂且孺。再追想兄弟之樂。○六章妻子好合，如鼓瑟琴。兄弟既翕，和樂且湛。後以妻子作陪，與上良朋相稱。章法極變換，亦極整飭。○七章宜爾室家，樂爾妻帑。是究是圖，亶其然乎。八章

右「常棣」八章，章四句。此詩左傳「富辰謂召穆公作」，「國語」富辰又以爲周文公詩。唯韋昭云：「周



公作《常棣》之篇，以閔管、蔡而親兄弟。其後周室既衰，厲王無道，骨肉恩缺，親親禮廢，宴兄弟之樂絕。故召穆公思周德之不類，而合其宗族于成周，復作《常棣》之歌以親之。是詩爲周公作，穆公特重歌之耳。且詩云「喪亂既平」，則明是誅管、蔡後語，非周公境地則不合，斷斷不可移於他人兄弟上去。召穆公爲周族歌之，尚可曰誦先芬以戒後哲，若他兄弟歌此，豈能切乎？《小序》但謂「燕兄弟」，則大失詩旨。故《大序》又補以管、蔡事，而不言誰作者，亦非。蓋非周公親言，人亦不敢代爲言也。《集傳》云：「首章畧言至親莫如兄弟之意。次章乃以意外不測之事言之，以明兄弟之情，其切如此。三章但言急難，則淺於死喪矣。至於四章，則又以其情義之甚薄，而猶有所不能已者言之。其《序》若曰：不待死喪，然後相收，但有急難，便當相助。言又不幸而至於或有小忿，猶必共禦外侮。其所言言之者，雖若益輕以約，而其所以著夫兄弟之義者，益深且切矣。」苦夫五章，則姚氏云：「喪亂既平而安寧矣，乃雖有兄弟反不如友生，何哉？蓋此時兄弟已亡，所與周旋者唯友生而已，故爲深痛。皆反覆明其『莫如兄弟』之意。」此說較《集傳》兩氣差合，故舍彼錄此。其他六七八章，姚氏又云：「追思兄弟之宜和樂也。上以良朋陪說，此又以妻子陪說，然有不同。良朋陪說，屈之也；妻子陪說，以見一家內外之和樂也。」此亦較《集傳》差明，故更錄之。總之，良朋妻孥，未嘗無助於己，然終不若兄弟之情親而相愛也。蓋良朋妻孥皆以人合，而兄弟則以天合。以天合者，雖離而實合；以人合者，雖親而實疏。故曰：「凡今之人，莫如兄弟。」豈不益信然哉？周公深有悔於管、蔡之禍，恐兄弟情由此疏，故不厭委曲詳盡，極言異形同氣之恩以申告之，使其反覆窮究而驗其信然，不得以管、蔡故遂自損其天倫之樂，

其用心亦可謂苦矣！

【眉評】「五章」第五章有兩解：朱子以爲反言，姚氏以爲追思，皆通。然追思較反言有意，讀之令人酸鼻，是周公當日情景，故從之。須看其全詩作法。首章虛冒，次章雙題，三四章以良朋陪，後二章以妻子陪，此章是一轉筆作中間樞紐。六章乃甚言兄弟之樂，以起末二章耳。此八段古文作法也。

【集釋】「集傳」：常棣，棣也。子如櫻桃，可食。宋氏祁曰：世人多誤以常棣爲唐棣，於兄弟用之。唐棣，移也。移，開而反合者也。此兩物不相親。李氏樗曰：「何彼穠矣」，「唐棣之華」，與「論語」所舉「唐棣之華，偏其反而」，則「爾雅」所謂移也。此常棣與「采薇」詩曰「維常之華」，則「爾雅」所謂棣也。二者異木也。「鄂不韡韡」鄭氏康成曰：承華者曰鄂，不當作柎。柎，鄂足也。鄂足得華之光明，則韡韡然盛。姚氏際恒曰：鄂、萼同，花苞也。不，附同，花蒂也。「集傳」以鄂爲「鄂然」，本「毛傳」之謬。又云「不，猶豈不也」，並謬。案：姚說本鄭，而較鄭尤精當，存之。「威」畏也。「原隰哀」姚氏際恒曰：「原隰哀」，只說原隰廣野之地，不相值則兄弟必求。故下脊令亦用原字。哀，損少意。「易」云，「哀多益寡」，謂少其人，猶後世詩「遍插茱萸少一人」也。「集傳」謂「尸哀聚於原野之間」，令人可畏復可笑也。且「死喪」、「原隰」之下，各有「兄弟」字，豈可爲蒙上之詞？又不連文義矣。愚案：詩詞無尸聚字，亦無人少字。「集傳」既以意增加尸聚於其中，姚氏又以意增添人少於其內，豈得謂爲確訓？蓋原隰者，陵谷也。哀爲損少，則變遷之意。上言死喪，乃人事之變；下言原隰，乃山川之變。總以見勢當變亂，始覺兄弟情親，起下急難、外侮。故兩言兄弟，與下兩言良朋，一主一陪，兩兩相形，可謂

曲盡人情，文亦整飭有法。「脊令」雖渠，水鳥也。《爾雅》作「鵲鵲」。《禽經》脊令友悌。陸氏璣曰：大如鷓鴣，腹下白，頸下黑如連錢，杜陽人謂之連錢。陸氏佃曰：《物類相感志》曰：「俗呼雪姑，鳴則天當大雪。」況季氏本曰：況與恒同，言朋友情雖愴怳，亦但長歎而已。《闔門狼也》。《禦禁也》。《烝衆也》。《戎姚氏際恒曰：戎，兵也。言有外侮，朋雖衆，也無有兵相助矣。《憤陳也》。《飢饉也》。《具俱也》。《孺小兒之慕父母也》。《翁合也》。《帑子也》。陸氏德明曰：帑依字吐蕩反，經典通爲妻帑字，今讀音孺也。《究窮也》。《圖謀也》。《亶信也》。

【標韻】韓五尾弟八齊通韻 威五微懷九佳通韻 哀十一尤求同本韻 難十四寒歎同本韻 務作悔，七虞。戎一東闕疑 寧九青生八庚通韻 飢六御，叶於慮反。孺七遇通韻 琴十二侵湛同本韻 帑七虞平同本韻

#### 校記

「〔〕」查原作「兩」，與四章旁批重，故改。「朋」字下原有「反」字，疑衍文，故刪。

### 伐木 燕朋友、親戚、兄弟也。

伐木丁丁，鳥鳴嚶嚶。出自幽谷，遷于喬木。與。嚶其鳴矣，求其友聲。比。相彼鳥矣，猶求友聲。矧伊人矣，人本意。不求友生。朋友。神之聽之，終和且平。接得奇妙。○一章伐木許許，醴酒有藇。既有肥羜，以速諸父。親。寧適不來，微我弗願？言極宛而和。於粲灑掃，陳饋八簋。既有肥牡，以速諸舅。威。寧適不來，微我有咎？二章伐木于阪，醴酒有衍。簋豆有

踐，兄弟無遠。弟兄。民之失德，乾餱以愆。曲一筆。有酒湑我，無酒酤我。坎坎鼓我，蹲蹲舞我。極盡歡樂。迨我暇矣，飲此湑矣。三章

右伐木三章，章十二句。舊本六章，從集傳引劉氏說爲三章，以詩中有「伐木」也。此朋友通用之樂歌也。

中間兼言親戚兄弟，而諸父、諸舅與兄弟，皆言燕饗之事，唯朋友反不之及。豈篤於內者，必疏於外乎？曰，非也，蓋兄弟親戚中，皆有友道在也。朋友不離乎兄弟親戚，親戚兄弟自可以爲朋友。所貴乎朋友者，心性相投，道義相交耳。故首章統言朋友之交，當可質諸神明，始終不渝。如嚶鳴友聲，雖使神之聽之，亦終和且平。已貫下親戚兄弟在內。此下但分言燕饗，而不必更及朋友矣。其實燕饗非結以心性，要之神明，則情誼不真，燕饗亦未必能久且樂也。此友道所以爲五倫之一也。不但此也，朱氏善曰：「人之所以資乎朋友者，以明道也，以進德也。貴之而爲天子，賤之而爲庶人，尊之而爲父兄，卑之而爲子弟，親之而爲同姓，疏之而爲異姓，其分離不同，而其可友則如一。故以賤交貴而不爲諂，以貴交賤而不爲屈，以卑就尊而不爲僭，以尊就卑而不爲貶，內取之同姓而不爲昵，外取之異姓而不爲泛。道之所存，德之所存，即吾友之所存也，而何貴賤親疏之間哉。」此詩取友義也，故曰朋友通用之樂歌。或但指爲天子之詩，意未免視友道爲甚狹已而，豈詩人本意歟！

【眉評】「一章」佳句。極爲閒雅。渾成。朋友則神明可質。【二章】親戚則婉詞相招。【三章】

兄弟則鼓舞爲樂。須玩他措詞不同，各還其分處。然總歸之友朋內，故首章不言燕享，而但以神聽和平要其信誓也。

【集釋】「丁丁」伐木相應聲。「嚶嚶」兩鳥鳴也。「幽」深也。「相」去聲，視也。「矧」況也。「神聽」盟誓之意。「許許」集傳：「許許，衆人共力之聲。」淮南子曰：「舉大木者呼邪許，蓋舉衆勸力之歌也。」釀酒集傳：「釀酒者，或以筐，或以草，沛之而去其糟也。」禮所謂「縮酌用茅」是也。禮記：郊特牲：「縮酌用茅，明酌也。」鄭氏康成曰：「五齊，醴尤濁，和之以明酌，藉之以茅，縮去滓也。明酌者，事酒之上也。事酒，今之醇酒，皆新成也。」莫美貌。「矧」郭氏璞曰：「今俗呼五月羔爲矧。」速召也。「微」無也。「願」念也。「於」歎辭。「粲」鮮明也。「八簋」器之盛也。「咎」過也。姚氏際恒曰：「寧適不來，微我弗願」，謂寧得不來乎，無乃不我肯願也。「微我有咎」，謂無乃以我有咎也，自反之意，較前益深。集傳云：「謂寧使彼適有故而不來，而無使我恩意之有不至也」，迂拙之甚。案：速客當婉詞以致其誠，若集傳所云，直罵客耳，非速賓也。講學家之不善體人情也如此！「衍」多也。「踐」陳列也。「無遠」皆在也。「乾餱」食之薄者也。「愆」過也。「潛」亦醴也。「醑」買也。「坎坎」鼓聲。「蹲蹲」舞貌。

【標韻】丁九青嚶八庚通韻 谷一屋木同本韻 鳴庚聲、生、平並同本韻 許六韻莫、矧並同父七虞願七遇叶韻 埽十九咍簋四紙，叶已有反。牡二十五有男、咎並同叶韻 阪十三阮衍十六統踐同遠阮愆一先，叶起淺反。叶韻 潛六韻醑七虞鼓、舞並同潛同上通韻

### 天保 祝君福也。

天保定爾，亦孔之固。俾爾單厚，何福不除？俾爾多益，以莫不庶。一章天保定爾，俾爾戩穀。罄無不宜，受天百祿。降爾遐福，維日不足。二章天保定爾，以莫不興。如山如阜，如岡如陵，如川之方至，以莫不增。三章吉蠲爲禋，是用孝享。禴祠烝嘗，于公先王。君曰卜爾，萬壽無疆。四章神之弔矣，詒爾多福。民之質矣，日用飲食。羣黎百姓，徧爲爾德。五章如月之恒，如日之升。如南山之壽，不騫不崩。如松柏之茂，無不爾或承。六章

右《天保》六章，章六句。《序》謂「下報上也」。鄭氏《集傳》遂謂前五章皆君下臣，此章乃臣報君。殊不知五章中非盡君下臣也，且臣必待君賜而後報，則所報者亦偶，豈尚有愛君之誠哉？此不過編《詩》次第應如是耳，不可泥以說《詩》也。全詩大意，前三章皆天之福君，後三章皆神之福君。其祝頌且多複筆，亦畧無規諷意，不已近於諛乎？豈知臣之祝君，非但君也，實爲民耳。蓋君之福即民之福，君一人受天地神祇之福，即天下臣民億萬衆同享天地神祇之福，其所係不綦重歟？故詩又曰，「羣黎百姓，徧爲爾德」，是必在上有多福之君，然後在下有受福之民。特民在福中，日用飲食皆君福所庇而不自知其所以然耳。前後雖極言天神降福無所不至，其實以德徧羣黎一句爲主。夫使君德未徧，天雖有福而不降，神又豈肯受其享哉？是知君福君自致耳，非民所能祝也。臣以此頌君，臣不過盡其心所欲而已。故極其頌禱不爲諛，反覆譬喻而非夸。若後世頌中帶諷，未免有意於其間，詎得以

是爲名高歟？

【眉評】全詩以德字爲主。

【集釋】「保」安也。曹氏粹中曰：保則不危，定則不傾。「爾」指君也。歐陽氏修曰：詩人爾其君，蓋稱天以爲言。王氏質曰：人傳天辭，如「皇矣」「帝謂」也。「固」堅也。「單」盡也。「除」除舊而生新也。「庶」衆也。「猷」集傳：聞人氏曰，猷與翦同，盡也。「穀」善也。「罄」盡也。「遐」遠也。「阜岡陵」集傳：高平曰陸，大陸曰阜，大阜曰陵。皆高大之意。「川」劉氏熙曰：川，穿也，穿地而流也。蔡氏邕曰：衆流注海曰川。集傳：川之方至，言其盛長之未可量也。「吉」集傳：吉，言諫曰擇士之善。「蠲」集傳：蠲，言齊戒滌濯之潔。「饋」集傳：饋，酒食也。劉氏瑾曰：饗，禮也。有饋饗注：炊黍稷曰饋。邢氏昺曰：言饋之一字通酒食兩名也。「享」獻也。宗廟之祭，春曰祠，夏曰禴，秋曰嘗，冬曰烝。孔氏穎達曰：孫炎曰，祠之言食，祔，新菜可灼，嘗，嘗新穀，烝，進品物也。若以四時，當云「祠禴嘗烝」，詩以便文，故不依先後。此皆周禮文。自殷以上，則禴禘嘗烝，王制文也。至周公，則去夏禘之名，以春禴當之，更名春曰祠。案：詩曰：「禴祠烝嘗」，取叶韻也。「公」集傳：公，先公也。謂后稷以下至公叔祖類也。司馬氏遷曰：亞國子公叔祖類，公叔祖類子古公亶父。司馬氏貞曰：世本云：太公、組紺、諸盤、三代世表稱叔類，凡四名。「先王」集傳：先王，太王以下也。孔氏穎達曰：周之所追太王以下，其太王之前皆爲先公。「語錄」問：古無追王之禮，武王、周公以王業肇於太王、王季、文王，故追王三王。至於組紺以上，則止祀以先公之禮。朱子曰：然，周禮

祀先王以裘冕，祀先公以鷩冕，乃是天子祭先公之禮耳。〔君〕《集傳》：君，通謂先公先王也。卜，猶期也。此尸傳神意以緦主人之祠。毛氏甚曰：尸所以象神。孔氏類達曰：《少牢》云：「皇尸命工祝承致多福無疆于汝孝孫」之等，是傳神詞。緦，主人也。〔弔〕至也。〔詒〕遺也。〔實〕實也。〔恒〕弦也。陸氏德明曰：恒，本亦作緦。〔升〕出也。〔薦〕薦也。

【標韻】固七遇除六御底何通韻 穀一屋祿同足二沃通韻 興十一蒸陵、增並同本韻 享二十二養，叶虛良反。嘗七陽王、疆同叶韻 福一屋，叶筆力反。食十三職德同叶韻 升十一蒸崩、承並同本韻

### 采薇 戍役歸也。

采薇采薇，薇亦作止。前三章皆以「采薇」興起，是一格調。曰歸曰歸，歲亦莫止。靡室靡家，玁狁之故。不遑啟居，玁狁之故。一章采薇采薇，薇亦柔止。曰歸曰歸，心亦憂止。憂心烈烈，載飢載渴。我戍未定，靡使歸聘。二章采薇采薇，薇亦剛止。曰歸曰歸，歲亦陽止。王事靡盬，不遑啟處。憂心孔疚，我行不來。三章彼爾維何？維常之華。此二章調變。彼路斯何？君子之車。戎車既駕，四牡業業。豈敢定居？一月三捷。四章駕彼四牡，四牡騤騤。君子所依，小人所腓。四牡翼翼，象弭魚服。豈不日戒？玁狁孔棘。五章昔我往矣，楊柳依依。末章又一變。今我來思，雨雪霏霏。行道遲遲，載渴載飢。我心傷悲，莫知我哀。六章右《采薇》六章，章八句。《小序》、《集傳》皆以爲遣戍役而代其自言之作。唯姚氏謂戍役還歸詩也，



蓋以詩中明言「日歸日歸」及「今我來思」等語，皆既歸之詞，非方遣所能逆料者也。愚謂日歸、歲暮可以預計，而柳往雪來，斷非逆觀。使當前好景亦可代言，則景必不真；景不真，詩亦何能動人乎？此詩之佳，全在末章，真情實景，感時傷事，別有深情，非可言喻，故曰「莫知我哀」。不然，凱奏生還，樂矣，何哀之有耶？其前五章，不過追述出戍之故與在戍之形而已。蓋壯士從征，不願生還，豈念室家？曰「我戍未定，靡使歸聘」者，雖有書不暇寄也。又曰「憂心孔疚，我行不來」者，雖生離猶死別也。至於在戍，非戰不可，敢定居乎？一月三戰，必三捷耳。若其防守，尤加警戒，獫狁之難，非可忽也！今何幸而生還矣，且望鄉關未遠矣。於是乃從容回憶往時之風光，楊柳方盛，此日之景象，雨雪霏微。一轉胸而時序頓殊，故不覺觸景懷耳。詩意若此，何可以人代言耶？故以戍役歸者自作爲近是。至作詩世代，或以爲文王時，或以爲宣王時，更或謂季歷時，都不可攷。《集傳》、姚氏同駁《大序》謂文王時之非，而亦不能定其爲何王。唯李氏堪引《孟子》文王事昆夷事，謂下章西戎即昆夷，遂並此詩亦指爲文王時作。然詩言獫狁，而未及西戎。姚氏又謂文王無伐獫狁事，未知然否。大抵遣戍時世，難以臆斷。詩中情景，不啻目前，又何必強不知以爲知耶？

【眉評】「一章」首章重言事故，以見義不容辭，非上所苦。【二章】不問家事。【三章】誓無生還。

【四章】戰勝。【五章】守嚴。【六章】以上五章皆追述之詞。末乃言歸途景物，並回憶來時風光，不禁黯然神傷。絕世文情，千古常新。

【集釋】「薇」解見《章句》。【作】生出地也。【獫狁】北狄也。【柔】始生而弱也。【烈烈】憂貌。【聘】問

也。〔剛〕既成而剛也。〔陽〕十月也。今以十月爲小陽月。〔爾〕董氏道曰：「爾雅注」，「說文」皆作爾。爾，華盛貌。〔常〕常棣也。解見「常棣」。〔路〕戎車也。〔君子〕將帥也。以其乘路車而稱君子，故知謂將帥。孔氏穎達曰：得稱路者，「左傳」鄭子蟻、叔孫豹，王賜之大路，是卿車得稱路也。〔業〕壯也。〔捷〕勝也。〔騤騤〕強也。〔依〕猶乘也。〔腓〕猶芘也。董氏道曰：案字書，腓，脛臑也。〔易〕之「威」、「艮」，皆取象以著其隨物以動也。李氏樗曰：言此車乃君子所處，小人則從而動也。〔翼翼〕行列鷗張之狀。〔象弭〕「集傳」：象弭，以象骨飾弓弣也。〔魚服〕「集傳」：魚，獸名。似豬，東海有之。其皮背上斑，腹下純青，可爲弓韃矢服也。〔戒〕警也。〔棘〕急也。

【標韻】作七遇莫、故並同本韻 柔十一尤憂同本韻 烈九屑渴七曷通韻 定二十五徑聘二十四敬通韻 剛七陽陽同本韻 鹽七庚處六韻疾二十六有，叶乾力反。來十灰，叶立直反。 叶韻 華六麻車同本韻 業十七洽捷十六葉 叶韻 騤四支腓五微通韻 翼十三職服一屋，叶肅北反。棘職叶韻 依微思支霽微遲支飢同悲同哀十灰。通韻

### 出車 征夫還也。

我出我車，于彼牧矣。自天子所，謂我來矣。召彼僕夫，謂之載矣。王事多難，維其棘矣。一章我出我車，于彼郊矣。設此旂矣，建彼旄矣。彼旗旒斯，胡不旆旆？憂心悄悄，僕夫況瘁。二章王命南仲，往城于方。天子命仲之言。出車彭彭，旂旐央央。天子命我，城彼朔方。仲於是乘建旂，宣傳天子命。赫赫南仲，玁狁于襄。大將威靈，所向克捷。○三章昔我往矣，黍稷方華。

今我來思，雨雪載塗。征夫途中往來景象。王事多難，不遑啟居。豈不懷歸？畏此簡書。又生一波。○四章嘒嘒草蟲，趯趯阜螽。未見君子，憂心忡忡；既見君子，我心則降。插此一筆，乃與前後二章景物相稱。看似閒淡，其實非閒淡也。赫赫南仲，薄伐西戎。五章春日遲遲，卉木萋萋。倉庚喈喈，采繁祁祁。此真還鄉景物也。執訊獲醜，薄言還歸。赫赫南仲，玁狁于夷。六章

右「出車」六章，章八句。「序」謂「勞還率」，「集傳」因之，以爲追言其始受命出征之時而爲歌以勞之。其言似是而實非也。蓋「赫赫南仲」等語，乃下頌上，非君勞臣之詞。且君自稱「王命」，自稱「天子」，亦於語氣不合。大畧此詩作於當時征夫，後世王者採以入樂，用勞還率以酬其庸，蓋將以南仲勳業望之而已。序言未能分晰明白，「集傳」又誤以爲勞南仲而作，遂失詩人語意，是烏能辨詩之工拙也哉？此詩以伐玁狁爲主腦，西戎爲餘波，凱還爲正意，出征爲追述，征夫往來所見爲實景，室家思念爲虛懷。頭緒既多，結體易於散漫。觀其首二章，先敘出軍車旂之盛，旗旐飛揚，僕夫況瘁，已將大將征伐，聲勢赫赫寫出。驚心動魄，照人耳目！次又言王之命仲，仲之承王，愈加鄭重。義正詞嚴，聲靈百倍，早使敵人喪膽，玁狁懾服。故不煩一鏃一矢，但城朔方而邊患自除。非「赫赫南仲」上承天子威靈，下同士卒勞苦，何能收功立效之速如是哉？不但此也，方議回軍，復事西戎。故以得勝王師加諸一隅亡虜，更不待剗刃而自解矣。此尤見南仲恩威並著，謀國遠畧有非他將所能及者。然當其將還未還時，征夫往來，景物變遷，固覺可感；卽其室家撫景懷人，甯無怨思？總以王事多難，簡書迫我，故不敢顧私情而辭公義耳。迨至今而春回日煖，草長鶯飛，采繁婦子，祁祁郊外，而壯士凱還，

則執訊獲醜，獻俘天子，歸功大帥。西戎既伐，獯狁之平愈固。然非南仲之功而誰功哉？於康盛矣！此詩意也。讀者試咏其辭，豈勞之者所能言歟？至南仲時代，諸家所攷亦無確見。鄭氏以爲文王時人，因文王不爲天子，而以天子歸之殷王。姚氏已駁其迂矣。季明德及偽傳又以爲宣王時人，因常武有南仲太祖一語，然常武爲宣王之上世可知，但不知果何王耳。案史·匈奴傳云：在襄王時，又云在懿王時。漢書·人表有南中，在厲王時。匈奴傳又引出車之詩，謂宣王命將征伐獯狁，則又在宣王時。史已無據，復何證歟？唯全詩一城獯狁，一伐西戎，一歸獻俘，皆以南仲爲束筆。不唯見功歸將帥之美，而且有製局整嚴之妙。此作者匠心獨運處，故能使繁者理而散者齊也。

【眉評】「一、二章」將出征，先寫車旂僕從之盛，是一篇點兵行。「三章」王命仲言，仲傳王命，兩命互寫，鄭重之至，赫奕之至，是全詩警策處。「四章」以上了一事，此下又生一事。以事之曲折爲文之波瀾。「五章」忽從其室家一面寫其未能即歸，事愈閒而文愈曲矣。獯狁是正意，西戎乃餘波故曰「薄伐」。「六章」須看他處處帶定南仲，章法自能融成一片。末仍歸重獯狁，完密之至。

【集釋】「牧」爾雅：郊外謂之牧。蓋言可放牧也。「郊」劉氏瑾曰：都城外五十里爲近郊，百里爲遠郊。「設」陳也。「旂」龜蛇曰旂。「建」立也。「旄」注旄於旗干之首也。「旗」鳥隼曰旗。「集傳」：鳥隼龜蛇，曲禮所謂前朱雀而後玄武也。楊氏曰：師行之法，四方之星各隨其方以爲前後左右，進退有度，各司其局，則士無失伍離次矣。「旆旆」飛揚之貌。「悄悄」憂貌。「況」與悅同。「南仲」此時大將也。說見篇中。「方」指朔方也，今靈、夏等州之地。「彭彭」衆盛貌。「旂」交龍爲旂。「央央」鮮明

也。〔赫赫〕威名光顯也。〔襄〕除也。程子曰：城朔方而獯豸之難除也。〔簡書〕姚氏際恒曰：簡書，天子策命也。《毛傳》謂「戒命，鄰國有急，以簡書相召，則奔命救之」，此用《左傳》而誤也。閔元年，狄人伐邢，管敬仲言于齊侯曰：「《詩》云：『豈不懷歸，畏此簡書。』簡書，同惡相卹之謂也。請救邢以從簡書。」此第謂當時天子有此簡書，其中有「同惡」之語，非鄰國之簡書也。其後鄰國有戒命，則亦謂之簡書耳。〔執訊〕其魁首當訊問者也。〔醜〕徒衆也。〔夷〕平也。于襄者，埽除而無敵也。于夷者，蕩平而無事也。

【標韻】牧一屋來十灰，叶六直反。載十一隊棘十三職叶韻 郊三肴施四豪通韻 施九泰率四真通韻 方七陽央、方、襄並同本韻 華六麻，叶芳無反。塗七虞居六魚書同叶韻 蟲一東鍾、仲並同降三江戎東轉韻 遲四支姜八齊皆九佳祁支歸五微夷支通韻

### 杕杜 念征夫也。

有杕之杜，有睆其實。王事靡盬，繼嗣我日。日月陽止，女心傷止，征夫遄止。一章有杕之杜，其葉萋萋。王事靡盬，我心傷悲。卉木萋止，女心悲止，征夫歸止。二章陟彼北山，言采其杞。王事靡盬，憂我父母。檀車幝幝，四牡痠痠，征夫不遠。三章匪載匪來，憂心孔疚。期逝不至，而多爲恤。卜筮偕止，會言近止，征夫邇止。四章

右《杕杜》四章，章七句。《小序》謂「勞還役」。勞之而不慰其心、酬其力，乃故作此婦人思夫之詞以

媚之，天下有是酬人法乎？聖王縱曲體人情，亦不代人妻子作悲泣狀也！即使爲之，何益勞者，而謂勞者受之耶？大抵儒者說詩，非迂卽腐，而又故曲其說以文所短，則詩旨愈晦。此詩本室家思其夫歸而未卽歸之詞，故始則曰「征夫遄止」，言可以暇矣，曷爲而不歸哉？繼則曰「征夫歸止」，言計其歸期實可歸也。既又曰「征夫不遠」，言雖未歸其亦不遠矣。終則曰「征夫遄止」，言歸程甚邇，豈尚誑耶？始終望歸，而未遽歸，故作此猜疑無定之詞耳。然期望雖殷，而終以王事爲重，不敢以私情廢公義也。此詩人識見之大，詎得以尋常兒女情視之耶？

【眉評】四章落筆均望征夫之歸，而各極其變。【三章】思而不歸，則代憂其父母，且慮及車馬疲敝，深情無限。【四章】再期不至，卜筮兼詢，情切可知。蓋事愈瑣而心愈迫矣。

【集釋】「杕杜」解見「唐·杕杜」。【睨】實貌。【嗣】續也。【陽】十月也。【遄】暇也。【萋萋】盛貌。春將莫之時也。【檀車】役車也。【輶輶】敝貌。【瘠瘠】疲貌。【載】裝也。【逝】往也。【恤】憂也。【卜筮】何氏楷曰：「禮，大事先筮而後卜，小事則龜筮不相襲。今相襲俱作，以心之惶惑不定也。【會】合也。著龜之辭合一也。」

【標韻】實四質日同本韻 陽七陽傷、遄並同本韻 萋八齊悲四支姜、悲同上歸五微通韻 杞四紙母二十五有、叶滿尾反。叶韻 輶十六統瘠十四旱遠十三阮通韻 來十灰、叶立直反。疾二十五有、叶託力反。至四真恤四質通四紙叶韻

魚麗 燕嘉賓也。

魚麗于留，鱮鯢。君子有酒，旨且多。一章魚麗于留，魴鯉。君子有酒，多且旨。二章魚麗于留，鰕鯉。君子有酒，旨且有。三章物其多矣，維其嘉矣。四章物其旨矣，維其偕矣。五章物其有矣，維其時矣。六章

右《魚麗》六章。三章，章四句；三章，章二句。從古本，仍歸入《鹿鳴》之什。姚氏曰：「此王者燕饗臣工之樂歌。」《大序》謂「文武始于憂勤，終于逸樂」，贊說失理，前人已辨之。《集傳》謂「宴饗通用之樂歌」，亦非。然此詩本無義意，不過極言餽饌之多且美，故宴饗可以通用。且《燕禮》、《鄉飲酒禮》均皆用之，則亦未爲過也。唯因《儀禮》問歌《鹿鳴》三章後，卽問歌《魚麗》三章，乃移《南陔》於此，而以《魚麗》次《華黍》之後，以爲篇次當如此。然《南陔》、《白華》、《華黍》既與《鹿鳴》三詩間歌，何不並移置三詩之間，而但移此以配《由庚》者，何哉？此可見其心游移，尚無成見，徒成其妄而已。愚故仍移置《南陔》之前，以復其舊。及至用樂，自有《儀禮》次序可循，不必擅移古聖經文也。若夫餽酒備極豐美，燕賓之禮自當如是。而諸家必衍至陰陽和而物類多，禮意周而賢士就，亦屬附會謬悠之談，均覺可厭！

【眉評】重重再描一層，是畫家渲染法。

【集釋】《麗》歷也。《留》《集傳》：留以曲薄爲筍，而承梁之空者也。《鱮》揚也。陸氏佃曰：今黃鱗魚，性

浮而善飛躍，故一曰揚也。〔鰲〕蛇也。漢氏一之曰：鰲魚多種，有極大者，其皮如沙，今人以爲刀劍鞘。吹沙，小魚耳。〔鱧〕銅也。嚴氏絜曰：毛氏以鱧爲銅。〔本草〕云：「鱧，一名銅，今黑鯉魚也。」〔鰻〕鮎也。孔氏穎達曰：「釋魚有鰻、鮎。郭璞曰：『今鰻類白魚也。鮎，別名鰻。』孫炎以爲鰻鮎一魚。郭璞以鰻、鮎各爲一魚。〔有〕猶多也。」

【標韻】留二十五有酒同隔句韻 鰲六麻多五歌隔句轉韻 鱧八齊旨四紙通韻 鯉四紙有二十五有，叶羽已反。叶韻 多歌嘉麻轉韻 旨紙借九佳，叶舉里反。叶韻 有同上。時四支，叶上紙反。叶韻

以上《鹿鳴之什》凡十篇。《大序》云：「文、武以《天保》以上治內，《采芣》以下治外。」今觀之乃不盡然。《鹿鳴》以下六篇，雖多君臣燕饗之樂，而《四牡》則勸王事，《皇華》則遣使臣，何以云「治內」？《采芣》以下四章，雖多將士征戍之詩，而《秋杜》則征婦思夫，《魚麗》則王者燕賓，又胡以云「治外」？而且《常棣》乃周公之作，《采芣》未定何王之詩，文、武安能用以爲樂？即此可見《詩序》之僞，徒附會而無理也。

## 南陔之什

《南陔》以下三詩，蘇氏轍云：「此三詩皆亡其辭。古者鄉飲酒、燕禮皆用之，孔子編《詩》，蓋亦取焉。歷戰國及秦，亡之，而獨存其義。毛公傳《詩》，附之《鹿鳴之什》，遂改什首。予以爲非古，於是復爲《南陔之什》，則《小雅》皆復孔子之舊。」今從之，而以《南陔》爲什首。

南陔笙詩也，辭亡。



## 白華同上。

## 華黍同上。

右三詩序謂「有其義而亡其辭」，集傳以爲「有聲無詞」。於是諸家解者遂以亡爲無，謂本無其辭，非亡之也。蓋古亡、無字通，然「無其辭」又何以「有其義」乎？郝氏敬辨之云：「夫聖人刪詩，非刪禮也。笙歌相間自有儀禮在，何得以有聲無辭之空名寄之雅中？辭生於心，聲託於器。凡樂由心生，聲由辭生。有辭然後有聲，聲無辭不成章。若笙自爲笙，歌自爲歌，一歌間一笙，風雅頌之歌三百，即合有三百笙，奚獨南陔、白華五六篇爾？」又謂「儀禮於鹿鳴、四牡以下曰『歌』，於南陔、白華、華黍曰『笙』，曰『樂』，曰『奏』，而不言『歌』，以此爲有聲無辭之徵。今案鄉射亦儀禮也，云『奏騶虞、貍首』。而騶虞亦云『奏』。周禮有九夏，國語稱金奏肆夏、樊遏、渠。案，肆夏即時邁，樊遏爲昭夏，即執競，渠爲納夏，即思文，皆有辭而皆爲金奏，則奏亦辭也。南陔、白華之名，即九夏之類。金奏九夏有辭，笙奏南陔、白華獨無辭乎？又周禮·籥章以籥吹豳詩，即七月籥吹七月，亦猶笙吹南陔、白華、華黍也。豳有辭，而南陔以下獨無辭乎？又禮記·文王世子「明堂位祭統」，升歌清廟，下管象。象即維清也。謂管奏維清于堂。下管有辭，而笙獨無辭乎？大抵歌即樂也，未有有聲無辭之樂。集傳又云「意古經篇題之下必有譜焉，如投壺魯鼓薛鼓之節而亡

之耳。愚謂樂固有有聲無辭者，不得謂盡皆有聲即有辭也。古之樂不可知，今之樂如琴譜、滄海龍吟、天風環佩之類，均有聲而無辭，但非南陔、白華可比。環佩、龍吟何辭可譜？聲即譜，譜即樂，第能狀其形聲，即樂之佳者，故無辭也。若南陔、白華則明明有篇可名，有題可標，而獨無辭乎？故以爲義存而辭亡者近是。唯序之所謂義者，又僅就篇名以立義。夫詩篇名只取首二字，其義尚在後也。南陔、白華之謂，安知非詩人借以起興，借以譬喻，然後再入正意？烏能就此二字即可發全詩大義耶？且其所序之義又多無理。南陔曰：「孝子相戒以養也」，猶可說也。白華曰：「孝子之潔白也」，果何謂乎？無怪集傳駁之，以爲尤無理也。至華黍曰：「時和歲豐宜黍稷也」，則明是就「華黍」二字敷衍成義，又不待明者而自知其僞矣。今既明辨序、傳得失，故僅存詩目於此，而不復爲之補序云。

### 南有嘉魚 娛賓也。

南有嘉魚，烝然罩罩。君子有酒，嘉賓式燕以樂。一章南有嘉魚，烝然汕汕。君子有酒，嘉賓式燕以飴。二章南有樛木，甘瓠累之。君子有酒，嘉賓式燕綏之。三章翩翩者鵲，烝然來思。君子有酒，嘉賓式燕又思。四章

右南有嘉魚四章，章四句。此與魚麗意畧同。但彼專言餽酒之美，此兼敘賓主綢繆之情。故下二章文格一變，參用比興之法，其實無甚深意，則如一耳。蓋亦燕臣工之樂也。故可與魚麗同時

間歌，而其後又以爲燕饗通用之樂矣。

【集釋】「嘉魚」，「集傳」：嘉魚，鯉質鱗，肌肉甚美，出於沔南之丙穴。李氏樗曰：嘉魚，意以爲善魚，是魚之美者。案，左太冲《蜀都賦》：嘉魚出於丙穴，在漢中沔陽縣。嘉乃是魚名也。〔烝然〕發語聲也。〔罩〕，「集傳」：罩，簠也，編細竹以罩魚者也。〔汕〕，「集傳」：汕，櫟也，以薄汕魚也。劉氏瑾曰：櫟，「爾雅」作栗，並側交反。鄭氏康成曰：今之掠罟也。〔衍〕，樂也。唐氏汝諤曰：衍卽樂之甚也。《易》曰：「飲食衍衍。」〔離〕，解見《四牡》。〔又〕，既燕又燕也。

【標韻】罩十九效，樂同本韻。汕十六諫，衍十五輪，叶韻。曩四支，綏同本韻。來十灰，又二十六有，叶夷昔反。叶韻。

### 南山有臺 祝賓也。

南山有臺，北山有萊。樂只君子，邦君之基。樂只君子，萬壽無期。一章南山有桑，北山有楊。樂只君子，邦家之光。樂只君子，萬壽無疆。二章南山有杞，北山有李。樂只君子，民之父母。樂只君子，德音不已。三章南山有栲，北山有杻。樂只君子，遐不眉壽。樂只君子，德音是茂。四章南山有枸，北山有楸。樂只君子，遐不黃耇。樂只君子，保艾爾後。五章

右《南山有臺》五章，章六句。《小序》謂「樂得賢」，與前篇「樂與賢」無異。姚氏駁之，而以爲「此臣工頌天子之詩」，以詩中有「萬壽」、「父母」等字也。然《儀禮》：鄉飲酒及《燕禮》皆用之，則似非專頌天

子詞矣。劉氏瑾曰：「或疑賓客不足以當『萬壽』之語。愚謂此詩上下通用之樂。當時賓客容有爵齒俱尊，足當之者。蓋古人簡質，如『士冠禮』祝辭亦云『眉壽萬年』，又況古器物銘所謂『用祈萬年』，『用祈眉壽』，『萬年無疆』之類，皆爲自祝之辭。則此詩以『萬壽』祝賓，庸何傷乎？故『集傳』以爲『燕饗通用之樂』，亦不爲過。然自『魚麗』至此，三詩各有一義。『集傳』於『魚麗』曰『優賓』，於『嘉魚』曰『樂賓』，於此曰『尊賓』，頗得燕樂次序。朱氏道行曰：『徐氏曰，『魚麗』言品物之豐美，故曰優賓。『嘉魚』言懷忻之交通，故曰樂賓。『南山』頌德祝壽，而德與壽，天下之達尊也，故曰尊賓。三者備，斯燕賓之道盡矣。』然愚案：三詩未必同出一時，不過後王用以入樂，其詞義先後重輕適如其序焉云爾。

【集釋】『臺』『集傳』：臺，夫須，卽莎草也。陸氏璣曰：舊說夫須，莎草也，可爲蓑笠。或云臺草，有皮，堅細滑緻，可爲簪笠。『萊』『集傳』：萊，草名，葉香可食者也。『杞』『集傳』：杞，樹如檇，一名狗骨。『栲』『山樛』：栲，檇也。『眉壽』秀眉也。朱氏公遷曰：秀眉，眉有秀毛也，長眉秀出於其間，爲壽徵。『枸』『集傳』：枸，枳枸。樹高大似白楊，有子著枝端，大如指，長數寸，噉之甘美如飴，八月熟，亦名木蜜。『榦』『集傳』：榦，鼠梓，樹葉木理如楸，亦名苦楸。『黃』老人髮復黃也。『耇』老人面凍梨色，如浮垢也。『保』安也。『艾』養也。

【標韻】臺十灰。萊同基四支期同通韻。桑七陽楊、光、疆並同本韻。杞四紙李同母二十五有，叶滿彼反。已紙叶韻。栲十九皓，叶音口。栲二十五有壽二十六宥茂同叶韻。枸七庚榦同本韻。耇有後同本韻。

由庚 笙詩也，辭亡。

崇丘 同上。

由儀 同上。

右三詩案：儀禮·鄉飲酒及燕禮，用以配魚麗、嘉魚、南山三詩，同間入樂。每歌魚麗，則笙由庚；歌嘉魚，則笙崇丘；歌南山，則笙由儀。言一歌一吹也。與鹿鳴下三詩，配南陔三笙，同爲燕饗之樂。鹿鳴等樂既畢，則魚麗諸樂繼進。故集傳以此三詩分次魚麗各章之後，愚以其非古，仍類錄於此，以復其舊。且南陔三笙既未移置鹿鳴等篇之下，則此三笙又何必分配前詩以改觀耶？至其辭亡無義，與序義之無理，已見前說，茲不再辯。

蓼蕭 天子燕諸侯而美之也。

蓼彼蕭斯，零露漙兮。既見君子，我心寫兮。燕笑語兮，是以有譽處兮。一章蓼彼蕭斯，零露漙漙。既見君子，爲龍爲光。其德不爽，壽考不忘。二章蓼彼蕭斯，零露泥泥。既見君子，孔燕豈弟。宜兄宜弟，令德壽豈。三章蓼彼蕭斯，零露濃濃。既見君子，偉革沖沖。和鸞離離，萬福攸同。四章

右蓼蕭四章，章六句。小序云：「澤及四海也」。案，詩止言天子諸侯「笑語」、「心寫」之樂，曷云「澤

及四海？爲之解者乃引《易·比》之《象》曰：「先王以建萬國，親諸侯。」諸侯正所以比天下，以爲古《序》之旨簡而該。以是爲「簡而該」，則凡屬天子燕諸侯之詩，莫不可曰「澤及四海」矣。序詩如此，何能使人測識？有序若無序，何若無序之爲妙乎？此蓋天子燕諸侯而美之之詞耳。然美中寓戒，而因以勸導之。曰德，曰壽，有是德乃有是壽，固也。諸侯之易於失德，則尤在兄弟爭奪之間與鄰國侵伐之際。故又從令德中特言「宜兄宜弟」。夫必內有以和其親，然後外有以睦其鄰，諸侯睦而萬國寧，乃真天子福也。故更曰「萬福攸同」，是豈徒爲諸侯頌哉？古人立言各有體裁，以上頌下，當以此種爲得體。

【集釋】「蓼」長大貌。「蕭」蒿也。「潯」潯然，蕭上露貌。「君子」指諸侯也。「寫」輪寫也。「燕」謂燕飲。「譽」善聲也。蘇氏轍曰：「譽，豫通。凡詩之譽皆言樂也。郝氏敬曰：如「韓姑燕譽」之譽。」「濃濃」露貌。「龍」寵也。唐氏汝謬曰：「爲龍增寵之意，爲光輝耀之意。」「爽」差也。「泥泥」露濡貌。「孔燕」猶言盛燕也。「豈」樂也。「弟」易也。「濃濃」厚貌。「條」轡也。何氏楷曰：「從絲曰轡，從革曰條。條即轡之別名，革乃轡首之垂者。」「沖沖」垂貌。「和鸞」《集傳》：「和、鸞，皆鈴也。在軾曰和，在轡曰鸞，皆諸侯車馬之飾也。」「攸」所也。

【標韻】潯六韻寫二十一馬，叶想羽反。語、處語叶韻。濃七陽光同爽二十二養忘陽叶韻。泥八養弟、弟並同豈十賄通韻。濃二冬沖一東離冬同東通韻。

湛露 天子燕諸侯也。

湛湛露斯，匪陽不晞。厭厭夜飲，不醉無歸。一章湛湛露斯，在彼豐草。厭厭夜飲，在宗載考。二章湛湛露斯，在彼杞棘。顯允君子，莫不令德。三章其桐其椅，其實離離。豈弟君子，莫不令儀。四章

右《湛露》四章，章四句。《小序》謂「天子燕諸侯也」。案《左》文四年，衛甯武子來聘，公與之宴。爲賦《湛露》，不拜，又不答賦。使行人私焉。對曰：「臣以爲肄業及之也。昔諸侯朝正于王，王宴樂之，于是乎爲賦《湛露》，則天子當陽，諸侯用命也。」此《序》所本，故無誤也。然《傳》統言諸侯，不言同姓。鄭氏則又謂「宴同姓矣」，豈不以「在宗載考」之謂乎？姚氏曰：「宗，宗廟也。古朝、聘、享皆于廟，則燕亦廟也。《毛傳》以宗子之法解「不醉無歸」，固已疎矣；又以宗爲宗室，尤非。宗室，宗子之室也。王者亦有宗室乎？《集傳》即依《毛傳》，謂宗室；又曰「蓋路寢之屬」，益可笑。路寢，聽朝之所也。路寢其宗室耶？宗室其路寢耶？此可見在宗之詞，不必其爲同姓賦也。然夜飲至醉，易於失儀，故必不喪其威儀而後謂之禮成。其威儀之所以醉而不改乎其度者，則非有令德以將之也不可。故醉中可以觀德，尤足以知蘊蓄之有素。況天子夜宴，而曰「不醉無歸」，君恩愈寬，臣心愈謹，乃可免愆尤而昭忠敬。詎可恃寵以失儀乎？詩曰「莫不令儀」，「莫不令德」者，蓋美中寓戒耳。外雖美其德容之無不善，意實恐其德容之或有未善，則未免有負君恩而虧臣職，其所係非淺鮮也。

【集釋】《湛湛》露盛貌。《晞》乾也。《厭厭》安也，久也，足也。《夜飲》私燕也。韓氏嬰曰：飲之禮，不脫屣而卽席者謂之禮，跪而上坐者謂之宴。孔氏穎達曰：《楚茨》云「備言燕私」，傳曰：燕而盡其私恩，

明夜飲者亦君留而盡私恩之義。〔豐〕茂也。〔宗〕已見篇中。〔考〕姚氏際恒曰：載，再也。考，擊也，擊鐘也。《唐風》：「子有鼓鐘，弗鼓弗考。」再考鐘，所謂「金奏《肆夏》」也，入門、客出及燕之時皆用之。〔顯〕明也。〔允〕信也。〔離離〕猶纍纍也。

【標韻】晞五微歸同本韻 草十九皓考同本韻 棘十三義德同本韻 離四支儀同本韻

以上《南陔之什》六篇，無辭凡四篇。案《嘉魚》、《南山》與前《魚麗》三篇，同爲燕饗通用之樂。《蓼蕭》、

《湛露》，則天子燕諸侯之詩。其時代皆不可考。毛公分《魚麗》以上爲文、武詩，《嘉魚》以下爲成王詩，《集傳》已辨其非矣，茲不再論。



# 詩經原始卷之十

## 小雅二

### 彤弓之什

● 彤弓 天子錫有功諸侯也。

彤弓召兮，受言藏之。我有嘉賓，中心貺之。鐘鼓既設，一朝饗之。一章彤弓召兮，受言載之。我有嘉賓，中心喜之。鐘鼓既設，一朝右之。二章彤弓召兮，受言饗之。我有嘉賓，中心好之。鐘鼓既設，一朝醕之。三章

右《彤弓》三章，章六句。案《春秋傳》甯武子曰：「諸侯敵王所愾而獻其功，於是乎賜之彤弓一，彤矢百，旅弓矢千，以覺報宴。」故《序》與《集傳》皆謂「天子錫有功諸侯」是也。范氏曰：「先王知諸侯不可無長，故爲方伯連帥以統之。有功則錫之弓矢以正諸夏，此王室所以尊也。不然，強凌弱，大并小，天子之令有所不行。故曰彤弓廢則諸夏衰矣。」黃氏樞曰：「周平王東遷，晉文侯有功焉。王賜之以彤弓一，彤矢百。其後襄王以文公有獻楚俘之功，而命之有，亦賜之彤弓一，彤矢百。夫以周室既

衰，賞罰無章，而彤弓之賜必待有功，況盛時乎？」此彤弓之錫，先王所以維持百世而不可廢，亦不可輕以畀人者也。是詩之作，當是周初制禮時所定。其詞甚莊雅而意亦深厚。曰「一朝饗之」者，謂錫弓之日非但錫弓，且並饗之，同在一朝也。既重其典，又隆其燕，禮之甚盛者耳。而《集傳》誤解「一朝」爲速，引東萊呂氏之說，必以衰朝寵錫私恩，及後世屯膏吝賞之行，以與先王相比論。尊之適所以慢之也，烏乎可？

【集釋】「彤弓」朱弓也。孔氏穎達曰：彤，赤，故言朱弓。爲弓者皆漆之以禦霜露。色以赤者，周之尚。故賜弓赤一而黑千，以赤爲重耳。〔弨〕弛貌。孔氏穎達曰：《說文》云：「弨，弓反。」謂弛之而體反也。嚴氏粦曰：賜弓不張。〔與〕與也。〔饗〕大飲賓曰饗。孔氏穎達曰：饗者，烹太牢以飲賓。殺牲俎，豆盛於食燕。《周語》曰：「王饗有醴薦，燕有折俎，公當饗，卿當燕。」是其禮盛也。〔載〕抗之也。劉氏瑾曰：載彤弓於弓槩，抗弓體使正，言其藏之謹也。〔右〕姚氏際恒曰：右，嚴氏曰：助也。右與宥、侑通，皆助也。《左傳》言「饗醴命宥」，《注》云：「以幣物助歡也。」《秦》緇也。陸氏德明曰：秦，弓衣也。〔好〕說也。〔醴〕報也。《集傳》：飲酒之禮，主人獻賓，賓酢主人，主人又酌自飲，而遂酌以飲賓，謂之醴。醴猶厚也，勸也。

【標韻】藏七陽 貺二十三漾 饗二十養 叶韻 載十一隊 喜四紙 右二十六宥，叶於配反。 叶韻 秦四豪 好二十號 醴十一尤，叶大到反。 叶韻

菁菁者莪 樂育材也。

菁菁者莪，在彼中阿。比。既見君子，樂且有儀。一章菁菁者莪，在彼中沚。既見君子，我心則喜。二章菁菁者莪，在彼中陵。既見君子，錫我百朋。三章汎汎楊舟，載沉載浮。既見君子，我心則休。四章

右《菁菁者莪》四章，章四句。《小序》曰：「樂育材也」。朱子初說亦從其義，既謂《序》失詩意，遂改爲「燕飲賓客之詩」。然詩中亦無燕飲字。故姚氏兩駁之，而以爲「人君喜得見賢之詩，其餘則不可以臆斷」。愚謂經文雖不露育材字，而菁莪之產於美地，在彼中阿、中沚、中陵，有潤澤以養其材。故物雖微而亦成其盛，卽如人材之在學校，有教化以培植之，故質雖魯而亦成其德。卽主育材言亦奚不可？且所謂賢，又安知其不從學校中以見之耶？此種詩古來相傳既久，可以不必與之立異。唯《大序》云：「君子能長育人材，則天下喜樂之矣」，迂曲難解，則斷不可從。蓋君子卽賢者也，而乃以爲人君，則下文「樂且有儀」、「錫我百朋」二句直接不去。儀謂「享多儀」之儀，是君見賢而樂，樂則有儀以將意。若天下人得見人君，則何儀之有乎？百朋謂貝之多，是君見賢而以爲寶，不啻百朋之錫。若天下人得見人君，又何寶之是錫乎？故此詩當是君臨辟廱，見學校人材之盛，喜而作此。或卽以燕饗羣材，亦未可知。總之，不離育材者近是。

【集釋】《菁菁》盛貌。〔我〕陸氏璣曰：莪，蒿也，一名蘼蒿。生澤田漸洳之處，葉似邪蒿而細，科生。三月中，莖可生食，又可蒸，香美，味頗似蘼蒿是也。〔君子〕指賢材也。〔儀〕姚氏際恒曰：「既見君子」之下句，嚴氏謂「從來皆承見君子者言」，是「樂且有儀」，自言其既樂而且以儀將之也，猶「享多儀」之

儀。〔百朋〕姚氏際恒曰：百朋，兩貝爲朋。凡言朋是兩偶之義。鄭氏謂「五貝爲朋」，謬。《漢·食貨志》：「貝有五等，其四等皆兩貝爲朋，其一不成貝，不爲朋。」鄭必是誤以五等爲五貝耳。《集傳》漫不加考，從之，非也。前人所論者如此。〔楊舟〕楊木爲舟也。

【標韻】莪五歌阿同儀四支，叶五何反。叶韻 沚四紙喜同本韻 陵十蒸朋同本韻 浮十一尤休同本韻

## 六月 美吉甫佐命北伐有功，歸宴私第也

六月棲棲，紀侯。戎車既飭。車堅。四牡騤騤，馬強。載是常服。旂盛。獫狁孔熾，我是用急。點明北伐之故。王于出征，王親征。以匡王國。一章比物四驪，閑之維則。再寫馬，不惟力齊，而且色備，兼能調習。維此六月，既成我服。戎服。我服既成，于三十里。師行。王于出征，以佐天子。王將中軍，以吉甫爲副。○二章四牡修廣，其大有顙。三寫馬壯。薄伐獫狁，以奏膚公。有嚴有翼，共武之服。紀律軍心，慎以將事。共武之服，以定王國。非同兒戲。○三章獫狁匪茹，整居焦穫，侵鎬及方，至于涇陽。賊勢深入，無所畏忌，逼近京邑。織文鳥章，白旆央央，軍中乃整車旂。元戎十乘，以先啟行。吉甫先行出戰。○四章戎車既安，如輕如軒。車雖馳而安。四牡既佶，既佶且閑。馬雖奔而閒。薄伐獫狁，至于大原。逐北追奔，出境而止。文武吉甫，萬邦爲憲。歸功吉甫，是一篇之主。○五章吉甫燕喜，既多受祉。燕飲私第，爲獻詩之故。來歸自鎬，我行永久。飲御諸友，炰鼈膾鯉。侯

誰在矣？張仲孝友。以賁陪作收。○六章

右六章，章八句。孔氏穎達曰：「此經六章皆是北伐之事。毛意上四章說王自親行，下二章說王還之後遣吉甫行。故三章再言薄伐。上謂王伐之，下謂吉甫伐之也。鄭以爲獨遣吉甫，王不自行。王基云：『六月使吉甫，采芑命方叔，江漢命召公，唯常武宣王親自征耳。』孫毓亦以此篇王不自行，鄭說爲長。」衆論紛紜，皆未嘗一讀經文也。而小序但謂「宣王北伐也」，則尤泛，何足與論詩旨？《集傳》雖亦歸功吉甫，而《辨說》仍遵古序，直以爲此句得之，豈得爲說詩達詁？蓋事本北伐，而詩則作自私燕；王本親征，而將則佐以吉甫；戰本同臨，追奔則止命元戎。詩旨甚明，何不細詳之？曰「王于出征」者，王于是自將親征也。曰「以佐天子」者，以吉甫爲副，參佐王師也。曰「以定王國」者，將以一戰而定王國，非如灞上諸軍直同兒戲，故慎以將事也。此時王初卽位，獯豸深入，逼近京邑。非自將親征，又得元戎大將參贊其間，不足以退強虜而安王國。故兵貴先聲，理直則氣壯也。此前三章命意所在，亦文章中之蓄勢養局法耳。迨至四、五兩章，乃敘戰事。先言獯豸之猖獗無忌，次寫大將之冲鋒先行。故一戰而敵退。王乃命將追奔，直至太原而止。蓋寇退不欲窮追也。此吉甫安邊良謀，非輕敵冒進者比。故當其乘勝逐北也，車雖馳而常安，馬雖奔而恒閑，何從容而整暇哉？及其回軍止戈也，不貪功以損將，不驕武以窮兵，又何其老成持重耶？所謂有武畧者，尤須文德以濟之，非吉甫其孰當此？宜乎萬邦取以爲法也。然此皆追敘之筆，卒章乃人題位。蓋吉甫成功凱還，歸燕私第，幕府賓客，歌功頌烈，追述其事如此。故末以孝友之張仲陪筆作收，與上文武

字相應，且以見賓客之賢。是私燕作法，亦獻詩者之自占身分處。故論北伐事，宣王爲主，吉甫爲佐，而論私燕情，張仲是賓，吉甫又是主。此詩乃幕賓之頌主將，自當以吉甫作主，宣王則不過追述之而已。《小序》漫不加考，故但曰「北伐也」。且其詩中又何嘗有王還後再遣吉甫行之說？諸儒讀《詩》鹵莽如此，無怪其不能得詩意也！

【眉評】「一、二、三章」前三章皆寫車馬旂服之盛及軍行紀律之嚴，而未及戰事，是文章中展局法。

「四、五章」至此乃入戰事。寫得賊焰甚熾而迫，然後我軍出敵，一戰而勝，所謂以逸待勞也。好整

以暇，是大將身分。窮寇毋追，深得禦邊之法。「六章」結似閒而冷，其實借孝友以陪文武，求忠

臣必於孝子，是作者深意。

【集釋】六月《集傳》：六月建未之月也。漢氏一之曰：《詩》言「四月維夏，六月徂暑」，則爲夏正可知。

案：周正改建未改月，故四月仍用夏首。不然本朝詩人咏本朝事，豈可忽用夏正耶？「戎車」兵車也。

孔氏穎達曰：「春官·車僕掌戎路之倅，廣車之倅，闕車之倅，屏車之倅，輕車之倅」注云：「此五者皆

兵車，所謂五戎也。戎路，王在軍所乘。廣車，橫陣之車。闕車，所用補闕之車也。屏車，所用對敵

自蔽隱之車也。輕車，所用馳敵致師之車也。」是其等有五也。「飭」整也。「駉駉」強貌。「常服」姚

氏際恒曰：常，旂屬也。服，屬也，言常之屬也。「毛傳」謂戎服，戎服何謂之常服乎？鄭氏謂「韋弁

服」，《集傳》謂「戎事之常服」，並非。且以服爲衣服，與下章「既成我服」亦複矣。通章三服字，凡三

義。「獵狁」即獫狁，北狄也。「比物」齊其力也。「四驪」其色又齊也。「我服」戎服也。「三十里」一

咎也。古者吉行日五十里，師行日三十里。〔順〕大貌。〔膚〕大也。〔公〕功同。〔翼〕敬也。〔共〕與供同。〔服〕事也。〔匪茹〕茹，度也。言蠻貊不自度量也。〔整居〕孔氏穎達曰：整齊而處之者。言其居周之地，無所畏懼也。〔焦穫〕毛氏萇曰：焦穫，周地接於蠻貊者。〔鎬〕前漢書：劉向疏曰，吉甫之歸，周厚賜之。其詩曰：來歸自鎬，我行永久。千里之鎬，猶以爲遠。顧氏師古曰：鎬非豐鎬之鎬。〔方〕〔集傳〕方，疑卽朔方也。〔涇陽〕〔集傳〕涇水之北，在豐、鎬之西北。言其深入爲寇也。〔織〕〔輶同。〕〔鳥章〕鳥隼之章也。〔白旆〕繼旄者也。〔央央〕鮮明也。〔元戎〕舊解皆曰戎車也。案：此當作大將解，猶稱方叔爲元老之稱也。〔先啟行〕啟，開也。行，道也。前鋒先開道而行也。〔如輕如軒〕言車之安適，前後視之，皆如軒輕也。〔佶〕壯健也。〔大原〕地名。〔吉甫〕卽尹吉甫，此時大將以佐宣王者。〔憲〕法也。〔祉〕福也。〔御〕進也。〔侯〕維也。〔張仲〕吉甫之友也。

【標韻】飭十三職服一屋急十四錫國職叶韻 則職服屋叶韻 里四紙子同本韻 願二冬公一東通韻 服、國見上叶韻 茹六語穫同本韻 方七陽陽、章、央、行並同本韻 軒十三元閑十五刪原元憲十四願叶韻 祉紙久二十有五有鯉紙友有叶韻

## 采芑 南人美方叔威服蠻荆也。

薄言采芑，于彼新田，于此菑畝。從開地旁觀興起。方叔涖止，入題。其車三千，師干之試。軍雖衆而有制。方叔率止，乘其四騏，馬。四騏翼翼。路車有奭，車。簟第魚服，車。鉤膺鞶革。

馬○一章薄言采芑，于彼新田，于此中鄉。方叔涖止，其車三千，旂旐央央。旗。方叔率止，約軼錯衡，車。八鸞瑯瑯。馬。服其命服，朱芾斯皇，服。有瑳葱珩。佩。○二章駛彼飛隼，其飛戾天，亦集爰止。又一興法。方叔涖止，其車三千，師干之試。方叔率止，鉦人伐鼓，金鼓。陳師鞠旅。顯允方叔，伐鼓淵淵，進。振旅闐闐。三章蠢爾蠻荆，大邦爲讎。方叔元老，克壯其猶。方叔率止，執訊獲醜。生擒。戎車嘽嘽，嘽嘽焞焞，如霆如雷。顯允方叔，征伐玁狁，蠻荆來威。墊一筆，畏服。○四章

右采芑四章，章十二句。凡作詩必先立題，題立不佳，則詩必不佳。閱詩亦必須審題，題審不真，則更不能識人詩之所以佳。如前章六月一詩，誰不知其爲宣王北伐？此詩誰又不知其爲宣王南征？然同一征伐也，而詩則有作於出師之始，或作於班師之後，或天子勞之而賜以詩，或僚庶頌之而獻以句，且有局外旁觀，發爲咏歌以紀其事。後世采詩者，則不問誰作，第擇其工而且切者錄之，以補一代國史所不及，所謂詩史也。前六月既爲吉甫幕賓所呈獻，此詩之作又將出於誰手與作於何時，豈無所別歟？觀其全詩，題既鄭重，詞亦宏麗。如許大篇文字，而發端乃以采芑起興，何能相稱？蓋此詩非當局人作，且非王朝人語，乃南方詩人從旁得觀方叔軍容之盛，知其克成大功，歌以誌喜。如杜甫觀安西兵過及聞官軍收河南河北諸詩。故先從己身所居之地興起。及入題，乃曰「方叔涖止」。以下卽極力描寫軍容之盛，紀律之嚴，早已爲攝服蠻荆張本。且其人亦非荆人，必詩



人之流寓蠻荆者。不然，荆人何以自謂「蠢爾蠻荆」耶？蓋其人雖流寓荆楚，素必熟稔荆楚情形，知其不臣已久，而又不能力請王師以討之。一旦得覩大將軍威，元老雄畧，不覺深幸南人之得覩天日，而已身亦與有餘慶焉。故末一章振筆揮灑，詞色俱厲，有泰山壓卵之勢，又何患其不速奏膚功也耶？若《序》但謂「宣王南征」，固已寬泛不切詩意，即《集傳》云「王命方叔南征，軍行采芑而食，故賦其事以起興」，亦非語氣。夫以赫赫王師，何至采芑而食，有如飢軍困卒之所爲，而乃以此起興乎？且「方叔涖止」一語，「涖」之云者，人自他方來臨吾土之謂，非我從本國適彼殊方之言，故知其爲南人作也。但姓氏無攷，故不能確指其爲誰耳。總之，南征北伐，皆宣王中興事。即《江漢》、《常武》亦宣王武功詩。而獫狁及徐夷必加親征者，一患除肘腋，一威宣遠夷也。若《江漢》及此篇，則但命將出征可矣。其詩共四篇，一入《大雅》，二載《小雅》。入《大雅》者，朝廷紀功之作；載《小雅》者，草野歌頌之章。讀者試涵泳而諷誦之，不惟可以辨大、小《雅》之分，即此篇之爲南人作也，亦斷斷乎無疑義矣！

【眉評】前三章皆言車馬、旂幟、佩服之盛，而進退有節，秋毫無犯，禽鳥不驚，是王者師行氣象。然非大帥統率有方，何能如是嚴肅乎？故每章皆言「方叔率止」，以見節制之嚴耳。末乃大聲疾呼，如雷震蟄，喚醒蠻荆敢抗王師。再以獫狁之事攝之，故不覺其畏威而來服也。全篇前路開闢，後乃警策動人。然制勝全在先爲不可勝以待敵之可勝，故不戰而已屈人之師。文之局陣如之。

【集釋】「芑」，《集傳》：「芑，苦菜也。青白色，摘其葉有白汁出，脆可生食，亦可蒸爲茹。即今苦蕒菜，宜馬

食。軍行采之，人馬皆可食也。〔舊畝〕田一歲曰舊，二歲曰新田，三歲曰畬。〔釋地〕文。舊者，災也。畬，和柔之意。〔方叔〕宣王卿士，受命爲將者也。〔泄〕臨也。〔師〕衆也。〔干〕扞也。〔試〕肄習也。言衆且練也。〔率〕總率之也。〔翼翼〕順序貌。〔路車〕戎車也。〔奭〕赤貌。〔簟第〕車蔽也。〔鉤膺〕〔集傳〕：鉤膺，馬婁頤，有鉤而在膺，有樊有纓也。樊，馬大帶，纓，鞅也。〔條革〕見〔蓼蕭〕篇。〔中鄉〕民居。〔約軼〕孔氏穎達曰：〔說文〕云：軼，長轂也，朱而約之。謂以皮纏之而上加以朱漆也。〔衡〕衡有文飾也。〔命服〕天子所命之服也。〔朱芾〕黃朱之芾也。〔皇〕猶煌煌也。〔瑱〕玉聲。〔蔥〕蒼色如蔥。〔珩〕佩首橫玉也。〔聿〕鵠屬。〔戾〕至也。〔爰〕於也。〔鉦〕鑄也。〔人〕擊鉦人也。〔伐鼓〕鉦鼓各有人，而言〔鉦人〕、〔伐鼓〕，互文耳。〔鞠〕告也。〔師〕二千五百人爲師。〔旅〕五百人爲旅。〔淵淵〕鼓聲。〔振旅〕〔春秋傳〕曰：出曰治兵，入曰振旅。〔闐闐〕亦鼓聲。〔元〕大也。〔猶〕謀也。〔嘽嘽〕衆也。〔焯焯〕盛也。

【標韻】芭四紙畝二十五有，叶每彼反。叶韻 止紙試翼十三職叶韻 爽十一陌革同本韻 鄉七陽央、瑱並同珩八庚轉韻 聿十一移，叶息九反。止紙叶韻 止、試見上鼓七虞旅六語通韻 淵一先闐同本韻 讎十一尤猶同醜二十五有，叶尺由反。叶韻 雷十灰威五微通韻

### 車攻 宣王復會諸侯於東都也。

我車既攻，我馬既同。四牡龐龐，駕言徂東。一章田車既好，四牡孔阜。東有甫草，駕言行

狩。二章之子于苗，選徒鷩鷩。建旄設旆，搏獸于敖。三章駕彼四牡，四牡奕奕。赤芾金鳥，會同有繹。四章決拾既飲，弓矢既調，射夫既同，助我舉柴。五章四黃既駕，兩驂不猗。不失其馳，舍矢如破。六章蕭蕭馬鳴，悠悠旆旌。神到之筆。徒御不驚，大庖不盈。七章之子于征，有聞無聲。允矣君子，展也大成！八章

右《車攻》八章，章四句。《小序》云：「宣王復古也」，語雖渾，頗得其要。《大序》復益之曰：「宣王內修政事，外攘夷狄，復文武之境土，修車馬，備器械，復會諸侯於東都。因田獵而選車徒焉。」數語反嫌其贅而無當於義，何也？蓋此舉重在會諸侯，而不重在事田獵。不過藉田獵以會諸侯，修復先王舊典耳。昔周公相成王，營洛邑爲東都以朝諸侯。周室既衰，久廢其禮。迨宣王始舉行古制，非假狩獵不足懾服列邦。故詩前後雖言獵事，其實歸重「會同有繹」及「展也大成」二句。其餘車徒之盛，射御之能，固是當時美觀，抑亦詩中麗藻，其所係不在此也。而諸儒說《詩》，專從此等處以求詩義，豈能得其要哉？至《集傳》欲併八章爲四，意謂首二章通言車馬盛備，將往東都圃田之地。三、四章通言天子諸侯來會東都之事故。五、六通言田獵射御。七、八通言始終整肅。合而爲四也。似此分章，非惟難得事勢輕重，且並不辨文章疏密。蓋首章東行，是一篇之冒。次三乃言所至之地，曰甫，圃田也；曰敖，敖山也，皆所期會獵處也。四章諸侯來會。五、六始獵。七收軍。八則回蹕禮成。此事之始終即詩之次序，故非八章不足以盡文局之變耳。然既曰會諸侯於東都，何不會之於洛邑，而乃會之於敖甫之間？且諸侯朝於天子，當先期以至其地，何乃後期始來？此予所謂非假狩獵不足以

懾服列邦者也。蓋東都之朝，不行久矣，至宣王始行之，而謂列辟能帖然服乎？迨至來會，得觀車徒之盛，紀律之嚴，射御之巧，頒賜之公，不覺心悅誠服，始懽聲鼓舞而爲舉樂之助。曰「展也大成」，喜之，亦幸之也。中興之業，豈易建哉？

【眉評】「一章」首章泛言東行。「二章」東至圃田。「三章」屯於敖山。「四章」諸侯來會，是全詩

主腦。「五、六章」二章皆言獵事，極力描寫射御之善，而獲禽之多，不言自見。「七章」馬鳴「二

語寫出大營嚴肅氣象，是獵後光景。杜詩「落日照大旗，馬鳴風蕭蕭」本此。「八章」贊美作結，仍

帶定軍行嚴肅，乃是王者之師。

【集釋】「攻」堅也。「同」《集傳》：同，齊也。《傳》曰：宗廟齊肅，尚純也。戎事齊力，尚強也。田獵齊足，尚疾也。「龐龐」充實也。「阜」盛大也。「甫草」姚氏際恒曰：甫草，《毛傳》謂「大芟草以爲防」，則有字無着落，非也。鄭氏謂「甫草，甫田之草也。鄭有圃田」。案，甫、圃同，鄭說是。田必芟草爲防，故有取于田之草也。《集傳》直以甫草爲圃田，謬。「之子」有司也。孔氏穎達曰：之子，謂凡從王者，非獨司馬官屬也。朱子曰：不敢斥王，故以有司言之。「苗」狩獵之通名也。張子曰：蒐苗獮狩，便習軍行草木間事，教茆舍亦然。黃氏一正曰：《大司馬》：「夏教茆舍，遂以苗田」。義取其害苗者，故獵可通名苗。「選」數也。「翼翼」聲衆盛也。「敖」呂氏祖謙曰：敖，山名。晉師救鄭在敖、郕之間，士季設七覆於敖前，則敖山之下，平曠可以屯兵，翳蒼可以設伏也。「奕奕」連絡布散之貌。「赤芾」諸侯之服。王氏安石曰：諸侯蒞其臣庶，則朱芾，君道也；會同於王，則赤芾，臣道也。「金鳥」連腰也，加金爲

飾。〔會〕時見曰會，無常期也。〔同〕殷見曰同。殷，衆也。〔鐸〕陳列聯屬之貌。〔決〕以象骨爲之，著於右手大指，所以鈎弦開弓體也。〔拾〕以皮爲之，著於左臂以遂弦。〔攸〕比也。鄭氏康成曰：謂手指相次比也。〔調〕謂弓矢強弱相調也。〔射夫〕指諸侯來會者。〔同〕協也。〔柴〕《集傳》：柴，《說文》作棼，謂積禽也。使諸侯之人助而舉之，言獲多也。姚氏際恒曰：毛、鄭訓棼爲積，以爲「舉積禽」。案下章方言獵事，此不應遽言積禽，亦非。何玄子謂「即《毛傳》『大芟草以爲防，褐繡旂以爲門』之意。防限之設必有門，故用柴」，未知然否。案：二說當以《說文》爲長。助我舉柴，言其齊力同樂也。若柴門之設乃有司事，豈有以諸侯之人同舉柴門乎？吾不知其柴門之設有幾許也！至謂下章方言獵事，此章不應舉積，則此章獨非獵事乎？〔猗〕偏倚不正也。〔馳〕馳驅之法也。劉氏瑾曰：五御之目，三曰過君表，五曰逐禽左，即御田車馳驅之法也。〔舍矢如破〕《集傳》：巧而力也。蘇氏曰：不善射御者，詭遇則獲，不然不能也。今御者不失其馳驅之法，而射者舍矢如破，則可謂善射御矣。〔大庖〕《集傳》：大庖，君庖也。不盈，言取之有度，不極欲也。蓋古者田獵獲禽，面傷不獻，踐毛不獻，不成禽不獻。擇取三等。自左膘而射之，達於右腓爲上殺，以爲乾豆，奉宗廟。達右耳本者次之，以爲賓客。射左髀達於右髀爲下殺，以充君庖。每禽取三十焉，每等得十，其餘以與士大夫習射於澤宮，中者取之。是以獲雖多而君庖不盈也。張子曰：饌雖多而無餘者，均及於衆而有法耳。凡事有法，則何患乎不均也？舊說，不驚，驚也。不盈，盈也。亦通。案：不驚不盈，以正說爲是。〔允〕信也。〔展〕誠也。

【標韻】同一東東同本韻 阜二十五有狩二十六省叶韻 豳四章敖同本韻 奕十一陌繹同本韻 調二蕭柴九佳。姚氏曰：「柴，今佳韻。調，今之蕭韻。皆無人聲，故爲通韻。」《說文》以樂作學，與首句依協。意以二句調與三句同協也。不知東、蕭韻不相通，故以樂作學，未然。」案：學人四實，亦與二蕭不叶，故此韻終難解。未詳 猗四支，叶於簡反。破二十一箇叶韻 旌八庚盈同本韻 聲庚成同本韻

### 吉日 美宣王田獵也。

吉日維戊，既伯既禱。田車既好，四牡孔阜。升彼大阜，從其羣醜。一章吉日庚午，既差我馬。獸之所同，麀鹿麀麀。漆沮之從，天子之所。二章瞻彼中原，其祁孔有。儻儻俟俟，或羣或友。悉率左右，以燕天子。三章既張我弓，既挾我矢。發彼小豝，殪此大兕。以御賓客，且以酌醴。四章

右《吉日》四章，章六句。此宣王獵於西都之詩，不過畿內歲時舉行之典，與《車攻》之復古制大不相侔。而《序》亦以爲「美宣王」，何也？呂氏曰：「蒐狩之禮可以見王賦之復焉，可以見軍實之盛焉，可以見師律之嚴焉，可以見上下之情焉，可以見綜理之周焉。欲明文武之功業者，此亦足以觀矣。」故雖歲時常典，宣王能修復之，亦與東都會獵爲中興盛事。詩人能不相因而並美乎？姚氏云：「舊傳岐陽石鼓爲宣王獵碣，或卽此時也。詩中漆沮正近岐陽。」其實非也。《禹貢》謂導渭自鳥鼠同穴，東會于涇，又東過漆沮，卽今洛河。其源自延、鄜流入同州，在涇水之東北。岐陽在涇水西南，相離遠甚。此

當獵於延、鄜之間，與岐陽獵碣別是一事，正不必強爲附會也。

【集釋】「戊」剛日也。黃氏一正曰：外事以剛日，內事以柔日。內事如郊社、宗廟、冠昏；外事如巡狩、朝聘、盟會、治兵，凡出郊皆是也。「伯」《集傳》：伯，馬祖也，謂天駟房星之神也。案：既伯既禱者，既祭伯而又禱之也。「醜」衆也，謂禽獸之羣衆也。「庚午」亦剛日也。「差」擇也。「同」聚也。「應」鹿牝曰應。「麇」衆也。「漆沮」《集傳》：漆沮，水名，在西都畿內，涇、渭之北，所謂洛水。今自鹽、韋流入鄜、坊，至同州入河也。案：《皇輿表》，鄜即今鄜州，坊即今鄜州中部縣，同州即今同州府，並隸陝西省。「祁」大也。「儻儻俟俟」嚴氏彙曰：儻儻而疾走，俟俟若相待。「羣」三曰羣。「友」二曰友。「燕」樂也。「發」發矢也。「豷」豕牝曰豷。「殪」一矢而死曰殪。「兕」野牛也。「醴」酒名，今甜酒也。

【標韻】「禱」十九略好同本韻 阜二十五有醜同本韻 馬二十一馬麇七麇所六語叶韻 有二十五有友同子四紙叶韻

矢紙兕同醴八齊通韻

### 鴻雁 使者承命安集流民也。

鴻雁于飛，肅肅其羽。比。之子于征，劬勞于野。爰及矜人，哀此鰥寡。一章鴻雁于飛，集于中澤。之子于垣，百堵皆作。雖則劬勞，其究安宅。二章鴻雁于飛，哀鳴嗷嗷。維此哲人，謂我劬勞。維彼愚人，謂我宣驕。三章

右《鴻雁》三章，章六句。《序》謂「美宣王」能安集離散，是已。而是詩之作，出自何人，持論不一。自

來諸家皆本《序》說，指「之子」爲使臣。唯《集傳》以「之子」指流民，謂此詩爲流民所作。姚氏駁之云：「哀此鰥寡」，此者，上之人指民而言，未有自以爲此者也。」其意亦以「之子」爲使臣。則篇中三「劬勞」皆屬使臣言，而末章「謂我劬勞」，乃代使臣之詞。是以此詩爲詩人所作而已。夫詩人雖能代人言，不能代人難言之言，雖能代人難言之言，必不能代人所不及料之言。哲人之言如此其哲，愚人之言又若彼其愚，則豈人所及料哉？而謂詩人能代之言哉？大抵使者承命安民，費盡辛苦，民不能知，頗有煩言，感而作此。蓋小民雖遭散離，而可與圖終，難與慮始之見，則千古一轍，牢不可破。非親歷人不能道其甘苦也。詩首章乃承命四出，未必僅止一人，故曰「之子于征」者，使臣自相謂也。「劬勞于野」，則尚無定所。但覺滿目瘡痍，莫非可矜之人，而就中鰥寡尤爲可哀，則不能不急爲安撫，或施饋粥，暫圖生存。故以鴻飛肅肅無依爲比。繼乃擇地安置，代爲興築，不日而百堵皆興，有所庇矣。此時民漸來歸，不啻如鴻之集在彼中澤也，雖曰劬勞，究屬安宅。蓋民之安，即使臣之安也，敢辭勞哉？乃衆口替替，哀鳴不已。故又稍爲整頓而編聯之，爲長久計，則議論紛起，毀譽交集。其間愚知固自不等，有能見理明而相諒者，則以爲我之爲民，誠劬勞矣。其或愚而無知，則且謂我多事，徒逞能也。我其奈之何哉？此詩意也。若《集傳》所云：「知者聞我歌，知其出於劬勞；不知者謂我閒暇而宣驕也。」吾不知此時之民尚何閒暇而宣歌也。且詩言「哀鳴」，而釋者乃云「閒歌」，非惟與詩不類，事亦並出情理之外矣。其可乎哉？



【集釋】「鴻雁」水鳥名，大曰鴻，小曰雁。「肅肅」羽聲。「之子」使臣自相謂也。「征」行也。「劬勞」勞瘁也。「矜」憐也。「鰥寡」老而無妻曰鰥，老而無夫曰寡。「堵」一丈爲板，五丈爲堵。「究」終也。「哲」知也。「宣」示也。

【標韻】羽七麌野二十一馬寡同叶韻 澤十一陌作十藥宅陌叶韻 啓四豪勞同驕二蕭通韻

### 庭燎 勤視朝也。

夜如何其？夜未央。庭燎之光。君子至止，鸞聲將將。一章夜如何其？夜未艾。庭燎晰晰。君子至止，鸞聲噦噦。二章夜如何其？夜鄉晨。庭燎有輝。君子至止，言觀其旂。

三章

右《庭燎》三章，章五句。此與《齊風·鸛鳴》篇同一勤於早朝之詩。然彼是士大夫妻警其夫以趨朝，此乃王者自警急於視朝。故詞氣雍容和緩，大相逕庭也。但不知其爲何王所作耳。然詩既敘於此，考之宣王前後，幽、厲皆無道主，豈尚有勤於視朝事哉？又況《列女傳》云：「宣王嘗晏起，姜后脫簪珥待罪於永巷。宣王感悟，於是勤於政事，早朝晏退，卒成中興之名。」以此證之，卽以爲宣王詩也，亦奚不宜？唯序既以爲「美宣王」也，又以爲「箴之」。詩無箴意，胡云箴耶？程伊川及嚴垣叔更謂「規宣王之過勤」，則尤可哂，誠有如姚氏所語云。

【眉評】「一章」起得超妙。

【集釋】「其」語辭。「央」中也。「庭燎」《集傳》：庭燎，大燭也。諸侯將朝，則司烜以物百枚并而束之，設於門內也。「艾」盡也。「晰晰」小明也。「鄉晨」近曉也。

【標韻】央七陽光、將同本韻 艾九泰晰八齊職泰通韻 晨十一真輝五微旂同叶韻

### 沔水 未詳。

沔彼流水，朝宗于海。駛彼飛隼，載飛載止。嗟我兄弟，邦人諸友，莫肯念亂，誰無父母？一章沔彼流水，其流湯湯。駛彼飛隼，載飛載揚。念彼不蹟，載起載行。心之憂矣，不可弭忘。二章駛彼飛隼，率彼中陵。民之訛言，寧莫之懲。我友敬矣，讒言其興？三章

右《沔水》三章：二章，章八句，一章六句。《集傳》疑當作三章，章八句，本章脫前兩句耳。《小序》謂「規宣王」。

《集傳》謂「憂亂之詩」。案：宣王初政，多亂定歸來之詩，後皆美詞，無所謂憂亂也。其朝周、召二公輔政，幾復成、康之舊，何讒之有？然詩前云「念亂」，後言「讒興」，分明亂世多讒，賢臣遭禍景象，而豈宣王世乎？此詩必有所指，特錯簡耳。況卒章亦脫二句，則此中不能無誤也。不然，其詩詞意與宣王前後諸詩大不相類，故難詮釋，姑闕之以俟識者。

【集釋】「沔」水流滿也。「不蹟」《集傳》：不循道也。胡氏紹曾曰：蹟者，行道之跡，故不蹟爲不循道。《載起載行》「不遑寧處也」。「弭」止也。「率」循也。「訛」僞也。「懲」止也。

【標韻】海十脂止四紙通韻 友二十五有母同本韻 湯七陽揚、行、忘並同本韻 陵十蒸懲、興並同本韻

## 鶴鳴 諷宣王求賢山林也。

鶴鳴于九臯，聲聞于野。魚潛于淵，或在於渚。樂彼之園，爰有樹檀，其下維蕣。此中有人，呼之欲出。他山之石，可以爲錯。一章鶴鳴于九臯，聲聞于天。魚在於渚，或潛在淵。樂彼之園，爰有樹檀，其下維穀。他山之石，可以攻玉。詩有起趣。○二章

右《鶴鳴》二章，章九句。此一篇好招隱詩也，奈被諸儒讀壞！蓋以理語解詩，已覺腐氣難堪；而又分疏而實按之，則尤滯而不靈。姚氏謂爲「說《詩》之魔」，豈過當歟？唯鄭氏謂「教宣王求賢人之未仕者」，差爲得之。然「教」字仍本《小序》「誨」字意，亦非。夫詩人之於宣王，何教之而何誨之耶？蓋諷之以求賢士之隱於山林者耳。詩人平居，必有一賢人在其意中，不肯明薦朝廷，故第即所居之園實賦其景。使王讀之，覺其中禽魚之飛躍，樹木之蔥蒨，水石之明瑟，在在可以自樂。即園中人令聞之清遠，出處之高超，德誼之粹然，亦一一可以並見。則即景以思其人，因人而慕其景，不必更言其賢，而賢已躍然紙上矣。其詞意在若隱若現，不即不離之間，並非有意安排，所以爲佳。若如姚氏云通篇作譬喻看，章法雖奇，詩味反索然也。此雅詩之近乎風者，以其園景皆實賦，故人雅體。倘以爲比也，豈非風乎？

【眉評】「一章」園字是全詩眼目，前後景物皆園中所有。【二章】名句。（鶴鳴……于天。）

【集釋】「鶴」鳥名，禽品中之最高貴者。其鳴高亮，聞八九里。陸氏璣曰：鶴常夜半鳴。《淮南子》：「雞

知將旦，鶴知夜半。」〔皋〕韓氏嬰曰：九皋，九折之澤。〔蘄〕落也。〔錯〕礪石也。〔穀〕陸氏德明曰：「說文」云：「穀從木，非從禾也。」陸氏璣曰：穀，幽州人謂之穀桑，或曰楮桑。荆、揚、交、廣謂之穀，中州人謂之楮。殷中宗時桑穀共生是也。今江南人績其皮以爲布，又擣以爲紙，謂之穀皮紙。〔攻〕錯也。

【標韻】野二十一馬渚六語叶韻 園十三元檀十四寒通韻 蕓十葉錯同本韻 天一先淵同本韻 園、檀同上通韻

穀一屋玉二沃通韻

以上《形弓之什》凡十篇。案：是什詩雖十篇，其一未詳。舊說謂《鹿鳴》以下至《菁莪》，凡十八篇，爲正小

雅；《六月》後皆變小雅也。不知其何取義？若以世變論，常棣、鵲兄弟之變，《采薇》、《出車》乃咏征戍之苦，《杕杜》則更思婦之念征夫也，何以同列正雅之中？《六月》至《無羊》皆宣王中興事。除《河水》一詩未詳外，其餘諸作，無非頌揚勳烈，以紀一時之盛，何以悉名變雅？大抵古序論詩，皆畧得梗概，未暇悉心詳求，故故後人之疑耳。以愚所論，自《鹿鳴》至此，可讀者二十三篇：《鹿鳴》、《四牡》、《皇華》、《伐木》、《天保》、《魚麗》、《嘉魚》、《南山》、《蓼蕭》、《湛露》、《形弓》、《菁莪》，固是雅之正；即《吉日》、《庭燎》，亦小雅之正。以其詞氣和平，格調亦整飭也。《六月》、《采芣》、《車攻》、《鴻雁》、《鶴鳴》，固是雅之變；即《常棣》、《采芣》、《出車》、《杕杜》，亦小雅之變。不唯其時勢多故，即詩筆亦多變幻也。而《鶴鳴》一詩，尤爲創格，是變而愈變矣。蓋正雅中未嘗無變，而變雅中亦未嘗無正，不可以一概論也。以此例觀，餘可類推。然其義猶有不盡於是者，讀者隨時諷咏，以察其變焉可耳。

## 祈父之什

## 祈父 禁旅責司馬徵調失常也。

祈父，予王之爪牙。胡轉予于恤，靡所止居？一章祈父，予王之爪士。胡轉予于恤，靡所底止？二章祈父，曷不聰。胡轉予于恤，有母之尸饗？三章

右「祈父」三章，章四句。此禁旅責司馬徵調失常之詩。諸家皆無異言，唯毛、鄭以千畝之敗實之，而「集傳」又謂軍士怨於久役，故呼祈父而告之，是主久戍言也。案成周兵制，籍鄉遠之衆以作六軍，而邱甸之民亦出車乘、甲士、步卒，然其爲數少，故統言之則六軍之士出自六鄉也。至虎賁、司右、簡勇士屬焉，以左右王。鄭康成所謂征行之士，例不取王之爪牙之士也。此次千畝之役，嚴華谷云：「宣王料民大原，人不足用，乃出禁衛以從征。」是禁旅原不出征，偶一用之，尚且致怨，況久戍乎？且自古兵政，亦無有以禁衛戍邊方者。故當以箋、疏爲長。何玄子又云：「千畝之戰，諸侯之師皆無恙，而王師受其敗，則以勤王不力故耳，故恨責之。此祈父必侯國之祈父，故其人自稱爲王之爪牙。若對王朝之大司馬，則無此文矣。」姚氏以爲「議論細而是」，然非「轉予」口氣，故亦未爲確也。且末云「有母之尸饗」，明明是不應征調而征調之謂矣，尚何紛紛強辯，以爲責侯國之祈父耶？獨是宣王中興，周室復振幾四十年。至是，始以諸侯勤王不力之故，而致王師敗績，朝綱再墜，則怨而責之者，不亦宜乎？然非詩人本意也。故事從舊說爲是。

【集釋】「祈父」，「集傳」：「祁父，司馬也。職掌封圻之兵甲，故以爲號。」酒誥曰：「圻父薄違」，是也。孔氏

穎達曰：古者祈、圻、畿同字，得通用。故此作祈，《尚書》作圻也。〔予〕司右、虎賁之屬自謂也。〔爪牙〕孔氏穎達曰：鳥用爪，獸用牙，以防衛己身。此人自謂「王之爪牙」，以鳥獸爲喻也。〔恤〕憂也。〔底〕至也。〔寧〕誠也。〔尸〕主也。〔饗〕熟食也。言不得奉母，反使母主饗殮之事也。

【標韻】牙六麻，叶五乎切。居六魚叶韻。士四紙止同本韻。聽一東養二冬通韻。

### 白駒 放隱士還山也。

皎皎白駒，食我場苗。繫之維之，以永今朝。所謂伊人，於焉逍遙。一章皎皎白駒，食我場藿。繫之維之，以永今夕。所謂伊人，於焉嘉客。二章皎皎白駒，賁然來思。爾公爾侯，逸豫無期。慎爾優游，勉爾遁思。三章皎皎白駒，在彼空谷。生芻一束，其人如玉。毋金玉爾音，而有遐心！四章

右《白駒》四章，章六句。此王者欲留賢士不得，因放歸山林而賜以詩也。其好賢之心可謂切，而留賢之意可謂殷，奈士各有志，難以相強。何哉？觀其初則欲繫白駒以永朝夕，繼則更欲縻以好爵，而不暇計賢者之心不在是也。終則知其不可留，而惟冀其毋相絕，時惠我以好音耳。詩之纏綿亦云至矣。而《序》乃以爲「刺宣王」，毛、鄭之徒遂仍《序》意，謂宣王之末不能用賢，賢者有乘白駒而去者。朱子初年亦本其說，《集傳》雖不實指宣王，而立說仍未能離去《箋》、《疏》也。試思宣王不能用賢，何以眷眷於賢若是哉？其時中興初定，安知宣王不有貧賤至交不肯出仕王朝，如嚴光之於漢光武，李

泌之於唐肅宗，獨行其志以爲高者。此詩之作，正光武所謂「咄咄子陵，不能相助爲理耶？」與肅宗所謂「朕非敢相臣，以濟艱難耳，今方同樂，奈何遽去」之意。特無實證，難指其人。若循文案義，則如是也。姚氏又謂「或必欲以爲刺王，則謂大夫欲留之，以見王之不能留，庶可耳。」然則「爾公爾侯」之咏，又豈臣下所宜言哉？

【眉評】「一章」愛賢而欲繫其駒，與好客而至投其轄，同一奇想。「三章」謝安爲布衣時，人皆以公輔期之。此必當時第一流人物。「四章」寫出賢人身分，令人神往不置。

【集釋】「皎皎」潔白也。「駒」馬之未壯者。「場」圃也。「繫」絆其足也。「維」繫其軛也。「逍遙」游息也。「藿」何氏楷曰：藿本作蘿，說文云：「藿之少也」，或以爲豆葉。「嘉客」呂氏大臨曰：嘉客者，暫客於斯亦將去也。「賁然」集傳：賁然，光采之貌也；或以爲來之疾也。「思」語詞。「慎」勿過也。「勉」毋決也，又保重意。「遁」避也。

【標韻】苗二蕭朝、遙並同本韻 藿十藥友、客十一陌叶韻 思四支期、思並同，二思字自屬韻。本韻 谷一屋束二沃玉同通韻 音十二侵心同本韻

## 黃鳥 刺民風偷薄也。

黃鳥黃鳥，無集于穀，無啄我粟！此邦之人，不我肯穀。言旋言歸，復我邦族。一章黃鳥黃鳥，無集于桑，無啄我梁！此邦之人，不可與明。言旋言歸，復我諸兄。二章黃鳥黃鳥，無

集于栩，無啄我黍！此邦之人，不可與處。言旋言歸，復我諸父。 三章

右《黃鳥》三章，章七句。此詩與下篇《我行其野》大畧相類，亦同出於一時。此不過泛言邦人之不可與處，下章則並昏姻亦不肯相恤。總以見人心澆漓，日趨愈下，有滔滔難返之勢。其所以致民如此者，豈無故與？王氏曰：「先王躬行仁義以道民厚矣，猶以爲未也。又建官置師，以孝友睦姻任恤六行教民。爲其有父母也，故教以孝。爲其有兄弟也，故教以友。爲其有同姓也，故教以睦。爲其有異姓也，故教以姻。爲鄉里鄉黨相保相愛也，故教以任。相關相教也，故教以恤。以爲徒教之或不率也，故使官師以時書其德行而勸之。以爲徒勸之或不率也，於是乎有不孝、不睦、不姻、不弟、不任、不恤之刑焉。方是時也，安有如此詩所刺之民乎？」此可見民之薄實由上之失其教也。故《小序》以爲「刺宣王也」，《集傳》以爲未見其然，然皆不可考。而在上之無以教其民也，則不能辭其咎焉。故此二詩重在「不可與處」及「爾不我畜」，非重在「復我邦族」也。且重在上之無以使民相親相恤，不重在民之不能相親相恤也。蓋所咏在民，而所刺則在上耳。若《集傳》及諸家所云，民適異國，不得其所，卽投昏姻亦不見收恤，不如仍歸故土之爲善，則是美宣王矣，又何刺之有耶？夫宣王中興令主，固嘗遣使安集流散，而有《鴻雁》之詩矣。乃數十年而民風偷薄如故，豈王氏所云，未能以先王之所以教民者教其民歟？聖人刪《詩》，存此二篇於中興之末，見周之衰實自此始，不必待東遷而後著也。

【集釋】《穀》木名，解見《鶴鳴》。《穀》善也。

【標韻】穀一屋粟二沃穀屋族同通韻 桑七陽梁同明八庚兄同轉韻 栩七麌黍六語處同父虞通韻



我行其野 刺陸嫺之政不講也。

我行其野，蔽芾其樛。昏姻之故，言就爾宿。爾不我畜，復我邦家。一章我行其野，言采其蕒。昏姻之故，言就爾宿。爾不我畜，言歸思復。二章我行其野，言采其蕒。不思舊姻，求爾新特。成不以富，亦祇以異。三章

右《我行其野》三章，章六句。說見前篇。而詞較迫，以人愈親而情愈見其薄耳。乃蘇氏又謂「甥舅之諸侯，求人爲王卿而不獲者所作」，則以私心測詩意，豈能切合？夫甥舅之國，求人爲卿不得，必有所以不得之故，烏能怨王而以此刺之乎？此與前篇朱鬱儀所云「宣王之世，諸侯兄弟有失所而來依于王室者。及其季年，政體怠荒，禮意衰薄，思返故國而賦是詩」，同爲臆測，然較蘇說差有理。唯既曰「失所」，而何「故國」之可返耶？案之詩意，均皆不切，故甯取王說而諸家可悉棄也。

【集釋】樛，惡木也。李氏樛曰：樛，不材之木。《莊子》曰：「大枝擁腫，不中繩墨；小枝卷曲，不中規矩。」《蓬》《集傳》：蓬，牛蒡，惡菜也。今人謂之羊蹄菜。《蕒》惡菜也。陸氏璣曰：幽州人謂之燕蕒，其根正白，可著熱灰中溫噉之。飢荒之歲，可烝以禦飢。《特》匹也。

【標韻】樛六魚居同家六麻，叶古胡反。叶韻 蓬一屋宿、復並同本韻 蕒一屋，叶餘力反。特十三職異四寘，叶逸繼反。

叶韻

斯干公族考室也。

秩秩斯干，臨水。幽幽南山。面山。如竹苞矣，如松茂矣。林木蓊茂。兄及弟矣，式相好矣，無相猶矣。聚族而處，誓相敦睦。○一章似續妣祖，承先志。築室百堵，創新業。西南其戶。爰居爰處，爰笑爰語。二章約之閣閣，棟之橐橐。綠垣。風雨攸除，鳥鼠攸去，君子攸芋。三章如跂斯翼，如矢斯棘，如鳥斯革，堂高。如翬斯飛，君子攸躋。四章殖殖其庭，有覺其楹。室遽。噲噲其正，嘒嘒其冥，君子攸寧。五章下莞上簟，乃安斯寢。突接入室寢處。乃寢乃興，乃占我夢。吉夢維何？吉兆。維熊維羆，維虺維蛇。六章大人占之，維熊維羆，男子之祥；維虺維蛇，女子之祥。最吉無過生育之繁。○七章乃生男子，載寢之牀，載衣之裳，載弄之璋。生男爲上，故先及之。其泣嗶嗶，朱芾斯皇，室家君王。及其長成，所與爲昏莫非君王世族。○八章乃生女子，載寢之地，載衣之褐，載弄之瓦。生女次之，亦爲吉昌。無非無儀，唯酒食是議，無父母貽罹。唯中饋是修，無貽父母以羞爲吉。○九章。

右《斯干》九章：四章，章七句；五章，章五句。此詩似卜築初成，祀禱屋神之詞；非落成宴飲詩也。然自是皇家語，非士庶所宜言。以詩中有「室家君王」等辭故耳。且鳥革翬飛，亦豈民間制度耶？《集傳》但言室成，而不指爲何王，固是。然其意以爲考室通用之樂則非。故此詩若以爲成王營洛時作，

朱彝儀、何玄子之言。則「南山」字無着落。姚氏際恒所駁。即篇中亦必無兄弟聚處及生男育女之祝。蓋東都只爲朝會諸侯而設，成王非躬居其室，何必祝其生男育女於是室哉？若以爲武王、鄭肇敏言。宣王「小序」時作，武王詩不應廁于宣王之內，宣王雖中興，不無建營官室之舉，然京仍鎬京，室仍舊室，不過補葺而更新之，又何必面山臨水，作「相彼流泉」，「觀其陰陽」，有似卜築爲乎？且劉向云：「周德既衰而奢侈，宣王賢而中興，更爲儉官室、小寢廟，詩人美之」。然則此詩豈儉小之謂乎？是知非爲宣王作可無疑矣。當是時，中興景運一新，天潢世胄以次還朝，各營新第，於是卜築豐水，面對南山，擇其林木佳處聚族環處，以爲世業常基者，夫豈無人？曰「似續妣祖」者，繼承先志也。曰「築室百堵」者，創建新室也。曰熊罴占夢者，子孫繁衍也。曰「室家君王」者，婚姻皆王侯世第也。唯女子則勉以中饋無貽父母羞爲勗，此非周室懿親及諸侯子姓，孰能創建如是之巍巍輪奐乎？故其詩次於宣王諸篇之末，以紀一時盛事，爲中興生色耳。「小序」不知，誤爲宣王考室，皆其讀詩粗率處也。

【眉評】「一、二章」先從形勝起，乃卜築第一要着。然非聚國族於斯，則亦未見其盛也。故首及之。次言承先志，乃創業者之心。「三、四、五章」此下三章皆築室事。先垣、次堂、次室，層次井然。須玩他鍊字有法、垣則曰「攸芋」，堂則曰「攸臚」，室則曰「攸寧」，一一分貼細膩處。「六章」藉夢作兆，文筆奇幻。「七章」再藉占夢男女雙題，開下兩章，乃不唐突。此文心結構精密處。「八、九章」生男育女，兩大段對寫作收。與篇首聚族承先，遙遙相應。非獨卜後之昌，亦見文章之美。

【集釋】「秩秩」有序也。「干」水涯也。「南山」終南之山也。「猶」當作尤。「似」嗣也。「爰」於也。「約」

束板也。〔閣〕上下相承也。〔椽〕築也。〔橐〕杵聲也。〔芋〕尊大也。〔跂〕竦立也。〔翼〕嚴氏祭曰：如《論語》「翼如也」之翼。〔棘〕急也。〔革〕變也。〔聲〕雉也。〔躋〕升也。〔殖殖〕平正也。〔覺〕高大而直也。〔楹〕柱也。〔噲噲〕猶快快也，爽塏之意。〔正〕向明處也。〔嘒嘒〕深廣之貌。〔冥〕與空之間也。〔莞〕蒲席也。孔氏穎達曰：郭璞曰：西方人呼蒲爲莞蒲，江東謂之苻籬。《司几筵》有莞筵、蒲筵，則爲兩種席也。〔簟〕竹葦曰簟。馮氏復京曰：《司几筵》有次席，注以爲桃枝竹所次成者，其卽此簟歟？莞席在下，卽筵也。竹簟在上，卽重席也。案：詩云「乃安斯寢」，似此席非筵席，乃寢處之席耳。〔黼〕《集傳》：黼似熊而長頭高脚，猛怒多力，能拔樹。陸氏璣曰：黼有黃黼，有赤黼，大於熊。〔虺〕《集傳》：虺，蛇屬，細頸大頭，色如文綬，大者長七八尺。〔大人〕太卜之屬，占夢官也。〔璋〕半圭曰璋。嚴氏粲曰：璋玉以禮神明，及朝聘以爲瑞，璋瓊以裸宗廟，此生男弄璋，當止是璋玉也。姚氏際恒曰：今世傳有三代玉璋，長一、二寸，至長不過三寸，其制不一，有孔可穿絲繩，故初生子可弄。〔嗶〕大聲也。〔芾〕天子純朱，諸侯黃朱。〔皇〕猶煌煌也。〔君〕諸侯也。〔室家君王〕言昏姻皆王侯族也。〔楊〕襍也。陸氏德明曰：楊，《韓詩》作禧。孔氏穎達曰：襍，縛兒被也。〔瓦〕姚氏際恒曰：瓦，《毛傳》以紡塏解之，不可以塏爲瓦。黃東發謂：湖州風俗，婦人以麻線爲業，人各一瓦，索麻線于其上，尤可笑。瓦質重大，豈初生子所能弄哉？予又見三代古玉，長潤寸許，如瓦形，或卽是此，未可知也。

【標韻】千十四寒山十五刪通韻 苞二十六宥茂同好十九皓猶十一尤叶韻 祖七麌堵、戶並同處六語語同通韻 關

十藥寒同本韻 除六御去同芋七虞叶韻 翼十三職棘同革十一陌通韻 飛五微躋八齊通韻 庭九青楹八庚正  
同冥青寧同通韻 寢二十六寢與十蒸夢一送，叶彌登反。叶韻 何五歌願四支，叶彼何反。蛇六麻，叶土何反。叶韻  
祥七陽祥同本韻二字自爲韻 牀陽裳、璋、惶、皇、王並同本韻 地四真楊十二錫瓦二十一馬，叶魚位反。儀四支，  
叶音義。議真羅支叶韻

### 無羊 美司牧也。

誰謂爾無羊？三百維羣。誰謂爾無牛？九十其犝。爾羊來思，其角濺濺。爾牛來思，其耳溼溼。一章或降于阿，或飲于池，或寢或訛。爾牧來思，何養何筮，或負其餼。三十維物，爾牲則具。此句是主。○二章爾牧來思，以薪以蒸，以雌以雄。爾羊來思，矜矜兢兢，不騫不崩。麾之以肱，畢來既升。三章牧人乃夢，衆維魚矣，旆維旗矣。大人占之，衆維魚矣，實維豐年。旆維旗矣，室家溱溱。四章

右《無羊》四章，章八句。《小序》謂「宣王考牧」。鄭氏踵之，以爲「厲王之時，牧人職廢，宣王始興而復之，至此而成，謂復先王牛羊之數」。《集傳》則置而不論，但云「牧事有成，而牛羊衆多也」。夫牧養雖非大政，而犧牲於是乎出，賓客於是乎享，君庖於是乎充，亦爲國者之先務。宣王當板蕩之餘，牧養之政久廢，何有乎牛羊？至是乃修而復之，亦中興所恒有事。但《禮》云，問席人之富，數畜以對。似天子不必以此誇耀富盛也。故但曰美司牧，而天子自在其中矣。《序》必以爲宣王考牧，未免小視

乎朝廷也。且並上篇考室亦歸美宣王，二事相題並論，則尤附會無稽。竊謂二詩雖同出於中興初年，而其事不相屬，編詩者後始類錄之耳。若使同美宣王，則二詩中皆以「大人占夢」，必不能再言以取重複之誚。是知考室自考室，考牧自考牧，不必盡爲宣王作也。詩首章「誰謂」二字飄忽而來，是前此凋耗，今始蕃育口氣。以下人物雜寫，或牛羊並題，或牛羊渾言，或單咏羊不咏牛，而牛自隱寓言外。總以牧人經緯其間，以見人物並處，兩相習自不覺其兩相忘耳。其體物入微處，有畫手所不能到。晉、唐田家諸詩，何能夢見此境？末章忽出奇幻，尤爲匪夷所思。不知是真是夢，真化工之筆也！其尤要者，「爾牲則具」一語爲全詩主腦。蓋祭祀、燕饗及日用常饌所需，維其所取，無不具備。所以爲盛，固不徒專爲犧牲設也。然淡淡一筆點過，不更纏繞，是其高處。若低手爲之，不知如何鄭重以言，不累卽腐。文章死活之分，豈不微哉！

【眉評】「一章」起勢飄忽。牛羊並題。「二章」人物雜寫，錯落得妙，是一幅筆牧圖。「三章」單寫羊，體物入微，文筆一變。「四章」幻情奇想，深得化俗爲雅，變板成活之法。

【集釋】「特」黃牛黑肩曰特。「濺濺」和也。「溼溼」集傳：溼溼，潤澤也。牛病則耳燥，安則潤澤也。「說」驚動貌。「韓詩」作譌。「何」揭也。「蓺笠」備雨具也。「三十維物」集傳：齊其色而別之，凡爲色三十也。何氏楷曰：物，謂毛物，與「比物四驪」之物同。「蒸」細薪曰蒸。「雌雄」姚氏際恒曰：雌雄字從佳，卽鳥也，故以雌雄言鳥。「矜矜兢兢」堅強也。欲爭先而實緩貌。「騫」虧也。「崩」傾也。不傾，崎嶇險仄之處不傾跌也。「肱」臂也。「既」盡也。「升」入牢也。「占夢」借占夢以爲豐年之兆耳。

〔旌旗〕《集傳》：旌，郊野所建，統人少。旗，州里所建，統人多。〔漘漘〕衆也。

【標韻】羣十二文特十一真通韻 濊十四緝涇同本韻 阿五歌池四支，叶唐何反。訛歌叶韻 笠緝物五物具七遇，叶居律反。叶韻 蒸十蕭雄一東兢、蒸、崩、肱、升並蒸叶韻 魚六魚虞同本韻 年一先漘十一真通韻

### 節南山 家父刺師尹也。

節彼南山，維石巖巖。首二章興起。赫赫師尹，民具爾瞻。憂心如惓，不敢戲談。其威可知。國既卒斬，何用不監！故作危言，虛喝一筆，領起全詩。○一章節彼南山，有實其猗。赫赫師尹，不平謂何？天方薦瘥，喪亂弘多。再唱一筆，乃其爲政之失。民言無嘉，惓莫懲嗟。二章尹氏大師，病根在此，特筆振起。維周之氏，秉國之均，四方是維，天子是毗，俾民不迷。不弔昊天，不宜空我師，乃轉入本意。○三章弗躬弗親，庶民弗信。此下歷舉不平之實。弗問弗仕，勿罔君子。式夷式已，無小人殆。瑣瑣姻亞，則無臚仕。勉之以平，則小人雖退而無怨。信任親人，小人之尤者。○四章昊天不傭，降此鞠訥。昊天不惠，降此大戾。惟其不平，天亦屢降大凶。君子如屆，俾民心閱。君子如夷，惡怒是違。再勉以進用君子，則諸怨自消。○五章不弔昊天，亂靡有定。根第三章。若不爲天所恤，亂未能已。式月斯生，俾民不寧。憂心如惓，誰秉國成。是誰之咎？應上「秉均」。不自爲政，卒勞百姓。應「弗親」，任用姻亞。○六章駕彼四牡，四牡項領。我瞻四方，蹙蹙靡所騁！

應「喪亂弘多」。○七章方茂爾惡，相爾矛矣。應「慚莫懲嗟」。既夷既憚，如相隣矣。故揭一筆。○八章昊天不平，我王不寧。始出「王」字。不懲其心，覆怨其正。抑。○九章家父作誦，以究王誥。明點作詩，反應「不敢戲談」。式訛爾心，以畜萬邦。再勉以德，是詩人忠厚處。○十章

右《節南山》十章：六章，章八句；四章，章四句。《序》以爲「刺幽王也」。然桓王之世亦有一家父，《春秋》桓十五年：「天王使家父來求車。」上距幽王之卒已七十五歲。《集傳》及諸家多疑之，遂有以爲東遷後詩者。唯孔氏穎達云：「古人父子多同字，此家父未必是一人。」姚氏亦云：「東遷後曷爲咏南山？」愚謂此家父乃與師尹同朝，人不敢戲談，而已獨作詩以刺之者，夫豈後人所能爲哉？詩以直刺尹氏爲主，言王因之不寧，乃是臣子愛君之心。若以爲刺幽王，非惟失臣子事君之道，且使小人得以藉口，則必不敢直題姓氏矣。尹氏爲政，失在委任小人，且多姻亞；而又「弗躬弗親」，政出私門。故多不平，以致召亂。天人交怒，災異迭興，流言四起，而猶不知自懲。偶有規而正之者，反以爲怨。此家父之深以爲憂也。然其人聲勢赫赫，舉朝畏威，莫敢戲談；況侮之乎？唯家父，周朝世臣，義與國同休戚。故不憚誅罰，直刺其非，無或稍隱。然始猶望其進君子退小人，以挽回天意而安王朝。既知其無可救正，「亂靡有定」，顧瞻四方，不知逝將焉往。又況天方降災，危及我王，尤非臣子潔身遠去，緘口不言之秋。不得不作爲歌詩，「以究王誥」之所由。倘使其人聞之，而因以改心易慮，則猶可以轉禍成福，而畜養萬邦，亦未始非歌詩之力也。此作詩表字之意所由來歟？然非忠誠爲懷，不計利害，亦孰肯以一身當尹氏之怒而不辭者？嗚乎！家父亦可謂爲人之所不能爲者矣，豈不壯哉？



【眉評】「一章」起得嚴厲有勢。〔一、二章〕首二章皆虛籠全局。〔三章〕上言「師尹」，此特題「大師」字，則其職任之重可知。是通篇警策處。〔四、五章〕二章實寫爲政不平，以及信任小人。以見天人交怒之故。然猶望其自懲，不作寫絕之辭。〔六章〕至此乃深惡而痛責之。蓋知其不能自懲也，觀下「不懲」二語可見。迨至「覆怨其正」，則惡愈深矣。〔九章〕「王」字輕輕帶出，詩人忠君愛國之心，含蓄無限。立辭之妙，可以爲法。〔十章〕結出作詩原由。

【集釋】〔節〕高峻貌。何氏楷曰：「節，通作岳。徐鍇云：『山之隈隅高處曰岳。』」〔巖巖〕積石貌。〔赫赫〕顯盛貌。〔師尹〕大師尹氏也。大師，三公。孔氏穎達曰：「尚書、周官云，太師、太傅、太保，茲惟三公。《集傳》：尹氏蓋吉甫之後，《春秋》隱三年書「尹氏卒」，公羊子以爲「譏世卿者」，卽此也。李氏樛曰：「春秋後又書「尹氏立王子朝」，則尹氏之爲世卿，其來甚久矣。〔具〕俱也。〔瞻〕視也。〔倏〕燔也。李氏樛曰：「《雲漢》曰：『如倏如焚。』倏，焚之類也。〔卒〕終也。〔斬〕絕也。〔監〕視也。〔有實其猗〕《集傳》：未詳其義。傳曰：「實，滿。猗，長也。」箋云：「猗，倚也。言草木滿其旁，倚之吠谷也。或以爲草木之實猗猗然，皆不甚通。案：山雖高，必有草木以實之，而其高愈顯。以興師尹雖尊，必有親近以附和之，而其威愈赫。〔薦〕荐通，重也。〔瘥〕病也。〔弘〕大也。〔憯〕曾也。〔懲〕創也。〔氏〕本也。〔均〕平也。〔維〕時也。〔毗〕輔也。〔弔〕悠也。〔空〕窮也。〔師〕衆也。〔問〕諮詢之也。〔仕〕任官之也。〔君子〕指正直人言。姚氏際恒曰：「仕，非事也。君子，非指王也。以君子而弗諮詢之，弗仕使之，是誣罔君子也，故戒其「勿」。〔夷〕平也。〔已〕止也。王氏安石曰：「已，廢退也。《孟子》所謂士

師不能治士則已之，與此已同義。〔殆〕危也。〔瑱瑱〕小貌。〔姻亞〕壻之父曰姻，兩壻相謂曰亞。〔應〕厚也。姚氏際恒曰：小人則平其心而休廢之，以小人危殆也，故戒其無。無，毋同。〔瑱瑱姻亞〕，指其事而言之。蓋此輩不唯仕，而且應仕矣，故亦戒其「無」，應上君子弗仕意。〔備〕均也。〔鞠〕窮也。〔訥〕亂也。〔戾〕乖也。〔屆〕至也。〔闕〕息也。〔遠〕遠也。〔醒〕酒病曰醒。〔成〕平也。〔項〕大也。〔蹙蹙〕縮小之貌。〔茂〕盛也。〔相〕視也。〔懌〕悅也。〔家父〕家，氏，父，字。周大夫也。

【標韻】嚴十五咸瞻十四鹽懷十三覃談同監咸通韻 猗四支，叶於何反。何五歌廢，多並同嘉六麻嗟同叶韻 氏八齊維四支毗、迷齊師支通韻 親十一真信同本韻 仕四紙子同殆十賄仕紙通韻 備二冬誦同本韻 惠八霽戾同屆十卦闕九屑，叶苦桂反。叶韻 夷四支違五微通韻 定二十五徑生八庚寧九青醒庚成同政二十四教姓同叶韻 領二十三梗聘同本韻 矛十一尤騰同本韻 平庚寧青心十二侵正庚通韻 誦二宋誦冬邦三江轉韻

### 正月 周大夫感時傷遇也。

正月繁霜，時季於上。我心憂傷。民之訛言，民謠於下。亦孔之將。念我獨兮，憂心京京。哀我小心，癡憂以瘁。我側憂之，無人能識。○一章父母生我，疾病則呼父母。胡俾我瘁？不自我先，不自我後。傷已適遭是時。好言自口，莠言自口。雖黃其口，尤覺可畏。憂心愈愈，是以有侮。見嫉之故。○二章憂心惻惻，念我無祿。民之無辜，并其臣僕。我之不幸，將與無罪民同被囚虜。哀我人斯，于何從祿？瞻烏爰止，于誰之屋？不知所止，如烏之止於誰屋。○三章瞻彼中林，侯薪侯

蒸。乃瞻林間，篇中興起，大小亦分明易辨。民今方殆，視天夢夢。民急呼天，天獨不應。既克有定，靡人弗勝。有皇上帝，伊誰云憎？四章謂山蓋卑？爲岡爲陵，民之訛言，寧莫之懲。召彼故老，訊之占夢。具曰予聖，誰知烏之雌雄？古今通病，召亂之本。○五章謂天蓋高？不敢不局。謂地蓋厚？不敢不跼。維號斯言，有倫有脊。哀今之人，胡爲虺蜴？東注前半。○六章瞻彼阪田，有苑其特。又與開後半文字。天之抗我，如不我克。彼求我則，如不我得。執我仇仇，亦不我力。七章心之憂矣，如或結之。今茲之正，胡然厲矣？燎之方揚，寧或滅之。借燎田起下褒姒。赫赫宗周，褒姒威之！罪人。○八章終其永懷，又窘陰雨。其車既載，乃棄爾輔。以陰雨行車比亂世棄賢。載輸爾載，將伯助予！九章無棄爾輔，員于爾輻。承上正言，以見賢不宜棄。屢顧爾僕，不輸爾載。終踰絕險，曾是不意。十章魚在于沼，亦匪克樂。潛雖伏矣，亦孔之炤。再以魚比賢難避視。憂心慘慘，念國之爲虐。十一章彼有旨酒，又有嘉殽。洽比其鄰，昏姻孔云。念我獨兮，憂心慙慙。十二章吡吡彼有屋，蔽蔽方有穀。民享承平未久。民今之無祿，天天是極。又遭大亂。智以富人，哀此惻獨！慘然。○十三章

右《正月》十三章：八章，章八句；五章，章六句。此自幽王時詩。然《序》以爲「刺幽王」，則非詩人語氣。蓋其自傷多難，不前不後，生當厄運。深恐國破家亡，與無辜人民同時被虜，爲人臣僕，有似鳥飛啞啞，不知集于何屋。則此情此境，真不堪預爲設想也。夫天心人事，互相倚伏。人當危殆，則疾

痛號泣，而欲訴之於天。今之天則夢夢然其如醉，若無辨於人之善惡也者，是天心已不可問矣。世將禍亂，則流言謗譸尤易煽動乎人。若今之人，則貿貿然以自聖，更難知其烏之雌雄也者，是人事又何勝言哉！然此特天心未定，訛言孔多時則然。倘使人知自警，天亂亦將平。則「有皇上帝」，福善禍淫，原無所偏愛而爲福，又豈有所偏憎而降災？予之處此，未敢縱恣。古人有言：「勿謂天高，不敢不局；勿謂地厚，不敢不踏。」夫亦自小之甚矣。而人顧不能容，嘗肆毒以相害也，則又何故？始予固嘗見用於世矣，而無如天方抗我，如恐不勝。譬彼特苗生於阪田，風雨動之，其能長乎？夫始求之以爲法，而唯恐其不得，繼得之而如仇，亦終莫能用。此世之所以亂，而賢者終莫能伸也。又況淫虐召亂，女戎方興。赫赫宗周，衆賢臣輔之而不足，一褒姒威之而有餘，可勝慨哉！然衆賢非不劬勞盡瘁以輔之也，奈彼自棄其輔。如行車然，車載既重，「又窘陰雨」，車輔相失，其何以行？迨至載墮困於泥塗，始相呼助，詎能及耶？使其早見及此，「無棄爾輔」，又能慎戒僕夫，則雖人世崎嶇，路多絕險，亦不難安車就駕，如不經意而自踰矣。乃今之世，非第棄賢，又將禍焉。予是以「憂心慘慘」，慮國之爲虐，而不勝其深藏而自晦之。然魚游淺水，雖曰潛伏，亦甚炤然，恐終無以逃其禍耳！夫天意難測，亂未有已，是非之淆，既若彼其甚，人心多險，國是日非，賢奸之辨，又若此其難。而欲國之無亡也，得乎？然彼小人則方且肆然得志，旨酒嘉穀，呼朋引類，相與爲樂。而不知其國破家亡，將在旦夕。此予獨深憂而不能自解者也。雖然，予何足惜？所苦者吾民耳。前此宣王中興，僦然民始有家，亦兢兢然民方有穀。將以爲從此安居，可享無事福矣。而孰知大亂又作，是天降天孽，極害小民。

擊無可道，富者尚可自勝，獨如此惇獨何哉？此周大夫感時傷遇之作，非躬親其害，不能言之痛切如此。而《集傳》疑爲東遷後詩，姚氏駁之云：「此詩刺時，非感舊也。若襄姒已往，鎬京已亡，言之何益？且與前後文意亦不相類。」是已。然鎬京未亡，何以遽言「襄姒威之」？古人縱極懲直，亦不應狂誕若此。此必天下大亂，鎬京亦亡在旦夕，其君若臣尚縱飲宣淫，不知憂懼，所謂燕雀處堂自以爲樂，一朝突決棟焚，而怡然不知禍之將及也。故詩人憤極而爲是詩，亦欲救之無可救藥時矣。讀者循文案義，其情自見，又何必紛紛辯論爲哉？

【眉評】「一章」天人交變，亂形已著。「二章」我何不幸，乃適當此厄運。「三章」亂極則國必亡，將來未知何如，偶一念及，詎堪設想？「四章」天何爲而此醉，「五章」人乃不知其非，可憐亦復可恨。「六章」己雖獨醒，無地能容。天高、地厚二語，根上天夢、山卑作一大段。「七章」前言是非顛倒，此後言用賢不專。「八章」政復暴虐。咎歸襄姒，言之可駭。「九、十章」二章極言得人者昌，失人者亡。純以譬喻出之，故易警策動人。「十一章」賢既不用，必難相容，故特憂之，爲一大段。「十二章」此下言小人朋黨亂政。「十三章」民弱受害作收。

【集釋】「正月」正，音政。《集傳》：正月，夏四月。謂之正月者，以純陽用事，爲正陽之月也。《訛》：偶也。《將》：大也。《京京》亦大也。《癡憂》：幽憂也。《瘁》：病也。劉氏彝曰：「鼠病而憂，在於穴內，人所不知也。我有鼠憂，至於瘁病，人所不知也。《瘁》：病也。《莠醜》也。《愈愈》：益甚之意。《惇惇》：憂意。《無祿》：不幸也。《辜》：罪也。《侯》：維也。《夢夢》：不明也。《局》：曲也。陸氏德明曰：局，本又作踟。《蹢

累足也。〔號〕長言之也。〔脊〕理也。〔虺蜴〕皆毒螫之蟲也。〔阪田〕崎嶇境埆之處也。〔苑〕茂盛貌。〔特〕特生之苗也。〔扝〕動也。黃氏一正曰：扝，動搖貌，使不遂也。〔力〕用力也。〔正〕政也。〔褒姒〕幽王嬖妾，褒國女，姒姓也。〔威〕亦滅也。〔輔〕〔集傳〕：輔，如今人縛杖於輻，以防輔車也。〔輪〕墮也。〔將〕請也。〔伯〕或人也，如某伯某仲之類。〔員〕益也。張氏彩曰：員者，周防完美，無缺陷傾側之意。〔炤〕音灼，昭明易見也。〔云〕周旋之意。〔眇眇〕小貌。〔蔌蔌〕陋貌。〔天天〕天所禍也。何氏楷曰：〔商書〕：彤日篇云：「非天天民」，與此天天同義。〔殛〕害也。〔笱〕可也。

【標韻】霜七陽傷，將並同京八庚痒陽轉韻。痾七庚後二十五有口同侮庚叶韻。祿一屋僕、祿、屋並同本韻。蒸十燕夢一送，叶莫登反。勝燕憎同叶韻。陵燕懲同夢送雄一東，叶胡陵反。叶韻。局二沃，叶居亦反。踏十一陌脊、蜴並同叶韻。特十三職克、得、力並同本韻。結九屑厲八霽，叶力禁反。滅屑威同叶韻。兩虞輔同予六語通韻。輻一屋，叶筆力反。載十一隊，叶節力反。意四寘叶韻。樂十藥炤音灼，同。虐同本韻。鄰十一真云十二文懲同通韻。屋一屋穀、祿並同極三覺獨屋轉韻。

## 校記

〔一〕「舞」，陶東本作「舞」，此依雲南本校改。

## 十月之交 刺皇父煊虐以致災變也。

十月之交，朔日辛卯，日有食之，亦孔之醜。彼月而微，此日而微。今此下民，亦孔之哀。

一章日月告凶，不用其行。四國無政，不用其良。彼月而食，則維其常；此日而食，于何不臧。二章燂燂震電，不寧不令；百川沸騰，山冢峩峩；高岸爲谷，深谷爲陵。哀今之人，胡僭莫懲？三章皇父卿士，番維司徒，家伯維宰，仲允膳夫，棐子內史，厥維趣馬，楛維師氏，豔妻嬭方處。繫承上「今之人」，歷舉其人以實之。○四章抑此皇父，豈曰不時？胡爲我作，不卽我謀？徹我牆屋，田卒汙萊。曰予不戕，禮則然矣！五章皇父孔聖，作都于向。擇三有事，亶侯多藏。不憇遺一老，俾守我王。擇有車馬，以居徂向。六章眚勉從事，不敢告勞。無罪無辜，讒口囂囂。下民之孽，匪降自天。噂沓背憎，職競由人。七章悠悠我里，亦孔之痾。四方有羨，我獨居憂。民莫不逸，我獨不敢休。天命不徹，我不敢傲我友自逸。八章

右「十月之交」八章，章八句。「小序」謂「大夫刺幽王」。鄭氏又以爲厲王之詩。歐陽修、蘇轍、陳鵬飛皆非之。李氏樗亦云，「《唐書·志》云，「十月之交」，以曆推之，在幽王之六年，則是爲幽王之詩無疑矣。」此詩中紀候力也。然亦非刺幽王，乃刺皇父耳。朱鬱儀曰：「向在東都，桓王與鄭人蘇忿生之田，向、盟、州、陘是也。去西都千里而遙。皇父恃寵請城，規避戎禍，土木繁興，徙世家巨族以實之。人情懷土重遷，傷其獨見搜括，故賦是詩。」姚氏以爲「此說得之」。今案，詩詞特一端耳。皇父援黨布置要樞，竊權固寵，罔上營私，以致災異，曾莫自懲。乃敢誣天，曰「彼月而食，則維其常；此日而食，于何不臧」，是不唯欺君，而又欺天矣！小人無忌，往往如此，豈非罪之尤大者乎？詩人刺之，

開口直書天變時日於上，以著其罪。詩史家法嚴哉！

【眉評】「一章」詩史書法，春秋用之。「二章」天變於上。小人不知自警，反以爲常，則無忌憚之心可見。「三章」地變於下。又不知懲，則尤可恨。「四、五、六章」小人用事於外，嬖妾固寵於內，所以致變之由。「七章」至此乃言己之受勞而被譏。「八章」並及鄉里受害。以自安所遇作收。

【集釋】「十月」建亥月也。「交」日月交會，謂晦朔之間也。一歲凡十二會。「日有食之」陳氏植曰：日月交會，日爲月掩則日蝕。日月相望，月與日亢則月蝕。自是行度分道，到此交加去處應當如是。曆家推算，專以此定疏密，本不足爲變異。但天文纔遇此際亦爲陰陽厄會，於人事上必有災戾。故聖人畏之，側身修行，庶幾可弭災戾也。案：日食固爲月掩，月食則非地隔。蓋月本自有光，半明半暗，隨日爲盈虧。日與月正對，則其光反向上以避日，向地一面則暗而成蝕。然月食則以爲常者，月有盈虧，乃其常耳。日食而以爲變者，日虧闕則爲變也。天人原本一氣，天有厄則人必有災。日食雖非真厄，而其象則成厄象，象著而氣亦足以相感，此聖王之所以畏也。「彼月而食四句」小人不知畏天，故借日曰：「彼月而食，固其常矣；此日而食，又于何不減之有乎？」蓋不欲以天變自加修省耳。「燁燁」電光貌。「震」雷也。「寧」安徐也。「令」善也。「沸」出也。「騰」乘也。「冢」山頂曰冢。「崒」崔嵬也。「潛」曾也。「皇父、家伯、仲允」皆字也。「番、棨、蹇、蹻」皆氏也。「卿士」集傳：卿士、六卿之外更爲都官，以總六官之事也。鄭氏康成曰：皇父則爲之端首，兼擅羣職，故但目以卿士云。「司徒」



掌邦教也。〔維宰〕姚氏際恒曰：家伯之下，〔註〕疏及蘇氏、嚴氏本皆作「維宰」。蘇氏曰：「維宰，未知何宰也。」鄭氏則以「冢宰」釋之。《集傳》本則直改作「冢宰」，更非。〔膳夫〕掌王之飲食膳羞者也。〔內史〕中大夫，掌爵祿廢置，殺生予奪之法者也。〔趣馬〕中士，掌王馬之政者也。〔師氏〕亦中大夫，掌司朝得失之事者也。〔豳妻〕指褒姒也。〔煇煇〕煇也。〔方處〕陳氏推曰：言其寵方固也。〔抑〕發語辭。〔時〕農隙之時也。〔都〕大邑也。《周禮》，畿內大都方百里，小都方五十里，皆天子公卿所封地，非都會之都也。〔向〕地名，在東都畿內，今懷慶府孟縣。〔三有事〕三卿也。〔寧〕誠也。〔侯〕維也。〔藏〕蓄也。〔愍〕陸氏德明曰：愍，〔爾雅〕云：願也，強也，且也。〔有車馬者〕富民也。〔徂〕往也。〔嘽〕聚也。〔沓〕重複也。〔職〕主也。〔競〕力也。〔羨〕餘也。〔徹〕均也。

【標韻】卯十八巧醜二十五有叶韻 微五微哀十灰通韻 行七陽良、常、咸並同本韻 令八庚崩十蒸陵、懲並同通韻 徒七虞夫同本韻 馬二十一馬處六語叶韻 時四支謀十一尤萊十灰然一先叶韻 向二十三漾藏、王、向並同本韻 勞四素露二蕭通韻 天一先人十一真通韻 里四紙痺十一隊，叶呼消反。叶韻 憂十一尤休同本韻 徹九屑逸四質通韻

## 雨無正 周誓御痛匡國無人也。

浩浩昊天，不駿其德。降喪饑饉，歲飢。斬伐四國。民隤。旻天疾威，弗慮弗圖。善惡不分。舍彼有罪，既伏其辜。有罪反舍，倒句。若此無罪，淪胥以鋪。無辜受害。○一章周宗既滅，靡所

止戾。宗室絕迹，無人救惡。正大夫離居，莫知我勳。宰輔又遠去。三事大夫，莫肯夙夜。諸親亦無人盡職。邦君諸侯，莫肯朝夕。列辟更難輔相。庶曰式臧，覆出爲惡！故君惡日長。○二章如何昊天，辟言不信？如彼行邁，則靡所臻。只好呼天自訴，君之不信忠言，有如行路無所底止。凡百君子，各敬爾身。胡不相畏？不畏于天！指上諸臣，雖各潔身不肯格君，獨不畏獲咎于天乎？○三章戎成不退，饑成不遂。曾我誓御，憯憯日瘁。亂作無人止，民生無人遂，惟我近侍獨形憂瘁。凡百君子，莫肯用訊。聽言則答，譖言則退。爾諸臣終莫進言，惟知唯諾，更巧避讒。○四章哀哉不能言！長嘆。匪舌是出，維躬是瘁。忠者不能言。智矣能言，巧言如流，俾躬處休。能言者不忠。○五章維曰于仕，孔棘且殆。又代諸臣自解出仕之難。云不可使，得罪于天子。直道，王以爲不可。亦云可使，怨及朋友。枉道者，又得罪于清流。○六章謂爾遷于王都，曰予未有室家。鼠思泣血，無言不疾！昔爾出居，誰從作爾室？雖然，王不可無輔，故相召爾，爾乃自設，使予幽思，至于泣血，言無不痛。爾以無家爲解，然則出君又豈有家耶？○七章

右《雨無正》七章，二章章十句，三章章八句，三章章六句。此篇名多不可解。《小序》云：「大夫刺幽王也。」《大序》曰：「雨自上下者也，衆多如雨，而非所以爲政也。」朱子駁之，以爲尤無理。故《集傳》引歐陽公之言曰：「古之人於詩多不命題，而篇名往往無義例。其或有命名者，則必述詩之意，如《巷伯》、《常武》之類是也。今《雨無正》之名，據《序》所言，與詩絕異，當闕其所疑。」又引元城劉氏言曰：

「嘗讀《韓詩》，有《雨無極》篇，《序》云：『雨無極，正大夫刺幽王也。』至其詩之文，則比《毛詩》篇首多『雨無其極，傷我稼穡』八字。」始以劉說有理，繼疑詩之長短不齊，以爲非例。且並疑其非幽王詩。姚氏亦云，此篇名「不可考，或誤，不必強論。」然愚案，《韓詩》於此篇首章忽多二句，其爲僞增，自不待言。卽詩中所言，亦非爲雨傷稼穡也。歲飢民亂，分明是荒旱景象，且不過借時勢以立言耳。其大旨乃警御近臣傷國無正人，以匡正王失也。故雨字或誤，正字上下或有脫漏，亦未可知。魯魚帝虎，古簡之常。但須細審，未可以無考忽之。夫以赫赫宗周，匡國無人，而憂而望之者，乃僅僅出於近侍微臣，則謂之「國無正」也亦奚不可？首章天既降災，又多不平，是善惡不分，天心難測時也。其所以然者，則以上失其道故耳。上之失道，又以左右無賢匡正其惡故耳。左右莫過宗親，今之宗親則滅迹而遠蹈矣。其次正大夫，今之正大夫則分封而離居矣。又其次三事大夫，而今之三事大夫雖近在朝廷，「莫肯夙夜」，靖共亦屬無益。至邦君諸侯，則更各適己國，瞻肯朝夕焉盡忠耶？是天災若彼其甚，人心又若此其離，王庶幾其一悟乎？乃更「覆出爲惡」，則無救矣。天乎，天乎，夫何忠言不信，如此其極，譬彼行邁而無所止乎！然而百爾君子，雖各潔其身，不相畏禍，而獨不畏於天乎？寇至無人退，民飢無人遂。唯我暫御憂心日瘁，而爾諸臣其誰是以忠告進於王前者？居平既多唯諾，臨危又巧於避譏，舉世一轍，莫知其非。哀哉，吾王孰與爲治？蓋忠者不能言，而能言者不忠。王之性又惡忠而好佞，是以巧言者反得安樂，忠誠者徒形勞瘁也。凡人莫不欲仕，而抑知簞仕之難，至急且殆乎？當今之時，直道者王之所謂「不可使」，而枉道者，王之所謂「可使」者也。直道者得罪于君，枉道

者見怨于友，此仕之所以難耳。然而君臣之義，未可以因難而思退也。予恒勸爾諸臣各還王都，共思輔導。而皆以無家辭，使我幽憂至於泣血。則雖言無不痛，而人終不肯來。豈真無家乎？如曰無家，則昔爾之去也，又誰爲爾作之室乎？詎可以相諉乎？此詩不惟非東遷後詩，且西京未破之作，故望諸臣還歸王都。若西京已破，王室東遷，則勤王又自有人，豈待魯御相招？且其立言別是一番建功立業氣象，斷不作「鼠思泣血」等語。曰「周宗既滅」者，周之宗室遠去絕迹，不來相依耳，非宗周王國爲人所滅也。觀其與下文「正大夫」諸臣並言歷敘而下，則知其爲宗室大臣也無疑。諸儒讀書，何不細心體會？但見「周宗」，卽以爲「宗周」；但見「既滅」，卽以爲「滅亡」，豈不可笑？且詩中明言「曾我魯御，惛惛日瘁。凡百君子，莫肯用訊」，又何以謂之「大夫刺幽王」耶？愚謂諸儒說《詩》，其實未嘗讀《詩》，寧不信然？

【眉評】「一章」先寫亂形，見天心之不平。「二章」歷數諸臣離心，匡國無人。時勢如斯，庶幾君心悔悟，乃更爲惡。「三章」痛責諸臣。「四章」乃自表己心，獨深憂慮，愈見國之無人也。舉朝如是，爲之奈何！「五章」可爲嘆息。「六章」代原臣心，君亦不能無過。言極沉痛，筆亦斬絕。「七章」末更望諸臣之來共匡君失，因詰責之，使窮於辭而無所遁，乃作詩本意。

【集釋】「鋪」徧也。「周宗」周之宗族也。「止戾」戾，乖也。「靡所止戾」，無人止王之乖戾也。「正大夫」姚氏際恒曰：「正大夫，上大夫也，卽卿。」「離居」姚氏際恒曰：「正大夫離居，猶前篇皇父出而作都于向之類。」「三事大夫」姚氏際恒曰：「三事，《書》立政篇爲「常伯、常任、準人」，亦大夫之職也。」《集

傳以前篇「擇三有事」爲三卿，此「三事」爲三公，既不一，且皆謬。又以大夫爲六卿中下大夫，亦謬。且「三事大夫」連言，謂三事之大夫也，今分之，並謬。「辟」法也。「臻」至也。「凡百君子」總上章宗親，正大夫、三事大夫及邦君諸侯而言也。「戎」兵也。「遂」遂生也。「誓御」近侍也。「惛惛」憂貌。「訊」告也。「棘」急也。「鼠思」猶言瘋憂也。

【標韻】德十三職國同本韻 圖七虞辜、鋪並同本韻 戾八霽勛四真通韻 夜二十二禡夕十一陌惡十藥叶韻 天一先信十一真臻、身並同天同上叶韻 遂四寘瘁同訊十二震退十一隊叶韻 出寘瘁同本韻 流十一尤休同本韻 殆十脂子四紙友二十五有叶韻 都虞家六麻叶韻 疾四質室同本韻

以上「祈父之什」凡十篇。案：此什「無羊」以上六篇，宣王時詩，多美辭。唯「祈父」及「黃鳥」、「我行其野」三詩有諷意。蓋末年政荒亂幾漸形矣。「節南山」皆幽王時詩，而鄭氏乃以爲厲王詩。范氏處義駁之云：「『小雅』無厲王之詩。鄭氏以爲『十月之交』、『雨無正』、『小旻』、『小宛』皆厲王之詩也。毛氏作傳，遷其第，因改之耳。其說曰：『師尹、皇父不得並政，襄如、貳如不得偕寵，番與鄭桓不得同位。先儒非之，謂使師尹、皇父、番與鄭桓先後共事，襄如以色居位謂之貳如，其誰曰不可？』又謂『韓詩』之次與毛氏合。案：幽王八年，以鄭桓公爲司徒，安知其前無番爲司徒？而四詩非厲王明矣。」又謂「十月辛卯，日有食之」，驗之唐曆，在幽王六年，亦其一證。「其餘引證雖多，無甚關係，故不錄。又有疑『正月』及『節南山』、『雨無正』三篇爲東周變雅者，是皆未審案切時勢，細咏詩詞而漫言之者。其說正已散見各篇之下，茲不再贅。

## 詩經原始卷之十一

### 小雅三

#### 小旻之什

#### 小旻 刺幽王惑邪謀也。

旻天疾威，敷于下土。謀猶回遹，何日斯沮？二句是主。謀滅不從，不滅覆用。就王一面言。我視謀猶，亦孔之邛！一章淪淪訛訛，亦孔之哀。謀之其滅，則具是違；謀之不滅，則具是依。就臣一面言。我視謀猶，伊于胡底！二章我龜既厭，不我告猶。謀夫孔多，是用不集。發言盈庭，誰敢執其咎？如匪行邁謀，是用不得于道。謀而不行。○三章哀哉爲猶，匪先民是程，匪大猶是經，維邇言是聽，維邇言是爭！如彼築室于道謀，是用不潰于成。謀而無斷。○四章國雖靡止，或聖或否。民雖靡盬，或哲或謀，或肅或艾。芻蕘堪聽。如彼泉流，無論胥以敗。五章不敢暴虎，不敢馮河。只見目前。人知其一，莫知其他。不知遠慮。戰戰兢兢，如臨深淵，如履薄冰。六章

右《小旻》六章，三章章八句，三章章七句。此篇名以「旻」加「小」字，說者雖多，難詳其義。《集傳》引蘇氏說云：「《小旻》、《小宛》、《小弁》、《小明》，四詩皆以小名篇，所以別其爲《小雅》也。其在《小雅》者謂之小，故其在《大雅》者謂之《召旻》、《大明》，獨《宛》、《弁》闕焉，意者孔子刪之矣。雖去其大而其小者猶謂之小，蓋即用其舊也。」其言頗近是。而郝氏猶駁之云：「未有二《雅》，先有篇目，非先有《小雅》而後以此詩從之也。《頌》有《小毖》又焉得有《大毖》乎？」然愚案：古人作詩，多不立題，詩成而後始拈首二字以名篇。故其名多可移易，如《唐風》有兩《杕杜》，一則云《杕杜》，一則云《有杕之杜》，皆後人分別名之，以示異耳。亦豈作詩者有意以避之耶？《小序》謂「刺幽王」，固是。然所刺者何事，必須標明，乃符序體，否則何詩不可謂之刺王乎？此必幽王多欲而無制，好謀而弗明，故羣小得以邪辟進，王心愈回惑而不辨其是非。雖有一二正直臣，而忠不勝奸，樸不勝巧，亦難力與爲爭。誰肯于發言盈庭之際，獨闢衆論而身任其責以決之乎？然其所謀者，又皆便辟習近之言，無遠大謀猶之計。王偏惑而聽之，亦如行路而坐謀之於室，築室而反謀之道路，豈能有成？是皆不以先民爲法，而「維迓言是爭」，不以大猶是信，而「維迓言是聽」者，此亂本也。能無慮哉？然國論雖多，賢愚互見，民人雖寡，芻蕘堪詢。苟得其要，亦易爲治。若稍反焉，則「如彼泉流」，有淪胥以至於敗焉矣耳。蓋人情每惕近憂而忘遠慮，暴虎馮河之患，顯而易見，則知所以懼。而其他隱於無形者，則雖有甚於暴虎馮河，而亦不知所懼也。故予有念於此，不覺戰兢自持，而如凜冰淵之戒焉。此詩之作所由來歟？夫天下不患無謀，患在有謀而弗用；不患在有謀弗用，而患在用非其謀。謀非所用，則好謀實足以誤

事。又況以邪辟之人議之於前，而以多欲之言聽而斷之於後也哉！

【眉評】「一、二章」首二章就君臣兩面寫足邪謀惑人之害將無所止。「三、四章」此二章受惑之故，其病在於不行不斷。「五章」人雖至愚，言亦可採。「六章」若無遠慮，必有近憂，是以戰兢自惕。【標韻】案：「應」謀無韻。《音韻攷》云：《釋文》曰：《韓詩》作「謀」，莫哈切，屬灰韻。與「止」「否」「謀」協。存以備考。

【集釋】「旻」幽遠之意。「敷」布也。「猶」謀也。「回」邪也。「遁」辟也。「沮」止也。「臧」善也。「覆」反也。「叩」病也。「淪淪」相和也。「說說」相詆也。曹氏粹中曰：淪淪然相和者，黨同而無公是。說說然相毀者，伐異而無公非。「具」俱也。「底」至也。「集」成也。「程」法也。「猶」道也。「經」常也。「潰」遂也。「應」大也，多也。「艾」與「乂」同，治也。「淪」陷也。「胥」相也。

【標韻】土七庚 沮六語通韻 用二宋叩二冬叶韻 哀十灰 達五微 依同底四紙叶韻 猶二十六有 集十四錫，《韓詩》作就，叶疾數反。咎二十五有 道十九皓，叶徒候反。叶韻 程八庚 經九青 聽同 爭庚 成同 通韻 止紙 否同 本韻 艾九泰 敗十卦 通韻 河五歌 他同 本韻 兢十蒸 淵一先 冰蒸 通韻

### 小宛 賢者自箴也。

宛彼鳴鳩，翰飛戾天。與我心憂傷，念昔先人。明發不寐，有懷二人。一章人之齊聖，飲酒溫克。彼昏不知，壹醉日富。各敬爾儀，天命不又。二章中原有菽，庶民采之。與螟蛉



有子，螺贏負之。反跌下文。教誨爾子，式穀似之。三章題彼脊令，載飛載鳴。興。我日斯邁，而月斯征。夙興夜寐，無忝爾所生。應上二人。○四章交交桑扈，率場啄粟。興。哀我填寡，宜岸宜獄。握粟出卜，自何能穀？五章溫溫恭人，如集于木。惴惴小心，如臨于谷。戰戰兢兢，如履薄冰。六章

右「小宛」六章，章六句。「小序」謂「大夫刺幽王」。朱子駁之云：「此詩之詞最爲明白，而意極懇至。說者必欲爲刺王之言，故其說穿鑿破碎，無理尤甚。」因改爲「大夫遭時之亂，而兄弟相戒以免禍之詩」。今細玩詩詞：首章欲承先志，次章慨世多嗜酒失儀，三教子，四勗弟，五、六則卜善自警，無非座右銘。言固無所謂「刺王」意，亦何嘗有「遭亂」詞？岸獄薄冰等字，不過君子懷刑，不能不常作是想。雖處盛世，此心亦終不能無也。然其作詩本意，亦非全無所爲而漫爲之之比。觀次章特題「飲酒」爲戒，則必因過量無德，恐致於禍，乃爲此以自警；且並勗子弟共相敦勉，「各敬爾儀」，無忝所生，而時凜薄冰之懼也。特其詞意在即離之間，似專爲此，又似不專爲此，故人難測其旨。總之，聖賢悔過自箴，特因一端以警其餘，規小過而全大德，是以愈推而愈廣耳。又有謂此爲同姓兄弟刺王之詩，故有「螟蛉」二句，以比宜臼奔申，申侯挾之而去。姚氏引嚴氏說。殊不知「螟蛉」二句乃反跌下文，「爾子」二語，意以爲螟蛉之子尚且相類，況爾親生獨不能相肖乎？諸家誤認爲興體，故多不得語氣。若以比宜臼事，則更失之愈遠也。古「序」說「詩」，病在牽涉，尤多附會。諸儒雖知其然，未能盡除厥弊，未免又牽合幽王爲言，豈能有當詩意哉？

【眉評】「一章」思親。【二章】慨世。【三章】教子。【四章】戒弟。【五章】自卜。【六章】自警。

【集釋】「宛」小貌。【鳴鳩】斑鳩也。【翰】羽也。【戾】至也。【明發】天將旦而光發明也。【二人】父母也。

【齊】肅也。【聖】通明也。【克】勝也。【富】甚也。【天命】案：天命，諸家皆作天運解，與上文意不貫。

當作天性，言天命之性也。【又】復也。【菽】大豆也。【螟蛉】桑上小青蟲也。【蜾蠃】土蜂也。似蜂而

小腰，取桑蟲負之於木空中，七日而化爲其子。楊氏雄曰：蜾蠃之子殭而逢蜾蠃，祝之曰：「類我，類

我，則肖之矣。」【式】用也。【穀】善也。【題】視也。【脊令】解見「常棣」。【而】汝也。【忝】辱也。【桑

扈】「集傳」：桑扈，竊脂也。俗呼青鸞，肉食，不食粟。陸氏佃曰：桑扈有二種，青質者脂曲食肉，好盜

脂膏，素質者其翅與領皆有文章，所謂「率場啄粟」，「有鶯其羽」也。呂氏祖謙曰：「淮南子」云：「馬不

食脂，桑扈不食粟」是也。【填】與瘕同，病也。【岸獄】「集傳」：岸亦獄也。【韓詩】作犴。鄉亭之繫曰

犴，朝廷曰獄。劉氏瑾曰：字書云，犴一作犴。犴，胡地犬也。野，犬所以守，故以獄爲犴。【如集于

木】恐隊也。【如臨于谷】恐隕也。

【標韻】天一先人十一真人同通韻 克十三職富二十六宥又同叶韻 采十賄負二十五有似四紙叶韻 鳴八庚征、生

並同本韻 粟二沃獄同穀一屋通韻 木屋谷同本韻 兢十蒸冰同本韻

## 小弁 宜臼自傷被廢也。

弁彼鸛斯，歸飛提提。興。民莫不穀，我獨于罹。何辜于天？我罪伊何？心之憂矣，云如

之何？一章踽踽周道，鞠爲茂草。我心憂傷，惄焉如擣。假寐永嘆，維憂用老。心之憂矣，  
疢如疾首。二章維桑與梓，必恭敬止。靡瞻匪父，靡依匪母。不屬於毛，不離于裏。天之  
生我，我辰安在？三章苑彼柳斯，鳴蜩嘒嘒。興。有濯者淵，萑葦淠淠。譬彼舟流，不知所  
屆。比。心之憂矣，不遑假寐。四章鹿斯之奔，維足伎伎。興。雉之朝雊，尚求其雌。譬彼  
壞木，疾用無枝。比。心之憂矣，寧莫之知。五章相彼投兔，尚或先之。行有死人，尚或墮  
之。借形下文。君子秉心，維其忍之。心之憂矣，涕既隕之。六章君子信讒，如或醜之。君  
子不惠，不舒究之。伐木掎矣，析薪杻矣。反形下文。舍彼有罪，予之佗矣。七章莫高匪山，  
莫浚匪泉。君子無易由言，耳屬於垣。名論。無逝我梁，無發我笱。我躬不閱，遑恤我  
後！八章

右《小弁》八章，章八句。此詩爲宜臼作無疑，而朱子猶疑之者，過矣。唯《大序》以爲「太子之傅作」，  
則不知其何所據。姚氏駁之，云「詩可代作，哀怨出于中情，豈可代乎？況此詩尤哀怨痛切之甚，異  
於他詩」者。既又疑宜臼實不德，孟子何爲以「親親之仁」許之？不知此特就詩以論詩耳。又況孽子  
被放，良心易見。宜臼縱不德，未至大惡。當此操心慮患，至危且深之際，獨無良心發現，而有一言  
之可取耶？觀其三章追思父母，沉痛迫切，如泣如訴，亦怨亦慕，與舜之號泣於旻天何異？千載下讀  
之，猶不能不動人。以屬毛離裏之思，則以「親親之仁」許之也，抑又何怪？然此特其良心之偶一發

見耳。若舜則五十而慕，故稱「大孝」，又非可同日並語者。全詩大旨，此章盡之。餘不過反覆申言被放之由及見逐之苦。或興或比，或反或正，或憂傷於前，或懼禍於後，無非望父母鑒察其誠，而怨昊天而降罪無辜。此謂情文兼到之作。宜聖雖欲刪之而不忍刪也。而謂孟子能不節取之哉？至其布局精巧，整中有散，正中寓奇，如握奇率，然離奇變幻，令人莫測。讀者熟思而細玩之，當自有得，勿煩多贅。又，此詩與《邶·谷風》同爲棄妻逐子，而有風、雅之異者。蓋彼寓言，此則實事，故氣體亦因之不同耳。噫，觀於此，不又可以識風、雅之辨歟？

【眉評】「一章」呼天自訴總起。「二章」去國景象，觸目傷心。「三章」追慕父母，言極沉痛，筆亦鬱勃頓挫之至。「四、五章」二章以舟流、壞木作比，見逐子失親，無所歸依之苦。「六章」此章先言投兔、死人，反跌忍心。「七章」此章先言信讒，後以伐木、析薪反形不惠，用意同而章法却變。「八章」去國後猶當謹言，華子之慮患深矣。

【集釋】「弁」將飛拊翼貌。何氏楷曰：弁，通作拊，拊手之義。鳥之將飛，而拊翼似之。「鸛」雅鳥也。小而多羣，腹下白，江東呼爲鸛鳥。毛氏長曰：鸛，卑居。卑居，雅鳥也。「斯」語詞也。「提提」羣飛安閒之貌。「穀」善也。「罹」憂也。「蹢躅」平易也。「周道」大道也。「鞠」窮也。「怒」思也。「擣」春也。「假寐」不脫衣冠而寐。「疾」疾也。「桑梓」二木名。桑可給蠶食，梓具器用。古者田園皆種之，故多先人手植以遺子孫者，後人賴其利用，又爲祖宗父母所遺，是以過其下必恭敬止。今稱父母之邦爲「桑梓」，卽此意。「瞻」尊仰也。「依」親倚也。「屬」連也。「毛」膚體之餘氣末屬也。「離」麗也。

〔裏〕心腹也。〔辰〕猶時也。〔菀〕茂盛貌。〔蜩〕蟬也。〔嚙嚙〕聲也。〔漼〕深貌。〔漼漼〕衆也。〔居至也〕。〔遑〕暇也。〔伎伎〕舒貌。孔氏穎達曰：獸走，故以遲相待。羅氏願曰：鹿愛其類，發於天性，欲食皆鳴相召，志不忍也。〔雉〕雉鳴也。孔氏穎達曰：《高宗彤日》：「雉升鼎耳而雉。」《說文》云：「雉，雄雉鳴也。雉鳴而句其頸。」故字從佳句。〔壞〕傷病也。〔寧〕猶何也。〔先之〕王氏安石曰：免見迫而投人，人宜利而取之也。乃或先之，使得逃避。案：先，去聲。〔塹〕埋也。毛氏萇曰：塹，路冢也。案：《左傳》曰：「道塹相望。」〔秉〕執也。〔隕〕墜也。〔醴〕報也。〔惠〕愛也。〔舒〕緩也。〔究〕察也。〔倚〕倚也。〔他〕隨其理也。〔佗〕《集傳》：佗，加也。姚氏際恒曰：佗即他，謂音唾，訓加，似無意義。予、與同。謂舍彼之有罪而予之他人耳。

【標韻】斯四支提、罹並同本韻 何五歌何同二字自爲韻 道十九陌草、擣、老並同本韻 憂十一尤首二十五有叶韻 梓四紙止同母二十五有裏紙在十脂叶韻 嚙八霽潁同屆十卦寐四真通韻 伎四支雌、枝、知並同本韻 光十七霽，叶蘇晉反。塹十二霽 忍十一稊隕同叶韻 醴十二尤究二十六宥叶韻 倚四紙，叶居何反。他《集傳》：教氏反，叶湯何反。陳氏《音韻攷》曰：《說文》無他字。篆文它，也相似，疑爲拖移之訛。佗五歌叶韻 山十五刪泉一先言十三元垣同通韻 笄二十五有後同本韻

### 巧言 嫉讒致亂也。

悠悠昊天，曰父母且。無罪無辜，亂如此撫。昊天已威，予慎無罪。昊天泰撫，予慎無辜。

一章亂之初生，承上。僭始既涵，亂之又生，君子信讒。點信字。君子如怒，反信字。亂庶遄沮，君子如祉，亂庶遄已。二章君子屢盟，亂是用長。轉入信字。君子信盜，亂是用暴。盜言孔甘，亂是用餒。造語奇，信字透。匪其止共，維王之邛。三章奕奕寢廟，君子作之。振起。秩秩大猷，聖人莫之。他人有心，予忖度之。躍躍覓兔，遇犬獲之。比。○四章荏染柔木，君子樹之。興。往來行言，心焉數之。蛇蛇碩言，出自口矣。巧言如簧，顏之厚矣。五章彼何人斯？直呼其人。居河之麋。無拳無勇，職爲亂階。既微且煇，爾勇伊何？爲猶將多，爾居徒幾何？六章

右「巧言」六章，章八句。《集傳》云：以五章「巧言」三字名篇。此詩大旨因讒致亂，而讒之所以能人與不能人，則信與不信之故耳。故前三章皆言信讒，而至此讒人以爲盜。甘之者不唯不知其人之有甚乎盜，而且嗜其言以如飴，則盜亦益甘其言以餌嗜者，而進而餒之。在餒者方且以爲忠言可聽，而不知其亂機已形，豈甘讒乎？實餒亂耳！然讒非易進也，有積漸焉。容而受之，譖乃能入。使其初人，怒以相拒，則讒亦遽止矣。否則從善如流，讒無由進，亂亦何自而生乎？唯王不然，而又甘之，是以天心變亂，罪及無辜。然後屢盟相要，欲以止亂，其何能及？雖然，讒亦何難辨哉？夫「奕奕寢廟」，君子尚能作之，「秩秩大猷」，聖人亦恒定之，豈讒人私心而予不能度之乎？使予而付是心也，如犬獵兔，無不獲矣。奈王性優柔，不能自決，「往來行言」，未嘗不「心焉數之」。而知其是非之所在，獨至

浸潤之譖，膚受之愬，行乎其間，則不能以無惑。蓋巧言無恥而如簧，碩言出口而尚訥，故訥者惡聽而巧者易入也。噫，彼何人哉？而言之巧有如是哉？論其居至卑且下，論其材至柔且懦，論其疾則更微而且燠，而乃憑此三寸舌以惑亂君心，國政因之而紊，天意因之而變，人民亦因之而散。不知者方疑其爲謀甚多而負勇實甚，而豈知其人乃卑卑無足道哉？卽其徒之倡而和者亦無幾何。若鋤而去之，根株不難淨盡。奈王不悟，則終未如之何也。已矣！此必有所指，惜史無徵，序不足信，徒存空言以爲世戒，俾知信讒之足以召亂也。如此，旨亦微哉！

【眉評】「一章」從遭亂虛起，伏下亂階。「二章」緊跟亂字，卸下信讒，以止讒作開。「三章」以長亂作合，亂卽生於讒也。以上皆因信讒以致亂之故。「四章」此下言止讒不難，特提「寢廟」、「大猷」以起下文，見讒人之心亦易察耳。「五章」其「碩言」與「巧言」之分，亦在「蛇蛇」、「如簧」上辨之而已。「六章」讒人毫無才能，唯憑口舌，足爲亂階。點明致亂之由，章法一線穿成。

【集釋】「悠悠」遠大之貌。「且」語辭。「懔」大也。「已泰」皆甚也。「慎」審也。「僭始」不信之端也。「涵」容受也。「君子」指王也。「遺」疾也。「沮」止也。「祉」猶喜也。「奕奕」大也。「秩秩」序也。「猷」道也。「莫」定也。「躍躍」音的，跳疾貌。「鼯」狡也。「荏染」柔貌。「行言」行道言也。「數」辨也。「蛇蛇」安舒也。「碩」大也，謂善言也。「靡」水草交謂之靡。李氏樗曰：左氏所謂「孟諸之麋」是也。「拳」力也。「階」梯也。「微燠」集傳：「肝瘍爲微，腫足爲燠。」孔氏穎達曰：郭璞云：「肝，脚脛也；瘍，瘡也。」膝脛之下有瘡腫，是涉水所爲。「猶」謀也。「將」大也。

【標韻】且六魚辜七虞憮同威五微憮、辜虞通韻 涵十三覃譌十五咸通韻 怒七遇沮六御通韻 祉四紙已同本韻  
盟八庚長七陽轉韻 盜二十一號暴同本韻 甘覃餞同本韻 共二冬印同本韻 作十葉莫、度並同獲十一陌叶  
韻 樹七廉數同本韻 口二十五有厚同本韻 斯四支廉同階九佳轉韻 何五歌多、何並同本韻

### 何人斯 刺反側也。

彼何人斯？故作疑詰之辭。其心孔艱。全篇之主。胡逝我梁，不入我門？伊誰云從？維暴之云。略略點明其人，仍不實指爲誰。○一章二人從行，誰爲此禍？胡逝我梁，不入唁我？始者不如，今云不我可。有始無終。○二章彼何人斯？胡逝我陳？我聞其聲，不見其身。有聲無形。不愧于人，不畏于天。三章彼何人斯？其爲飄風。胡不自北？胡不自南？踪跡無定。胡逝我梁？祇攪我心。四章爾之安行，亦不遑舍；爾之亟行，遑脂爾車？壹者之來，云何其盱？一望其來。○五章爾還而入，我心易也；還而不入，否難知也。壹者之來，俾我祇也。再望其來。○六章伯氏吹壎，仲氏吹箎。及爾如貫，諒不我知。出此三物，以詛爾斯。更誓以心。○七章爲鬼爲蜮，則不可得。有覩面目，視人罔極。而終不來，乃直斥其人，而不忍隱矣。作此好歌，以極反側。卒乃點明心艱之至。○八章

右《何人斯》八章，章六句。《小序》謂「蘇公刺暴公」。暴公爲卿士而譖蘇公，故蘇公作詩以絕之。然



詩中只有暴字而無蘇字，故《集傳》及諸家多疑之。愚謂《小序》雖偽，其來已久，此等證據，或有所傳，今亦不必過爲深考。且刺暴公，則只可明題暴字，安能更有蘇字？唯案詩意，通篇極力摹寫小人反側情狀，未及讒譖一語，止「誰爲此禍」四字見其互相傾軋之意，似不專指譖譏言。小人之傾君子，未嘗不譖，未嘗不翹，但詩既未明言，則亦不必定以此立說也。況詩始云「不入我門」，繼卽詢之「伊誰云從」，始知其維暴公之從。似此人初與蘇公和好，繼慕暴公權勢，遂疎此而親彼，以至互相傾軋，釀成大禍，而又不來相弔。故曰「二人從行，誰爲此禍」。蓋此詩不徒爲暴公發，乃專斥依附暴公權勢而傾蘇公之人耳。小人欺天罔人，毫無畏忌，亦不知恥。是以交友則始合終離，行事則有影無形，居心則忽南忽北，行踪詭秘，令人莫測。所謂「爲鬼爲蜮」，心極奸險，不徒以譖譏爲工者也。然蘇公雖受其禍，未肯遽與之絕，仍望其來者再，至欲出三物以與盟心。亦因曩昔和好，不啻如壠如箠之相應而相和，今忽決裂至此，非君子交友大道，故不惜委曲以相望。而不料其人終不自反，是其心之反側誠難定也。乃形諸歌咏，以見交游不終之故如此。然則何以列之於《雅》？夫君子小人同秉國政，互相水火。君不能正之於上，臣必亂之於下。朋黨勢成而君心孤立，其國焉得不亡？君子讀《詩》至此，不能無慨於其際云！

【眉評】「一章」開口直刺心艱，而不言何人，使譏者聞之，自知所警。「二、三、四章」此三章極力摹寫譏人性情不常，行踪詭秘，往來無定。跟上「心艱」，起下「鬼蜮」，可謂窮形盡相，毫無遁情。「五、六章」此二章故作和緩之筆，文勢至此一曲，亦詩人忠厚待人之意。「七章」追念從前和好，如壠如箠，

反形下文「爲鬼爲蜮」。「八章」末句結出「反側」二字，應上「心艱」，首尾一氣相承。蓋惟「心艱」，是以「反側」，小人心迹，千古如見。

【集釋】「艱」險也。「喧」弔也。「陳」堂塗也，堂下至門之徑也。「舍」息也。「盱」集傳：盱，望也。「字林」云：「盱，張目視也。」「易」曰：「盱豫，悔。」「還」返也。「易」說也。「祗」安也。「塹」集傳：樂器。土曰塹，大如鵝子，銳上平底，似稱鍾，六孔。竹曰箎，長四寸，圍三寸。七孔，一孔上出，徑三分，凡八孔。橫吹之。「如貫」如繩之貫物。言相連屬也。「諒」誠也。「三物」犬、豕、雞也。刺其血以詛盟也。「蜮」集傳：蜮，短狐也。江、淮水皆有之，能含沙以射水中人影，其人輒病，而不見其形也。陸氏德明曰：蜮狀如鼈，三足，一名射工，俗呼之水弩。「覩」面見人之貌也。「反側」反覆無常也。

【標韻】艱十五刪門十三元。云十二文。通韻 禍二十舒我、可並同本韻 陳十一真身同天一先通韻 風一東南十三覃心十二侵叶韻 舍二十一禡，叶商居反。車六魚盱七虞叶韻 易十一陌知四支祗同叶韻 箎支知、斯並同本韻 蜮十三職得、極、側並同本韻

### 巷伯 遭讒被宮也。

妻兮斐兮，成是貝錦。比。文致之罪。彼譖人者，亦已太甚！一章哆兮修兮，成是南箕。比。簸揚其說。彼譖人者，誰適與謀？二章緝緝翩翩，謀欲譖人。慎爾言也，謂爾不信。跌回，譖人一面。○三章捷捷幡幡，謀欲譖言。豈不爾受，既其女遷。既不信則必遷怒，較前章更深。○四章驕人

好好，勞人草草。承上。蒼天蒼天，視彼驕人，矜此勞人！開下。○五章彼譖人者，誰適與謀？取彼譖人，投畀豺虎；豺虎不食，投畀有北；有北不受，投畀有昊！故作痛快語以洩其憤，亦無可如何之意而已。○六章楊園之道，猗于畝丘。興。寺人孟子，作爲此詩。凡百君子，敬而聽之。淡淡作收，筆意一變。○七章

右《巷伯》七章，四章章四句，一章五句，一章八句，一章六句。《序》謂「刺幽王」，泛而無著。《大序》云「寺人傷于讒，故作是詩」，此亦詩中明文，無煩多贅。唯《集傳》引班固《司馬遷贊》云「迹其所以自傷《小雅》·《巷伯》之倫」，其意亦謂巷伯本以被譖而遭刑也，遂以爲「時有遭讒而被宮刑爲巷伯者作此詩」。其說較有理。不然，寺人於王最近，誰得而譖之？即云同類自譖，與寺人惡讒作詩以儆君子，亦無此悲憤痛絕，不欲與共戴天之語。此必腐遷之流無疑。其禍同，其文亦同，故班固引以譬贊。此亦天之忌才，故設此一局以厄文人。未有腐遷，先有巷伯，古今人可同聲一哭也！雖然，遷不遭刑，文亦不奇，伯不遭禍，詩何能傳？此又天之玉成二人如出一轍，豈不奇哉？使伯回思至此，自當破泣爲笑。則「投畀豺虎，豺虎不食」之人，亦可以置之度外，不必更投諸有北與有昊矣。唯其時善人遭讒被禍至於此極，不能不令人扼腕而嘆彼蒼之夢夢耳！

【眉評】「一、二章」凡譖人者不外文致、箴揚兩端。首二章已將小人伎倆從喻意一面寫足，以下便不費手。「三、四章」此二章進一層說，言譖人者亦將自受其譖。「五章」譖人與受譖於人兩面雙題，總上起下，爲全篇樞紐。「六章」處置小人，不但揮諸天外，且欲得而甘心焉。「七章」受譖者既已大受

其害，則惟有作詩以戒後之君子勿受其害而已。

【集釋】「姜斐」毛氏甚曰：文章相錯也。【貝】陸氏璣曰：貝，龜鼈之屬，其文彩之異、大小之殊甚衆。古者貨貝是也。餘蜆，黃爲質，以白爲文；餘泉，白爲質，黃爲文；又有紫貝，其白質如玉，紫點爲文，皆行列相當。其大者常有徑一尺，小者七八寸。【哆侈】微張之貌。【南箕】箕，星名。嚴氏粲曰：箕，東方之宿，考星者多驗於南方，故曰南箕。【集傳】南箕四星，二爲踵，二爲舌。其踵狹而舌廣，則大張矣。朱氏謀埠曰：天文，箕主口舌，以喻讒者。【適】主也。言有所以主之者，則其爲譖也深矣。【緝】口舌衆也。【翩翩】往來貌。【不信】謂聽者有時而悟，亦將不信爾言矣。【捷捷】僥利貌。【幡幡】反覆貌。【女遷】謂禍亦將遷及於女矣。【驕人】指譖行而得意之人也。【勞人】指受譖之人。【投】棄也。【北】北方寒涼不毛之地。【昊】昊天也。【楊園】楊生下濕之地也。【猗】加也。【畝丘】高地也。【寺人】內侍也。【孟子】其字也。蓋被宮而爲寺人之官者也。

【標韻】錦二十六寢其同本韻 箕四支謀十一尤叶韻 人十一真信同本韻 言十三元遷一先通韻 好十九皓草同本韻 謀尤，叶滿補反。虎七廣北十三職昊皓，叶許候反。叶韻 丘尤，叶祛奇反。詩支之同本韻

## 谷風 傷友道絕也。

習習谷風，維風及雨。將恐將懼，維予與女。將安將樂，女轉棄予。一章習習谷風，維風及雨。將恐將懼，維予與女。將安將樂，女轉棄予。二章習習谷風，維山崔嵬。無草不死，無

木不萎。忘我大德，思我小怨。三章

右《谷風》三章，章六句。此朋友相怨之詩。而《序》固謂之「刺幽王」，何也？夫天下俗薄，朋友道衰，以此刺王，何事不可以刺王？且亦天下古今通病，豈獨幽王時爲然耶？凡人處世，當患難恐懼時，則思朋友；遇安樂無事日，則謝交游。受人大德，轉瞬不記，遭人小怨，終身難忘者，比比皆是，而詩固云，爾也亦身受其怨，而不能自己焉耳。然詩體絕類乎風，而乃列之於雅，姚氏以爲「不可解」，愚亦以爲不可解。豈其間固不能無所誤歟？

【集釋】《谷風》姚氏際恒曰：嚴氏曰：「來自大谷之風，大風也。又習習然連續不斷，繼之以雨，喻連變恐懼之時，猶後人以『震風、淩雨』喻不安也。」《將》且也。《類》《集傳》：「類，風之焚輪者也。孔氏穎達曰：『釋天』云：『焚輪謂之類。』孫炎曰：『迴風從上下曰類。』然則類者，迴風從上而下，力薄不能更升，谷風與相遇，乃相扶而上。姚氏際恒曰：『維風及類』，類，暴風也。《真》置同。《崔嵬》山巔也。《草死》木萎，言草木值大谷暴風無不萎死也。《集傳》云：『然猶無不死之草，無不萎之木』，恐非語氣。姚氏際恒曰：言草木萎死，無長生之意。舊說谷風爲生長，習習爲和調，難通矣。

【標韻】雨七庚女、予並同本韻 類十灰懷九佳遺四支通韻 嵬灰萎支通韻 德十三職怨十三元叶韻

蓼莪 孝子痛不得終養也。

蓼蓼者莪，匪莪伊蒿。比。哀哀父母，生我劬勞。一章蓼蓼者莪，匪莪伊蒿。比。哀哀父母，

生我勞瘁。兩章雙臂作起。○二章餅之罄矣，維罍之恥。比。鮮民之生，不如死之久矣！沉痛語。無父何怙，無母何恃？題面。出則銜恤，人則靡至。寫出無依情狀。○三章父兮生我，母兮鞠我。題意。拊我畜我，長我育我，顧我復我，出入腹我。腹字鍊。欲報之德，昊天罔極！四章南山烈烈，飄風發發。興。民莫不穀，我獨何害！五章南山律律，飄風弗弗。興。民莫不穀，我獨不卒！二章雙陪作收，篇法整飭。○六章

右《蓼莪》六章：四章，章四句；二章，章八句。此詩爲千古孝思絕作，盡人能識。唯《序》必牽及「人民勞苦」，以「刺幽王」，不惟意涉牽強，即情亦不真。蓋父母深恩與天無極，孰不當報？唯欲報之，而或不能終其身以奉養，則不覺抱恨終天，悽愴之情不能自己耳。若謂人民勞苦，不得終養，始思父母，則遇勞苦乃念所生，不遇勞苦即將不念所生乎？又況詩言「民莫不穀，我獨何害」，「我獨不卒」者，明明一己所遭不偶，與人民無關也。詩首尾各二章，前用比，後用興；前說父母劬勞，後說人子不幸，遙遙相對。中間二章，一寫無親之苦，一寫育子之艱，備極沉痛，幾於一字一淚，可抵一部《孝經》讀。固不必問其所作何人，所處何世，人人心中皆有此一段至性至情文字在，特其人以妙筆出之，斯成爲一代至文耳！又何暇指其爲刺王作哉？

【眉評】「一、二章」先言父母劬勞、勞瘁，總起。〔三章〕次言無父無母，拍合題位。〔四章〕追念父母劬勞之實。姚氏云，勾人淚眼全在此無數我字，何必王哀！（五、六章）末二章以衆襯己，見己之抱恨獨深。

【集釋】「藹」長大貌。【莠】美菜也。【蒿】賤草也。嚴氏桑曰：「釋草曰：『藹之醜，秋爲蒿。』」釋云，醜，類也。言藹、蒿、藹、莠之類。春始生，氣味既異，故其名不同。至秋老成，則皆蒿也。此說藹、蒿甚明。以莠形蒿，莠美而蒿惡。【藹】集傳：藹，牡蒿也。三月始生，七月始華，如胡麻華而紫赤。八月爲角，似小豆角，銳而長。案：此蒿之蠶者。【餅】皆酒器也，餅小罍大。【罄】盡也。【鮮】寡也。【恤】憂也。【鞠】皆養也。【拊】拊循也。【育】覆育也。【顧】旋視也。【復】覆也，不能暫舍也。【腹】懷抱也。【罔】無也。【極】窮也。【烈烈】高大貌。【發】疾也。【穀】善也。【律律】猶烈烈也。【弗弗】猶發發也。【卒】終也。不卒，言不得終養也。

【標韻】蒿四查勞同本韻 藹五未瘁四實通韻 恥四紙矣、恃並同至真叶韻 鞠一屋畜、育、復、腹並同本韻 德十三職極同本韻 烈九屑發六月害九泰、叶音易、叶韻 律四質弗五物卒質本韻

## 大東 哀東國也。

有饒簋殮，有捄棘匕。興。周道如砥，其直如矢。君子所履，小人所視。瞻言顧之，潛焉出涕。徐徐龍題。○一章小東大東，突接東國，緊。杼柚其空。正旨。糾糾葛屨，可以履霜。佻佻公子，行彼周行。既往既來，使我心疚。二章有冽洊泉，無浸穫薪。比。契契寤歎，哀我憚人。薪是穫薪，尚可載也。哀我憚人，亦可息也。三章東人之子，職勞不來。西人之子，粲粲衣服。以西人形東人。舟人之子，熊羆是裘。私人之子，百僚是試。四章或以其酒，不以其漿。

輶輶佩璫，不以其長。維天有漢，監亦有光。忽人天文志，奇。跂彼織女，終日七襄。應上「杼柚」。○五章 雖則七襄，不成報章。皖彼牽牛，不以服箱。因織女出牽牛。東有啟明，西有長庚。有掾天畢，載施之行。因牽牛又帶出以下諸星。四句似開文，然節去此，文氣即不舒。○六章 維南有箕，不可以簸揚。維北有斗，不可以挹酒漿。應上「酒漿」。維南有箕，載翕其舌。維北有斗，西柄之揭。應西人爲東人之厄。○七章

右《大東》七章，章八句。姚氏曰：「《大序》謂『東國困于役而傷于財』，是已。謂『譚大夫作』，則無可稽。朱子亦以爲『無據』，然又恐其或有所傳而不敢駁，故《集傳》仍之。愚謂譚亦東國，詩雖無據，安知其不爲譚所作耶？此等考據，可以不必。詩本咏政賦煩重，人民勞苦。人後忽歷數天星，豪縱無羈，幾不可解。不知此正詩人之情，所謂『光燄萬丈長』也。試思此詩若無後半文字，則東國困敝，縱極寫得十分沉痛，亦不過平常歌咏而已，安能如許驚心動魄文字？所以詩貴有聲有色，尤貴有興有致，此興會之極爲歎舉者也。然其驅詞寓意，亦非漫無紀律者。四章以上，將東國愁怨與西人驕奢兩相形，正喻夾寫，已極難堪。『天漢』而下，忽仰頭見星，不禁有觸於懷，呼天自訴。因杼柚之空，而怨及織女機絲亦不成章，因織女虛機，而怨及牽牛河鼓難駕服箱。不寧唯是，卽啓明、長庚之分見東西，亦若有所怨及焉，以其徒在天而燦然成行也。於是更南望箕張，北顧斗柄。箕非徒無用，不可以簸揚，反張其舌而若有所噬，斗非徒無益，不可以挹酒漿，反揭其柄而若取乎東。民之困於王者，既若彼其窮，而人之厄於天者，又如此其極。天乎，何其困厄東國若是乎？民情至此咨怨極矣！故不



必論其辭之有意義無意義也。若論意義，織女、牽牛、南箕、北斗，有意義者也；啓明、長庚、天畢，無意義者也。使以其無意義節而去之，直接南箕句，未爲不可。然文氣迫而不舒，光饒亦因之頓減矣。此中消息非老於文者不知，即非深乎詩者亦未可與論得失也。倘斤斤然字句間求之，詎能免高叟之誚歟？後世李白歌行，杜甫長篇，悉脫胎於此，均足以卓立千古。三百篇所以爲詩家鼻祖也。

【眉評】【五章】以下大放厥詞，借仰觀以洩胸懷積憤。與上「杼柚」、「酒漿」等字若相應若不相應。奇情縱恣，光怪陸離，得未曾有。後世歌行各體從此化出，在三百篇中實創格也。

【集釋】【饒】滿盛貌。【殽】熟食也。毛氏萇曰：謂黍稷也。孔氏穎達曰：禮之通例，皆簠盛稻粱，簠盛黍稷。【杼】曲貌。【柚】集傳：以杼爲匕，所以載鼎肉而升之於俎也。【砥】礪石。【矢】言直也。【瞻】反顧也。【潛】涕下貌。【小東大東】東方大小之國也。【杼】持緯者也，用梭以行緯也。【柚】陸氏德明曰：柚，本又作軸。董氏道曰：柚，卷織者。【空】盡也。【佻】輕薄不耐勞苦之貌。【冽】寒也。【汎】音軌。側出曰汎泉。【穫】刈也。【契契】憂苦也。【憚】勞也。【東人】東諸侯之人也。【西人】西京之人也。【職】專主也。【來】慰撫也。【私人】皂隸之屬也。【僚】官也。【試】用也。【韞韞】長貌。【璫】以瑞玉爲佩也。【漢】天河也。【跂】姚氏際恒曰：跂，跂予望之之謂。【織女】星名。【七襄】周天十二次，自卯至酉，一日而歷七次也。【睨】視也。【牽牛】星名。【服】駕也。【箱】車箱。【啓明長庚】皆金星。以其朝在東，先日而出，故謂之啓明；以其夕在西，後日而入，故謂之長庚也。【天畢】畢星也。【行】行列也。【箕斗】二星名。以夏秋之間見於南方，云北斗者，以其在箕北耳，與北斗異。【翕】引也。

「舌」箕下二星也。朱氏公遷曰：箕，四星，在天漢之中。二爲踵，在上；二爲舌，在下。踵反在上，故曰引其舌也。

【標韻】七四紙砥、矢、履、視並同涕八霽通韻 東一東空同本韻 霜七陽行同本韻 來，十灰，叶六直反。疚二十  
六宥，叶乾力反。叶韻 薪十一真同本韻 載十一隊，叶節力反。息十三職叶韻 來音齊，叶六直反。服一屋，叶  
北反。裘十一尤，叶渠之反。試四寘，叶申之反。叶韻 漿七陽長、光、襄並同本韻 章陽箱同庚八庚行陽轉韻  
揚陽漿同本韻 舌九屑揭同本韻

### 四月 逐臣南遷也。

四月維夏，自首夏起。六月徂暑。先祖匪人，胡寧忍予？？ 不念先臣舊烈，忍逐其子孫。○一章秋日  
淒淒，歷秋。百卉具腓。亂離瘼矣，奚其適歸。又遭亂離，將安所歸？○二章冬日烈烈，飄風發  
發。歷冬。爲時既久。民莫不穀，我獨何害？三章山有嘉卉，侯栗侯梅。廢爲殘賊，莫知其尤。  
廢同縲囚，不知何罪。○四章相彼泉水，載清載濁。我日構禍，曷云能穀？不能同流，所以致禍。○五  
章滔滔江漢，南國之紀。自西而南，經程又遠。盡瘁以仕，寧莫我有。竭誠報國，君反不知。○六章  
匪鶉匪鳶，比。翰飛戾天。不能高飛。匪鱸匪鮪，潛逃于淵。不能潛伏。○七章山有蕨薇，隰有  
杞桋。興。君子作歌，維以告哀。只好作詩，聊以志痛而已。○八章

右《四月》八章，章四句。此詩明明逐臣南遷之詞，而諸家所解，或主遭亂，或主行役，或主構禍，或主

思祭，皆未嘗卽全詩而一誦之也。頭緒既紛，不知所從。故《序》以爲「刺幽王在位貪殘，下國構禍，怨亂並興焉」。割裂詩體，雜湊成言，前後文義，竟不能通。《集傳》雖專主「遭亂」說，而曰：「我先祖豈非人乎？何忍使我遭此禍也。」因遭亂而怨及祖宗非人，天下豈有如是子孫？至「廢爲殘賊」，則又云：「在位者變爲殘賊，誰之過哉？」方敘己之遭亂，忽言在位兇殘，語既無根，事亦不倫。且訓廢爲變，恐無此解。詩詞並不難解，其奈諸說自生轉轉，何哉？愚謂當時大夫，必有功臣後裔，遭害被逐，遠謫江濱者，故於去國之日作詩以志哀云。冒暑遠征，人情所難，今遭放廢，適當其厄，豈得已哉！然予雖獲罪，而先人恒有功。論貴論功之典行，亦當寬宥而矜全之，何朝廷不齒我祖於人，而獨忍加罪于予耶？故自夏徂秋，由秋而冬，歷時三序，始抵南國。則見江、漢交流，滔滔不斷，包絡大地而經帶乎荆、揚，何其有條而有理也！夫二瀆納川而注之海，民得賴以安居，是南國之有江、漢，南國之事皆可坐而就理矣。獨予盡瘁王室，而王終不我知，而我有者何哉？此其中蓋亦有故。譬彼泉流，清濁異派，既不同流而合污，自當見嫉而構禍。予之放廢，殘賊之所爲也。故欲問其尤，莫知所致。蓋展輪而高飛者，鵠與鳬也；潛淵而深藏者，鱧與鮪也。予既匪鱧而匪鮪，宜乎其不能潛藏而避患，又匪鵠而匪鳬，更宜乎其不能高飛而遠難。此遷謫之禍所由來歟？嗟嗟，孤臣遠邁，悵望何之？游子無家，去將焉往？又況亂離多故，萬民交病，更覺無所依歸。回憶來時，景象頻更：秋則白日淒淒，冬則飄風發發。雖南方嘉卉，不少梅栗，而江干落寞，百草皆枯，不覺愴然泣下。有慨乎於其際者，蓋人皆安樂，而我獨窮愁，未免所遭之不偶耳。雖然，薇蕨生山，杞桮在隔，物各有宜，人亦隨遇，豈可例視？夫是

以作爲歌詩，用訴哀情，亦聊以抒吾鬱積之氣而已矣。朱氏善曰：「此詩專以爲行役，則『先祖匪人』之怨，其辭過於深；專以爲憂亂，則『滔滔江漢』之詠，其辭過於遠。然則是詩也，蓋大夫行役而憂時之亂懼其禍之辭也。」姚氏際恒曰：「此疑大夫之後爲仕者遭小人構禍，身歷南國，而嘆其無所容身也。」是二說者，蓋庶幾焉，而未盡也。愚故爲之衍其緒如此云。

【眉評】「一章」冒暑而行。 「二、三章」歷經三時。 「四章」獲罪之冤，實爲殘賊人所擠。 「廢」字乃全篇眼目。 「五章」召禍之由。 「六章」遠謫南國。 「七章」禍無可逃，妙以譬喻出之。 「八章」結始點明。

【集釋】「四月」建巳月，孟夏，卽周之四月也。諸家作夏之四月者非，另有辯。 「六月」建未月，季夏也。卽此亦足見周正未改歲時也。 「徂」往也。 「淒淒」涼風也。 「卉」草也。 「腓」姚氏際恒曰：腓當依「爾雅」作非。非訓病，若腓則屬足趾。 「瘼」病也。 「侯」維也。 「廢」放廢也。 「爲」去聲。 「殘賊」指在位貪殘賊民之人也。 「尤」咎也。 「江漢」見周南·漢廣。 「紀」集傳：紀，綱紀也，謂經帶包絡之也。 「有」識有是人也。 「鷦」鷦也。 「鷽」亦鷽鳥也。 「鱣」大魚也。 「杞」枸櫞也。 「榱」赤棟也。

【標韻】暑六韻予同本韻 腓五微歸同本韻 發六月害九泰叶韻 梅十灰尤十一尤叶韻 渴三覺數一屋轉韻  
紀四紙有二十五有叶韻 天一先淵同本韻 榱四支哀十灰通韻

以上《小旻》之什凡十篇。案是什《序》皆以爲「刺幽王」，今聞之，僅《小旻》、《大東》二篇爲刺王之作，其餘皆

臣子自傷所遭不偶，或以弟兄多咎，或以朋友不終，或因父母早歿，致不得終養，或因朝臣排擠，致被宮而被

讀，無非各寫遭際，各抒憤懷。雖《小弁》被廢，子未可以刺父；《巷伯》遭刑，臣亦未可以刺君。今乃概謂之「刺」，其可乎哉？愚謂《三百》佳詩，純被腐儒說壞，即此亦見一斑。

## 北山之什

### 北山 刺大夫役使不均也。

陟彼北山，言采其杞。偕偕士子，朝夕從事。王事靡盬，憂我父母。一章溥天之下，莫非王土。率土之濱，莫非王臣。大夫不均，我從事獨賢！二章四牡彭彭，王事傍傍。嘉我未老，鮮我方將。旅力方剛，經營四方。三章或燕燕居息，或盡瘁事國；或息偃在牀，或不已于行；或不知叫號，或慘慘劬勞；或棲遲偃仰，或王事鞅掌；或湛樂飲酒，或慘慘畏咎；或出入諷議，或靡事不爲。四章

右《北山》四章，三章章六句，一章十二句。姚氏際恒曰：「末章分三章，今當爲一章，以其文法相同也。」從之。《序》謂「刺幽王」，而不言何人作。《集傳》云：「大夫行役而作此詩。」惟姚氏以爲「此士者所作以怨大夫也」。蓋以詩中有「偕偕士子」及「大夫不均」之語，故不得又謂大夫作耳。幽王之時，役賦不均，豈獨一士受其害？然此詩則實士者之作無疑。前三章皆言一己獨勞之故，尚屬臣子分所應爲，故不敢怨。末乃勞逸對舉，兩兩相形，一直到底，不言怨而怨自深矣。此詩人善於立言處，固不徒以無數或

字見局陣之奇也。

【眉評】歸重獨勞，是一篇之主。末乃以勞逸對言，兩兩相形，愈覺難堪。姚氏曰：或字作十二疊，

奇。末更無收束，竟住，尤奇。

【集釋】「偕偕」強壯貌。「彭彭」不得息貌。「傍傍」不得已貌。「嘉」善也。「鮮」少也，以爲少而難得也。

「將」壯也。「旅」與「齊」同。「燕燕」安息貌。「不知叫號」深居安逸，不聞人聲也。「執掌」集傳：執掌，失容也。言事煩勞，不暇爲儀容也。孔氏穎達曰：「傳」以執掌爲煩勞之狀，故云失容。今俗語以職煩爲執掌，其言出於此。「出入諷議」孔氏穎達曰：謂閒暇無事，出入放恣，議量時政者。

【標韻】杞四紙事四真叶韻 鹽七庚母二十五有叶韻 下二十一馬土虞叶韻 演十一真臣、均並同賢一先通韻  
彭八庚傍七陽將、剛、方並同轉韻 息十三職國同本韻 牀陽行同本韻 號四豪勞同本韻 仰二十養掌同本韻  
韻 酒有咎同本韻 議真，叶魚羈反。爲四支叶韻

### 無將大車 自遣也。

無將大車，祇自塵兮。無思百憂，祇自底兮。一章無將大車，維塵冥冥。無思百憂，不出于類。二章無將大車，維塵離兮。無思百憂，祇自重兮。三章

右「無將大車」三章，章四句。此詩人感時傷亂，搔首茫茫，百憂并集，既又知其徒憂無益，祇以自病，故作此曠達，聊以自遣之詞。亦極無聊時也。「序」謂「大夫悔將小人」，而詩無將小人意。「集傳」又

謂「行役勞苦而憂思者之作」，而詩更無行役語，不知諸儒說《詩》，何以好爲附會也如是？

【集釋】「將」扶進也。「大車」平地任載之車。蓋駕牛者也。「祗」適也。「疢」病也。劉氏曰：當作瘕，與瘕同，眉貧反。案：古音、昏字同寫。「冥冥」昏晦也。「類」《集傳》：類與耿同，小明也。在憂中耿耿不能出也。「離」音壘，猶蔽也。「重」猶累也。

【標韻】塵十一真底四支，當作瘕，叶真韻。叶韻 冥九青類二十四通叶韻 離二冬重同本韻

### 小明 大夫自傷久役，書懷以寄友也。

明明上天，照臨下土。我征徂西，至于荒野。二月初吉，載離寒暑。心之憂矣，其毒大苦。念彼共人，涕零如雨。豈不懷歸？畏此罪罟。一章昔我往矣，日月方除。此一章起句作追憶之辭，章法一變。曷云其還，歲事云莫？念我獨兮，我事孔庶。心之憂矣，憚我不暇。念彼共人，惓惓懷顧。豈不懷歸？畏此譴怒。二章昔我往矣，日月方與。曷云其還，政事愈蹙？歲事云莫，采蕭穫菽。心之憂矣，自貽伊戚。念彼共人，興言出宿。豈不懷歸？畏此反覆。三章落筆同調。○三章嗟爾君子，無恒安處！此二章起句作正喝之辭，又一變。靖共爾位，正直是與。神之聽之，式穀以女。理語無塵腐氣，自是不朽名言。○四章嗟爾君子，無恒安息！靖共爾位，好是正直。神之聽之，介爾景福。五章

右《小明》五章，三章章十二句，二章章六句。此詩與《北山》相似而實不同。彼刺大夫役使不均，此因己之久役而念友之安居。題既各別，詩亦迥異。故此不獨羨人之逸，且勉其不可懷安也。而《序》乃謂「大夫悔仕於亂世」。詩方勉人以「靖共」，已顧自悔其出仕，有是理哉？

【眉評】「一、二、三章」前三章因久役而思友。【四、五章】末二章勗友以無懷安，首尾義意自相環貫。

【集釋】「芄野」地名，蓋荒遠之地，無可考也。【二月】建卯月也。【初吉】朔日也。【毒】言憂心如毒之苦也。【共人】指僚友之處者。共、恭同，即「靖共爾位」之人。【罍】網也。【除】除舊生新，即二月初吉也。【譴怒】罪責也。【與】煖也。【盛】急也。【詒】遺也。【戚】憂也。【反覆】傾倒無常之意。【君子】亦指其僚友也。【靖共】謝氏枋得曰：靖，如「自靖自獻」之靖，凡事謀之心而安也。共，如「溫共朝夕」之共，凡事共敬而不敢慢也。【與】猶助也。【敷】祿也。【以】猶與也。【息】猶處也。【介景】皆大也。【標韻】土七廢野二十一馬暑六語若廣雨、罍並同叶韻。除六御莫七過庶同韻。二十二禍顧遇怒同叶韻。與一星燈、菽並同咸十二錫，叶子六反。宿屋覆同叶韻。處六語與、女並同本韻。息十三職直同福屋叶韻。

### 鼓鐘 未詳。

鼓鐘將將，淮水湯湯。憂心且傷。淑人君子，懷允不忘。一章鼓鐘喑喑，淮水潛潛。憂心且悲。淑人君子，其德不回。二章鼓鐘伐鼗，淮有三洲。憂心且妯。淑人君子，其德不猶。三章鼓鐘欽欽，鼓瑟鼓琴，笙磬同音。以《雅》以《南》，以簫不僭。四章



右《鼓鐘》四章，章五句。此詩循文案義，自是作樂淮上，然不知其爲何時、何代、何王、何事？《小序》漫謂「刺幽王」，已屬臆斷。歐陽氏云：「旁考《詩》、《書》、《史記》，皆無幽王東巡之事。」《書》曰：「徐夷並興」，蓋自成王時，徐戎及淮夷已皆不爲周臣。宣王時嘗遣將征之，亦不自往。初無幽王東至淮、徐之事，然則不得作樂於淮上矣。當闕其所未詳。觀此不惟不信幽王時作，且並詩亦疑其非淮上詩也。嚴氏又云：「古事亦有不見於史而因經以見者」，論固當已，然詩文亦何嘗有幽王字哉？夫疑此詩非幽王時詩也可，且並此詩亦疑其非淮上詩也不可。以詩固云鼓鐘淮上矣。禹導淮自桐柏，東會于泗、沂，東入于海。淮之境固甚寬，不必定指徐夷爲言。又況《常武》伐徐，宣王親征，何云亦不自往？此詩之作，或即在於其時，而誤簡於此歟？玩其詞意，極爲歎美周樂之盛，不禁有懷在昔。淑人君子，德不可忘，而至於憂心且傷也。此非淮、徐詩人重觀周樂，以誌欣慕之作而誰作哉？特史無徵，《詩》更失考，姑釋其文如此，而仍闕其序云。

【眉評】四章極力摹寫周樂之盛作收。

【集釋】《將將》鐘聲也。《淮水》出信陽桐柏山，至淮安入海。《湯湯》沸騰之貌。《回邪也》。《磬》大鼓也。《周禮》作臬，云：「臬鼓，尋有四尺。」《三洲》淮上地。《笙磬三句》姚氏際恒曰：「笙磬同音」，以其異器也，若琴瑟則不言同音矣。此固夫人知之。然別有妙旨：笙在堂上，磬在堂下，言堂上、堂下之樂皆和也。然尤有妙旨：《小雅》言「鼓瑟吹笙」，則瑟依于笙；《商頌》「執鼓淵淵，嘒嘒管聲」，又曰「依我磬聲」，則鼓管依于磬，故言「笙磬」以統堂上、堂下之樂。詩人之善言如此。「南」，《二南》也。

△二南爲文王之詩，後世子孫必以用之爲樂矣。唯「雅」未詳，或△大雅歟？大抵議禮作樂之說出於△三百篇後，不可據以解△三百篇也。然△二南亦非如禮所言以爲歌，蓋以爲籥耳。「籥」，管籥也，吹以應舞也。季札觀樂，所謂「見舞△象△籥△南△籥者」是矣。此△南△籥也，故承之曰「以籥不僭」，謂以籥△南，以籥△雅也。△集傳釋「不僭」之義曰：「言三者皆不僭也」，以籥與雅、南爲三者，謬。〔僭〕亂也。

【標韻】將七陽湯、傷、忘並同本韻 啗九佳潛同悲四支回十灰通韻 整四豪洲十一尤妯、猶並同叶韻 欽十二侵琴、音並同南十三覃僭二十九鮑，叶七心反叶韻

### 楚茨 王者嘗烝以祭宗廟也。

楚楚者茨，言抽其棘。自昔何爲？我藝黍稷。追敘田工之始，是長篇展局法。我黍與與，我稷翼翼。我倉既盈，我庾維億。以爲酒食，以饗以祀，以妥以侑，以介景福。一章濟濟跄跄，入祭事。絜爾牛羊，牲體。以往烝嘗。祭名。或剥或亨，或肆或將。熱而薦之。祝祭于祊，祀事孔明。求神致誠，總束一句。先祖是皇，神保是饗。初獻，神是以享。孝孫有慶，報以介福，降福。萬壽無疆！二章執爨踴躍。下至賤役。爲俎孔碩，俎豆。或燔或炙，君婦莫莫。內而貴者，亞獻。爲豆孔庶，爲賓爲客，獻酬交錯。外而貴者，三獻。禮儀卒度，笑語卒獲。無不知法而得宜。神保是格，報以介福，萬壽攸酢！降神。○三章我孔熯矣，式禮莫愆。承上起下，略爲停頓，是中權過脉法。工祝

致告，「俎賚孝孫。」總詞。苾芬孝祀，神嗜飲食。卜爾百福，如幾如式。既齊既程，既匡既勅，永錫爾極，時萬時億。」四章禮儀既備，鐘鼓既戒，孝孫俎位。工祝既告，「神具醉止」，皇尸載起。鼓鐘送尸，神保聿歸。送神。諸宰君婦，廢徹不遲。祭畢。諸父兄弟，備言燕私。順勢帶起下章。○五章樂具入奏，以綏後祿。人內私燕。爾殽既將，莫怨具慶。既醉既飽，小大稽首。「神嗜飲食，使君壽考。孔惠孔時，維其盡之。子子孫孫，勿替引之。」六章

右《楚茨》六章，章十二句。自此篇至《大田》四詩，辭氣典重，禮儀明備，非盛世明王不足以語此。故《序》無辭以說之，不得不創爲「傷今思古」之論。然詩實無一語傷今，顧安得謂之思古耶？朱晦翁辯之既詳，且疑爲正雅之篇有錯脫在此者，而又指爲「公卿」之詩也，何哉？此詩之非爲公卿作也，他不具論，卽鼓鐘送尸，乃奏《肆夏》，爲天子禮樂，翁豈未之前聞？何其疏忽乃爾耶！至詩體之佳，則姚氏云：「煌煌大篇，備極典制。其中自始至終一一可案，雖繁不亂。」《儀禮·特性》、《少牢》兩篇皆從此脫胎，亦可謂善於論文者矣！

【眉評】「一章」首章總冒，先從稼穡言起，由壘闢而有收成，由收成而得享祀，由享祀而獲福祿。蓋力於農事者，所以爲神饗致其誠也。是祭前一層文字。「二、三章」備言牲醴之潔，俎豆之盛，以及從祀之人莫不敬謹將事，是以神降之福。是初祭，二大段。「四章」祝致神語。「五章」神醉尸起，送尸歸神，「一往肅穆，敬謹之至。是既祭，二大段。」《卒章》人燕族，是祭後一層文字。通篇層次井然，一絲不亂。

【集釋】「楚楚」盛貌。【茨】疾藥也。董氏道曰：鄭康成謂「趨以采齊」，當爲「楚齊」之「齊」。呂氏祖謙曰：「說文」曰：「齊，葵藿也」。而茨則以茅葺屋覆之名。然則當康成世，字猶爲齊，其爲茨者，後人誤也。【抽】除也。【與與翼翼】皆蕃盛貌。【庚】露積曰庚。【億】十萬曰億。【饗】獻也。【妥】安坐也。【集傳】：妥，安坐也。【禮】曰：「詔妥尸」，蓋祭祀筮族人之子爲尸，既奠迎之，使處神坐而拜以安之也。【侑】勸也。【少牢饋食禮】：尸告飽。祝獨侑曰：「皇尸未實，侑。」尸又食。主人不言，拜侑。尸又三飯。【介】大也。【景】亦大也。【濟濟跄跄】言有容也。【烝嘗】冬祭曰烝，秋祭曰嘗。【剝】解剝其皮也。【亨】煮熟之也。【肆】陳之也。【將】奉持而進之也。【祊】廟門內也。【禮記·郊特牲】：「索祭祝于祊，不知神之所在於彼乎，於此乎？」注：索，求神也。輔氏廣曰：王氏云：凡祀，裸鬯則求諸陰，燔蕭則求諸陽，索祭祝于祊，則求諸陰陽之間。蓋魂無不之，神無不在，求之之備如此。【孔】甚也。【明】猶備也，著也。【皇】大也。【保】安也。【神保】姚氏際恒曰：神保，何玄子曰：「本其生存謂之祖，言其精氣謂之神」。朱子謂神保，蓋尸之嘉號，猶「楚詞」所謂「靈保」者。案「楚詞」云：「思靈保兮賢姱」，乃謂神安附於巫身，以「賢姱」目巫，非以「靈保」目巫也。若以「神保」名尸，則于第三章「神保是格」固自難通，而第五章「神保聿歸」之前，不應變言「皇尸載起」矣。【孝孫】主祭人也。【饗】寵也。【階階】敬也。【燔】燒肉也。【炙】炙肝也。皆所以從獻也。【特性】：主人獻尸，賓長以肝從；主婦獻尸，兄弟以燔從，是也。【君婦】后也。【莫莫】沖漠之意。【豆】集傳：豆所以盛內羞庶羞，主婦薦之也。孔氏穎達曰：內羞，在右，陰也；庶羞在左，陽也。【賓客】集傳：賓客筮而戒之，使助祭者既獻尸而遂與之相獻酬也。主

人酌賓曰獻，賓飲主人曰酢。主人又自飲而復飲賓曰酬，賓受之，莫於席前而不舉，至旅而後少長相勸，而交錯以徧也。〔卒〕盡也。〔度〕法度也。〔獲〕得其宜也。〔格〕來也。〔酢〕報也。〔煖〕竭也。〔工祝〕工於爲祝也。〔蕤芬〕香也。〔卜〕予也。〔幾〕期也。〔式〕法也。〔齊〕整也。〔稷〕疾也。〔匡〕正也。〔敕〕戒也。〔極〕至也，衆善所歸也。〔祖位〕《集傳》：祭事既畢，主人往阼階下西面之位也。〔致告〕《集傳》：祝傳尸意，告利成於主人，言孝子之利養成畢也。〔神醉四句〕《集傳》：於是神醉而尸起，送尸而神歸矣。曰「皇尸」者，尊稱之也。〔鼓鐘〕者，尸出人奏《肆夏》也。鬼神無形，言其醉而歸者，誠敬之至，如見之也。〔諸宰二句〕姚氏際恒曰：諸宰徹諸饌，君婦徹簋豆，諸宰徹于先，君婦徹于後，故言諸宰在君婦先。何玄子以君婦在諸宰後，遂謂君婦爲九嬪、世婦、女御之屬，鑿也。〔不遲〕以疾爲敬也。〔人奏〕《集傳》：凡廟之制，前廟以奉神，後寢以藏衣冠。祭於廟而燕於寢。故於此將燕，而祭時之樂，皆人奏於寢也。〔後祿〕前祭既受祿矣，故以燕爲將受後祿而緩之也。〔惠〕順也。

【標韻】棘十三職、稷、翼、億並同祀四紙福一屋，叶筆力反。叶韻 贈七屬羊、營並同亭八庚將陽訪庚明同皇陽饗二十  
二養。慶陽疆並同轉韻 踏十一陌碩、炙並同莫陌庶六御客陌錯十藥度同獲陌格同酢葉叶韻 愆一先孫十三  
元通韻 祀紙食職福屋式職稷、敕、極、億並同叶韻 備四實戒十其位實告二十一號，叶古得反。止紙起同叶韻  
尸四支歸五微遲支私同通韻 奏二十六宥，叶音族。祿屋叶韻 將陽慶同本韻 飽十八巧首二十五有考十九皓  
叶韻 盡十一參引同本韻

### 信南山 王者烝祭也。

信彼南山，維禹甸之。地利。眇眇原隰，曾孫田之。我疆我理，南東其畝。一章上天同雲，雨雪雰雰。益之以秣，既優既渥，既霑既足，生我百穀。二章疆場翼翼，黍稷彧彧。曾孫之穡，以爲酒食。人事。畀我尸賓，壽考萬年！三章中田有廬，治畧。疆場有瓜。種瓜。是剝是菹，剝瓜。獻之皇祖。獻瓜。曾孫壽考，受天之祜。四章祭以清酒，從以騂牡，方祭事灌酒，迎牲。享于祖考。執其鸞刀，主人親執。以啟其毛，告純。取其血膋。告殺。升鼎。○五章是烝是享，承上點明案名。苾苾芬芬。祀事孔明，維東。先祖是皇。報以介福，降福作收。萬壽無疆！ 六章

右《信南山》六章，章六句。姚氏云：「此篇與《楚茨》畧同，但彼篇言烝、嘗，此獨言烝。蓋言王者烝祭歲也。《集傳》亦以爲「大指與《楚茨》畧同」，而以曾孫爲凡祭者皆得稱之。案首章從「南山」「禹甸」言起，以疆理南東之制屬之曾孫，此豈爲公卿咏者耶？謬矣！」愚謂不寧惟是，詩中灌酒迎牲，謂爲天子諸侯之禮。且曰「獻之皇祖」，則更非諸侯之所宜言矣。姚氏又云：「此篇言曾孫與上篇曾孫別：上篇曾孫指主祭者，此言『我疆我理』，則指成王也。蓋『我疆』二句，此初制爲徹法也。」然則此詩乃正《雅》之錯脫在此，非幽王時詩，誠有如晦翁之疑矣。而何氏楷亦云：「《楚茨》、《信南山》同爲一時

之作。《楚茨》詳於後而畧於前，自祭枋以前，但以「祀事孔明」一語該之。《信南山》詳於前而畧於後，自薦熟以後，但以「祀事孔明」一語該之。是二詩同出一時，則二曾孫均指成王也，詎得謂凡爲祭者皆得而稱之哉？

【眉評】「一、二、三章」前三章因祭祀而推原樂盛所自出，與《楚茨》同意而較詳。「二章」姚氏曰：「冬雪春雨，寫景皆入微，後世不能到。」「四章」至此可入祀事矣，而未言牲酒先及獻瓜，看似閒筆，乃文章中養局法也。「五、六章」寫祭事精細入微。姚氏曰：「上篇鋪敘閎整，敘事詳密；此篇則稍略而加以跌蕩，多閒情別致，格調又自不同。」

【集釋】「南山」終南山也。「甸」治也。「酌酌」鑿辟貌。「曾孫」曾，重也。自曾祖以至無窮，皆得稱之也。「疆」爲之大界也。「理」定其溝塗也。「畝」壟也。何氏楷曰：「韋昭云：『下曰畝，高曰畝。畝，隴也。』」案，畝乃隴中水道，古作畝。六畝爲一畝，對畝則畝爲下；對畝則畝爲高。畝卽田身也。「同雲」《集傳》：「同雲，雲一色也。將雪之候如此。」《雰雰》雪貌。「霖霖」小雨貌。「優渥」優，渥也。「霑足也」《場音亦》。何氏楷曰：「疆、場皆田界之名。疆乃八家同井之界畔，場乃一夫百畝之界畔。場通作易。《翼》整飭貌。《或或》茂盛貌。《界》與也。《蒞》酢菜也。《祐》福也。《清酒一章》《集傳》：「清酒，清潔之酒，鬱鬯之屬也。辟，赤色，周所尚也。祭禮，先以鬱鬯灌地，求神於陰，然後迎牲。執者，主人親執也。鸞刀，刀有鈴也。膋，脂膏也。啓其毛，以告純也。取其血，以告殺也。取其膋，以升臭也。合之黍稷，實之於簋而燔之，以求神於陽也。《記》曰：『周人尚臭，灌用鬯臭，鬱合鬯，臭陰達於淵泉。灌

以圭璋，用玉氣也。既灌然後迎牲，致陰氣也。蕭合黍稷，臭陽達於牆屋。故既奠然後燔蕭合羶薌。凡祭慎諸此。魂氣歸于天，形魄歸于地，故祭求諸陰陽之義也。〔烝〕冬祭名。

【標韻】句十七韻田一先，叶去聲。叶韻 理四紙畝二十五有，叶滿彼反。叶韻 雲十二文旁同本韻 琛一屋渥三覺

足二沃穀屋通韻 翼十三職或屋食職叶韻 賓十一真年一先通韻 廬六魚瓜六麻，叶夜呼反。菹魚祖七虞枯同

叶韻 酒二十五有杜同本韻 刀四豪毛同替二蕭通韻 芬十二文明八庚皇陽疆同通韻

### 甫田 王者祈年因以省耕也。

倬彼甫田，歲取十千。賦斂。我取其陳，食我農人。周給。自古有年，今適南畝，巡省。或耘或耔，黍稷薿薿。攸介攸止，烝我髦士。勸相。○一章以我齊明，與我犧羊，以社以方。我田既臧，農夫之慶。琴瑟擊鼓，以御田祖，以祈甘雨，以介我稷黍，以穀我士女。總點祀事。○二章曾孫來止，以其婦子，饁彼南畝，田畯至喜。攘其左右，嘗其旨否。如畫。禾易長畝，終善且有。曾孫不怒，農夫克敏。三章曾孫之稼，如茨如梁。曾孫之庾，如坻如京。乃求千斯倉，乃求萬斯箱。黍稷稻粱，農夫之慶。報以介福，萬壽無疆。另提一筆，總前祈年、省耕作收，非美農夫也。○四章

美農夫也。○四章

右《甫田》四章，章十句。此王者祈年因而省耕也。祭方社，祀田祖，皆所以祈甘雨，非報成也。觀其「或耘或耔」，曾孫來省，以至嘗其饁食，非春夏耕耨時乎？至末章極言稼穡之盛，乃後日成效，因「農



夫克敏一言推而言之耳。文章有前路，自有後路。賓主須分，乃得其妙。不然，方祈甘雨何以便報成耶？《集傳》按章分釋，虛實莫辨，已失語氣。乃更謂報福爲上頌下之詞，以君王而視農失曰「萬壽無疆」，竊恐三代聖王不如是之悖且謬耳！

【眉評】《首章》泛口農政大端作起。《二章》次入祭事，於方社則詳禮物，於田祖則詳樂器，互文以見義。一時之祭皆祈年耳，非報自報而祈自祈也。《三章》此乃省耕。至「嘗其旨否」，古王者愛民重農之意寫得如許親切。《四章》稼穡之盛由於農夫克敏，農夫之敏由於君上能愛農以事神，全篇章法一線，妥貼周密，神不外散。

【集釋】《倬》姚氏際恒曰：倬，大也。《毛傳》作明貌，不切。《甫》亦大也。《十千》鄭氏康成曰：井田之法，九夫爲井。井稅一夫，其田百畝。井十爲通，通稅十夫，其田千畝。通十爲成，成稅百夫，其田萬畝。欲見其數，從井、通起，故言十千。《陳》舊粟也。《有年》豐年也。《耘》除草也。《耜》離本也。《藪藪》茂盛貌。《介》大也。《烝》進也。《髦士》朱氏公遷曰：髦士，即農人之秀者。慰勉之意不可人人曉之，惟可與言者與之言，庶幾達於衆也。《齊明》齊與樂同。《曲禮》曰：「稷曰明粢」，蓋齊盛也。《犧羊》純色之羊。《社》后土也，以句龍氏配。《方》四方之神也。《田祖》先裔也，謂始耕田者，即神農也。《穀》養也，又善也。《曾孫》主祭王者之稱也。《醴餉也。《攘》取也。《旨》美也。《易》去聲，治也。《長》竟也。《有》多也。《敏》疾也。《如茨》茨，屋蓋。如茨，言其密比如屋茨。《如梁》梁，車梁。言其穹隆也。《坻》水中之高地也。《京》高邱也。《箱》車箱也。

【標韻】田一先千同陳十一真人同年先通韻 畝二十五有紆四紙疑、止、士並同叶韻 明八庚羊七陽方、臧、慶並同轉韻 鼓七庚祖、兩並同黍六斷女同通韻 止紙子同畝有喜紙右有否、畝、有並同怒七遇敏十一軫、叶母鄰反。叶韻 梁陽京庚倉陽箱、梁、慶、疆並同轉韻

### 大田 王者西成省斂也。

大田多稼，既種既戒，擇種。既備乃事。以我覃耜，俶載南畝。播厥百穀，耕種。既庭且碩，曾孫是若。先冒一筆。○一章 既方既皂，發苗。既堅既好，結穗。不稂不莠。去草。去其螟蟘，驅蟲。及其蠹賊，無害我田穰！田祖有神，播神。秉畀炎火。二章 有渰萋萋，興雨祁祁。雲霓慰望，借點景物。雨我公田，遂及我私。先公後私，忠懇可愛。彼有不穫穰，低穗。此有不斂穧。遺刈穗。彼有遺秉，失載穗。此有滯穗，折亂穗。伊寡婦之利！利及鰥寡。○三章 曾孫來止，始入省斂。以其婦子，饁彼南畝，田峻至喜。來方禋祀，並祀西方。以其騂黑，牲。與其黍稷，樂盛。以享以祀，以介景福。祈福作收。○四章

右大田四章，二章章八句，二章章九句。此王者西成省斂之詩，與前篇同出一時。蓋春秋巡省，祈年報賽，用以答神者也。前篇重在祈年省耕，故從王者一面極力摹寫祀事巡典，神則致其誠，民則極其愛，所以盡在上者之心也。此篇重在播種收成，故從農人一面極力摹寫春耕秋斂，害必務去盡，利

必使有餘，所以竭在下者之力也。凡文正面難於著筆，須從旁渲染，或閒處襯托，則愈閒愈妙，愈淡愈奇。前篇省耕，只管饑食二語寫出聖王愛民之情，千古如見其誠。此篇省斂，本欲形容稼穡之多，若從正面描摹，不過千倉萬箱等語，有何意味？且與上篇犯複，尤難出色。詩只從遺穗說起，而正穗之多自見。其穗之遺也，有低小之穗，爲刈穫之所不及者；有刈而遺忘，爲束縛之所不備者；亦有束縛雖備，而爲輦載之所不盡者；且更有輦載雖盡，而折亂在壟，爲刈穫所不削，而束縛之難拾者。凡此皆寡婦之利也。事極瑣碎，情極閒淡，詩偏盡情曲繪，刻摹無遺，娓娓不倦。無非爲多稼穡一語設色生光，所謂愈淡愈奇，愈閒愈妙，善於烘托法耳。《集傳》不知，以爲「有餘不盡取」，又以爲「與嫫婁共爲不費之惠」，且以爲不棄於地爲「不輕視天物」，皆呆泥句下，未能曲盡詩旨，誠如姚氏所譏。又謂「農夫答前篇之意」，則更非也。

【眉評】「一章」追敘方春始種一層。「二章」順敘夏耘除害一層。「三章」秋成收穫一層。描摹多稼，純從旁面烘托，閒情別致，令人想見田家樂趣，有畫圖所不能到者。「四章」此乃省斂正面，一路順寫，與前篇局勢不同。前篇詳於察與省，而畧於耕，此篇詳於斂與耕，而畧於省與察。

【集釋】「種」擇其種也。「戒」飭其具也。「覃」利也。「俶」始也。「載」事也。「庭」直也。「碩」大也。「若」順也。「方」《集傳》：方，房也，謂孚甲始生而未合時也。「阜」實未堅者曰阜。「稂」童梁也。「莠」似苗而害苗者也。「螟」蟊蟲賊「姚氏際恒曰：《爾雅》云：「食苗心曰螟，食葉蟊，食節賊，食根蠹。」按，賊乃賊害之意，以此押韻。以爲蟲名，恐非。「穉」幼禾也。「有渰」二句「何氏楷曰：渰，《說文》：雲雨

貌。《毛傳》專以淪爲「雲興貌」，似無據。「祈祈」當指雲言，《韓奕》之詩曰「祁祁如雲」可證。「有淪」  
萋萋「雖兼雲，而意專在雨」，言隨雲之雨萋萋然。「興雨祁祁」雖專指雨，而意獨在雲，言興雨之雲  
祁祁然也。《公田》《集傳》：「公田者，方里而井，井九百畝，其中爲公田，八家皆私百畝而同養公田也。」  
〔稽〕束也。〔滯〕亦遺棄之意也。〔裡〕《集傳》：「精意以享謂之裡。」董氏道曰：「來方裡祀」，以其所至  
之方而裡祀也。

【標韻】戒十卦相四紙叶韻 畝二十五有穀一屋叶韻 碩十一陌若十葉叶韻 阜十九咍好同本韻 臘十三職賊同  
本韻 釋四寅火二十寄，叶虎委反。叶韻 萋八齊祁四支私同稗寅精八霽稷寅利同叶韻 止紙子、喜、祀並同本  
韻 黑十三職稷同福屋，叶筆力反。叶韻

### 瞻彼洛矣 闕疑。

瞻彼洛矣，維水泱泱。君子至止，福祿如茨。韎韐有奭，以作六師。一章瞻彼洛矣，維水泱  
泱。君子至止，韎韐有琫。君子萬年，保其家室。二章瞻彼洛矣，維水泱泱。君子至止，福  
祿既同。君子萬年，保其家邦。三章

右《瞻彼洛矣》三章，章六句。此詩與《秦風·終南》相似。然彼自咏諸侯，此則天子事也。《序》說之  
謬固不必辯，何玄乎謂「紀東遷」，爲鄭武公咏。姚氏取之。然詩云「以作六師」，豈亦爲未受命之世  
子咏耶？《集傳》云：「天子會諸侯於東都以講武事，而諸侯美天子之詩。」循文案義，自如此解。唯此

等歌咏必有所紀，非泛泛者。今既求其事而不得，則不如闕疑以俟知者之爲愈也。如必謂爲東遷事，則當是爲平王賦，庶乎可耳！

【集釋】「洛」東都水名。【泱泱】深廣貌。【君子】指天子也。【茨】積也。【韠】茅蒐所染色也。梁氏益曰：茅蒐，茹蘆也。古謂之茅蒐，今謂之茜草。茜亦作蒨，染絳之草也。【韠】《集傳》：韠，韠也，合韠爲之。《周官》所謂「韠弁」，兵事之服也。【爽】赤貌。【作】猶起也。【六師】六軍也，天子六軍。【韠】容刀之韠，今刀鞘也。【瑋】上飾。【琕】下飾。皆玉爲之。【同】猶聚也。

【標韻】矣四紙止紙本韻 茨四支師同本韻 姚氏廉恒云：每章六句，三句一韻，首末句協，甚爲創格。從之，下同。琕四質室同本韻 同一東邦三江通韻

### 裳裳者華 闕疑。

裳裳者華，其葉湑兮。我觀之子，我心寫兮。我心寫兮，是以有譽處兮。一章裳裳者華，芸其黃矣。我觀之子，維其有章矣。維其有章矣，是以有慶矣。二章裳裳者華，或黃或白。我觀之子，乘其四騖。乘其四騖，六轡沃若。三章左之左之，君子宜之。右之右之，君子有之。維其有之，是以似之。四章

右裳裳者華四章，章六句。此詩與前篇互相酬答。上篇既無可考，則此亦當闕疑。唯末章似歌非歌，似謠非謠，理瑩筆妙，自是名言，足垂不朽。雖曰承上「沃若」，而不過借六轡在手，以寫全德。

備躬，常變大小，無適不宜。蓋必誠於中而後形諸外也。故曰：維其有，是以似。若何玄子引「老子」，「吉事尚左，凶事尚右」之言以釋「毛傳」曰：「左，陽道，爲朝紀之事；右，陰道，爲喪戎之事。」未免泥而鮮通。又以有似二語爲「賦象賢」，指武公繼父與復王室事，則尤鑿之又鑿。姚氏雖存其說，愚弗取也。

【集釋】「裳裳」，「集傳」：裳裳，猶堂堂。董氏云，古本作常，常棣也。【滑】盛貌。【觀】見也。【處】安也。

【芸】黃盛也。【章】文章也。有文章斯有福慶也。

【標韻】滑六語寫二十一馬處語叶韻 黃七陽章、慶並同本韻 白十一陌略十藥若同叶韻 左二十寄宜四支，叶牛何

反叶韻 右二十五有似四紙叶韻

以上《北山之什》，凡十篇。案是什可讀者纔七篇，餘皆未詳其世。而楚茨下四詩，「集傳」疑爲「幽雅」，固

屬擬議。要自是古王者田祀諸時饌簡於此無疑。卽《洛矣》以下二篇，詞氣和平，亦非亂世之音。諸儒不求其真，曲爲附會，以致明珠委地，瓦礫相混，然其精光寶氣，自不可掩也。

# 詩經原始卷之十二

## 小雅四

### 桑扈之什

桑扈 天子饗諸侯也。

交交桑扈，有鶯其羽。興。君子樂胥，受天之祜。一章交交桑扈，有鶯其領。興。君子樂胥，萬邦之屏。二章之屏之翰，百辟爲憲。不戢不難，反起末句。受福不那。三章兕觥其觶，旨酒思柔。彼交匪敖，萬福來求。正應上章。○四章

右《桑扈》四章，章四句。此詩詞義昭然，的爲天子燕諸侯之詩無疑。然頌禱中寓箴規意，非上世君臣交儆，未易有此和平莊雅之音。編《詩》者偶檢於此，亦正變互雜之際，能無所誤歟？考《左傳》成十三年「衛侯饗苦成叔，甯惠子相。苦成叔傲。甯子曰：『苦成叔其亡乎？古之爲饗食也，以觀威儀，省禍福也。』故《詩》曰：『兕觥其觶，旨酒思柔。彼交匪敖，萬福來求。』今夫子傲，取禍之道也。」正爲此詩下一注脚。而《集傳》解「不戢」三句云：「蓋曰豈不斂乎，豈不慎乎，其受福豈不多乎？」是意在求

福，暑無警傲之意，恐非詩旨。故姚氏駁之，以爲「詩味素然」，且與「來求」犯複。蓋二句皆正言，非「古語聲急」而反言之。那，語辭，非多也。卽「思柔」句亦當作飲此兕觥之酒，宜思所以柔和其德性，則「彼交匪傲」，而「萬福來求」矣。《集傳》訓思爲語辭者，皆非。其說於理較順，故從之。至序所謂「刺幽王」。曰「君臣上下動無禮文焉」。不知所謂，不敢妄爲附和也。

【眉評】「三章」頌不忘規，可作兕觥銘。

【集釋】「交交」飛往來之貌。《桑扈》竊脂也，見《小宛》。《有鶯其羽》姚氏際恒曰：有如鶯之羽與領也。古用字多拗折如此。《君子》指諸侯也。《胥》語辭。《祐》福也。《屏》蔽也。《翰》幹也。《辟》君也。《憲》法也。《戢》斂也。《難》音難，慎也。《那》語辭。《兕觥》爵也。姚氏際恒曰：兕性剛好觸，故以其角製爲觥飲酒，所以寓鑒戒之意，使人不敢剛而傲也。《觶》角曲貌。《旨》美也。《敖》傲通。《萬福來求》無事求福，而福反來求我也。

【標韻】處七虞羽、祐並同本韻 領二十三梗屏同本韻 翰十五翰憲十四韻叶韻 難五歌那同本韻 觶十二尤柔、求並同本韻。

### 鴛鴦 幽王初昏也。

鴛鴦于飛，畢之羅之。與。君子萬年，福祿宜之。一章鴛鴦在梁，戢其左翼。工於賦物。君子萬年，宜其遐福。二章乘馬在廐，摧之秣之。君子萬年，福祿艾之。三章乘馬在廐，秣之摧



之。君子萬年，福祿綏之。 四章

右《鴛鴦》四章，章四句。《序》謂「刺幽王。思古明王，交於萬物有道，自奉養有節焉」。朱子譏其穿鑿，尤無理，誠然。然以爲「此諸侯所以答《桑扈》也」，亦未爲得。蓋臣子頌君，何物不可以起興，而乃有取於在梁斂翼之鴛鴦鳥耶？夫鴛鴦匹鳥，當其偕而雙棲，一正一倒，戢其左翼以相依於內，舒其右翼以防患於外，有夫婦情而無君臣義焉。故《白華》之詩有感於伉儷之不終，亦引用其語，而下卽云「之子無良，二三其德」，詞意固昭然矣。《白華》爲申后被黜之詩，安知此詩不爲申后初昏而作？聖人兩存其詩，正以見幽王「二三其德」，雖有初而靡終也。何玄子說詩甚鑿，唯解此與鄭意同。姚氏亦甚取之，故並誌焉。然其說亦非始於何氏，蓋創自鄒肇敏。但彼謂咏成王，自不如幽王之切而有據耳。

【眉評】「二章」細膩如畫。

【集釋】《鴛鴦》匹鳥也。崔氏豹曰：鴛鴦，鳬類，雌雄未嘗相離，故謂之匹鳥。《畢羅》《集傳》：畢，小罔，長柄者也。羅，罔也。孔氏穎達曰：羅則張以待鳥，畢則執以掩物。《梁》石絕水爲梁。《戢》斂也。《遐》遠也。《摧秣》許氏謙曰：莖與摧同。《說文》：「莖，斬芻也。秣，食馬穀也。」《艾》養也。《綏》安也。

【標韻】羅五歌宜四支，叶牛何反。叶韻 翼十三職福一屋叶韻 秣七曷，叶莫佩反。艾九泰叶韻 摧十灰綏四支通韻

### 頍弁 刺幽王親親誼薄也。

有頍者弁，實維何何？爾酒既旨，爾殽既嘉。豈伊異人，兄弟匪他。薦與女蘿，施于松柏。  
比。未見君子，憂心奕奕，既見君子，庶幾說懌。一章有頍者弁，實維何何？爾酒既旨，爾殽既時。豈伊異人，兄弟俱來。薦與女蘿，施于松上。比。未見君子，憂心忼忼。既見君子，庶幾有臧。二章有頍者弁，實維在首。爾酒既旨，爾殽既臯。豈伊異人，兄弟甥舅。如彼雨雪，先集維霰。比。死喪無日，無幾相見。樂酒今夕，君子維宴。三章

右《頍弁》三章，章十二句。《序》自《節南山》後，無一不以爲「刺幽王」，此則真刺幽王詩也。但謂「不能宴樂同姓，孤危將亡」，則非。詩明言「爾酒」「爾殽」，又云「樂酒今夕」，何得謂之「不能宴樂同姓」耶？蓋王平日親親誼薄，雖有宴樂，未能和睦。故同姓諸公借飲酒以諷刺之。曰「豈伊異人」，曰「兄弟匪他」，皆言外見意。以爲此兄弟也，豈異人乎哉？使王不以他人視骨肉，則骨肉自骨肉，他人自他人，誰弗知之？同姓諸公又何至作此自外之辭以相諷刺？此以知其爲王發也無疑。卒章又曰「死喪無日，無幾相見」，雖不必定謂孤危將亡，而對酒當歌，人生幾何，王能無所動於中歟？夫同姓聯支，本屬一氣。卽異姓諸親，亦非外人。凡屬兄弟以及舅甥，豈欲庇護本根以固皇家？如薦蘿之施松柏，而松柏亦因以自蔭其根株。以故見君則喜，背君則憂。而無如君之外視兄弟，疏遠舅甥，未免本實先撥，何哉？此雖刺王，而一片忠誠愛君之心溢於言表，固自足存。若《集傳》第以爲「宴兄弟

親戚之詩，則此一宴也，不過尋常款洽，何足重輕於其際歟？

【集釋】「頰」《集傳》：頰，弁貌。或曰舉首貌。張氏彩曰：許氏曰，頰即古規字。規爲員者，弁之貌。「弁」皮弁。孔氏穎達曰：弁者，冠之大名。稱弁者多矣，但爵弁則士之祭服，韋弁則服以即戎，冠則服以從禽，非常服也。惟皮弁上下通服之，故知皮弁也。曹氏粹中曰：士之爵弁，服之以祭，皮弁之以朝。其在王者，常朝則服皮弁，而燕同姓亦服之。所謂皮弁者，以白鹿皮爲冠，其衣十五升，其裳積素。「薦」《集傳》：薦，寄生也。葉似當盧，子如覆盆子，赤黑甜美。「女蘿」免絲也。「奕奕」心無所薄也。「何期」猶伊何也。「時」善也。輔氏廣曰：以時爲善，何也？曰：物得其時則善矣。「維其時矣」之時同。「具」俱也。「炳炳」憂盛滿也。「阜」猶多也。「霰」何氏楷曰：《說文》云：「霰」雪也。徐鍇云：「雪初作未成花，圓如稷粒，撒而下也。」

【標韻】何五歌嘉六麻他歌通韻 柏十一陌奕、憚並同本韻 期四支時同來十灰通韻 上二十三漾炳二十三梗、田反。減七陽叶韻 首二十五有阜、舅並同本韻 霰十七霰見、宴並同本韻

### 車華 嘉賢友得淑女爲配也。

閒關車之華兮，思變季女逝兮。往迎。匪飢匪渴，德音來括。思慕之忱。雖無好友，式燕且  
一章依彼平林，有集維鵲。興。辰彼碩女，令德來教。式燕且譽，好爾無射。二章雖無旨  
式飲庶幾。雖無嘉穀，式食庶幾。雖無德與女，式歌且舞。三章陟彼高岡，析其柞薪。

析其柞薪，其葉湑兮。鮮我覯爾，我心寫兮。四章高山仰止，景行行止。品高。四牡騤騤，六轡如琴。覯爾新昏，以慰我心。歸來又得賢配，點明作意。○五章

右《車牽》五章，章六句。此詩依《序》及《集傳》，均有可疑處。《序》云：「大夫刺幽王」，《大序》謂褒姒嫉妒無道，「周人思得賢女以配君子，故作是詩。」鄭肇敏駁之云：「思得賢女以問其寵，則是張儀傾鄭袖，陳平給閼氏之計耳。以嬖易嬖，其何能淑？且賦《白華》者安在？豈真以不賢見黜？詩不諷王復故后，而諷以別選新昏，無論黜妻驕寵，寵不再移，其爲倍義而傷教亦已甚矣！」姚氏以爲「閱此可以擊節」，然亦不能定其爲誰作也。《集傳》則第以爲「宴樂新昏之詩」。夫樂新昏，則德音燕譽無非賢淑；而高山景行，亦屬閨門。試思女子無儀是式，而何德音之可譽？閨門以貞靜是修，更何仰止之堪思？且令德既望其來教，式歌又樂其且舞，皆於事理有難通，即頌揚亦覺其弗類。孰謂證之《關雎》，可以共得性情之正，而爲昏禮通用之樂乎？無已，其爲樂賢友而得淑女以爲之配乎？故曰：「覯爾新昏，以慰我心。」此其人學品既端，如高山之在望，景行之堪追，非得碩女，何堪來教？故於其乘車而往迎也，不啻飢渴之難待；其攬轡而來歸也，愈見琴瑟之靜好。遂不覺中藏而心寫之，以爲佳耦鮮覯，雖無旨酒，飲亦能甘；雖無嘉穀，食亦自飽。但恨無德可以稱述於女，則唯有式歌且舞，以頌爾之新昏而已。然頌新昏而不忘碩德，此所以爲賢。詩人與友，均堪不朽。夫子引之，以爲《詩》之好仁如此，鄉道而行，中道而廢，忘身之老也，不知年數之不足也，俛焉日有孳孳，斃而後已者，豈無意歟？

【眉評】前後兩章實賦，一往迎，一歸來。二四兩章皆寫思慕之懷，却用興體。中間忽易流利之筆，三層反跌作勢，全詩章法皆靈。

【集釋】「閒關」車聲。【牽】左傳作轄，車軸頭鐵也。董氏道曰：案說文「牽，鍵也，故謂之關。」又曰：「牽，車聲也。」車鍵而行則有聲，故古人以閒關爲聲，其說本此。【鑾】美貌。【逝】往也。【括】會也。【依】茂木貌。【鵲】集傳：鵲，雉也。微小於翟，走而且鳴，其尾長，肉甚美。【辰】時也。【碩】大也。【射】厭也。【女】指友也。【柞】櫟也。【清】盛也。【鮮】少也。【覲】見也。【景行】大道也。【慰】安也。

【標韻】牽八賄逝八舞渴七曷括同叶韻 友二十五有喜四紙叶韻 鵲二蕭教四肴通韻 鑾六御射十一陌叶韻 幾五微幾同二字同韻 女六蕭舞七虞通韻 岡七陽薪十一真叶韻 潛語寫二十一馬叶韻 仰二十二養行七陽叶韻 琴十二侵心同本韻

### 青蠅 大夫傷于讒，因以戒王也。

營營青蠅，止于樊。興而比。豈弟君子，無信讒言！一章營營青蠅，止于棘。讒人罔極，交亂四國。二章營營青蠅，止于榛。讒人罔極，構我二人。三章

右青蠅三章，章四句。《序》以爲「刺幽王也」，《集傳》則云：「詩人以王好聽讒言，故以青蠅飛聲比之，而戒王以勿聽也。」二者似是而未盡也。蓋詩明言「構我二人」，是此人已中其害，乃爲詩以遺王，

非徒空言刺而戒之已耳。凡事必由親以及疎，由近以及遠，唯讒則必先由遠以及近，由疎以及親，迨至親近而亦受其讒，則讒真無所底極已。此人與王始必相得，至是亦爲所譖，故曰「構我二人」。夫以我二人之親且信也，似無所用其間矣，而讒居然行乎其間，使我二人始合而終離，外信而內疑者，其爲術不甚可畏哉！吾願王慎勿聽之可也。王不知讒，王獨不見青蠅乎？青蠅之爲物至微而甚穢，驅之使去而復來。及其聚而成多也，營營然往來，飛聲可以亂人之聽。始不過「止于樊」，繼且「止于棘」，終且「止于榛」。是無往不入，漸而相親，是非滑而黑白亂矣。故首章直呼君子，以「勿聽」戒之。然後甚言其禍，如後世禪家之當頭棒喝，使人猛省耳。而君子之上必加之曰「豈弟」者，微詞也。

【集釋】「營營」往來飛聲。【青蠅】鄭氏康成曰：蠅之爲蟲，汙白使黑，汙黑使白，喻佞人變亂善惡也。

【樊】藩也。【君子】王也。【棘】所以爲藩也。【極】猶已也。【構】孔氏穎達曰：構者，構合兩端，令二人彼此相嫌，交更惑亂也。【二人】已與聽者。

【標韻】樊十三元言同本韻 棘十三職國同本韻 榛十一真人同本韻

### 賓之初筵 衛武公飲酒悔過也。

賓之初筵，左右秩秩。坐有次序。簋豆有楚，殽核維旅。陳列整潔。酒既和旨，飲酒孔偕。飲者齊一。鐘鼓既設，舉醴逸逸。將射改縣，進止安徐。大侯既抗，弓矢斯張，射之有節。射夫既同，獻爾發功。善射者多。發彼有的，以祈爾爵。務求中的，借罰勸飲。○一章簫舞笙鼓，樂既和奏。備樂。烝

衍烈祖，以洽百禮。備禮。百禮既至，有壬有林。錫爾純嘏，子孫其湛。其湛曰樂，各奏爾能。各酌獻尸。賓載手仇，室人入又。加爵再酌。酌彼康爵，以奏爾時。二章賓之初筵，溫溫其恭。入正傳。其未醉止，威儀反反。曰既醉止，威儀幡幡。舍其坐遷，屢舞僛僛。初醉，僅遷其坐，屢舞。作三層高，一層深一層。其未醉止，威儀抑抑。曰既醉止，威儀怱怱。是曰既醉，不知其秩。三章賓既醉止，載號載呶。亂我簋豆，屢舞僛僛。再醉則亂簋豆。是曰既醉，不知其郵。側弁之俄，醉極則冠弁亦復不整，是一幅醉客圖。屢舞僛僛。既醉而出，並受其福。醉而不出，是謂伐德。飲酒孔嘉，維其令儀。歸重令儀。○四章凡此飲酒，或醉或否。總束。既立之監，或佐之史。彼醉不減，不醉反耻。式勿從謂，無俾大怠。匪言勿言，匪由勿語。由醉之言，俾出童毀。奇語。三爵不識，矧敢多又。五章

右《賓之初筵》五章，章十四句。《集傳》云：「《毛氏序》曰：『衛武公刺幽王也。』《韓氏序》曰：『衛武公飲酒悔過也。』今案此詩意，與《大雅·抑》戒相類，必武公自悔之作。當從韓義。」姚氏以爲此說「出《後漢書》注，未知是否。」《小序》因以爲「衛武公刺時」。愚謂二說實相通。詩爲武公之作無疑，不必過爲苛論也。當幽王時，國政荒廢，嬖近小人，飲酒無度。君臣上下，沈湎淫佚，以成風俗者，尚堪問哉？武公初人爲王卿士，難免不與其宴。既見其如此無禮，而又未敢直陳君失，只好作悔過用以自警，使王聞之，或以稍正其失，未始非詩之力也。古人教人，以言教不如以身教，臣子事君，以言諫不

如以身諫。武公立朝，正己以格君非，雖曰悔過，實以諷諫意耳。毛、韓二說，原未嘗錯，特各主一義，遂使詩旨不明，以啟後世之爭。夫豈無因而至此哉？詩本刺今，先陳古義，以見飲酒原未嘗廢，但須射祭大禮而後飲，而飲又當有節，不至失儀，乃所以爲貴。古之飲也如是，今之飲酒則不然。飲不至醉，醉必失儀，不至伐德不止，其無禮也又如是。兩義對舉，曲繪無遺。其寫酒客醉態，縱令其醒後自思，亦當發笑，忸怩難安，此所以善爲諷諫也。末乃言立監，俾勿大怠，以至妄語，大傷酒德。總是自警語，總前作收，爲全詩正旨，篇法極爲整飭。而前四章雖若古今二義平說，其實章法各極變化，盡作者之能事，又非後世鱗次排比者比。不惟言可爲戒，文亦當法，非武公盛德，孰能爲之哉？

【眉評】「一章」將言燕飲之失儀，先舉射飲祭飲之不失儀者作起。開局既覺宏敞，宴飲亦非偏廢，是高一層起法。「二章」上章先飲後射，此章先祭後飲。「三章」至此乃入燕飲，不然即與首章犯複。「四章」三章描摹醉客失儀狀，可謂窮形盡相。然上章由未醉寫到既醉，次由失儀回顧令儀，回環變換，絕不呆板。「五章」末章總收，歸重悔過，是爲本旨。

【集釋】「初筵」初卽席也。《周禮·春官·司几筵》注：筵亦席也。鋪陳曰筵，藉之曰席。「秩秩」有序也。「楚」列貌。「殽」豆實菹醢也。「核」簋實桃梅之屬。孔氏穎達曰：殽是總名，此文殽核與簋豆相對，故分之耳。其實核亦爲殽。「旅」陳也。「和旨」調美也。「偕」齊一也。「設」將射，更整其樂也。「逸逸」往來有序也。「大侯」《集傳》：大侯，君侯也。天子熊侯，白質；諸侯麋侯，赤質；大夫布侯，畫



以虎豹，士布侯，畫以鹿豕。天子侯身一文，其中三分居一，白質，畫熊其外則丹地，畫以雲氣。〔抗〕張也。張，《集傳》：凡射，張侯而不繫左下綱，中掩束之。至將射，司馬命張侯，弟子脫束，遂繫下綱也。大侯張而弓矢亦張，節也。〔射夫既同〕比其耦也，射禮：選羣臣爲三耦，三耦之外，其餘各自取匹，謂之衆耦。〔獻〕猶奏也。〔發〕矢發也。〔的〕質也。侯中所畫之地爲質。〔祈〕求也。〔爵〕射不中者，飲豐上之觴也。〔簫舞〕文舞也。毛氏甚曰：秉簫而舞，與笙鼓相應也。〔烝〕進也。〔衍〕樂也。〔烈〕業也。〔洽〕合也。〔百禮〕言其備也。〔壬〕大也。〔林〕盛也。〔各奏爾能〕《集傳》：謂子孫各酌獻尸，尸酢而卒爵也。〔仇〕《集傳》：仇，讀曰劑。許氏謙曰：《釋文》，劑，音拘，挹取酒也。〔室人〕室中有事者，謂佐食也。〔又〕復也。賓手挹酒，室人復酌，爲加爵也。〔康〕安也。〔時〕時祭也。〔反〕顧禮也。〔幡幡〕輕數也。〔僊僊〕軒舉之狀。〔抑抑〕慎密也。〔怱怱〕蝶嬾也。〔秩〕常也。〔號〕呼也。〔嘏〕謹也。〔傲傲〕傾側之狀。〔郵〕與尤同，過也。〔傐傐〕盤旋不休貌。〔俄〕傾貌。〔伐〕害也。〔令〕善也。〔監史〕司正之屬。〔謂〕告也。〔由〕從也。〔童殺〕無角之殺羊，必無之物也。姚氏際恒曰：「由醉之言」二句，謂其醉言無實，如可使出童殺。然此必無之物，其言其不實也。《集傳》云：「則將謂汝使出童殺矣，設言必無之物以恐之也。」既曰必無之物，又烏足以恐之？且醉者正以變易情志，不畏於人，無所恐也。若猶有恐，則不醉矣。〔三爵不識二句〕姚氏際恒曰：「三爵不識」二句，謂三爵之禮亦不識，況敢又多飲乎？《集傳》謂「飲至三爵已昏然無所記矣」，夫人量有寬窄，何以知其量止三爵乎？醉而失德者多因寬量，飲而不止所至。若三爵便已昏醉，則亦不能再飲，何由至

于失德耶？況以不識爲無所記，更不知欲其記何事也？

【標韻】秩無韻楚六語旅同本韻 旨四紙借九佳，叶舉里反。叶韻 設九屑逸四質通韻 抗二十三張七陽叶韻 同  
一東功同本韻 的十二錫爵十葉叶韻 奏二十六宥禮八聲叶韻 林十二侵湛同能十蒸通韻 又二十六宥，叶音  
怡。時四支叶韻 恭同上，無韻。反十三元幡同僊一先通韻 抑十三職協四質秩同通韻 嘯三殺傲四支郵十一尤  
叶韻 俄五歌佺同本韻 福一屋德職叶韻 嘉六麻儀支叶韻 否四紙史、耻並同怠十賄通韻 語六語殺七庚  
通韻 識職又見上叶韻

### 魚藻 鎬民樂王都鎬也。

魚在在藻，有頌其首。興。王在在鎬，豈樂飲酒。一章魚在在藻，有莘其尾。王在在鎬，飲  
酒樂豈。二章魚在在藻，依于其蒲。王在在鎬，有那其居。三章

右「魚藻」三章，章四句。此鎬民私幸周王都鎬，而祝其永遠在茲之詞也。然其體近乎風，所以爲變  
雅歟？不然都鎬始自武王，詩不當別序在此，而序在此者，以其體變故耳。「小序」不知，遂以爲「刺  
幽王」，其說固非。即「集傳」以爲「諸侯美天子之詩」，亦未得詩意。夫使諸侯而美天子也，則必將先  
序鎬京形勝，以爲天下壯觀，而顯吾主之宅是鎬京以撫有四夷也。乃所以爲下頌上之詞，乃所以爲  
諸侯美天子之詩。今不過曰王在鎬耳，而其興又不過曰魚在藻耳。以魚之在藻興王之在鎬，則其細  
已甚，故知爲細民聲口也無疑矣。夫細民何知險要？但喜其身近皇居，遂若私爲己有，不啻形諸歌

咏已耳。細玩兩在字，則其情自見。聖人喜其真誠無偽，採以入樂，且採以入雅樂，亦足見周初盛時民情之愛戴其君上也如是，而唯鎮民則尤深幸無已焉。若何玄子以爲「武王愷還之詩」，則徒泥豈樂之豈爲愷還之愷耳。說詩而死於句下，則豈善說詩者哉？

【集釋】「藻」水草也。【頌】大首貌。【豈】亦樂也。【莘】長也。【那】安也。【居】處也。

【標韻】首二十五有酒同本韻 尾五尾豈同本韻 蒲七虞居六魚通韻

### 采菽 美諸侯來朝也。

采菽采菽，筐之筥之。與。君子來朝，何錫予之？雖無予之，路車乘馬。又何予之？玄衮及黼。一章甯沸檻泉，言采其芹。與。君子來朝，言觀其旂。其旂淠淠，旗幟。鸞聲嘖嘖。載駟載駟，車馬。君子所屆。初至。○二章赤芾在股，邪幅在下。服飾。此章實賦朝見。彼交匪紆，天子所予。容止。樂止君子，天子命之。錫命。樂只君子，福祿申之。三章維柞之枝，其葉蓬蓬。與。樂只君子，殿天子之邦。屏藩。樂只君子，萬福攸同。平平左右，亦是率從。並及侍從。○四章汎汎揚舟，緋纜維之。與。樂只君子，天子葵之。考察。樂只君子，福祿膍之。優哉游哉，亦是戾矣。五章

右「采菽」五章，章八句。此固是西周盛王諸侯來朝加以錫命之詩，然非出自朝廷制作，乃草野歌咏

其事而已。觀前後四章與筆自見。事極典重而起極輕微，豈國家錫予而有取於筐篚以爲興耶？若《集傳》云「此天子所以答魚藻也」，則尤非。詩中明言「天子所予」，「天子所命」等語，則非天子自言可知，讀《詩》不先明語氣，安能更望其深探作者微意？學者試將此詩與《彤弓》、《湛露》等篇並讀，其氣象之廣狹輕重，迥不相侔。然後知事體雖同，詩旨各別。太史編之，亦將以紀一時之盛云爾。若《序》謂「刺幽王侮慢諸侯」之說，不悉辯。

【眉評】「三章」朝覲正面只「彼交匪紆」一句寫足。【五章】考察乃天子維制諸侯之權。

【集釋】《路車》《集傳》：路車，金路以賜同姓，象路以賜異姓也。《玄衮及黼》《集傳》曰：玄衮，玄衣而畫以卷龍也。黼，如斧形，刺之於裳也。周制，諸公衮冕九章，已見《九章》篇。侯伯鷩冕七章，則自華蟲以下，子男毳冕五章，衣自宗彝以下而裳黼黻。孤卿緇冕三章，則衣粉米而裳黼黻。大夫玄冕，則玄衣黻裳而已。《瘠沸》泉出貌。《檻泉》正出也。梁氏益曰：《爾雅》云：「檻泉，正出。」《公羊傳》云：「直出」，直猶正也。正出者，涌出也。自發源處涌而直上，故曰正出。《芹》水草。《漣漣》動貌。《嘒嘒》聲也。《屈》至也。《股》脛本曰股。《邪幅》偃也，邪纏於足，如今行膝，所以束脛，在股下也。《交》交際也。《紓》緩也。《蓬蓬》盛貌。《嚴鎮也》。《平平》姚氏際恆云：平平，《韓詩》作「便便」，安順義，亦作「辯」。《毛傳》云：「辯治」，未聞。《左右》諸侯之臣也。《率循也》。《緝緯也》。《緝緯》繫也。《葵揆也》。《臚厚也》。《臚至也》。

【標韻】宮六語予同馬二十一馬黼七虞叶韻 芹十二文旂五微叶韻 漣八霽嘒同屈十卦通韻 股廣下馬予語叶韻

命二十四敬申十一真叶韻 蓬一東邦三江同東從二冬通韻 維四支葵同本韻 曉八霽庚同叶韻

### 角弓 刺幽王遠骨肉而近僉壬也。

駢駢角弓，翻其反矣。兄弟昏姻，無胥遠矣。一章爾之遠矣，民胥然矣。爾之教矣，民胥傲矣。二章此令兄弟，綽綽有裕。不令兄弟，交相爲瘡。三章民之無良，一語關合上下。相怨一方。受爵不讓，至于已斯亡。四章老馬反爲駒，不顧其後。比。承上「不讓」。如食宜飪，如酌孔取。五章毋教猱升木，如塗塗附。比。君子有微猷，小人與屬。六章雨雪漙漙，見晁曰消。比。承上「與屬」。莫肯下遺，式居婁驕。七章雨雪浮浮，見晁曰流。比。如蠻如髦，我是用憂。八章

右「角弓」八章，章四句。觀「頍弁」爲兄弟刺幽王之詩，則此篇亦爲刺幽王也無疑。特「大序」謂「不親九族而好讒佞」，則詩中無刺讒語，唯疏遠兄弟而親近小人是此詩大旨。前四章疏遠兄弟，難保不相怨，而民且傲尤，體多用賦。後四章親近小人，以至「不顧其後」，而相殘賊，詩純用比，乃篇法變換處。中間以「民之無良」一句結合上下。唯無良，故兄弟相瘡；唯無良，故小人不讓。如老馬之不力而思任載，如飲食之不自足而貪殘是縱。王又不知其惡，反飽之欲，是教猱以升木，而以塗塗附，其可乎哉？雖然，小人之情亦視君子爲轉移焉耳。君子而有微猷，小人亦將聽用而與爲屬。譬彼雨雪，見日即消而自流也。無如君子莫肯下遺以德，反自矜驕，小人得以逞志，滅棄禮義，敗壞王綱，則

與蠻髦無異，非世道人心一大害哉？吾用是隱然深憂，而不能自解者也。雨雪陰凝之象，兄弟相喻，小人縱欲，均包在內。《集傳》專指譏言，姚氏專主兄弟疑怨，說均非。蓋「老馬」二章即承「受爵不讓」來，「雨雪」二章即承「小人與屬」來。一氣相承而下，前後雖若分說而蟬聯不斷，章法之妙，無以踰此。章法明則詩旨亦自見矣。奈何說《詩》諸儒，多不以章法爲重哉？

【集釋】「駢駢」弓調和貌。「角弓」以角飾弓也。「圖」反貌。《集傳》：「弓之爲物張之則內向而來，弛之則外反而去，有似兄弟昏姻，親疎遠近之意。」「胥」相也。「令」善也。「綽」寬也。「裕」饒也。「瘠」病也。「饁」飽也。「狻」獼猴也。「塗」泥也。「徽」美也。「猷」道也。「屬」附也。「漣漣」盛貌。「覲」日氣也。「蠻」南蠻也。「髦」夷髦也。《書》作「髦」，義同。

【標韻】反十三阮遠同本韻 遠叶於圓反然一先叶韻 教十九效微同本韻 裕七遇瘠七虞叶韻 方七陽亡同本韻 後二十五有取同本韻 木一屋附遇屬二沃叶韻 漣二蕭消、驪並同本韻 浮十一尤流、憂並同本韻

### 苑柳 諸侯憂王暴厲也。

有苑者柳，不尚息焉。上帝甚蹈，無自暱焉。俾予靖之，後予極焉。一章有苑者柳，不尚惕焉。上帝甚蹈，無自療焉。俾予靖之，後予邁焉。二章有鳥高飛，亦傳于天。彼人之心，于何其臻？曷予靖之？居以凶矜。三章

右《苑柳》三章，章六句。姚氏曰：「《小序》謂『刺幽王』，或謂厲王。《大序》謂『諸侯皆不欲朝』，《集傳》

從之，非也。君雖不淑，臣節宜敦，不朝豈可訓耶？大概王待諸侯不以禮，諸侯相與憂危之詩。其說義理較正大，故錄之。若如《序》與《集傳》所云，是以私心待天王，不臣孰甚焉？此詩直可刪去，何存之有？然詩中所刺又似厲王，非幽王也。蓋其所述非暴即虐，於厲王爲尤近云。

【眉評】「一、二章」兩後字宜一頓。言天王之威甚厲，使予靖職，莫敢或後，後則責予無有窮極也。「三章」末章言天王之欲無有極至，使予不早靖之，則小民受害，日居凶矜之地，曷時能已哉？

【集釋】「苑」茂盛也。「尚」庶幾也。「上帝甚蹈」姚氏際恒曰：「上帝甚蹈」，《戰國策》、《荀子》作「上天甚神」。古人引《詩》類多字句錯互，學者宜從本書，不必言矣。然其解釋則可以依之。如以上帝爲上天，則上帝指天也。蹈，《毛傳》訓動。蹈者，足動而履之之謂，故訓動。郝仲輿謂猶《樂記》「發揚蹈厲」之蹈，亦可參証。謂上帝甚蹈厲，不可自暇於宴安也。《集傳》曰：「上帝，指王也；（又）不言何王」蹈，當作神。既從《國策》諸書以蹈作神，而又別解上帝爲王，混亂之極。且言「王甚神」，是贊之，非刺之矣。案：「上帝」，《國策》諸書雖作「上天」，其實卽以上帝比天王也。不然，「上天甚神」與下文「俾予靖之」語意殊不相貫。姚氏於上帝則從《國策》之文，於「甚蹈」則又不從甚神之訓，何也？「暇」玩也。「靖」靖職也。「惕」息也。「瘵」病也。言無自取病也。「邁」過也。言王必過責我也。「傳臻」皆至也。「曷予靖之」言我曷不靖其厥職。「凶」危地也。「矜」言民之遭凶危而可憐也。

【標韻】息十三職曜四質極職通韻 惕八霽瘵十卦邁同通韻 天一先臻十一真矜十蒸通韻

以上《桑扈之什》凡十篇。案是什雖多刺幽王之詩，而《桑扈》則天子饗諸侯，《魚藻》則民樂王都餉，《采芣》

則又詩人美諸侯之來朝，均非後世衰亂之音。幽王世烏有此和平作哉？蓋周初正雅錯簡在此，不必曲爲之說也。大凡說詩，不可預設成心，須各還本面。雖不能言皆有中，要亦十得八九，不可不知也。

## 都人士之什

### 都人士 緬舊都人物盛也。

彼都人士，狐裘黃黃。衣。其容不改，出言有章。行歸于周，萬民所望。一章彼都人士，臺笠緇撮。冠。彼君子女，綢直如髮。我不見兮，我心不說。二章彼都人士，充耳琇實。冠飾。彼君子女，謂之尹吉。門第。我不見兮，我心苑結。三章彼都人士，垂帶而厲。帶。彼君子女，卷髮如蠶。我不見兮，言從之邁。四章匪伊垂之，帶則有餘。匪伊卷之，髮則有旗。重寫帶髮一層，風致翩然，令人神往不置。我不見兮，云何盱矣！五章

右《都人士》五章，章六句。《序》謂「周人刺衣服無常」，蓋襲《禮·緇衣》之誤，不再辯。《集傳》云：「亂離之後，人不復見昔日都邑之盛，人物儀容之美，而作此詩以歎惜之。」然則此又東遷以後詩也。況曰「彼都」，曰「歸周」，明是東都人指西都而言矣。詩全篇只咏服飾之美，而其人之風度端凝，儀容秀美自見，即其人之品望優隆與世族之華貴，亦因之而見，故曰「萬民所望」也。詩本無甚關係，然存之可以紀一時盛衰之感，而因以見先王化淳俗美之休猶未盡泯於人心云。



【眉評】「一章」單提士。【二、三、四章】此三章士女並題。【五章】一女雙收與首章若相應若不相應，並見篇法之變。

【集釋】「不改」有常也。【周】鎬京也。【臺】夫須也，見南山有臺。【緇】緇，緇布冠也。【綱直如髮】集傳：「綱直如髮」，未詳其義，然以四章、五章推之，亦言其髮之美耳。姚氏際恆曰：「綱直如髮」，毛謂「密直如髮」，鄭謂「其性情密緻，操行正直，如髮之本末無隆殺」，此說是。如此解殊有味，正見古人罕譬之妙。且以髮喻女，亦本地風光。此云「如髮」，下以髮云「如臺」，用字分明，安得泥此以爲咏其髮乎？又此咏其髮，後又咏其髮，亦復。又此咏其髮之直，後又咏其髮之曲，亦矛盾。此言「如髮」者，以髮之本末而言也。咏其卷髮者，以其綰髻也。案：姚駁朱傳是矣，而違鄭說仍非。詩以「綱直如髮」對上「臺笠緇撮」。臺笠緇撮，實物也，則「綱直如髮」亦應是實物，非徒虛咏性情而已。今訓綱爲密緻，直爲正直，是以虛對實，未能相稱。且以性情如髮，竟迂折難通。遍攷諸書，綱多訓縛束。爾雅：釋天：「素錦綱杠」注：「以白地錦緇旗之竿。」禮：檀弓：「綱練設旒」注：「以練綱旌之杠。」楚辭：九歌：「薜荔柏兮蕙綱」注：「綱，縛束也。」前漢書：司馬相如傳：「靡屈虹而爲綱」注：「綱，緇也。」又集韻：「綱，音套，臂衣也。」然則綱當是臂衣、束素之類，女子所着，故以對士子之冠。曰「直如髮」者，其物必垂下如髮之鮮明光膩，幾委乎地者。【琇】美石也，以美石爲瑱。【尹吉】集傳：鄭氏曰：「吉讀爲媾。」尹氏、媾氏，周之昏姻舊姓也。人見都人之女咸謂尹氏、媾氏之女，言其有禮法也。【苑】猶屈也，積也。【厲】垂帶之貌。【卷髮】見姚說。【臺】螭蟲也。【邁】行也。【旗】揚也。

〔肝〕望也。

【標韻】黃七陽章、望並同本韻 撮七易髮六月說九屑通韻 實四實古同結九屑通韻 厲八霽張十卦邁同通韻

餘六魚旗同肝七虞通韻

校記

〔一〕「綱杜」原作「綱杜」，據「爾雅」改。

### 采綠 婦人思夫，期逝不至也。

終朝采綠，不盈一匊。予髮曲局，薄言歸沐。一章終朝采藍，不盈一擔。五日爲期，六日不詹。二章之子于狩，言赉其弓。之子于釣，言綸之繩。三章其釣維何？維魴及鱖。維魴及鱖，薄言觀者。四章

右「采綠」四章，章四句。此真風詩也，何以列之於「雅」？倘所謂變體者非歟？幽王之時，政煩賦重，征夫久勞於外，踰時不歸，故其室思之如此。採「詩」者錄之以刺時。非詩有刺王意，亦非詩之刺怨曠者。「序」說既欠分明，辯之者亦未暇深爲理會也。夫王政失平，民人嗟怨，不在其人，卽在其家。茲錄其室怨曠之詩，雖無一語及王政，而王政之苦於民者自見諸言外，故曰刺也。

【眉評】「四章」單承釣說，章法一變。

【集釋】「綠」王弼也。郭氏璞曰：「蓐，蓐也，今呼鷓鴣腳莎。」董氏道曰：「楚辭」曰：「黃蘗施以盈室」，王逸

云：「終朝采葦，今攷鄭氏說以爲玉芻，則當逸時字爲葦矣。」〔芻〕兩手曰芻。〔局〕卷也。〔藍〕染草也。孔氏穎達曰：「藍可以染青，故淮南子云：『青出於藍。』」月令：「仲夏無刈藍，是可以染之草。」〔澹〕衣蔽前謂之澹，卽蔽膝也。〔詹〕與瞻同。〔五日六日〕姚氏際恆曰：「五日爲期」二句，五日成言也，六日調笑之意。言本五日爲期，今六日尚不瞻見，只是過期之意，不必定泥爲六日而咏也。鄭氏以其不近理，改爲「五月、六月」，吁，何其固哉！〔綸〕理絲曰綸。

【標韻】錄二沃知一屋沐同通韻 藍十三覃澹十四鹽詹同通韻 弓一東繩十蒸叶韻 鱖六語者二十一馬叶韻

### 黍苗 美召穆公營謝功成也。

芃芃黍苗，陰雨膏之。悠悠南行，召伯勞之。一章我任我輦，我車我牛。我行既集，蓋云歸哉！二章我徒我御，我師我旅。我行既集，蓋云歸處！三章肅肅謝功，召伯營之。烈烈征師，召伯成之。四章原隰既平，泉流既清。召伯有成，王心則寧。五章

右《黍苗》五章，章四句。此詩明言召穆公營謝功成，士役美之之作。而《序》固云「刺幽王」者，何也？事與《崧高》同，詩亦出於一時，而彼篇則入《大雅》，此自歸《小雅》者，體異故耳。詩以體分，不在事同。讀者試合兩篇而細咏之，其厚薄輕重當自有得於心，豈以士役朝臣及詩之長短而分大小哉？姚氏之論，未足憑也。

【集釋】〔芃芃〕長大貌。〔任〕負任者也。〔輦〕人輓車也。〔牛〕所以駕大車也。〔集〕成也。〔徒〕步行

者。〔御〕乘車者。〔師旅〕五百人爲旅，五旅爲師。〔肅肅〕嚴正之貌。〔謝〕邑名，申伯所封國也，在

今汝寧府信陽州。〔功〕工役之事也。〔營〕治也。〔烈烈〕威武之貌。〔征〕行也。〔平〕土治曰平。

〔清〕水治曰清。

【標韻】齊二十號勞同本韻 牛十一尤哉十灰叶韻 旅六脂處同本韻 營八庚成同本韻 清庚寧九青通韻

### 隰桑 思賢人之在野也。

隰桑有阿，其葉有難。興。既見君子，其樂如何？一章隰桑有阿，其葉有沃。既見君子，云何不樂？二章隰桑有阿，其葉有幽。既見君子，德音孔膠。三章心乎愛矣，遐不謂矣？中心藏之，何日忘之？四章

右《隰桑》四章，章四句。《序》謂「刺幽王」，《辯說》以爲「非刺詩」。然桑而曰隰，則以興賢人君子之在野者可知。夫以賢人君子而隱處巖阿，則朝廷之上所處非賢人君子之儔又可知。詩不喜在位廷臣，而思野處賢士，以至中藏心寫，無日能忘，則當日朝政爲何如哉？故《序》言亦未可以厚非。特此皆言外意，詩中原未嘗露，似亦不必據此爲說，徒傷詩人忠厚意耳。

【集釋】〔隰〕下溼之地。〔阿〕美貌。〔難〕盛貌。〔沃〕光澤也。〔幽〕黑色也。〔膠〕固也。〔遐〕《集傳》：遐與何同，《表記》作瑕。鄭氏注曰，瑕之言胡也。〔謂〕猶告也。

【標韻】難五歌何同本韻 沃二沃樂十葉叶韻 幽十一尤膠三肴叶韻 愛十一隊謂五未通韻 藏七陽忘同本韻

## 白華 申后自傷被黜也。

白華蒼兮，白茅束兮。一比已之潔。之子之遠，俾我獨兮。一章英英白雲，露彼蒼茅。二比王恩之不及。天步艱難，之子不猶。二章滌池北流，浸彼稻田。三比王澤之不廣。嘯歌傷懷，念彼碩人。三章樵彼桑薪，叩烘于燧。四比已供無釜之憂。維彼碩人，實勞我心。四章鼓鐘于宮，聲聞于外。五比已不足以動王聽。念子惻惻，視我邁邁。五章有鷺在梁，有鶴在林。六比嫡失位。維彼碩人，實勞我心。六章鴛鴦在梁，戢其左翼。七比夫婦反目。之子無良，二三其德。七章有扁斯石，履之卑兮。八比尊卑異階。之子之遠，俾我疢兮。八章

右《白華》八章，章四句。《小序》謂「周人刺幽后也」，蓋誤，不必辯。《大序》謂「幽王取申女以爲后，又得褒姒而黜申后，故周人爲之作是詩」者，亦非。按此詩情詞悽惋，託恨幽深，非外人所能代，故《集傳》以爲「申后作」也。姚氏曰：「郝仲興云：『愚幼受《朱傳》，疑申后能爲《白華》之忠厚，胡不能戢父兄之逆謀？宜白能爲《小弁》之親愛，胡乃預驪山之惡？讀古《序》始知二詩託刺，故《序》不可易也。』何玄子駁之曰：『驪山之事，不可舉以責申后。申后被廢，未必大歸。又幽王遇弒事在十一年，距廢后時蓋已九載。此時申后存亡亦未可知。鄭肇敏謂『觀于宮、于外、在梁、在林之咏，亦如後世之賦《長門》耳』。此論爲允。』又曰：『郝氏倣《序》，最屬可恨，故錄何氏之駁于此，俾人無惑焉。』愚案，后此時縱歸申且尚在，亦不過一老婦人耳，何能阻父兄之逆謀？觀宜白卽位後，尚不能指叛臣而申

弑逆之典，況申后乎？論古人當卽勢以原心，不可好爲苛論以責人也。是詩之作，與《小弁》同爲千古至文。至今讀之，猶令人悲咽不能自己，非至情而能若是乎？

【眉評】全篇皆先比後賦，章法似複，然實創格，又一奇也。

【集釋】「白華」野苧也，已漚爲苧。陸氏璣曰：苧似茅，而滑澤無毛，根下五寸中有白粉者宜爲索，漚乃尤善矣。「英英」輕明之貌。「天步」猶言時運也。「猶」如也。「漙」流貌。「北流」豐、鎬之間水多北流。「碩人」尊大之稱，指幽王也。「卬」我也。「烘」燎也。「熒」集傳：熒，無釜之竈，可燎而不可烹飪者也。「慄慄」《說文》云：愁不安也。「邁邁」不顧也。「鷺」禿鷺也。陸氏佃曰：鷺性貪惡，一名扶老。狀如鶴而大，長頸赤目，其毛辟水毒，頭高八九尺，善與人鬪，好啗蛇。「梁」魚梁也。「鷺鷥」見前。「扁」卑貌。「疢」病也。

【標韻】東二沃獨一屋通韻 茅三肴猶十一元叶韻 田一先人十一真通韻 薪真熒十二侵人真心侵通韻 外九泰邁十卦通韻 林侵心同本韻 翼十三職德同本韻 卑四支疢同本韻

### 縣蠻 王者加惠遠方人士也。

縣蠻黃鳥，止于丘阿。比。道之云遠，我勞如何？飲之食之，教之誨之。命彼後車，謂之載之。一章縣蠻黃鳥，止于丘隅。豈敢憚行，畏不能趨。飲之食之，教之誨之。命彼後車，謂之載之。二章縣蠻黃鳥，止于丘側。豈敢憚行，畏不能極。飲之食之，教之誨之。命彼後

車，謂之載之。 三章

右《縣蠻》三章，章八句。此王者加惠遠方人士也。「縣蠻黃鳥」，音雖可聽，而所飛不遠。極其所至，不過止于丘阿、丘隅、丘側而已。以喻遠方寒士，雖有令聞，無力觀光，難資於王者。故代爲之設想曰：「道之云遠，我勞如何」，「豈敢憚行」，亦畏不能趨以極所至云耳。然則國家宜何如加惠而體恤之乎？夫亦曰「飲之食之」，使內無所憂；「教之誨之」，使學有所就；更命後車以載之，使其利用賓王者無所憚其勞，則野無遺賢，而國多俊士矣。若如序云「微臣刺亂」，而詩無刺意。卽如《集傳》所云「此微賤勞苦而思有所託者」，又何其卑鄙無足道哉！姚氏曰：「此疑王命大夫求賢，大夫爲咏此詩。」然則命車載之，果誰爲之命耶？是皆不可通之說也。舊說又謂「大臣出使，小臣爲介，依託于卿大夫，而望其飲食教誨，後車以載」，則不知其何所謂矣。噫，說《詩》之難也若是其甚乎！

【集釋】《縣蠻》鳥聲。何氏指曰：以其聲之微細相連，不絕如縣，而鳥語不可與人解，又似蠻也。【阿】曲阿也。【後車】副車也。【隅】角也。【憚】畏也。【趨】疾行也。【極】至也。

【標韻】阿五歌何同本韻 誨十一隊載同本韻 隅七庚趨同本韻 側十三職極同本韻

## 瓠葉 不以物薄廢禮也。

幡幡瓠葉，采之亨之。君子有酒，酌言嘗之。 一章有兔斯首，炮之燔之。君子有酒，酌言獻之。 二章有兔斯首，燔之炙之。君子有酒，酌言酢之。 三章有兔斯首，燔之炮之。君子有

酒，酌言醕之。四章

右《瓠葉》四章，章四句。《序》謂「刺幽王」，固鑿。《集傳》以爲「燕飲之詩」，亦泛。大抵古人燕賓，情真而意摯，不以豐備而寡情，亦不以微薄而廢禮。「瓠葉」「兔首」，固不必拘，然總是微薄意。徐氏常吉曰：「豐以燕賓者，《魚麗》是也。《易·鼎》之《彖》傳曰：『大亨以養聖賢』。薄以燕賓者，《瓠葉》是也。《易·損》之《彖》曰：『二簋可用享』。知《易》之意，則知《詩》之意矣。」然而格調平庸，詞意膚淺，未免《三百篇》之濫觴，則又不可不知也。

【集釋】《幡幡》瓠葉貌。羅氏願曰：瓠，其葉可爲菜。《炮》毛曰炮。《燔》加火曰燔。《炙》炕火曰炙。《酢》報也，賓既卒爵而酌主人也。

【標韻】亨八庚嘗七陽轉韻 燔十三元獻十四韻叶韻 炙十一陌酢十葉叶韻 炮三肴醕十一尤叶韻

### 漸漸之石 東征怨也。

漸漸之石，維其高矣。山川悠遠，維其勞矣。武人東征，不遑朝矣。一章漸漸之石，維其卒矣。山川悠遠，曷其沒矣。武人東征，不遑出矣。二章有豕白蹄，烝涉波矣。三章月離于畢，天象。俾滂沱矣。武人東征，不遑他矣。三章

右《漸漸之石》三章，章六句。此將士東征，勞苦自嘆之詩。《小序》以爲「刺幽王」，姚氏謂其「無據」。然以詩體觀之，氣味甚薄，唯務造警句以爲奇，此正雅降爲風之候，故以屬諸幽王亦無疑也。唯《大



序云：「我狄叛之，荆舒不至，乃命將率東征，久病於外，故作是詩。」則徒成爲附會而無據耳。又「豕涉波」四句，或以爲既雨，或以爲將雨，或以爲實境，或以爲虛擬借以起興，均非確論。此必當日實事。月離畢而大雨滂沱。雖負塗曳泥之豕，亦烝然涉波而逝，則人民之被水災而幾爲魚鼈者可知。卽武人之露體塗足，冒險東征，而不遑他顧者更可見。四句只須倒說，則文理自順，情景亦真。詩人造句結體與文家迥異，不可以辭而害意也。不然，武人離家遠行，何物不可起興？而必有取於豕涉波、月離畢之象乎？古人作詩，務要徵實。況此東征，尤關國事，不可不據實直書，以備國史採錄。如「十月辛卯，日有食之」之類，所謂詩史，不可滑過。奈何諸儒說「詩」，不從此等處着眼細勘，反以爲虛詞起興，徒賞其語意奇警，爲得未曾有哉！吁，可嘆已！

【眉評】「三章」紀異而造語甚奇，若使「月離」句在上，則語意自原，而文筆庸平矣，不可不知。

【集釋】「漸漸」高峻之貌。「卒」卽卒字，謂山嶺之末也。「曷」何也。「沒」盡也。「出」謂深入不暇出也。

「豕白蹄四句」蹄，蹄也。烝，衆也。離，月所宿也。畢，星名。朱子曰：畢是漚魚底叉網。漚魚，則其汁水淋漓而下若雨然。畢，星名，義蓋取此。今畢星上有柄，下開兩叉，形亦類畢，故月宿之則雨。

【集傳】豕涉波，月離畢，將雨之驗也。姚氏際恒曰：「集傳」引張子曰：「豕之負塗曳泥，其常性也。今其足皆白，衆與涉波而去，水患之多可知矣。」此正指既雨後爲言也。乃「集傳」又曰「豕涉波，月離畢，將雨之驗也」，何居？姪炳曰：「將雨，既雨，諸說紛如。總因泥下『離畢』之義，認爲苦雨，與鸛鳴蟪蛄之說同一可哂。愚謂出師日久，三年六月，不知幾歷雨暘，武人何沾沾以此爲苦？若東山零雨，

特就歸途所遇而言，不可以此例彼也。豕性或喜羣聚卑濕之所有之，若謂喜雨至于游泳波漣，鮮不『載胥及弱』矣。蓋二者皆以不得其所爲興。豕性負塗而今涉波，月行中道而今離畢，武人有室室而今東征，是以行役久病，不遑他事。兩兩相況，意直捷而味深雋。此說甚佳，存之。案：數說皆似是而實非，其駁已見本文，不再贅。

【標韻】高四聲勢同朝二蕭通韻 卒四質沒六月出質通韻 波五歌沱、他並同本韻

### 苕之華 傷饑亂也。

苕之華，芸其黃矣。興。心之憂矣，維其傷矣！一章苕之華，其葉青青。知我如此，不如無生！二章牂羊墳首，三星在留。人可以食，鮮可以飽！三章

右『苕之華』三章，章四句。周室衰微，既亂且饑，所謂大兵之後，必有凶年也。人民生當此際，『不如無生』，蓋深悲其不幸而生此凶荒之世耳。『序』但謂『大夫閔時』，則不知其所閔者何事？『大序』乃云：『師旅並起，因之以饑饉』，而其義始暢。『牂羊』二句，造語甚奇。較之『豕涉波』尤爲警闢可愕。姚氏謂『但覺其奇妙，不能深得其解』。因引『毛傳』云：『牂羊墳首』，言無是道也。『三星在留』，言不可久也。『集傳』云：『羊瘠則首大。留中無魚而水靜，但見三星之光而已。言饑饉之餘，百物彫耗如此。』以爲二說『皆非確義，唯『集傳』較近』。愚案『集傳』是也，何云難解？姚氏說『詩』雖多穎悟，要亦有推求過深之處，故既信而復疑耳。

【眉評】「三章」沉痛語，不忍卒讀。奇闕！

【集釋】「若」《集傳》：「若，陵若也。」《本草》云：「即今之紫葳。蔓生，附於喬木之上，其華黃赤色，亦名凌霄。」《群羊》牝羊也。《墳》大也。

【標韻】黃七陽傷同本韻 青九青生八庚通韻 首二十五有留同飽十八巧，叶補苟反。叶韻

### 何草不黃 征夫恨也。

何草不黃？何日不行？何人不將，經營四方？一草何草不玄？何人不矜？哀我征夫，獨爲匪民！二章匪兕匪虎，率彼曠野。哀我征夫，朝夕不暇。三章有芃者狐，率彼幽草。有棧之車，行彼周道。四章

右《何草不黃》四章，章四句。此征伐不息，行者愁怨之詩，人皆知之矣。唯「兕虎」二句，迄無定解，何哉？《大序》云：「視民如禽獸，君子憂之。」《集傳》云：「言征夫匪兕匪虎，何爲使之循曠野而朝夕不得閒暇也？」是皆泥兩「匪」字而不得其解耳。姚氏雖知是倒句法，乃曰「率彼曠野者，非兕非虎耶？」而又以爲「興征夫朝夕在途」也，亦非。蓋全詩皆賦體，而諸家必欲以爲興，故泥而鮮通。至《集傳》則前後三章皆興，獨虎兕章以爲賦，尤覺可怪。夫征役不息，終歲往來，以至「何草不黃」矣，而「經營四方」者猶未有已時耶！卽至草色皆枯，由黃而玄，而征行仍如故也。且也曠野之間，無非虎兕，幽草以內，盡是芃狐，此何如荒涼景象乎？「哀我征夫，朝夕不暇」，乘此棧車，「行彼周道」，是虎兕芃狐

相率而爲羣也，其幸而不至爲惡獸所噬者，亦幾希矣！嗟嗟，我征夫也，獨非民哉？胡爲遭此亂離，棄其室家，幾至無人不繇也哉？蓋怨之至也。周衰至此，其亡豈能久待？編詩者以此殿《小雅》之終，亦《易》卦純陰之象。《坤》上六曰：「龍戰于野，其血玄黃。」其是之謂歟？觀於《詩》，而世運之升降，人事之盛衰，可一覽而識其故矣！

【眉評】純是一種陰幽荒涼景象，寫來可畏，所謂「亡國之音哀以思」也。詩境至此，窮仄極矣！

【集釋】「將」相將而行也。「玄」赤黑色。草衰而黃，既黃而黑也。「率」循也。「芘」尾長也。「棧車」役車也。

【標韻】黃七陽行、將、方並同本韻 玄一先矜十蒸民十一真通韻 虎七麌野二十一馬暇二十二攝叶韻 草十九皓道同本韻

以上《都人士》之什凡十篇。案：是什有宣王時詩雜入其中者，《黍苗》是也。有東遷後詩雜入其中者，《都

人士》是也。亦有周盛時詩雜入其中者，《騶虞》是也。要之，氣味甚薄，體兼乎風，故不得爲雅之正。其餘急管繁絃，哀音促節，盡是亡國之詩。徒以造句奇警，爲驚人之具。有似六朝陳、隋人語，專以琢句爲工，求其真氣，則索然矣。文章厚薄，關乎氣運。雖三代著作，亦不能不爲風會所移。朱氏公遷曰：「自《苑柳》至此，其詩多似風體。雅降爲風，亦有其漸歟？」可謂知言。然愚謂不獨此也，即《桑扈》一什，除《實之初筵》及《車牽》、《采芣》、《洋洋數篇外，其餘莫非風體。讀者試合前六什而通觀之，則《小雅》正變之分，亦可以得其梗概。惟其間有以事變者，有以體變者，不能不細心剖別，而後《雅》詩體裁乃判然而無混耳。

## 詩經原始卷之十三

### 大雅一

說見小雅。○朱子曰：「大雅非聖賢不能爲，平易明白，正大光明。章氏潢亦曰：嘗讀李白詩云「大雅久不作」，白其深明大雅之旨矣乎？三代而下，如韓退之唐平淮西碑，其於小雅猶庶幾近之。至於大雅豈特「久不作」而已乎？而大雅之義，其不明於世也亦久矣，何也？大雅篇什皆所以發天人之奧也，雖後儒終生勤苦探索，亦止能敷陳其理義云耳。求其知性知天，洞晰大雅之精奧者，幾何人哉？又曰：自「文王在上」以至召旻，篇什不齊，莫非此意。但是詩也，向非周、召、衛武、申伯、大聖大賢，亦孰能有此大雅之音也？案：二說皆謂大雅非聖賢不能爲，誠爲有見。若云大雅篇什皆發天人之奧，則未盡然。夫大雅固有美有刺也，雖多尚德，亦嘗論功，安能盡發天人奧哉？如江漢、常武，美宣王之中興；瞻卬、召旻，刺幽王之召亂，何嘗有一言及於天人性理。卽行葦、鳧鷖，亦無非燕飲、祈福等事，固不害其爲大雅詩也。蓋大、小雅之分，亦以體異焉耳。讀者試卽嵩高、黍苗二詩誦之，而其體自見。又卽賓之初筵與抑詩合而咏之，而其體愈見。數詩皆前人之所謂人同、事同者也，而何以詩之詞氣與音節迥然不同？此可以知大、小雅之分矣。竊謂天人奧蘊，固非聖賢不能發，大雅篇什亦多發

之，而欲執是以盡大雅之體，則將以性理爲風騷，又何異宋人談詩，人魔，不知隔卻幾重障霧也耶。

## 文王之什

### 文王 周公追述文德配天，以肇造乎周也。

文王在上，於昭于天。周雖舊邦，其命維新。有周不顯，帝命不時。文王陟降，在帝左右。  
姚氏曰：「每四句承上語作轉韻，委委屬屬，連成一片。曹植贈白馬王彪詩本此。」愚謂曹詩只起落處相承，此則中間換韻亦相承不斷，詩格尤奇。○一章臺臺文王，令聞不已。陳錫哉周，侯文王孫子。文王孫子，本支百世。凡周之士，不顯亦世。二章世之不顯，厥猶翼翼。思皇多士，生此王國。王國克生，維周之楨，濟濟多士，文王以寧。三章穆穆文王，於緝熙敬止。假哉天命，有商孫子。商之孫子，其麗不億。上帝既命，侯于周服。四章侯服于周，天命靡常。殷士膚敏，裸將于京。厥作裸將，常服黼黻。王之燕臣，無念爾祖。五章無念爾祖，聿修厥德。永言配命，自求多福。殷之未喪師，克配上帝。宜鑒于殷，駿命不易。六章命之不易，無遏爾躬。宜昭義問，有虞殷自天。上天之載，無聲無臭。儀刑文王，萬邦作孚。七章

右文王七章，章八句。《小序》謂「文王受命作周」，似是而非也。文王未改元，何以云受命？歐陽

氏、蘇氏、游氏諸家辯之詳已。然愚獨怪漢以後儒者，何不信經傳而信符讖，不信孔子而信雜家？孔子不云乎：「三分天下有其二，以服事殷。」周之德，其可謂至德也已矣。使受命改元，何以尚云「服事」哉？天下豈有二天子，而可云「服事」者？故知文王並未改元也。「三分有二」，亦就人心之向背言之耳。《集註》引《春秋傳》以釋《論語》云：「文王率商之畔國以事紂」，亦屬非是。既曰「畔國」，豈尚可以「事紂」乎哉？此詩蓋推本文王之德足以配天，故可以肇造周室於奕禩。商之孫子，臣服于周，與殷之多士，亦來助祭，皆武王有天下後事，非謂文王時卽如是也。《呂覽》引此詩以爲周公作，蓋亦近之。唯《集傳》云：「以戒成王」，則不必泥。夫文王德配上帝，而其後遂有天下者，蓋能盡人性以合天心，而天因以位育權界之耳。中古前聖君固常有之，三代後帝王所必無也。故周公述焉，亦將以爲萬世法，豈獨爲成王戒耶？然求其所以能與天合德之故，則不過曰「穆穆」，曰「於緝熙敬止」而已。子思子曰：「維天之命，於穆不已。」蓋曰天之所以爲天也。「於乎不顯，文王之德之純」，蓋曰文王之所以爲文也，「純」亦「不已」。此可謂唯聖賢能知聖賢矣。然則此詩固不獨與王兆瑞之章，抑亦聖學傳心之典，故非周公不能爲也。至其章法之佳，句法之奧，已見眉評旁批。讀者細玩之，而自有得於心焉。

【眉評】「一章」首章總冒，不過言文王之德與天合一，而造語特奇，此詩文之分也。「二章」福及孫子，福及多士。「三章」理語無塵障，三代聖賢之所以異於宋儒處。「四章」商之孫子「亦臣服于周」。「五章」殷之多士亦助祭于周。四章平列對舉，一法一戒。「六章」再追念殷德未失，亦可配天，以襯

起下章。文勢乃曲而不直。〔七章〕天無聲臭可求，唯法文王卽所以法天。應首章與天合德作收，法極嚴整。

【集釋】〔於〕歎辭。〔昭〕明也。〔命〕天命也。〔不顯〕姚氏際恆曰：「不顯不字，楊慎、陸深皆作丕，謂古字通。從之。後放此。丕，說文：『大也。』」〔臺臺〕姚氏際恆曰：「臺，爾雅訓勉，毛傳亦云：『臺臺，勉也。』」〔集傳〕云：「勉強之貌。增強字，非。」〔令聞〕善譽也。〔陳〕敷也。〔哉〕語辭。〔侯〕維也。〔本〕宗子也。〔支〕庶子也。〔猶〕謀也。〔翼翼〕勉敬也。〔思〕語辭。〔皇〕美也。〔楨〕幹也。〔穆穆〕深遠之意。〔緝〕續也。〔熙〕明也。真氏德秀曰：「詩言緝熙者四：『文王之詩於緝熙敬止』，以德言也。『敬之』之詩曰『學有緝熙于光明』，以學言也。『維清』之詩曰『維清緝熙，文王之典』，昊天有成命曰『於緝熙，單厥心』，二者以事言也。〔止〕語辭。〔假〕大也。〔麗〕敷也。〔不億〕不止於億也。〔服〕釋文云：「事也，用也，言服行。」〔膚〕美也。〔敏〕疾也。〔裸〕嚴氏粲曰：「裸，謂以饔酒獻尸，尸受酒而灌於地以降神也。裸，灌，古字通也。」〔將〕行也，酌而送之也。〔京〕周之京師也。〔黼〕黼裳也。〔冏〕殷冠也。〔蓋臣〕姚氏際恆曰：「王之蓋臣，承上殷士言。謂此殷士，今皆爲王所進用之臣，豈得無念爾祖文王之德乎？義自明順。」〔集傳〕曰：「于是呼王之蓋臣而告之曰：『得無念爾祖文王之德乎？』」蓋以戒王而不敢斥言，猶所謂「敢告僕夫」云爾。其自爲迂拙如此。〔聿〕發語辭。〔命〕天理也。〔師〕衆也。〔上帝〕天之主宰也。〔駿〕大也。〔不易〕言難保也。〔遏〕絕也。〔宣〕布也。〔昭〕明也。〔義〕善也。〔問〕聞通。〔有〕又通。〔虞〕度也。〔載〕事也。〔儀〕象也。〔刑〕法也。〔孚〕信也。



【標韻】天一先新十一真通韻 時四支右二十五有叶韻 已四紙子同本韻 世八霽世同二字自爲韻 翼十三職國

同本韻 楨八庚寧九青通韻 止紙子同本韻 億職服一屋叶韻 常七陽京庚轉韻 時七虞祖同本韻 德職

福屋叶韻 帝霽易真通韻 躬一東天先叶韻 臭二十六宥孚七虞叶韻

## 大明 追述周德之盛，由於配偶天成也。

明明在下，人。赫赫在上。天。天難忱斯，天。不易維王。人。天位殷適，側落殷王。使不挾四方。鍊字。○一章攀仲氏任，自彼殷商，來嫁于周，曰嬪于京。乃及王季，維德之行。大任有身，生此文王。以下追述周德。此章先出太任，後出王季。○二章維此文王，小心翼翼。昭事上帝，聿懷多福。厥德不回，以受方國。三章天監在下，有命既集。文王初載，天作之合。一句總合兩代佳偶。在洽之陽，在渭之涘。文王嘉止，大邦有子。此章先出文王，再出太姒。○四章大邦有子，俶天之妹。文定厥祥，親迎于渭。造舟爲梁，不顯其光。太任則曰「來嫁」，太姒則曰「親迎」，兩世昏配，作兩樣寫法。○五章有命自天，命此文王，于周于京，續女維莘，長子維行，篤生武王。雙收婦德。落到武王。保右命爾，變伐大商。以下側重伐商。○六章殷商之旅，其會如林。矢于牧野，維予侯興。上帝臨女，應在上。無貳爾心。七章牧野洋洋，檀車煌煌，駟驕彭彭，維師尚父，特顯尚父，隱含邑姜，文章虛實之。時維鷹揚。涼彼武王，肆伐大商，會朝清明。八章

右「大明」八章，四章章六句，四章章八句。「序」謂「文王有明德，故天復命武王也」，直不知詩中命意所在。即「辯說」云「言王季、大任、文王、太姒、武王，皆有明德，而天命之」，亦甚含囑。蓋周家奕世積功累仁，人悉知之。所奇者，歷代夫婦皆有盛德以相輔助，並生聖嗣，所以爲異。使非「天作之合」，何能聖配相承不爽若是？故詩人命意，即從此著筆，歷敘其昏媾天成，有非人力所能爲者。然大任、太姒明寫，邑姜暗寫，此又文心變幻處。從來說「詩」者無人道及，不將詩人一片苦心埋沒不彰耶？至首尾三章，極言天人感應之機捷於影響。天可信而不可信，王易爲而不易爲。逆天者天必亡之，順天者天必昌之。其昌之也，一朝而「清明」；其亡之也，四方無所恃。故必有「明明」之聖德，而後有「赫赫」之天命。天人之際，豈不亦甚微哉？吾願萬世之有天位者，當以殷適爲戒，而以武王爲法；庶可以上應天心，中承祖德，下撫四方，一戎衣而天下大定也。然亦豈偶然得之者歟？於摩盛矣！

【眉評】「一章」將言文武受命，故先揭出天人感通之故，以爲全篇綱領。而說得赫然可畏，蓋危言以惕之也。「次章至六章」皆歷敘文、武生有聖德，並非偶然。蓋「天作之合」，故父子夫婦之間皆有盛德以相配偶，而生聖嗣。在文法，此爲鋪敘開文；在詩意，此爲追述要義。「七、八兩章」始言伐商而有天下，以終首章之意。「八章」「清明」作收，與「明明」「赫赫」相應，用字亦極不苟如是。全詩六句八句相間成章，又是一格。

【集釋】「明明」德之明也。「赫赫」命之顯也。「忱」信也。「不易」難也。「天位」天子之位也。「殷適」

殷之適嗣也。〔挾〕持也。〔摯〕國名。〔仲〕中女也。〔任〕舉國姓也。〔殷商〕黃氏一正曰摯，奚仲之後。〔自彼殷商〕，蓋摯，商畿內國也。〔來嫁二句〕姚氏際恆曰：「〔集傳〕云：『續于京』，疊言，以釋上句之意，猶曰『釐降二女于漚汭，續于虞』。」按〔書〕曰：「降」，言其下嫁也。曰「續」，言其成婦也。曰「漚汭」，詳其地名也。曰「虞」，詳其國名也。此詩正與之同：「來嫁」，始嫁也。〔續〕，成婦也。〔周〕，國名也。〔京〕，京師之地也。古人立言悉有文理，其層次毫忽不苟。乃皆誤以〔詩〕〔書〕爲疊言，胡文理淺事尚不之知而談經耶？〔王季〕文王父也。〔身〕姚氏際恆曰：身，〔毛傳〕曰：「重也。」鄭氏曰：「重，謂懷孕也。」孔氏曰：「以身中復有一身，故言重。」古人解析字義，其精如此。〔集傳〕但曰：「身，懷孕也」，甚麤。〔翼翼〕恭敬之貌。〔懷〕來也。〔回〕邪也。〔方國〕姚氏曰：方國，爲方百里之國。孟子曰：「文王由方百里起」，是也。鄭氏謂「四方來附之國」，向來從之，非。〔洽〕水名，在今西安府同州郃陽縣，今流已絕，故去水而加邑。渭水亦逕此入河也。〔嘉〕昏禮也。〔大邦〕莘國也。梁氏益曰：莘，姒姓之國，文王妃大姒之母家。今同之夏陽，漢郃陽也，有大姒家祠。〔子〕指大姒也。〔覲〕〔集傳〕：覲，摯也。〔韓詩〕作摯。〔說文〕云：「覲，摯也。」孔氏曰：「如今俗語譬喻物曰摯作然也。」〔天妹〕姚氏曰：妹，少女之稱。女將歸，故〔易〕卦名歸妹。天妹，尊稱之也，猶王曰天王之義云耳。〔文〕禮也。〔祥〕吉也。言卜得祥而以納幣之禮定其祥也。〔梁〕〔集傳〕：梁，橋也。作船於水，比之而加板於其上以通行者，即今之浮橋也。〔續〕繼也。〔莘〕國名。〔長子〕指大姒也。〔行〕嫁也。〔牧野〕在朝歌南七十里。衛之汲縣，故商都牧野之邑。〔侯〕姚氏曰：「維予侯興」，鄭氏解侯爲諸侯，謂武王

也。《集傳》以侯爲維，非。〔驪〕驪馬白腹曰驪。〔師尚父〕大公望也。〔涼〕《韓詩》作亮，佐助也。〔會朝〕會戰之旦也。蘇氏轍曰：《書》所謂「甲子昧爽」也。〔清明〕孔氏穎達曰：王肅云：「天下乃大清明，無復濁亂之政。」

【標韻】上二十二養王七陽方同叶韻 商陽京八庚行陽王同轉韻 翼十三職福一屋國職叶韻 集十四緝合十五合通韻 埃四紙子同本韻 妹十一隊渭五未通韻 梁陽光同本韻 王陽莘十一真王、商並陽叶韻 林十二侵與十蒸心侵通韻 煌陽彭庚揚陽商同明庚轉韻

### 縣 追述周室之興始自遷岐，民附也。

縣縣瓜隄。比起。民之初生，自土沮漆。古公亶父，溯源。陶復陶穴，未有家室。先翻一筆，領起全局。○一章古公亶父，來朝走馬，率西水滸，至于岐下。遷居。爰及姜女，挈眷。聿來胥宇。二章周原膺膺，萁茶如飴。爰始爰謀，爰契我龜。地。曰止曰時，築室于茲。定宅。○三章迺慰迺止，迺左迺右，迺疆迺理，迺宜迺畝。經畫自西徂東，周爰執事。四章乃召司空，乃召司徒，董事。俾立室家。其繩則直，縮版以載，作廟翼翼。先宗廟。○五章揀之陧陧，度之薨薨，築之登登，削屢馮馮。後宮室。百堵皆興，鼙鼓弗勝。六章迺立皋門，皋門有伉。再次乃立門。迺立應門，應門將將。迺立冢土，戎醜攸行。兼營大社，帶起下二章。○七章肆不殄厥愠，外侮。亦不隕厥

問。內情。柞械拔矣，行道兑矣，混夷駢矣，維其喙矣。服敵。○八章虞芮質厥成，德化。文王蹶厥生。予曰有疏附，予曰有先後，予曰有奔奏，予曰有禦侮。四轉。○九章

右縣九章，章六句。此上三章皆周公述祖德詩也。然三章立義各有不同：文王以天德言，故曰「令聞」，曰「厥猶」，曰「緝熙敬止」，曰「聿脩厥德」，又曰「宜昭義問」，而總歸之於「陟降」配天，以至聲臭俱無。使非「穆穆」不已，烏能「作孚萬邦」？故有天德者必膺天命，此文王之旨也。大明以人事言，故有王季卽生大任，有文王卽生大姒，有武王卽生邑姜，奕世寶淑，互相繼承。使非「天作之合」，烏能「不顯其光」？故人紀肇修者，人心亦附，此大明之旨也。此詩以地利言，故曰「自土沮漆」，曰「至于岐下」，曰「築室于茲」，凡屬宗廟社稷，莫不制畫昭然。使非去邠踰梁，何以臣服戎狄？故地利之美者地足以王，是則縣詩之旨耳。若論世次，縣爲首，王迹所自始也。次大明，再次乃文王。若論功德，周至文王而始大，自當以文王弁首。此編詩義例，亦卽詩人意旨。從來說者不明作者深心，概謂之追述，而無所別。豈知周室之興，其有得於天、地、人三者之厚，實有異乎歷代帝王之數，故能如是之盛且遠耶？然詩雖重地利，仍以威德爲主。故後二章，一感昆夷，一感芮，王道大行，天下歸心。夫豈無因而致此哉？蓋文王德修於內，四臣力贊乎外，故以作收。自古帝王未有不得人而能自昌者，地靈尤須人傑，是之謂耳。

【眉評】「七章」自次章至此，皆經營遷居立國之事。落筆乃乘勢帶起下章，機局乃緊，否則平散無力矣。「九章」上章威服強敵，此章德感二君，周所以日盛而昌大也。收筆奇肆，亦饒姿態。

【集釋】「縣縣」不絕貌。〔縣〕邢氏長曰：「縣，一名胞，小瓜也。」〔沮漆〕二水名，在豳地。《水經》：「沮水出北地直路縣東，過馮翊投柳縣北。」東入于洛。漆水出扶風杜陽縣俞山東北，入于渭。朱氏公遷曰：「自土沮漆」，自沮漆之土也，語倒如此也。〔古公亶父〕《集傳》：「古公，號也；亶父，名也。或曰，字也。」後乃追稱大王焉。趙氏順孫曰：「古公，猶言先公也，蓋未追王前之本號。古公當殷末，時猶尚質，故亶父以名言。姚氏際恆曰：『孫文融曰：「此詩不但稱『古公』，且仍書其名，乃後又稱『文王』，豈武王初克商，甫尊文王，尚未追王大王，是彼時作耶？」案，此誠不可曉。季明德以末章言文王，與大王不相連屬，疑爲錯簡，殊妄。」《左傳》：「昭二年已賦縣之卒章，以晉侯比文王，以韓子比四輔矣。」〔陶復陶穴〕姚氏際恆曰：「陶，《說文》：「瓦器也」，蓋瓠、甕之屬。復者，平地累土爲之，故曰復。穴者，土中室也。復、穴雖皆土所爲，而以瓠、甕之類甃之。復則以拒風雨，穴則以隔土氣。」《集傳》云：「陶，窰竈也。復，重窰也」，絕不明。〔岐下〕岐山之下也。許氏謙曰：「《地理考異》、《郡縣志》：岐山，亦名天柱山，在鳳翔府岐山縣東北十里。」〔姜女〕大王妃也。〔胥〕相也。〔宇〕宅也。〔周〕地名，在岐山之南。〔膳〕肥美貌。〔茶〕姚氏際恆曰：「嚴氏曰：『《內則》言婦養舅姑，《公食禮》言君待其臣，皆以葍，則葍是美菜。《七月》言食農夫以茶，則茶非美菜也。雨露所濡，甘若薺實。葍、茶皆甘如飴，言美惡皆宜也。孔氏謂葍卽烏頭，且引《晉語》：『驪姬實酖於酒，實葍於肉』爲證，蓋以此葍爲《爾雅》『葍，葍之葍也。說者皆祖之。若爲驪姬實葍肉之葍，則與酖毒同類，與茶菜可食之物非其類矣。詩人稱周原之美，不應言其宜毒物也。且毒物不可食，何由知其如飴乎？』〔契〕《集傳》：「契，所以然火而灼龜者也，」

《儀禮》所謂「楚焯」是也。或曰，以刀刻龜甲欲鑽之處也。《慰》安也。《止》居也。《周》徧也。《司空》掌管國邑。《司徒》掌徒役之事。姚氏際恆曰：司空、司徒、司馬，商世所有之官，天子有之，諸侯亦有之。故武王《牧誓》呼此三官，而此詩以築室之故召此二官也。《棊》盛土於器也。《陳陜》衆也。《度》投土於版也。《藁藁》衆聲也。《登登》相應聲。《馮馮》牆堅聲。《堵》五版爲堵。《鼗鼓》解見《鼓鐘》，以鼓役事。《三》《皋門應門》《集傳》：《傳》曰：「王之郭門曰皋門。」伉，高貌。「王之正門曰應門。」將將，嚴正也。大王之時，未有制度，特作二門，其名如此。及周有天下，遂尊以爲天子之門，而諸侯不得立焉。《冢土》大社也。天子諸侯皆立也。《戎醜》大衆也。《肆》《集傳》：肆，故今也，猶言遂也，承上起下之辭。《殄》絕也。《愠》怒也。《隕》墜也。《問》聞通，謂聲譽也。姚氏際恆曰：「肆不殄厥愠」二句，必指當時與昆夷之事實言，今不可考矣。觀二厥字，與下章「虞芮質厥成」二句二厥字同，可見彼爲事實，則此章亦事實可知。案：此與《集傳》「言大王雖不能殄絕昆夷之愠怒，亦不限墜己之聲聞」者異。然《集傳》亦求其實而不得，故爲此虛擬之言耳。《虞芮一章》《集傳》：虞、芮，二國名。質，正。成，平也。《傳》曰：「虞、芮之君，相與爭田，久而不平，乃相與朝周。入其境，則耕者讓畔，行者讓路，入其邑，男女異路，斑白不提挈，入其朝，士讓爲大夫，大夫讓爲卿。二國之君感而相謂曰：『我等小人，不可以履君子之境。』乃相讓，以其所爭田爲閒田而退。天下聞之而歸者四十餘國。」蘇氏曰：「虞在陝之平陸，芮在同之馮翊。平陸有間原焉，則虞、芮之所讓也。」厥生，未詳其義。或曰：厥，動而疾也。生，猶起也。予，詩人自予也。率小親上曰疏附。相道前後曰先後。喻德宣譽曰奔奏。武

臣折衝曰禦侮。姚氏際恆曰：「文王厥厥生」，厥字難解。然其義自承上句「虞芮質厥成」來，而文王乃爲之「厥厥生」，大約是謂動其生讓畔之心耳。解者離上句釋之，便紛然羣僂，益無是處矣。

【標韻】駘九屑漆四質六屑室質通韻 父七虞馬二十一馬辭虞下馬女六語字虞叶韻 飴四支龜、時、茲並同本韻 止四紙右二十五有理紙畝有事四真叶韻 徒七虞家六麻，叶音姑。叶韻 直十三職翼同本韻 陟十蒸蕤、登、馮、興、勝並同本韻 仇二十三漾將七陽行同叶韻 愠十三問同本韻 拔十二隊兌九泰喙隊通韻 成八庚生同本韻 附七遇後有奏二十六有侮虞叶韻

校記

(一)「投綯」，原作「投綯」，據《水經注》改。

(二)「弗勝者」三字係《集傳》另條注文，誤收，今刪。

棫樸 文王能作士也。

芄芄棫樸，薪之標之。濟濟辟王，左右趣之。一章濟濟辟王，左右奉璋。奉璋戕戕，髦士攸宜。二章溥彼涇舟，烝徒楫之。周王于邁，六師及之。三章倬彼雲漢，爲章于天。周王壽考，遐不作人。四章追琢其章，金玉其相。勉勉我王，綱紀四方。五章

右《棫樸》五章，章四句。《小序》謂「文王能官人」。姚氏以爲差些，蓋「能作士」耳。《集傳》又云：「前三章言文王之德，爲人所歸；後二章言文王之德，有以振作綱紀天下之人，而人歸之。」使非不能作



士，人孰歸之？故此詩亦倒敘法耳。其作人之盛也，既美其質，復琢其章，故能煥發成采，如「彼雲漢」之「爲章於天」矣，豈不倬然也哉？及其歸心也，莫大乎承祭與征伐。文王承祭，「奉璋毳毼」，無非「髦士攸宜」，則其作文德之士也可知。文王征伐，六師扈從，有似「烝徒楫舟」，則其作武勇之士也又可見。蓋非徒能官人而已，又有以作之，使其振興鼓舞而變化焉。此周之人材所以獨盛於唐虞三代上也。然豈一朝一夕故哉？「周王壽考」，始見成功。故雖有聖人在上，亦必久於其道，而後天下化成。「才難」之嘆，不益信歟？

【眉評】【四章】以天文喻人文，光燄何止萬丈長耶！

【集釋】【芄芄】木盛貌。【械】白桺也。小木叢生，有刺。【樸】言根枝迫迮相附著也。【櫛】積也。【辟】君也。【璋】《集傳》：半圭曰璋。祭祀之禮：王裸以圭瓚，諸臣助之。亞裸以璋瓚，左右奉之。其判在內，亦有趣向之意。【毳毼】盛壯貌。【髦】俊也。【烝徒楫舟】貌。【涇】水名。【烝】衆也。【楫】櫓也。【于往也】。【邁】行也。【六師】六軍也。【倬】大也。【雲漢】天河也。【壽考】文王九十七乃終，故曰壽考。【遐】與胡同。【作人】謂鼓舞變化之也。【追】雕也。【琢】金曰雕，玉曰琢。【相】質也。【勉勉】猶言不已也。【綱紀】凡綱罟張之爲綱，理之爲紀。

【標韻】標二十五有趣同本韻 王七陽璋同本韻 毳五歌宜四支叶韻 楫十六葉及十四緝通韻 天一先人十一真叶韻 章陽相、王、方並同本韻

### 旱麓 祭必受福也。

瞻彼旱麓，榛楛濟濟。豈弟君子，干祿豈弟。一章瑟彼玉瓚，黃流在中。豈弟君子，福祿攸降。二章鸛飛戾天，魚躍于淵。豈弟君子，遐不作人。三章清酒既載，騂牡既備，以享以祀，以介景福。四章瑟彼柞、械，民所燎矣。豈弟君子，神所勞矣。五章莫莫葛藟，施于條枚。豈弟君子，求福不回。六章

右《旱麓》六章，章四句。《小序》曰：「受祖也。」《大序》因以爲「周之先祖世修后稷、公劉之業，大王、王季申以百福千祿焉」，不知作何夢囈！即《集傳》以爲「詠歌文王之德」，亦殊泛泛。此蓋指其祭祀受福而言也，與上篇絕不相類。上篇言作人，於祭祀見其一端；此篇言祭祀，而作人亦見其極盛。姚氏但見其有「作人」字，遂謂其與上篇大抵相似，胡不即前後文而一咏之耶？首章曰「干祿」，卒章曰「求福」，夫福祿豈可干而求之哉？又況聖王明德配天，祿自我祿，福自我福，非他人所能預抑，豈有意爲之哉？不知此正詩人立言之妙耳。若曰文王盛德，上有以得天，下有以得人，幽有以格神，夫固與天人神鬼無毫髮之間，祿何待干而後獲，福何待求而始至？而自人視之，則若文王之有意干而求之也。不然，何以無祿不臻，無福不備？不求福則已，一求福而神勞之以福，不干祿則已，一干祿而天降之以祿，一若事之操券而得者。夫非有術以致之哉？此蓋以常情擬聖德，從不能摹擬中極意以摹擬之，非真謂祿可干而福可求也。宋儒不解詩意，以爲祿不可干，福不可求，乃爲之極力回護。是真

以干祿、求福擬文王，亦何歎而可哂耶？《詩》遇漢儒而一厄，遇宋儒又一厄，遇明儒又一大厄。不知何時始能撥雲霧而見青天也？

【眉評】「二章」華貴。「三、四章」前後均泛言福祿，中間乃插入「作人」、「享祀」二端。蓋享祀是此篇之主，而「作人」則推原致福之由，得人者昌，天必相之矣。

【集釋】「旱」山名。「麓」山足也。「榛」似栗而小。「桔」似荆而赤。「豈弟」樂易也。「瑟」鎮密貌。「玉瓚」《集傳》：玉瓚，圭瓚也。以圭爲柄，黃金爲勺，青金爲外，而朱其中也。「黃流」《集傳》：黃流，鬱鬯也。釀秬黍爲酒，築鬱金煮而和之，使芬芳條鬯，以瓚酌而裸之也。孔氏穎達曰：秬，黑黍，一秬二米者也。秬鬯者，釀秬爲酒，以鬱金之草和之。草名鬱金，則黃如金色。酒在器流動，故謂之黃流。「攸」所也。「鸛鳴類」。「良」至也。「瑟」茂密貌。「燎」爨也。「勞」慰撫也。「莫莫」盛貌。「回」邪也。

【標韻】濟八霽弟同本韻 中一東降三江轉韻 天一先淵同人十一真叶韻 備四真福一屋叶韻 燎十八嘯勞二十號通韻 枚十灰回同本韻

## 思齊 刑于化洽也。

思齊大任，文王之母。刑于之本。思媚周姜，京室之婦。大姒嗣徽音，刑于之實。則百斯男。一章惠于宗公，神罔時怨，神罔時恫。刑于寡妻，點明主意。至于兄弟，以御于家邦。二章雖離在宮，肅肅在廟。刑于之象。不顯亦臨，無射亦保。三章肆戎疾不殄，烈假不瑕。與「家邦」爲刑

于所推。不聞亦式，不諫亦入。四章肆成人有德，小子有造。兄弟字亦包在內。古之人無斃，譽髦斯士。五章

右《思齊》五章：二章，章六句；三章，章四句。《小序》謂「文王所以聖」，以首章特標「文王之母」句也。姚氏遵之，遂以爲一篇眼目在是，全詩只「以首章爲主」。殊不知此特推原刑于之化所自始耳。詩蓋咏歌文王刑于之化也。治化無不本於閭門，由寡妻而兄弟，由兄弟而家邦，乘其機而順以導之，勢甚便也。然非有所本，則其化亦不能如是之神且速。文王治家，不獨以身爲率，又得聖母以爲之倡，故其宮闈寢廟間，「肅肅」「離離」，太和翔洽，莫可言喻。此蓋其母大任氏德性齊莊，而又能上媚先姑，以盡子婦之職。故其子婦亦有所式，化而成內助之功。此文王刑于之化至神且速，而獨有異乎人者也。故此詩當以刑于數語爲主。首章大任，逆溯其源。末二章戎疾、造士，順徵其效。三章宮廟，則虛寫其刑于氣象。所謂德修於內而化成乎天下者，非文王而能若是乎？若單重大任，則全詩氣脉中難一氣貫下。卽如《集傳》以爲此詩「亦歌文王之德」，則所歌者何德？造語殊欠分明，均非善說《詩》者。

【眉評】「一章」首章推本刑于之化，實賴上有聖母。「二章」數語爲全詩之主。「三章」描寫文王居室氣象，刑于化洽，自可想見。「四、五章」末二章承上「家邦」推廣言之。

【集釋】「思」語辭。「齊」莊也。「媚」愛也。「周姜」大王之妃大姜也。「京」周也。「大妣」文王之妃也。「徽」美也。「百男」舉成數而言其多也。朱子曰：案《春秋傳》云：「管、蔡、郕、霍、魯、衛、毛、聃、郕、

雍、曹、滕、畢、原、豐、郇、文之昭也。并伯考、武王十八人。然此特其見於書傳者耳，亦可見其多矣。  
〔惠〕順也。〔宗公〕宗廟先公也。〔恫〕痛也。〔刑〕儀法也。〔御〕迎也，又治也。〔離離〕和之至也。  
〔肅肅〕敬之至也。〔不顯〕幽隱之處也。〔射〕與戮同，厭也。〔保〕守也。〔肆〕故今也。〔戎〕大也。  
〔疾〕難也。〔殄〕絕也。〔烈〕光也。〔假〕大也。〔瑕〕過也。〔式〕法也。〔髦〕俊也。

【標韻】母二十五有婦同本韻 音十二侵男十三覃通韻 公一東恫同邦三江轉韻 廟十八曠保十九略叶韻 殄十六

純瑕六麻無韻 式十三職人十四緝通韻 造二十號士四紙無韻江氏以爲後三章皆無韻，今攷之，唯殄、瑕、造、士無韻。

#### 校記

〔一〕「聖」原作「興」，據《毛詩注疏》改。

### 皇矣 周始大也。

皇矣上帝，臨下有赫。監觀四方，求民之莫。維此二國，其政不獲。維彼四國，爰究爰度。  
上帝耆之，憎其式廓。乃眷西顧，俾之。此維與宅。一章作之屏之，其蓄其翳。修之平之，其  
灌其柵。啟之辟之，其裡其樞。攘之剔之，其際其柘。帝遷明德，大王。串夷載路。天立厥  
配，大姜。受命既固。二章帝省其山，柞、械斯拔，松、柏斯兑。帝作邦作對，自大伯、王季。夾  
寫大伯。維此王季，因心則友。從王季一面寫友愛，而大伯之讓德自見。則友其兄，則篤其慶，載錫之  
光。受祿無喪，奄有四方。三章維此王季，帝度其心，貺其德音。其德克明，昭定明德。克明

克類，克長克君。王此大邦，克順克比。比于文王，遐下四章。其德靡悔。既受帝祉，施于孫子。四章帝謂文王，「無然畔援，無然歆羨，誕先登于岸。」密人不恭，敢距大邦，侵阮徂共。王赫斯怒，爰整其旅，以按徂旅，以篤于周祜，以對于天下。五章依其在京，侵自阮疆。陟我高岡。「無矢我陵，我陵我阿，無飲我泉，我泉我池。」度其鮮原，居岐之陽，在渭之將，萬邦之方，下民之王。六章帝謂文王，「予懷明德，不大聲以色，不長夏以革。不識不知，順帝之則。」帝謂文王，「詢爾仇方，同爾兄弟，以爾鉤援，攻具。與爾臨衝，攻具。以伐崇墉。」城池。○七章臨衝閑閑，崇墉言言，執訊連連，攸誠安安。斬俘。是類是禡，祭禱。是致是附，四方以無侮。臨衝弗弗，崇墉仡仡。再述攻堅，以見降敵之難。是伐是肆，是絕是忽，四方以無拂。八章

右《皇矣》八章，章十二句。《序》云：「美周也。天監代殷莫若周，周世世修德莫若文王。」朱子無異議，故《集傳》從之。唯姚氏以爲「美周」泛混。大抵上篇《思齊》與此篇皆咏文王：「思齊」則述其母以上及王母，此篇則述大王以下至王季，皆推原其所生以見其爲聖也。然「以見其爲聖」一語，又何嘗非「泛混」哉？況經咏文王，亦只言其伐密、伐崇二事，有此武功而已，何以遽見其「爲聖」？此似是而非之說也。周雖世世修德，然至文王而始大。故此詩歷敘大王以來積功累仁之事，而尤著意摹寫王季友愛一段至德。一以見大伯讓國之美，一以見王季實能不負大伯推讓之心，故至文王而昌大也。文王聖德自不必言，而其所以昌大大王之業者，實自伐密、伐崇，始有文德，而又有武功。所謂

「一怒而安天下之民」者，天之眷戀，雖欲不「西顧」也，其可得哉？自篇中處處以「明德」作骨，此尤周家世傳心學，與虞廷「執中」，受授無異。學者於此，斷斷不可輕意滑過。三代帝王，莫不本天德以爲王道；若後世，則兵強馬壯者爲之而已。天命之歸，亦未嘗不有所眷顧，然而雜霸、純王之分，判若霄壤也。

【眉評】「一章」天眷西顧是全篇主腦，然自求民莫來，天豈有私於周哉？「二章」接敘大王遷岐開闢景象，歸重「明德」。通篇限定二字發揮，是周室歷代傳心家學。「三、四章」寫王季友愛，帶出太伯，是夾敘法，亦是推原法。而精理名言，粹美無痕，所以爲佳。「五章」以下敘伐密、伐崇，連用「帝謂文王」句，特筆提起，是何等聲靈！通篇文勢皆振。後代文唯韓愈往往有此。「六章」定都於程。「七章」不脫「明德」字。三聖明德，亦作三樣寫。上章伐密，止按旅一句，此下伐崇，備久而後降，是文章詳畧相間法。「八章」一怒而安天下之民，所謂王者之師也。

【集釋】「皇」大也。「臨」視也。「莫」定也。「二國」姚氏際恆曰：「二國，商、周也。獲，得也。商、周之政大不相得，于是悉反之，承上天監民而言。舊解二國爲夏、商，不應遠及夏。且此者，本國及紂云也，若夏、商，則亦不云此矣。「四國」四方之國也。「究」尋也。「度」謀也。「善」毛氏其曰：「善，致也。「憎」集傳：「憎，當作增。「式廓」輔氏廣曰：「式，如式樣之式。廓，如匡廓之廓。「作」拔起也。「屏」去之也。「菑」木，立死者也。「翳」小木，蒙密蔽翳者也。「修平」皆治也。「灌」叢生者也。「樹」行生者也。「啟辟」芟除也。「檉」集傳：「檉，河柳也。似楊，赤色，生河邊。陸氏璣曰：「一名兩師，枝葉似松。「据」集

傳：「櫛，櫛也。腫節似扶老，可爲杖者也。陸氏璣曰：即今靈壽木是也。〔櫛〕則也。〔壓〕，壓也。〔集傳〕：壓，山桑也。與柘皆美材，可爲弓幹，又可爲也。〔考工記〕：弓人取幹，柘爲上，壓桑次之。〔明德〕：謂明德之君，即大王也。〔申夷〕：申即患，謂昆夷也。〔載路〕：謂滿路而去。〔配〕：指大姜也。〔帝〕：上帝也。〔柞〕：柞三句：柞，櫟也。械，白桺也。均叢生有刺，拔挺而上。兑，通也。姚氏際恆曰：柞械拔而松柏兑，往來道通，人物蕃盛，于是始成其爲邦而有君矣，故曰：帝作邦作對。作對，猶對于天下也。〔大伯〕：大王長子。〔王季〕：大王少子，文王父也。〔因心四句〕：姚氏際恆曰：因心者，王季因大王之心也，故受大伯之讓而不辭，則是能友矣。下單承則友言，「則友其兄」，因以「篤慶」、「錫光」，描摹家庭一段霽然致祥光景也。舊解皆切合受讓上糾纏作解，古人作詩，要無此意。〔奄〕：〔集傳〕：奄字之義，在忽遽之間。〔緇〕：〔集傳〕：緇，春秋傳：樂記：皆作莫，莫然清靜也。〔克明〕：能察是非也。〔克長〕：教誨不倦也。〔克君〕：賞慶刑威也。〔順〕：慈和也。〔比〕：上下相親也。〔比于〕：至于也。〔悔〕：遺恨也。〔帝謂〕：設爲天命之詞也。〔畔援三句〕：〔集傳〕：無然，猶言不可如此也。畔，離畔也。援，攀援也。言舍此而取彼也。歆，欲之動也。羨，愛慕也。言肆情以徇物也。岸，道之極處也。又曰：人心有所畔援，有所歆羨，則溺於人欲之流，而不能以自濟。文王無是二者，故獨能先知先覺，以造道之極至。蓋天寶命之，而非人力之所能及也。姚氏際恆曰：畔援，猶跋扈也；歆羨，覬覦也；無然，謂無使其然。「誕先登于岸」，謂先據高以制下也。于是密人之不恭則征之。不恭即畔援、歆羨之類。岸，鄭氏謂獄，固非，〔集傳〕說作道，無論解〔詩〕不可說入理障，且下「密人不恭」如何接得去？又以道爲岸，彼岸，釋氏之



教也。解《詩》不可入吾儒之理，況可入釋氏之理耶？案：姚氏之駁《集傳》是已。然謂畔援猶跋扈者亦非。且登岸爲據高以制下，義亦甚淺而粗，恐「帝謂文王」之意不如是耳。愚謂畔者，離而去之也。援者，攀而附之也。無然者，謂無間離人以攀附之心也。至歆者，欲之動乎中；羨者，心之慕乎外，蓋利人土地而生羨慕之念耳。今皆無之，是帝心之所深眷者矣。登岸，猶言拯民溺流，而登諸高岸之上也。以故「密人不恭」，命爾以征伐者，非利人土地，非阻人來歸，蓋將拯民水火，「以篤于周祜，以對于天下」而已。帝謂如此，夫豈後儒淺見所能測哉！「密」密須氏也，姁姓之國。梁氏益曰：密須，子爵，商侯國，《世本》云之。有密須，文王伐之。「阮」國名，在今涇州。密則靜寧州也。「共」阮地名，今涇州之共池是也。梁氏益曰：虞公所奔之共池。「按」過也。「徂旅」密師之往共者也。「依其在京一章」姚氏際恆曰：此言定都也。謂依其在周京之時，蓋從伐密之侵阮來，在伐密以後也。《集傳》云：「文王安然在周之京，而所整之兵既遏密人，遂從阮疆而出以侵密。」按，既云「遏密」，又云「出以侵密」，無異醉夢語，可怪殊甚。且侵阮本謂密人，卽上「侵阮阻共」也，乃云「侵密」，尤不通。鮮原必是地名，今無考。或據《竹書紀年》爲地名以證，此書不可信。案：「依其在京」一語，姚、朱二說均未明。蓋既伐密之後，將別遷都，不必遠去，但依其在周京左近之地。故曰「居岐之陽，在渭之將」，去周京亦未遠也。「陟高岡」五句，正度地之宜：無近陵，無逼泉，泉以爲池，陵易成谷，均非善地。然非登高望遠，不能相其陰陽，故「陟我高岡」，而後辨耳。鮮原如姚說，當是地名，或卽程邑也。「懷明德五句」姚氏際恆曰：帝謂予懷文王之明德，其整旅、遏旅之時，不大其聲

音與色相也，不長其侈大與變革也。《集傳》解「不大」句，謂「德之深微，不暴著其形迹」，全本《中庸》說理。不知《中庸》斷章取義，豈可從乎！案：其說近是，存之。蓋聖王處事，臨大敵，抒大難，不動聲色，不輕喜怒，但循天理以著威德，是此章大旨。《鈎援》鈎梯也。《臨》臨車也，在上臨下者也。《衝》衝車也。皆攻城之具也。《崇》國名，在今西安府鄠縣。《史記》：崇侯虎譖西伯於紂，紂囚西伯於羑里。西伯之臣閼夭之徒求美女、奇物、善馬以獻紂，紂乃赦西伯，賜之弓矢鈇鉞，得專征伐。曰：「譖西伯者，崇侯虎也。」西伯三年，伐崇侯虎而作豐邑也。《墉》城也。《閑閑》徐緩也。《言言》高大也。《連連》屬續狀。《敵》割耳也。軍法：獲者不服，則殺而獻其左耳。《安安》不輕暴也。《類》將出師祭上帝也。《禡》至所征之地而祭始造軍法者，謂黃帝及蚩尤也。《致》致其至也。《附》使之來附也。《萑萑》強盛貌。《仡仡》堅壯貌。《肆》縱兵也。《忽》滅也。《拂》戾也。

【標韻】赫十一陌莫、獲並同度十藥廊同宅陌叶韻 駢八霽樹同本韻 樞六御柘二十二禡路御固同叶韻 拔十一隊兌九泰對隊季四賁友二十五有叶韻 兄八庚慶七陽光、喪、方並同轉韻 心十二侵明庚君十二文通韻 比四紙悔十脂子紙通韻 援十七霰羨同岸十五輪叶韻 恭二冬邦三江共冬通韻 怒七遇旅六語祛七慶下二十一馬叶韻 疆陽岡同本韻 阿五歌池四支叶韻 陽陽將、方、王並同本韻 德十三職色同革十一陌則職通韻 王陽方同援十三元衝冬塘同叶韻 閑十五刪言元連一先安十四寒通韻 禡禡附七遇侮虞叶韻 萑五物仡同忽六月拂同通韻

## 靈臺 美遊觀也。

經始靈臺，經之營之，庶民攻之，不日成之。經始勿亟，庶民子來。一章王在靈囿，應鹿攸伏，應鹿濯濯，白鳥濯濯。王在靈沼，於物魚躍。二章虞業維樅，賁鼓維鏞，於論鼓鐘，於樂辟雍。三章於論鼓鐘，於樂辟雍。鼙鼓逢逢，矇瞍奏公。四章

右《靈臺》四章：二章章六句，二章章四句。《小序》以爲「民始附」，如同醉夢，何足深辯。而辟雍之名，或以爲學名，或以爲樂名，或又以爲習樂之所，且更以爲大射行禮之處。紛紛聚訟，迄無定解，亦覺可笑。以爲學名者，引《王制》論學曰「天子曰辟雍，諸侯曰泮宮」，遂以此辟雍爲講學之地。且其制「水旋邱如璧」，遂謂雍爲澤，更名其學曰澤宮。以爲樂名者，引《莊子》論歷代樂曰「文王有《辟雍》」，故又以爲樂名也。蘇氏疑之曰：「古人以樂教胄子，則未知學以樂而得名歟，樂以學而得名歟？」是不敢以爲樂，而以爲學樂之所耳。朱子又曰：「古人之學與今不同。《孟子》所謂『序者，射也』，則學蓋有以射爲主者矣。」此又以爲習射之處，皆爲學所泥也。然獨不思所謂學者「曰辟雍」，天子之學也，其時文王未爲天子，而何以有辟雍之學耶？且辟雍環邱以水，則不能習射；地近靈臺、靈沼、靈囿，與麋鹿、禽鳥、鱗介爲隣，更非習樂講學地，蓋游觀處耳。夫人君游樂，必有園圃。築臺所以望氣視，察災祥也；設囿所以域禽獸，備田獵也；至於關沼，則蓄酒饌兼資灌溉耳。然有游必有宴，有宴必有樂，此《辟雍》之樂所由名歟？其後周家盛王以爲：辟雍者，文王之所經營也。臺曰靈臺，囿

曰靈囿，沼曰靈沼，雖曰民情樂赴，實亦地氣鍾靈。故或就其地以爲學，或仿其制以設教，或假其名以別乎「泮水學宮」之號，均不可知。然於是始有以辟廡爲天子學者，而諸侯不得立焉矣。若此時之辟廡，則實以供文王之游玩，而非以待諸生之觀聽也。諸儒何不平心一細察之？詩首章見落成之速，使非民情踴躍，胡以至是？次章見蕃育之盛，不啻人物相忘，藉非賢者，又烏樂此？末二章則辟廡鐘鼓，以助謙遊樂興，此何如太平景象乎？故同此鐘鼓管樂之音也，同此臺池鳥獸之觀也，而民之見之者，有樂有不樂，非可強而同之。同此，則不惟民心樂赴，且亟欲同樂，雖欲緩之而不能者，果操何術以致之哉？詩人觀此，能不一再咏之，以紀聖王游觀之美？若以辟廡爲學，則「靈臺」一詩，前方縱游，後忽講道，殊覺不倫，何以立訓？古人斷斷無是文字，而顧可以誣文王哉！

【眉評】「一章」民情踴躍，於興作日見之。「二章」飛走鱗介，各適其性，卻處處與王夾寫。見人物兩忘，不相驚擾之意。描摹物情，體貼入微。「三、四章」辟廡「鐘鼓」，盛世游觀，何等氣象！

【集釋】「經」度也。「靈臺」文王所作也。「營」鄭氏康成曰：營表其位。孔氏穎達曰：謂以繩度立表，以定其位處也。「攻」作也。「不日」言不數日也。「集傳」言「不終日」者，非。「亟」急也。「囿」《說文》曰：囿，苑有垣也。案：臺下有囿，所以域養禽獸也。「應」牝鹿也。「伏」言安其所處，不驚擾也。「濯濯」肥澤貌。「白鳥」鶴與鷺之類。「濯濯」潔白貌。「物」滿也。「虞業維樅」《集傳》：虞，植木以懸鐘磬，其橫者曰柶。業，柶上大板，刻之捷業如鋸齒者也。樅，業上懸鐘磬處，以綵色爲崇牙，其狀樅樅然者也。「賁」大鼓也。「鏞」大鐘也。「論」《集傳》：論，倫也。言得其倫理也。姚氏際恆曰：論，鐘鼓

之節度，不必改作倫。〔辟靡〕解已見篇中。姚氏際恒曰：辟靡非天子之學，戴仲培、楊用修皆闢之。今按《毛傳》第言「水旋丘如璧曰『辟靡』，以節觀者」，鄭氏于《文王有聲》曰：「武王于鎬京行辟靡之禮」，皆不言天子之學。自《王制》曰：「天子之學曰辟靡。」《毛傳》轉於《王制》之時，鄭在其後，而皆不之信，則《王制》之說果未然也。大抵辟，君也；靡，和也。《文王有聲》上章曰「皇王維辟」，下章曰「鎬京辟靡」，正可證。謂之辟靡者，作樂之地也，故《莊子》言歷代之樂曰：「文王有《辟靡》」是矣。「鎬京辟靡」者，築城池，建垣輪，以成京師，而亦法文王爲作樂之地焉，然則辟靡既非學，即《毛傳》「水旋丘如璧」之說亦非實。然自有此說，而以《魯頌》「泮水」爲半璧之形所自來矣。案：是說亦不以辟靡爲天子學，乃作樂之地耳。然以之解是詩則近是，若概謂辟靡非學則不然。蓋後世固以辟靡爲天子之學矣。考古家只知駁前而不顧後，往往如是。〔鼙鼓〕《集傳》：鼙，似蜥蜴，長丈餘，皮可冒鼓。陸氏佃曰：《夏小正》云：「剥鼈以爲鼓」，其皮堅厚，取以冒鼓，故曰鼙鼓。鼙鼓非特有取於皮，亦其鼓聲逢逢然象鼙之鳴。《續博物志》曰：「鼙長一丈，其聲如鼓。」〔矇矓〕有眸子而無見曰矓，無眸子曰矓。古者樂師皆以瞽者爲之，以其善聽而審於音也。〔公〕事也。

【標韻】營八庚成同本韻 亟十三職來十友叶韻 伏一屋濯三覺窩同躍十藥通韻 縱二冬鏞、鐘、靡並同本韻  
鐘、靡、逢冬公一東通韻

### 下武 美武王上繼文德以昭後嗣也。

下武維周，世有哲王。三后在天，王配于京。一章王配于京，世德作求。永言配命，成王之孚。二章成王之孚，下土之式。永言孝思，孝思維則。三章媚茲一人，應侯順德。永言孝思，昭哉嗣服。四章昭茲來許，繩其祖武。於萬斯年，受天之祜。五章受天之祜，四方來賀。於萬斯年，不遐有佐。六章

右「下武」六章，章四句。「小序」謂「繼文也」，意是而詞未達。蓋有意與下章「繼伐」相對故也。武王伐殷而有天下，諡曰武，樂亦曰「武」。人幾疑其以武功顯，而文德或有媿乎三后。殊不知其所稱善繼、善述者，乃在文德而不在武功，故詩人特表而咏之，亦可謂深知武王者。以武王之德在「永孝思」，孝思之永，在「求世德」，以上合乎天理，而下孚乎人心。徐氏光啟曰：「武王通先人之節以濟天下之變，與先人志意流通。此其心事何等光明正大，故曰『昭哉嗣服』，不但以其變侯化國爲能闡揚光大而已。」又可謂善說此詩者矣。夫天子以善繼述爲能孝，故武王之孝曰達孝，尼父固嘗稱之。此詩發端卽曰「下武維周」，下者，後也；武者，繼也。以後人而繼先世之業，孝思之永，孰大乎是？「箋」、「傳」甚明，而朱晦翁乃云「下，義未詳」，又疑其「字當作文」。無論文複三后，卽詩旨亦因之而晦。姚氏譏其文義、字義均不通，雖未免言之太甚，實亦有以自取耳。

【眉評】「三、四章」前後四章皆首句跟上蟬聯而下，中兩章忽用第三句相承，格又一變。

【集釋】「下」鄭氏康成曰：下，猶後也。「武」毛氏萇曰：武，繼也。「三后」大王、王季、文王也。「王」武王也。「配」對也。「京」鎬京也。「媚」愛也。「一人」謂武王也。「服」事也。「繩」繼也。「武」迹也。「佐」助也。

【標韻】王七陽京八庚轉韻 求十一尤孚七虞叶韻 式十三職則同本韻 德職服一屋叶韻 武七虞祐同本韻 賀二十一箇佐同本韻

### 文王有聲 鎬以成豐志也。

文王有聲，通駿有聲，通求厥寧，通觀厥成。文王烝哉！單句終。○一章文王受命，有此武功；文中有武。既伐于崇，作邑于豐。文王烝哉！二章築城伊瀉，作豐伊匹。匪棘其欲，通追來孝。承先。王后烝哉！文王。○三章王公伊濯，維豐之垣。四方攸同，王后維翰。王后烝哉！文王。○四章豐水東注，以豐水作兩京樞紐。維禹之績。四方攸同，皇王維辟。皇王烝哉！武王。○五章鎬京辟廡，武中有文。自西自東，自南自北，無思不服。皇王烝哉！武王。○六章考卜維王，宅是鎬京。維龜正之，武王成之。武王烝哉！七章豐水有芭，武王豈不仕！詒厥孫謀，啟後。以燕翼子。武王烝哉！八章

右「文王有聲」八章，章五句。此詩專以遷都定鼎爲言。文王之遷豐也，「匪棘其欲」，蓋「求厥寧」，以

「追來孝」耳，然已兆宅鎬之先聲。武王之遷鎬也，豈徒繼伐，蓋建辟應以貽孫謀耳，又無非成作豐之素志。故文、武對舉，並言文之心即武之心，武之事實文之事。自有日進於大之勢，更有事不容已之機。文、武亦順乎天心之自然而已，夫豈有私意於其間哉？《序》云「繼伐」，固非詩人意旨，即《集傳》所謂「此詩言文王遷豐，武王遷鎬之事」，又何待言？蓋詩人命意必有所在。《大雅》之咏文、武多矣，未有以豐、鎬並題者。茲特題之，則必以建置宏謀爲繼承大計。說者當從此究心以求兩聖心心相印處，乃得此詩要旨。不然，泛言繼述，與詩無涉，即呆說豐、鎬，於事又何益耶？詩共八章，前四章乃說文王遷豐，後四章說武王遷鎬。遷鎬則「貽厥孫謀」，遷豐則「追追來孝」，而皆以單句贊詞煞脚，此兩平駿板格也。然八句煞脚中，前兩章言「文王」，後兩章言「武王」，中間四章，二言「王后」，二言「皇王」，則又變矣。不獨此也。言文王者，偏曰伐崇「武功」，言武王者，偏曰「鎬京辟應」，武中寓文，文中有武。不獨兩聖兼資之妙，抑亦文章幻化之奇，則更變中之變矣！若姚氏引鄧潛谷之言曰：「中四章皆言武王」，曰「王后」、「皇王」者，本其在生爲君而言也，末二章曰「武王」者，本其崩後之諡而言也。忽生忽死，忽皇忽后，夾雜不清，豈成文哉？法律尚且弗知，義旨烏能盡識？以此嘆說《詩》之難也。

【眉評】「五章」豐水之東卽鎬，遞下鎬京無迹。

【集釋】「通」《集傳》：「通，義未詳，疑與聿同，發語辭。」《駿》大也。《烝》姚氏際恒曰：「烝，《說文》：『火氣上行』，贊其熾盛升進之意。舊說謂君，非是。王后、皇王，卽君也，又曰君哉，可乎？」《伐崇》事見皇矣。



篇。〔作邑〕徙都也。嚴氏彙曰：國勢寢盛，程邑不足以容，乃作邑于豐以居之。〔豐〕即崇國之地，在今鄂縣杜陵西南。〔滅〕《集傳》：滅，成溝也。方十里爲成，成間有溝，深廣各八尺。陸氏德明曰：《韓詩》作漁。〔匹〕稱也。〔棘〕急也。〔王后〕指文王也。〔公〕功也。〔濯〕著明也。〔豐水〕《集傳》：豐水東北流，徑豐邑之東，而注于河。〔績〕功也。〔皇王〕有天下之號，指武王也。〔辟〕君也。〔鎬京〕《集傳》：鎬京，武王所營也。在豐水東，去豐邑二十五里。呂氏祖謙曰：《後漢·地志》曰：「鎬在京兆尹上林苑中。」孟康云：「長安西南有鎬池。」《古史考》曰：「武王遷鎬，長安豐亭鎬池也。」〔辟廱〕說見前篇。張子曰：靈臺辟廱，文王之學也。鎬京辟廱，武王之學也。至此始爲天子之學矣。案：靈臺辟廱不必爲學，或至此始爲學耳。〔思服〕心服也。〔考〕稽也。〔宅〕居也。〔正〕決也。嚴氏彙曰：以吉凶取正于龜，而龜出其吉兆以正定之也。〔成之〕作邑居也。〔苕〕草名。〔仕〕姚氏際恒曰：「孔氏曰：述用材也。豐水之傍以潤澤生芑穀，喻養成人材也。武王豈有不仕之以官者，言無不用之，無遺材也。蓋欲傳其孫之謀，而燕安輔翼其子耳。」案：是說較諸家訓仕爲事之說差直捷，故從之。〔詒〕遺也。〔燕〕安也。〔翼〕敬也。〔子〕指成王也。

【標韻】聲八庚成同本韻 功一東豐同本韻 匹四質孝十九效叶韻 垣十三元翰十四寒通韻 績十二錫辟十一陌

通韻 應二冬東一東通韻 北十三職服一屋叶韻 京八庚成同本韻 仕四紙子同本韻

以上《文王之什》凡十篇。《集傳》云：《鄭譜》此以上爲文、武時詩，以下爲成王、周公時詩。今案：《文王》首句即云「文王在上」，則非文王之詩矣。又曰「無念爾祖」，則非武王之詩矣。《大明》、《有聲》并言文、武者非一，

安得爲文、武之時所作乎？蓋正雅皆成王、周公以後之詩，但此什皆爲追述文、武之德，故譜因此而誤耳。愚謂作詩時世多不可攷，強爲之譜，亦臆測耳。大抵文王一什，皆周家有天下後追述祖德之詩，故疑非周公不能作也。卽械模、旱麓、靈臺三篇，或譜入文王之世者，亦非旱麓偶不稱王言諡，而械模、靈臺二詩則居然言王矣。豈西伯生存，亦自命爲王乎？是二天子也，詎可爲訓。詩以忠孝爲本，周家之德亦以忠厚開基。說者以是誣文不識天經大義，獨不念詩學根本乎？是烏可以無辯也？

# 詩經原始卷之十四

## 大雅二

### 生民之什

生民 述后稷誕生之異，爲周家農業始也。

厥初生民，時維姜嫄。特題母名。生民如何？克禋克祀，素性好神。以弗無子。以「弗」字，尚「無子」。履帝武敏歆，忽感異迹。攸介攸止，載震載夙，載生載育，遂有身孕。時維后稷。點明。○一章誕彌厥月，先生如達。不圻不副，無畱無害。以赫厥靈，上帝不寧。不康禋祀，居然生子。徵詞。○二章誕寘之隘巷，牛羊腓字之。誕寘之平林，會伐平林。誕寘之寒冰，鳥覆翼之。鳥乃去矣，后稷呱矣。實覃實訐，厥聲載路。三章誕實匍匐，克岐克嶷，以就口食。蓺之荏菹，荏菹旆旆，禾役穰穰，麻麥幪幪，瓜瓞嗶嗶。四章誕后稷之穠，有相之道。菲厥豐草，種之黃茂。實方實苞，實種實稂，實發實秀，實堅實好，實穎實栗。卽有邠家室。五章誕降嘉種，維秬維秠，維糜維芑。恆之秬秠，是獲是畝；恆之糜芑，是任是負。以歸肇祀。六章誕

我祀如何？或春或榆，或籩或蹂，釋之叟叟，烝之浮浮，載謀載惟，取蕭、祭脂，取粢以載，載燔載烈，以興嗣歲。七章印盛于豆，于豆于登。其香始升，上帝居歆。胡臭亶時。后稷肇祀，庶無罪悔，以迄于今。八章

右《生民》八章，四章章十句，四章章八句。從《集傳》。此詩事異文奇，未免駭人聽聞，故說者紛然各異。然所以異者，其亦有故：一由於不通文理，一由於不解人事。曷言之？詩曰：「生民如何，克禋克祀，以弗無子。」履帝武敏歆，攸介攸止，載震載夙，載生載育。《集傳》云：「精意以享謂之禋，祀，郊禘也；弗之言被也，被無子，求有子也。」意蓋謂「姜嫄出祀郊禘，見大人迹而履其拇，遂歆歆然如有人道之感，於是即其所大所止之處，而震動有娠」。其說本《史記》及鄭《箋》，諸儒多非之。然證以二、三章「居然生子」，以屢棄寘而屢逢庇護，雖牛羊禽鳥亦腓字而覆翼之，則「履迹」之說似非虛誕。唯從帝出祀郊禘，雖履迹而心動，安知其娠不為帝子而為異種，必多方以棄寘之乎？若《毛傳》云：「姜嫄出祀郊禘，履帝嚳之迹，而行將事齊敏」，則尤不通。之祀蓋從祀郊禘者，求有子也。求子而得子，又反棄之，有是理乎？凡此皆「克禋克祀，以弗無子」之文有未通耳。詩言禋祀，不過精意以致祭，未言「郊禘」也。凡言「郊禘」者，皆後儒所增。何以知其為求子乎？「以弗無子」。鄭氏謂「被除其無子之疾」，已迂而鑿。姚氏又謂「弗使其無子」，亦與下意棄寘不相貫。唯鄧潛谷與季明德兩家以為姜嫄未嫁而生子者得之。蓋「以弗」云者，以其弗嫁，未字於人也。「無子」者，以其未字於人，故尚無子也。下乃云「履帝武敏歆」，是倏然有感而心動，故下又云「居然生子」而棄寘之。文氣本自相貫，其奈諸儒

不細心領會，何哉？然則裡祀謂何？愚意姜嫄其人，性必好道而敬神，故於天帝之類恆虔祀之。其所履者亦即天帝之迹，非別有所謂大人也。蓋平日精神所聚，故不覺靈氣感通，豈必待郊禘求子而後有所遇哉！此等事不必上世始有之，即後世之見於稗官小說及釋典中者，不一而足，固無足異。今黃梅意生寺爲釋子慧能所生地，居然尚存，亦其類也。即春秋傳闕穀於兔之被棄，爲虎所乳；前漢書高帝之母夢與龍交而娠，何一非駭人聽聞者哉？唯高帝現有太公，故明知其爲龍種，而亦不忍棄之；子文母未嫁而孕，故雖知其爲父後，而亦不能不棄之，有名與無名之分也。是知后稷之生，必因無名而見棄。若從帝郊禘而娠，豈尚無名乎哉？愚謂諸儒不察文義，且並不解人情者，此也。又況詩中溯源，但題其母，不及其父，則是無父而生也明矣。姜嫄爲高辛氏世紀，或曰元妃，都無定解，然皆後日事。若此時，則尚未有夫也，故足怪。詩首章言受孕之奇。次言誕生之易。三言被棄而庇護者多。四言稍長即知稼穡。五言其有功農民，因以受封。六言其能降嘉種以歸肇祀。七言其祭祀之誠，並祈來年。八言周人世守其業，不敢有懈，而因以得膺天命而有天下。是皆后稷所賜，故將尊之以配天，未爲過也。然非姜嫄不及此，故曰「厥初生民」，自姜嫄始。《小序》曰：「尊祖也。」《大序》曰：「文、武之功起于后稷，故推以配天。」《集傳》從之，謂「周公制禮，尊后稷配天，故作詩」。然皆得其半而未明也。后稷配天，已有《思文》一頌，此特推原其故耳，非用以爲配天之樂。衆說不明，故異論滋生。何玄子謂此詩「郊祀后稷以祈穀」，朱晦翁又謂「受釐頒胙之禮」，何不即詩辭而一細繹之耶？

【眉評】「一章」受孕之奇。 「二章」誕生之易。 「三章」保護之異。 「四章」嗜好天生。 「五章」克

勤人事。教種膚封。 「六章」播種肇祀。 「七章」報賽祈年。 「八章」尊祖無怠。通篇層次井然，

不待深求而自了了。唯八章中皆以八句十句相間，又二章以後，七章以前，每章起句均用「誕」字作首，另是一格。

【集釋】「民」人也，謂周人也。「時」是也。「姜嫄」《集傳》：姜嫄，炎帝後，姜姓，有邠氏女，名嫄，爲高辛之世妃。孔氏穎達曰：鄭以姜嫄爲高辛之世妃，謂其後世子孫之妃也，未知其爲幾世，故直以「世」言之。姚氏際恆曰：或云元妃，歷來相傳如此。案：《通鑑》亦作帝嚳元妃所生，卽棄。於堯爲長兄，何以至舜始用？此中年歲不無可疑。或以爲世妃者庶幾近之，第去帝嚳世亦未遠耳。「祀」《集傳》：祀，郊禘也。古者立郊禘，蓋祭天於郊，而以先媒配也。變媒言禘者，神之也。其禮以玄鳥至之日，用太牢祀之。天子親往，后率九嬪御。乃禮天子所御，帶以弓韉，授以弓矢，于郊禘之前也。案：祀者，祭之通名。詩第言「克禋克祀」者，謂能精意以享祖耳，並無一語及郊禘意。不知《集傳》何以引及此禮，至使第三章棄寘之言，竟不能通，皆此注誤之也。然不獨《集傳》爲然，諸家正坐此病耳。「履」踐也。「帝」上帝也。「武」迹也。「敏」拇也。郭氏璞曰：拇迹大指處。「歆」動也。「介」大也。「震」娠也。「夙」《集傳》：夙，肅也。生子者，及月辰居側室也。「育」養也。「誕」發語辭。「彌」終也，終十月之期也。「先生」首生也。「達」小羊也。羊子易生，無留難也。「坼副」皆裂也。「赫」顯也。「不寧」寧也。「不康」康也。「居然」猶徒然也。「腓」肥。「字」愛也。「會」值也。「覃」長也。「訐」大也。「載」滿

也。〔匍匐〕手足並行也。〔岐嶷〕峻茂之狀。〔口食〕自然食也。〔藪〕樹也。〔荏菹〕大豆也。〔旆旆〕枝旗揚起也。〔役〕列也。〔穠穠〕苗美好之貌也。〔幪幪〕茂密也。〔曄曄〕多實也。〔相〕助也。〔菲〕治也。〔種〕布之也。〔黃茂〕嘉穀也。〔方〕房也。〔苞〕甲而未坼也。〔裊〕漸長也。〔發〕盡發也。〔秀〕始穠也。〔堅〕其實堅也。〔好〕形味好也。〔穎〕《說文》曰：穎，禾末也。案：言其穗重而穎垂也。〔粟〕孔氏穎達曰：《左傳》曰：「嘉粟旨酒。」服虔云：「穀之初熟爲粟。」〔邠〕陸氏德明曰：邠，后稷所封國也，今在京兆武功縣。姚氏際恆曰：「卽有邠家室。」《毛傳》曰：「邠，姜嫄之國也。堯見天因邠而生后稷，故國后稷于邠。」孔氏曰：「邠國當自有君，所以得封后稷者，或時君絕滅，遷之他所也。」羅泌駁之曰：「昔者帝嚳取于有駘氏，曰姜嫄，生后稷，而后稷之封亦曰駘。說者咸謂帝堯以其母國封之。然及太王復取于有駘氏曰大姜，是姜姓之駘至周猶在，豈得云以是而封稷哉！不知稷封之駘在于武功，而姜姓之駢在于瑯琊，固不同也。」何玄子曰：「瑯琊之駢，固齊地，乃有逢伯陵所居，大姜祖也。然大姜之『有台』，據《列女傳》作『有呂』，呂、台相似，疑但當作『呂』耳。呂，姜姓也。《國語》云：「堯祚四岳國，命爲侯伯，賜姓曰姜，氏曰有呂。」嫄固姜姓，或是訛『有呂』爲『有台』，轉訛爲『有邠』，未可知也。羅說是，何說亦存之。〔降〕《集傳》：降，降是種於民也。《書》曰：「稷降播種」，是也。〔秬〕黑黍也。〔秠〕黑黍，一稗二米者也。〔糜〕陸氏德明曰：「爾雅」作「糜」，赤梁粟也。〔芑〕白梁粟也。〔恆〕徧也。〔任〕肩任也。〔負〕背負也。〔肇〕始也。稷始受國爲祭主，故曰肇祀。〔揄〕抒白也。謂取米出臼也。〔簸〕揚去糠也。〔蹂〕蹂以脫其穗也。〔穉〕漸米也。〔叟叟〕陸氏德明曰：叟字又作漘，漘米聲

也。《爾雅》作滌。《浮浮》、《爾雅》、《說文》並作燂。云，烝也。《謀》卜日擇士也。《惟》齊戒具修也。《蕭》蒿也。《脂》、《集傳》：脂，脾膏也。宗廟之祭，取蕭合脾膏烝之，使臭達牆屋也。案：此亦氣相感耳。《羝》牡羊也。《較》姚氏際恆曰：較爲祭行，月令冬，「祀行」本此。「以興嗣歲」，祈來歲也。《叩》姚氏際恆曰：叩，我也。鄭氏曰：「我，后稷也。」終言「后稷肇祀」，至於今承而行之，幸得無罪悔也。

【標韻】民十一真類十三元通韻 祀四紙子、止並同本韻 夙一屋育同稷十三職叶韻 月六月達七曷害九害叶韻 靈九育寧同本韻 祀紙子同本韻 字四真翼十三職隔句叶韻 林十二侵林同二字自爲韻 去六御呱七虞許同 路七遇叶韻 甸職食同本韻 旒九泰稷實通韻 轅一束嗥一董叶韻 道十九略草同茂二十六育苞三肴褒宥秀 同好皓叶韻 栗四質室同本韻 秬紙苞同敵二十五有負同祀紙叶韻 掄虞蹂十一尤叟、浮並同叶韻 惟四支 脂同本韻 較隊歲八霽通韻 登十蒸升同本韻 歆侵今同本韻 祀紙悔十賄通韻

### 行葦 詩用未詳。

敦彼行葦，牛羊勿踐履。方苞方體，維葉泥泥。戚戚兄弟，罔爾來。莫遠具爾。或肆之筵，點明燕樂。或授之几。一章肆筵設席，授几有緝御。或獻或酢，洗爵奠斚。醢醢以薦，或燔或炙。嘉穀脾臄，或歌或嘏。二章敦弓既堅，四鍬既鈞，舍矢既均，序賓以賢。敦弓既句，既挾四鍬。射作兩層寫。四鍬如樹，序賓以不侮。三章曾孫維主，以曾孫爲主，則兄弟爲賓。酒醴維醕，酌以大斗，以祈黃耇。黃耇台背，如皤。以引以翼。壽考維祺，以介景福。四章



右《行葦》四章，章八句。從《集傳》。此詩首章總提燕兄弟，次言醕酢，三言射禮，末言尊優耆老。詞意甚明而詩用莫詳者，蓋以爲燕射，而無尊老之文；以爲養老，則更非角射之典。故《小序》但謂「忠厚」，《大序》衍之云：「周家忠厚，仁及草木，故能內睦九族，外尊事黃耆，養老乞言，以成其福祿焉。」朱晦翁駁之，以爲「逐句生意，無復倫理」，是已。然詩中有射，而《序》遺之；詩無乞言，而《序》反增之，則尤荒謬之甚。卽《集傳》疑爲「祭畢而燕父兄耆老之詩」。無論稽之《三禮》，無文可考；縱使有之，鄒肇敏曰：「夫孔熯之餘，再欲逞破的之技，卽少壯者不堪，又可苛求於高年乎？」故知聖王制禮，必無祭後之射，尤無行射養老之文。況燕毛不及異姓，又安能有舍矢序賓之事？其非祭後燕也明矣。然則《詩》豈無所用乎？姚氏云：「是詩者，固燕同、異姓父兄、賓客之詩，而醕酢、射禮亦並行之，終之以尊優耆老焉。古禮不可考，不得以後世禮文執而求之。」此亦無可如何辭耳，然猶勝強不知以爲知者。故愚亦以爲詩用未詳也。至何玄子則直以爲美公劉之詩矣。蓋一徵之《吳越春秋》，曰：「公劉慈仁，行不履生草，運車以避葦葦。」一徵之《列女傳》，曰：「晉弓工妻謁于平公曰：『君聞昔者公劉之行乎？牛、羊踐葦葦，惻然爲痛之。』」一徵之王符《潛夫論》，曰：「公劉厚德，恩及草木，牛羊六畜且猶感德。」一徵之後漢書，桓榮曰：「昔文王葬枯骨，公劉敦行葦，世稱其人。」案：衆說雖非《詩》義，然公劉必有是事，而後人稱之者衆。觀《詩》引此爲興，未必無因，特以爲美公劉則臆測耳。詩曰：「戚戚兄弟，莫遠具爾」，蓋承上來，以爲去公劉之世未遠，則皆骨肉兄弟也。然則是詩固燕同姓之樂，故又曰「曾孫爲主」，不必以「序賓」爲疑。其曰「序賓」者，特射禮爲然，他何及耶？

【眉評】「一章」牛羊未有不踐生草者，詩言「勿踐」，故知非泛然起興者比，同一筵燕而有分別，已爲末章地步。「二章」此寫醕酢，爲燕正面。「三章」此寫射禮，爲燕中事。「四章」老者不射，故酌大斗飲之座中，乃不寂寞。

【集釋】「敦」聚貌，勾萌時也。「行」道也。「苞」甲而未坼也。「體」成形也。「泥泥」柔澤貌。陸氏德明曰：「張揖作「苞苞」，云「草盛也」。「緝」續也。「御」侍也。「獻酢」進酒於客曰獻，客答之曰酢。主人又洗爵醕客，客受而莫之，不舉也。「罍」爵也。夏曰醕，殷曰罍，周曰爵。「醢」醢之多汁者也。「燔炙」燔用肉，炙用肝。「臠」口上肉也。「歌」歌者，比於琴瑟。徒擊鼓曰歌。「敦」雕通，畫也。「鏤」爾雅：金鏤翦羽謂之鏤。「鈞」參亭也。「舍」發矢也。「均」皆中也。「賢」射多中也。「句」殷通，謂引滿也。「不侮」射以中多爲雋，以不侮爲德。「曾孫」主席者之稱，不必祭也，如宗子、嫡孫之類。「醕」厚也。「台」飴也。人老則背有飴魚文。「引」導也。「翼」輔也。「祺」吉也。

【標韻】葦五尾履四紙體八齊泥、弟並同爾紙几同通韻 御六御學二十一馬炙二十二禡叶韻 臠十臠罍本韻 堅一先鈞十一真均同賢先通韻 句二十六宥鏤同本韻 樹七虞侮同本韻 主虞醕同本韻 斗二十五有寄同本韻 翼十三職福一屋叶韻

校記

「一」席，據《集傳》應作「祭」。

既醉 嘏詞也。

既醉以酒，既飽以德。一篇之主。君子萬年，介爾景福。福。○一章既醉以酒，爾殽既將。君子萬年，介爾昭明。德。○二章昭明有融，單承「德」言。高朗令終。令終有俶，公尸嘉告。三章其告維何？以下綴詞。籩豆靜嘉。祭品之誠。朋友攸攝，攝以威儀。贊助之誠。○四章威儀孔時，君子有孝子。孝子不匱，孝嗣之誠。永錫爾類。五章其類維何？室家之壺。內助之誠。君子萬年，永錫祚胤。於是始錫福。○六章其胤維何？後胤之錫。天被爾祿。君子萬年，景命有僕。七章其僕維何？釐爾女士。妾婦之錫。釐爾女士，從以孫子。以昌厥後。○八章

右《既醉》八章，章四句。《小序》謂「太平」，既泛且混。孔氏又從而附和之，尤無謂。《集傳》云：「此父兄所以答《行葦》之詩」，因此章言祭，並前篇亦言祭。殊不知前篇非祭，此詩亦非答，蓋祭而述神嘏之詞耳，何答之有耶！詩雖以「介福」爲言，其實以德爲主。不獨「昭明」、「高朗」爲明德之光，卽「籩豆靜嘉」，誠之寓於物也，何其潔！「朋友攸攝」，誠之萃於人也，何其敬！「孝子不匱」，「室家之壺」，誠之著於後嗣與內助也，又何其賢且孝！於是錫爾以祚，所以厚其身；錫爾以胤，所以昌厥後。「釐爾女士」，「從以孫子」，則內助之賢且化及於僕婦，後嗣之孝更貽厥夫孫謀。凡以爲誠也。誠者，德之極。有是德而後膺是福。祭者無事而不盡其誠，故神嘏無時而不錫以福。此非光明俊偉之君，治化熙洽之世，不克有此祀事，亦不克當此咏歌。故諸家皆以爲成王時詩。誠哉，其爲成王時詩也！唯以「昭明」爲福之光大，「令終」爲福之悠遠，舍德言福，非佞卽諛，而豈詩人意旨哉！

【眉評】「一章」起得飄忽。「二」「三」「四章」首二章福德雙題，三章單承德字，四章以下皆言福，蓋借嘏詞

以傳神意耳。然非有是德何以廣是福？詩意甚明。何元、明以來儒者，乃有專主福而不言德者？

「四章」蟬聯而下，次序分明。「六章」以下雖言福，仍帶定德字。

【集釋】「德」王德也。統下「昭明」及祀事之誠，皆是。「穀」俎實也。「將」行也。奉持而進之意。「昭

明」王氏安石曰：昭明，明德也。「融」《集傳》：融，明之盛也。《春秋傳》曰：「明而未融。」《朗》虛明也。

「令終」姚氏際恆曰：「高朗令終」，鄭氏曰：「天既與女以光明之道，又使之長有高明之譽，而以善名

終」，此說是；即「以永終譽」之意。自孔氏釋「令終」為「考終命」，則又承鄭之誤而誤者。何也？鄭氏

妄以「景福」為「五福」，故孔氏遂牽合之。《集傳》從之，非也。「俶」始也。「公尸」《集傳》：公尸，君尸

也。周稱王，而尸但曰公尸，蓋因其舊。如秦已稱皇帝，而其男女猶稱公子、公主也。《嘉告》善言以

告，即嘏詞也。「靜嘉」清潔而美也。「朋友」指賓客之助祭也。「攝」檢也。「孝子」《集傳》：孝子，主

之嗣子也。《儀禮》：「祭祀之終，有嗣舉奠。」《匱》竭也。「類」姚氏際恆曰：類，鄭氏謂族類，是。曰，

人「謂廣之以教道天下也。」《春秋傳》曰：「類考叔，純孝也，施及莊公。」引證亦明。《毛傳》以類訓善，

《集傳》從之，亦非。《靈》《集傳》：靈，官之巷也。言深遠而嚴肅也。「祚」福祿也。「胤」子孫也。

《僕》附屬也。《釐》予也。《女士》女之有士行者。《從》隨也。

【標韻】德十三職福一屋叶韻 將七陽明八庚轉韻 融一東終同本韻 俶屋告二沃通韻 嘉六麻饒四支叶韻

子四紙類四支叶韻 壹十三阮胤十二震叶韻 祿屋僕同本韻 士紙子同本韻

## 鳧鷖 繹祭也。

鳧鷖在涇，公尸來燕來寧。爾酒既清，爾殽既馨。公尸燕飲，福祿來成。一章鳧鷖在沙，公尸來燕來宜。爾酒既多，爾殽既嘉。公尸燕飲，福祿來爲。二章鳧鷖在渚，公尸來燕來處。爾酒既湑，爾殽伊脯。公尸燕飲，福祿來下。三章鳧鷖在濼，公尸來燕來宗。既燕于宗，福祿攸降。公尸燕飲，福祿來崇。四章鳧鷖在臺，公尸來止熏熏。旨酒欣欣，燔炙芬芬。公尸燕飲，無有後艱。五章

右《鳧鷖》五章，章六句。此繹祭燕尸之樂也。姚氏曰：「《序》謂『守成』，泛混。鄭氏于上章下曰：『祭祀既畢，明日又設醴而與尸燕，成王之時尸來燕也』，此說可爲詩旨。而《集傳》本之，因謂『祭之明日繹而賓尸之樂』，然又有誤。孔氏曰：『燕尸之禮，大夫謂之『賓尸』，即用其祭之日，今有司徹，是其事也。天子、諸侯則謂之繹，以祭之明日。《春秋·宣八年》言『辛巳，有事於太廟，壬午，猶繹』，是謂在明日也。此『公尸燕飲』是繹祭之事，《疏》語分別明了，惜乎其未閱耳。」此說詩旨甚明。而鄭氏又以首章之「在涇」，喻燕祭宗廟之尸；二章之「在沙」，喻燕祭四方萬物之尸；三章之「在渚」，喻燕祭天地之尸；四章之「在濼」，喻燕祭社稷山川之尸；五章之「在臺」，喻燕祭七祀之尸。一「在涇」也，而曲爲分別，以譬在宗廟等處，豈尚知詩人用字義哉？水雖有五，唯涇是名。其餘沙、渚、濼、臺，皆從涇上推說，猶言涇之旁，涇之涯，涇之渚耳。而何至以配天地萬物，山川社稷乎？且燕一尸而衆尸皆

咏，則所燕之尸又將誰屬？諸儒說《詩》大都如此，可慨也夫！

【集釋】「鳧」水鳥如鴨者。【鷺】鷺也。【涇】水名。【爾】指王也。【爲】猶助也。【渚】水中高地也。【潁】

酒之沛者也。【濠】水會也。【來宗】尊也。【于宗】宗廟也。【臺】《集傳》：臺，水流峽中，兩岸如門也。

【熏熏】和說也。

【標韻】涇九青寧同清八庚聲青成庚通韻 沙六麻宜四支多五歌嘉麻爲支叶韻 渚六語處、潁並同脯七廢下二十一

馬叶韻 濠一東宗二冬崇東通韻 臺十三元熏十二文欣、芬並同艱十五刪通韻

### 假樂 詩用未詳。

假樂君子，顯顯令德。宜民宜人，受祿于天。保右命之，自天申之。一章千祿百福，子孫千億。 跟「受祿」。穆穆皇皇，宜君宜王，不愆不忘，率由舊章。 跟「令德」。二章威儀抑抑，德音秩秩。 跟「令德」。無怨無惡，率由羣匹。 跟「宜人」。受福無疆，四方之綱。 跟「宜民」。○三章之綱之紀，燕及朋友。 跟「宜人」。百辟卿士，媚于天子。不解于位，民之攸墜。 跟「宜民」。○四章

右《假樂》四章，章六句。姚氏際恒曰：此分章從舊本，《中庸》引此詩首章可證。嚴氏分爲六章，章四句；季明德分爲三章，章八句，皆不必從。此等詩無非奉上美詞，若無「不解于位」一語，則近諛矣。其所用既無考證，詩意亦未顯露，故不知其爲何王，亦莫定其爲何用矣。《序》云「嘉成王」，以其詩次成王之世而言也。《集傳》疑卽公尸之答《鳧鷖》，又以其篇在《鳧鷖》後而言也。至何玄子更以爲祭武王之詩，則因《中庸》引

《詩》以證舜，故疑爲下章之武王咏也。皆臆測也，而何可以爲據哉？自《行葦》至此四詩，大抵皆賓筵、祀事、嘏祝、頌禱之章，後世因用以入樂。世雖未詳，而以爲成王咏者庶幾近焉。唯體兼小雅，在《文王》、《生民》諸詩中實爲變體，故又另爲一格也。

【眉評】「一章」一詩大旨全在首章，以下第承言之。【四章】至末始寓規意。

【集釋】「假」《集傳》：《春秋傳》皆作嘉。嘉，美也。【申】重也。【穆穆】敬也。【皇皇】美也。【君】諸侯也。【王】天子也。【抑抑】密也。【秩秩】有常也。【匹】類也。【燕】安也。【解】情也。【暨】息也。

【標韻】子四紙德十三職叶韻 人十一真天一先申真通韻 福一屋億職叶韻 皇七陽王、忘、章並同本韻 抑職秩四質匹同通韻 疆陽綱同本韻 紀紙友二十五有士紙子同位四真暨質叶韻

### 公劉 始遷豳也。

篤公劉，匪居匪康，迺場迺疆，迺積迺倉，足食。迺裹餼糧，于橐于囊，思輯用光。弓矢斯張，干戈戚揚，足兵。爰方啟行。一章篤公劉，于胥斯原。既庶既繁，民衆。既順迺宜，而無永歎。陟則在巘，復降在原。何以舟之？維玉及瑤，鞞琫容刀。點染華貴。○二章篤公劉，逝彼百泉，瞻彼溇原，迺陟南岡，乃覲于京。京師之野，于時處處，于時廬旅，于時言言，于時語語。描摹遷都人衆未定景象，如在目前。○三章篤公劉，于京斯依，跼蹐濟濟，俾筵俾几，既登乃依。落成宴飲。乃造其曹，執豕于牢，酌之用匏。食之飲之，君之宗之。四章篤公劉，既溥既長，

既景迺岡，相其陰陽，觀其流泉，其軍三單，兵制。度其隰原，徹田爲糧，稅法。度其夕陽，幽居允荒。偏寫得如許風雅。○五章篤公劉，于豳斯館。涉渭爲亂，取厲取鍛。止基迺理，爰衆爰有。夾其皇澗，遡其過澗。新居如畫。止旅迺密，芮鞠之卽。竟佳，妙！○六章

右《公劉》六章，章十句。姚氏曰：「《小序》謂『召康公戒成王』。按詩無戒辭，召康公亦未有據。《集傳》漫從之，何耶？金仁山謂《七月》及《篤公劉》皆豳之遺詩，其言曰：『《篤公劉》下視《商頌》諸作，同一蹈厲，《七月》亦然，豈至周、召之時而後有此哉？且周詩固有追述先公之事者，然皆明著其爲後人之作。《生民》之詩，述后稷之事也，而終之曰『以迄于今』。《緜》之詩述古公之事也，而係之以文王之作。此皆後人之作也。若《篤公劉》之詩，極道岡阜、佩服、物用、里居之詳，《七月》之詩，上至天文、氣候，下至草木、昆蟲，其聲音、名物、圖畫所不能及。安有去之七百歲而言情、狀物如此之詳，若身親見之者？又其末無一語追述之意。吾是以知決爲豳之舊詩也。』案，此說深爲有理，然則此詩皆固當日豳民咏公劉之舊詩，而周、召之徒傳之以陳于廟王歟？愚謂《序》以此爲召康公作者，蓋因《七月》既屬之周公，則此詩不能不屬諸召公矣。其有心附會周、召處，明白顯然。卽二詩之爲豳舊作，亦可概見。二公當日陳之王前，未必不聯名具上，以見同心輔政之誠。而後世強分而屬之誰作者，適成其私心臆測之見而已，是烏可與談《大雅》之樂哉？詩首章將言遷都，先寫兵食具足，是爲民信之本。古人舉事不苟如此。次相度地勢。三寫民情歡洽，「于時處」，「于時廬」，「于時言」，「于時語」，莫非鼓舞操作氣象，毫無咨嗟怨歎之言，此國之所以日大也。四既落成而燕飲之。君乃爲之立長分宗，以整



屬其民，乃開國大計，非泛然者。迨至五章，區畫畧定，乃定兵制，軍分爲三，並立稅法，糧什取一。民卽兵，兵卽民，故並言焉。此「寓兵于農」之法，千秋軍制無過乎是。周家世守成規，有由來矣。至此，遷都之事已畢，而更「度其夕陽」以爲之地者，何哉？蓋舊民雖安，新附日衆，不可不設館以處之。于是更卽芮水之外，廣爲安置，或夾皇澗，或遡過澗，莫非民居，悉成都邑。幽居之境，乃益擴耳。首尾六章，開國宏規，遷居瑣務，無不備具。使非親觀其事而胸有條理者，未見其如是之觀縷無遺。又況千百載下人，能執筆摹而爲之也哉？金氏之言大有見也，故錄之。

【眉評】「一章」遷都之始。 「二章」度地之宜。 「三章」民情之洽。 「四章」燕饗之樂。 君宗卽此亦定。 「五章」軍制稅法並寫，蓋寓兵于農也。 「六章」新附民衆，乃更擴其土而居之，以作收筆。見國勢之大，日進無疆也。

【集釋】「篤」厚也。「公劉」后稷之曾孫也，事見「豳風」。陸氏德明曰：王肅云：「公，號；劉，名也。」《尚書傳》云：「公，爵；劉，名也。」「居」安也。「康」寧也。不啻失官而葬于戎狄之間，公劉爲不啻孫，自不安于戎狄地，故遷幽。「場」田小界也。「疆」田大界也。「積」露積也。「餼」食也。「糧」糗也。「藁」無底曰藁，有底曰藁。「輯」和也。「戚」斧也。「揚」鉞也。「胥」相也。「順」安也。「宜」徧也，言居之徧也。「無永歎」得其所，無嗟怨也。「嶽」山頂也。「舟」未詳。「玉璫」二句「姚氏際恆曰：舟，毛傳謂帶，或謂佩，今未詳。「維玉及璫」，言佩玉也。「鞞琫容刀」，言佩刀也。鞞，刀鞘也；琫，刀上玉飾，琕，刀下玉飾。「小雅」，鞞琫有琕是也。此但言琕，不言琕。容刀，謂鞞之容此刀也。「毛傳」謂「下

曰鞞，混鞞爲琫，非是。琫又與鞞同，非鞞也。蓋誤以鞞作琫耳。《集傳》解容刀爲「容飾之刀」，謬。又上既解鞞爲刀鞘，又云：「或云，容刀謂鞞琫之中容此刀耳」，琫爲刀上玉飾，何能容刀？尤謬。總于諸字之義全未清楚耳。〔百泉〕姚氏際恆曰：百泉，嚴氏曰：「泉，水也。今地理家言衆水所聚爲得水也。」曹氏據杜佑云：「百泉在漢爲朝那縣，屬安定郡；在唐爲百泉縣，屬平涼郡，當是其地因《詩》『百泉』而得名。」何玄子曰：「不啻竄于西戎，其地卽慶陽府是也，有不啻城，又有不啻塚，春秋時爲義渠戎國。厥後公劉往遷于豳，蓋道慶陽、平涼，而後達于今西安府之邠州。邠州乃涇流所經，而百泉則入于涇水，自平涼而來者也，故詩人咏及之。舊說但謂公劉自邠遷豳，而百泉遂茫然不知其處矣。〔溥〕大也。〔京〕高邱也。〔師〕衆也。京師高邱而衆居也。董氏曰：「所謂京師者，蓋起於此，其後世因以所都爲京師也。〔時〕是也。〔廬〕寄也。〔旅〕賓旅也。〔于京斯依一章〕姚氏際恆曰：何玄子曰：「京卽上章京字，人卽依乎此。則宗廟之禮亦依乎此矣。故營建甫畢，卽是舉遷廟之禮。踰，動也。濟濟，言齊也。筵几，乃供神者。登，謂登進神之衣服于坐也。依，神所依也。《祭統》云：『鋪筵設同几，爲依神也』，正此詩義。」此說可存。『乃造其曹』至末，言與羣臣燕飲之事。殺豕、酌匏、禮簡不諱，妙。『君之宗之』，謂公劉以一身爲羣臣之君宗也。以異姓之臣言，稱君；以同姓之臣言，稱宗。合上四之字，皆指羣臣言。案：此說與呂氏「建國立宗」之義雖稍通，然自是一解，存之亦足以備參考。〔景〕考日景以正四方也。〔三軍〕姚氏際恆曰：單，盡也，謂三軍盡出于是也。古「寓兵于農」之義如此。鄭氏謂單爲「無義卒」，「丁夫適滿三軍之數」，迂鑿未然。〔徹〕姚氏際恆曰：徹，《毛傳》訓

治。按，井田起于三代，商人行助法，公劉微而行之，故于此治田爲糧，以爲國用。助法，一夫七十畝，公劉想亦同。不然，爲商之臣敢變商之法乎！其後周公增爲百畝之制，因取此詩微之一字以爲本朝變更之號焉。總之，商、周皆有公田，皆治公畢然後敢治私，故孟子讀「雨我公田」之詩，而謂「雖周亦助也」。《集傳》曰：「一井之田九百畝，八家皆私百畝，同養公田。耕則通力而作，收則計畝而分。周之徹法自此始。」其說謬也。《孟子》曰：「井九百畝，其中爲公田。八家皆私百畝，同養公田。公事畢，然後敢治私事。」八家各自耕百畝，同出力耕公田百畝，如今之「當官事」是也。若謂通力而作，計畝而分，是八家合耕九百畝田，均分其粟爲九處，公取其一，八家取其八，則是八家皆公九百畝，非皆「私百畝」矣，更不分「公事」與「私事」矣，不與《孟子》之文明相反乎！而乃引《孟子》文于前，何也？且《詩》云：「雨我公田，遂及我私」，既無公私之分，又何先後之別與？如其說，九百畝之廣地安能一鼓而齊作？其中勤惰作止，誰爲之察？多寡衡量，誰爲之分？適以長其爭端，又安能相有助而親睦乎！必不可行也。〔夕陽〕山西也。〔允〕信也。〔荒〕大也。〔館〕客舍也。〔亂〕舟之截流橫渡者也。〔厲〕砥也。〔鍛〕鐵也。〔止〕居也。〔基〕定也。〔理〕疆理也。〔衆〕人多也。〔有〕愈衆也。〔皇過〕二澗名。〔芮〕《集傳》：芮，水名，出吳山西北，東入涇。《周禮》：職方作汭。〔鞠〕水外也。

【標韻】康七陽疆、倉、糧、囊、光、張、揚、行並同本韻 原十三元繁同宜一先歟十四寒原元通韻 瑶二蕭刀四豪通韻 泉先原元通韻 岡七陽京八庚轉韻 處六語旅、語並同本韻 依五微濟八齊几四紙依微叶韻 曹豪牢同貌三肴通韻 之、之、之、之四支四字自爲韻 鍾氏以爲無韻者，非。 長陽岡同本韻 泉先單十四寒原元

通韻 糧陽陽、荒並同本韻 館十四旱亂十五輪鍛同叶韻 理紙有二十五有叶韻 澗十六諫澗同自爲韻 密四質卽十四職通韻

### 洞酌 召康公戒成王也。

洞酌彼行潦，挹彼注茲，可以餽饘。豈弟君子，民之父母。一章洞酌彼行潦，挹彼注茲，可以濯鬻。豈弟君子，民之攸。二章洞酌彼行潦，挹彼注茲，可以濯漑。豈弟君子，民之攸。三章

右《洞酌》三章，章五句。《小序》謂「召康公戒成王」，未知其何所據。然相傳既久，亦姑從之。此等詩總是欲在上之人當以父母斯民爲心，蓋必在上者有慈祥豈弟之念，而後在下者有親附來歸之誠。曰「攸歸」者，爲民所歸往也；曰「攸堅」者，爲民所安息也。使君子不以「父母」自居，外視其赤子，則小民又豈如赤子相依，樂從夫「父母」？故詞若褒美而意實勸戒。唯其體近乎風，匪獨不類大雅，且並不似小雅之發揚蹈厲，剴切直陳者，則又不知其何故耳。

【集釋】《洞》遠也。《行潦》孔氏穎達曰：「行道上兩水流聚，故云流潦。」《餽》《集傳》：「餽，烝米一熟，而水沃之，乃再烝也。」《漑》酒食也。《豈弟》豈，以強教之，故有父之尊；弟，以悅安之，故有母之尊。《濯》漑也。《漑》亦漑也。孔氏穎達曰：《傳》云：「漑，清也。」謂洗之使清潔也。《堅》息也。

【標韻】茲四支鎡四質母二十五有叶韻 鬻十灰歸五微通韻 漑五未堅四質通韻

校記

「一」下「尊」字，據《集傳》當作「親」。

## 卷阿 召康公從游，歌以獻王也。

有卷者阿，地。飄風自南。時。豈弟君子，人。來游來歌，游。以矢其音。歌。○一章泮奭爾游矣，承上「游」字入，勢甚便捷。優游爾休矣。豈弟君子，俾爾彌爾性，似先公苗矣。二章爾土宇畷章，有土。亦孔之厚矣。豈弟君子，俾爾彌爾性，百神爾主矣。三章爾受命長矣，有壽。弗祿爾康矣。有福。豈弟君子，俾爾彌爾性，純嘏爾常矣。四章有馮有翼，有輔。有孝有德。有德。以引以翼。豈弟君子，四方爲則。五章頤頤卬卬，如圭如璋，令聞令望。有名。豈弟君子，四方爲綱。六章鳳凰于飛，紀瑞。翩翩其羽，亦集爰止。藹藹王多吉士，扈從之盛。維君子使，媚于天子。能忠君。○七章鳳凰于飛，翩翩其羽，亦傳于天。藹藹王多吉人，維君子命，媚于庶人。能愛民。○八章鳳凰鳴矣，于彼高岡。梧桐生矣，于彼朝陽。華華萋萋，離離喈喈。九章君子之車，既庶且多。不脫游字。君子之馬，既閑且馳。矢詩不多，維以遂歌。應首章作結。○十章

右《卷阿》十章，六章章五句，四章章六句。姚氏曰：「《小序》謂『召康公戒成王』，未見其必然。」又曰：

「或引《竹書紀年》，以爲成王三十三年，遊于卷阿，召康公從，政附會此而云，不足信。」殊不知此正可以深信無疑，何也？詩首章不云乎，「有卷者阿，豈弟君子，來游來歌」矣，卒章又不云乎，「矢詩不多，維以遂歌」也，此非王游卷阿，而公因有是詩以陳王前之一證乎？又何待旁考他書，然後足信其爲有據也？《集傳》亦云：「疑公從成王游於卷阿之上，因王之歌，而作此以爲戒。」當信者而反疑之，亦由其心之游移未有定耳。詩發端總敘以爲全篇之冒，是一段卷阿游宴小記。中間借游陳詞，故稱頌中有勸戒意。二、三、四章，有土、有壽、有福，可謂頌揚極矣。而統而歸之曰「俾爾彌爾性」，蓋必有性命、德，而後來福、祿、徵。曰彌者，益也。謂充滿其性量而無間，又悅怡夫性天以弗遺，則似先公、主百神、常純嘏，胥於是乎在，此德之內蘊者然也。五、六兩章曰，「四方爲則」，「四方爲綱」，則就其德之外著者言之。雖曰祝頌，不忘規諷，此其所以爲周、召學歟？七、八兩章，忽題「鳳凰」，以頌賢臣。曰，「王多吉士」，「王多吉人」，豈虛譽哉？蓋自鳳鳴于岐，而周才日盛。卽此一游，一時扈從賢臣，無非才德具備，與吉光瑞羽，互相輝映，故物瑞人材，雙美並咏，君顧之而君樂，民望之而民喜，有不期然而然者。故又曰「媚于天子」，「媚于庶人」也。然猶未足以形容其盛也。九章復卽鳳凰之集于梧桐，向朝陽而鳴高者虛寫一番。則「華華萋萋，離離嘈嘈」之象，自足以想見其「賡賡濟濟」之盛焉。是前半寫君德，後半喻臣賢，末乃帶咏游時車馬，並點明作詩意旨，與首章相應作收，章法極爲明備。何諸家議論尚紛然無定解哉？又《大序》云「言求賢用吉士也」，不唯止說得詩之後半面，且並似「王多吉士」、「吉人」二語亦並未嘗讀者。夫既曰「藹藹」，而又曰「多」矣，則其人才之盛，不待求

而自足者可知也。召公不必勸王求，王亦何必待召公之勸而後用哉！其所以寓規於頌者，在「媚于天子」與「媚乎庶人」而已。蓋能事天子，乃能「媚乎天子」；能愛庶人，乃能「媚乎庶人」也。且能愛庶人而不能事天子，庶人未必媚；即能事天子而不能愛庶人，天子亦未必爲其所媚。是媚之一字，似頌而實諷，不可輕心滑過，徒賞其鍊字之工也。至嚴氏謂「周公有明農之請，將釋天下之重負以聽王之自爲。康公慮周公歸政之後，成王涉歷尚淺，任用非人，故作『卷阿』之詩，反覆歌咏，欲以動悟成王」。因以每章「豈弟君子」鑒實爲指賢，此尤如夢初醒，純以私心測古聖，詎能得其要領？

【眉評】「一章」總點作詩之由。「二、三、四章」三章俱以「彌性」作主，「彌性」兼充滿無間、悅怡不衰二義，似先公、主百神、常純嘏，端賴乎是。此德之裕乎內者。「五、六章」二章「爲則」「爲綱」，即從德望來。乃德之著乎外者。「七、八章」二章就實景以喻賢臣。而臣之所謂賢，無過忠君愛民，詩特媚字，遂覺異樣生新。「九章」承上再虛摹一層，喻意始足，而文心亦飽。「十章」總收因游獻練一詩意。

【集釋】「卷」曲也。「阿」大陵也。「豈弟君子」指王也。毛、鄭作賢人看者，非。「矢」陳也。「伴奭」精神舒展之意。「優游」起居自適之意。「爾」指王也。「彌」姚氏際恆曰：彌，「釋文」，「益也」。「彌爾性」，謂充足其性，使無虧間也，不可解作「終命」，亦不可說入理障。「先公」姚氏際恆曰：先公似指文、武，當曰先王，抑亦可互稱歟？「首」終也。「販章」集傳：販章，大明也。或曰：販當作版，版章猶版圖也。「弗遐」皆福也。「馮」依也。「翼」輔也。「顯顯」尊嚴也。「鳳凰」靈鳥也。雄曰鳳，雌曰凰。

孔氏穎達曰：天老曰：「鳳象：麟前鹿後，蛇頸魚尾，龍文龜背，燕頤雞喙，五色備舉。」出于東方君子之國，見則天下大安寧。」案：鳳，靈鳥，不常見。周初，鳳鳴于岐山，故鄭氏謂「時鳳凰至」，詩因以爲喻，亦本地風光也。〔翻翻〕羽聲。〔藹藹〕衆多也。〔媚〕順愛也。

【標韻】阿五歌同本韻隔韻叶 南十三覃音十二侵通韻隔韻叶 游十一尤休、酋並同本韻 厚二十五有主七虞叶韻 長七陽康、常並同本韻 翼十三職德、翼、則並同本韻 印陽璋、望、綱並同本韻 止四紙士、子並同本韻 天一先人十一真同通韻 鳴八庚生同本韻隔句叶 岡陽陽同本韻隔句叶 姜八齊嗜九佳通韻 多歌馳四支多、歌並見上叶韻

校記

〔一〕「燕頤雞喙」原作「燕頤雞喙」，「正義」作「燕頤雞喙」，今據阮元「校勘記」改。

### 民勞 召穆公警同列以戒王也。

民亦勞止，汙可小康。惠此中國，以綏四方。安民。無縱詭隨，以謹無良。式遏寇虐，憚不畏明。防姦。柔遠能邇，以定我王。正君。○一章民亦勞止，汙可小休。惠此中國，以爲民迷。無縱詭隨，以謹僭恤。式遏寇虐，無俾民憂。無棄爾勞，以爲王休。二章民亦勞止，汙可小息。惠此京師，以綏四國。無縱詭隨，以謹罔極。式遏寇虐，無俾作慝。敬慎威儀，以近有德。三章民亦勞止，汙可小惕。惠此中國，俾民憂泄。無縱詭隨，以謹醜厲。式遏寇虐，



無俾正敗。戎雖小子，而式弘大。四章民亦勞止，汔可小安。惠此中國，國無有殘。無縱詭隨，以謹繯繂。式遏寇虐，無俾正反。王欲玉女，是用大諫。五章《集傳》、《春秋傳》、《荀子》皆竝作簡，音簡。

右《民勞》五章，章十句。《序》謂「召穆公刺厲王」，《集傳》謂「乃同列相戒之辭」，姚氏以爲皆是。愚謂詩起四句說安民，中四句說防姦，非君上不足以當此，唯末二句輔成君德，似戒同列辭耳。每章皆然，特各變其義以見淺深之不同。而中間四句尤反覆提唱，則其主意專注防姦也可知。蓋姦不去，則君德不成，民亦何能安乎？故全詩當以中四句爲主。雖曰「戒同列」，實則望君以去邪爲急務也。公當厲王無道時，王必信用詭隨人以寇虐天下，公未便直陳君惡，故借同僚相勸言以聳君聽，冀君有以格其非心而同歸於治焉耳。噫，公之用心可謂勤矣！濮氏一之曰：「每章首言民今勞弊，可少休息。京師者、諸夏之本，欲安四方之民，當自恤京師始。」嚴氏粲曰：「穆公戒同列之用事者，言國以民爲本，民勞則國危。今周民亦疲勞矣，庶幾可以小安之乎？京師諸夏之根本，愛此京師，則可以安天下也。詭隨者，心知其非而詐順從之，此姦人也。人見詭隨者無所傷拂，則目爲良善，不知其容悅取寵，皆爲自利之計，而非忠於所事，實非善良之士也。苟喜其甘言而信用之，足以召禍亂，致寇虐。但權位尊重者，往往樂軟熟而憚正直，故詭隨之人得肆其志，是居上位者縱之爲患也。今戒用事者無縱此詭隨，則可以謹防無良之人，用遏止其寇虐。此理甚明，可痛其不長明也。治道略外而詳內，惟「柔遠能邇」者可以安吾君，而何取於詭隨乎？」二說皆深知召公心者。而詭隨與寇虐互相爲難，尤難

遏止。朱氏善曰：「非詭隨無以媚上，而爲寇虐之本；非寇虐無以威下，而遂詭隨之志。詭隨者，柔惡之所爲，寇虐者，剛惡之所發。」是詭隨不除，寇虐何自止哉！夫詭隨情狀，不一而足：曰無良，曰憎傲，曰罔極，曰醜厲，曰繾綣，皆小人之變態而莫可以言窮者也。而就中唯繾綣一類，唯能固結君心而不可解，故終之以此，欲王深惡而痛絕之耳。迨至詭隨除而寇虐止，然後知明命之當畏，民憂之足慮，「無俾作慝」以至於敗，常反經而無乎不爲也。故末二句，始則正告之以「柔遠能邇」，乃可以定王室。繼則姑誘之以無棄前功，乃可以成王休。三則不徒遠惡，尤當親近有德，而威儀始固。四曰「戎雖小子，而式弘大」，言女身雖微而所係甚重，不可不謹，蓋深責之之詞也。五曰「王欲玉女」，是用大諫，言王將以女爲材而寶重之，吾用是器女而有所規諫焉。何者？蓋王寶重女，則必大用女，王大用女，則天下安危，民生休戚，係女一身，而可無一言以相勸？蓋述作詩之旨也。此必有所指，非泛戒同列者。惜乎無可攷耳！

【眉評】「三章」京師爲天下根本，故以居中，亦見安頓之法。五章章法一例，唯於字句淺深間見變換，又一格也。

【集釋】「汔」幾也，「詭隨」嚴氏彙曰：詭詐也，懷詐面從也。「謹」斂束之意。「僭」曾也。「明」天之明命也。「柔」安也。「能」順習也。「述」聚也。「憎傲」猶譴諱也。「罔極」爲惡無窮極之人也。「惕」息也。「泄」孔氏穎達曰：其憂寫泄而去。「厲」惡也。「正敗」正道敗壞也。「戎」汝也。「繾綣」小人之固結其君者也。孔氏穎達曰：昭二十五年「左傳」：「繾綣從公，無通外內」，則繾綣者，固牢相著之意。

「正反」反於正也。「正敗」者，敗而已，未盡反而爲不正也。「正反」則無正矣。每章言愈切而意愈深。

〔玉〕寶愛之意。

【標韻】康七陽方、良並同明八庚王陽轉韻 休十一尤速同微三肴憂尤休同叶韻 息十三職國、極、慝、德並同本韻 惕八霽泄、厲並同敗十卦大九泰通韻 安十四寒殘同本韻 縉十七霰反十三阮諫十六諫叶韻

### 板 凡伯規同僚以警王也。

上帝板板，下民卒瘁。出話不然，爲猶不遠。靡聖管管，非聖。不實于衷。猶之未遠，是用大諫。一章天之方難，無然憲憲。慢天。天之方蹶，無然泄泄。辭之輯矣，民之洽矣。辭之懌矣，民之莫矣。二章我雖異事，及爾同僚。我即爾謀，聽我囂囂。我言維服，勿以爲笑。先民有言，「詢于芻蕘」。邇詞以誘之。○三章天之方虐，無然謔謔。老夫灌灌，小子蹻蹻。匪我言耄，爾用憂謔。多將熇熇，不可救藥。危詞以警之。○四章天之方憤，無爲夸毗。威儀卒迷，善人載尸。民之方殿屎，則莫我敢葵。喪亂蔑資，曾莫惠我師。養。○五章天之牖民，教如璫如篴，如璋如圭，如取如攜。攜無曰益，牖民孔易。民之多辟，無自立辟。六章价人維藩，大師維垣。大邦維屏，意不過得人，而措詞極警。大宗維翰。懷德維寧，唯德是輔，故五者都以此句爲主。宗子維城。無俾城壞，無獨斯畏。七章敬天之怒，無敢戲豫。敬天之渝，無敢馳驅。昊

天曰明，及爾出王。昊天曰旦，及爾游衍。以此作收，令人凜凜而敬心自生。○八章

右板八章，章八句。此與前篇不但相類，且出一手。前警同列以戒王，此亦規同僚以警王也。前「用大諫」在篇末，此亦「用大諫」在章首也。大旨不殊，而章法略異耳。且前著意詭隨、寇虐，故多從人心上說；此著意違聖、慢天，故多從天命言。立義雖各不同，而實可參觀。然則何以分屬之凡伯、召公耶？蓋厲王時，唯此二公爲國勳舊，故借重二公名耳。然非二公儔，亦不能爲此詩，卽以之分屬二公，奚不可者？且夫人心之患，莫患於非聖而自是；主德之衰，又莫衰於慢天而無忌。無忌者，以天爲不足畏，而予智自雄，凡古聖遠大謀猷，靡不蔑絕，以遂其私。故上帝震怒，降災下民，天意與人心若甚遠隔，而豈知禍由人哉？自是者，又以聖爲不足法，而放蕩自恣，凡上天昭鑒在茲，又無不怠弛，以肆其欲。故古聖法言，不人民聽，王道與人情若大相懸，而豈知治甚邇哉？蓋辭輯而民治，辭慄而民定，有必然者。我用是爲諸公懼，且爲諸公勸。我之所事，雖與諸公異，而忝列同朝，則僚友也。我言雖微，中則有物，願勿笑焉。何則？昔者先民有言，芻蕘之言，尚可採聽，況僚友乎？且天方虐威，未可戲謔。唯老者知其不可而正告之。倘少者不信，以爲昏聩妄言，而更驕焉，是以憂爲戲，如火之燎原不可撲滅，其可救藥乎哉？夫天心至仁而或憤怒者，則以小人用事，善人無爲，馴至於亂焉耳。蓋小人好爲夸大以欺世，人或信其真能而用之，又工於諂媚以毗人，世或取其容悅而任之，則善惡不分，威儀迷亂。雖有賢者，難以自白，則唯有箝口尸位，隱忍不言而已。此民之所以愁苦呻吟而無所控告者也。然其君臣上下，方且迷亂暴虐，無敢揆度其所以然者。際茲喪亂，資財篋

亡，曾無恩惠下逮吾民，已覺難爲之上。而人有秉彝未盡泯滅，以故「天之牖民」，其覺甚易。如堯唱而箴和也，如璋判而圭合也，取則得而攜則隨，上之化下，何莫不然？今者民既多辟，又豈可自立邪辟以導之耶？然則爲之奈何？曰：王道以得人爲盛，君心以敬天爲主。人可以爲藩、爲垣、爲屏、爲翰，且並可以爲城，而總視乎君德以爲之本。有德則安，無德則危。价人也，大師也，大邦也，大宗之與宗子也，皆所以固乎吾城者也。吾城壞，則藩、垣、屏、翰，無平不壞，而王且獨居矣。王且獨居，則可畏者將至矣，而可忽乎哉？至於天變，尤當敬畏。曰板板，曰方難，曰方蹙，曰方虐，曰方憤，其變也不一，則其怒也亦不一。苟不之敬，而戲豫自荒，馳驅無忌，則怒而變也，不愈甚乎！蓋天之陟降，日監在茲。人一出入，而天無不與之俱；人一動息，而天無不與之隨。曰明、曰旦，狀天威也。平時猶然，況怒且渝。欲回天者，將舍敬其奚從哉？吾是以不能不爲諸公告也。較之上篇，意尤深切，而詞愈警策，足以動人，奈王不悟，何歟？

【眉評】「一、二章」首二章言其違聖慢天，乃當時大病。「三、四章」此二章乃進言之，故一言我言雖微，不可不聽；一言爾病之深，將不可救。「五、六章」此二章乃正告以救民之方，民方困苦，雖無恩惠以及之，而人心易覺，不難教化以導之。「七、八章」末二章又正告以自修之法，唯德乃足以得人，唯敬乃可以回天。「八章」天人相接處，說得至嚴而精。

【集釋】「板板」姚氏際恆曰：板板，似違隔之意。「毛傳」以板爲反，恐未然。「卒」盡也。「瘡」病也。「猶」謀也。「管管」姚氏際恆曰：管管，似小智自用之意。「毛傳」謂「無所依繫」，亦未然。案：此卽所謂管

窺見也。〔亶〕誠也。〔憲〕欣也。〔蹶〕動也。〔泄泄〕猶沓沓也，蓋弛緩之意。〔輯〕和也。〔洽〕合也。〔懌〕悅也。〔莫〕定也。〔服〕事也。〔芻蕘〕採薪者。言古人尚詢及芻蕘，況僚友乎？〔譖〕戲侮也。〔灌灌〕款款也。〔蹢躅〕驕貌。〔煢煢〕熾盛也。〔憤〕怒也。〔夸〕大也。〔毗〕附也。〔尸〕不言不爲，飲食而已者也。〔殿屎〕呻吟也。〔葵〕揆也。〔箴〕猶無也。〔資〕財也。〔惠〕恩也。〔師〕衆也。〔牖〕《集傳》：牖，開明也。猶言天啟其心也。程子曰：牖，開通之義。室之暗也，故設牖以通明。何氏楷曰：《左傳》言「天牖其衷」，用字同此。〔壘〕《集傳》：壘，唱而箴和也。〔圭璋〕孔氏穎達曰：半圭爲璋，合二璋則成圭。〔取攜〕取求攜得而無所費。〔价〕大也。大德之人也。〔藩〕籬也。〔師〕衆也。〔垣〕牆也。〔大邦〕強國也。〔屏〕樹也。〔大宗〕強族也。〔翰〕幹也。〔宗子〕同姓也。〔渝〕變也。朱子曰：如「迅雷風烈必變」之變。〔王〕往也。言出而有所往也。〔旦〕亦明也。〔衍〕寬縱之意。

【標韻】板十五滑痺十四旱遠十三阮管旱同諫十六諫叶韻 難十五翰憲十四願叶韻 蹶八霽泄同本韻 輯十四緝洽十七洽通韻 懌十一陌莫同本韻 僚二蕭蕭同笑十八蕭蕭葉韻 虐十藥詭、蹢、譖、藥並同本韻 憤齊毗四支迷八齊尸支屎、葵、資、師並同通韻 箴支圭齊攜同通韻 益十一陌易、辟並同本韻 藩十三元垣同翰十四寒通韻 寧九青城八庚通韻 壤十卦畏五未通韻 怒七遇豫六御通韻 渝虞驅同本韻 明庚王七陽轉韻 且十五翰衍十六緝叶韻

以上《生民之什》凡十篇案是什詩體凡數變：《生民》、《公劉》爲一體，正大雅也。《行葦》至《假樂》四詩爲一體，兼乎小雅者也。《洞酌》、《卷阿》爲一體，兼乎風者也，皆變大雅也。然以格變，非因時與事變也。若《民勞》與《板》，則時與事俱變矣。時與事雖變，而詩體不變，則又變而不變焉者也。噫！知乎此，可以識大雅正變之分矣。

# 詩經原始卷之十五

## 大雅三

### 蕩之什

蕩 召穆公託古傷周也。

蕩蕩上帝，下民之辟。天之常。疾威上帝，其命多辟。天之變。天生烝民，其命匪謨。靡不有初，鮮克有終。一章文王曰咨，咨女殷商！以下設詞借殷作鑒。曾是彊禦，暴。曾是培克，貪。曾是在位，曾是在服。天降滔德，女興是力。二章文王曰咨，咨女殷商！而秉義類，彊禦多愆，眼暴虐。流言以對，寇攘式內。三章文王曰咨，咨女殷商！女眼貪欲。侯作侯祝，靡屆靡究。四章文王曰咨，咨女殷商！女魚休于中國，斂怨以爲德。不明爾德，時無背無側。爾德不明，以無陪無卿。五章文王曰咨，咨女殷商！天不函爾以酒，不義從式。既愆爾止，靡明靡晦。式號式呼，俾晝作夜。六章文王曰咨，咨女殷商！如蜎如蠋，如沸如羹。小大近喪，人尚乎由行。內爨于中國，尊及鬼方。六章文王曰咨，咨女殷商！匪上帝不時，殷不用舊。雖無老成人，尚有典刑。曾

是莫聽，大命以傾。七章文王曰咨，咨女殷商！人亦有言，顛沛之揭，枝葉未有害，本實先撥。殷鑒不遠，在夏后之世！點明殷鑒，後世可知。○八章

右《蕩》八章，章八句。此詩自二章以下，皆託言文王嘆商以刺厲王。蓋臣子奉君，不敢直斥其惡，而目擊時事日非，紀綱大壞，又難自忍，故假託往事以警時王。雖敗壞已極，而猶冀其感悟，庶幾一改厥圖，以臻於治。此臣子憂國愛君之心，自有所不能已於言者。觀其借殷爲喻，曰「曾是彊禦，曾是掊克」，自古危亂之君，未有不貪，亦未有不暴者。唯暴也，故所用皆彊禦之人；唯貪也，故所用皆掊克之輩。曾是二者而使之在位，而位有弗爭？曾是二者而使之任事，而事有不敗者乎？蓋二者之德，滔德也。豈天降是德以爲民害乎？亦女之興起其人而力爲之耳。夫人而彊禦，則必忌賢而妒能；妒且忌，而欲無怨之也得乎？人而掊克，則必巧取以聚斂，斂以巧，不謂之攘內也得乎？人心相疑則詛祝相要，靡有屈極窮究時矣。而女顧舍善類，而用此貪暴之人，何哉？蓋由於「爾德不明」，故有逆背傾仄之人出，而不知其爲逆背傾仄而用之也，則以爲無背側之明也可。亦由於「不明爾德」，故有不堪爲陪爲卿之人至，而不知其爲不堪陪卿而用之也，則以爲無陪卿之人也亦無不可。此女之任用小人，以至肆行中國而無所忌。而女方且斂衆怨以爲德焉，而女不知也。又何怪今之上帝不浩蕩而疾威，不爲民辟而乃多邪辟也哉？不寧唯是，女又沈湎于酒，縱淫無度。用燕喪儀，靡晦靡明，無時不醉，甚至「俾晝作夜」，亦不知檢。以故朝政無大無小，悉近喪亡。則夫人情怨亂，咨嗟歎息，不啻如蟬之鳴，如羹之沸，無時能靜，無地能清也。其始不過內憂中國，繼且外延鬼方，可謂無間遠邇矣。而乃



尚不知變，復由行於惡而不已，則其召亂豈有極哉？夫國有大政，人惟求舊，非老成人無以定大計，決大疑。《書》曰：「無侮老成人」，盤庚之所以興也。今殷既棄舊而乃怨乎天者，謬矣！正使無老成人可用，而先王法政紀綱猶存，獨不可藉爲扶持以資治理乎？唯其并人與法，「曾是莫聽」，夫然後大命從而傾覆也。雖然，舊人弗用，夫亦何害？獨念大木將傾，必有所損。雖枝葉固未折傷，而本實先撥矣。勳舊者，國家之根本，道德者，又君心之根本。君心之根本既若彼其壞，國家之根本又若是將傾，而欲無亡也得乎？此殷鑒也，豈其遠哉？亦在夏后之世耳！殷鑒在夏，則後之鑒者從可知已。

《小序》云：「傷周室大壞也。」《大序》謂「厲王無道，天下蕩蕩無綱紀文章」，固是言外之意。然其所謂「蕩蕩」，又非詩之所謂「蕩蕩」也，不可不知。說見晦翁《辯》中，茲不再贅。

【眉評】「一、二章」貪暴二字是厲王病根，故先揭出，作全詩眼目。【三章】任用貪壬。【四章】善惡

不明。【五章】沈湎於酒。【六章】怙惡不悛。【七章】廢棄典刑。【八章】剝喪本根。

【集釋】《蕩蕩》廣大貌。《辟》君也。《疾威》猶暴虐也。《多辟》多邪辟也。《烝》衆也。《謀》信也。《有初》鮮終。姚氏際恆曰：「天生烝民」以下，孔氏謂天之生民，其命難信，無不有初而鮮克有終者。「初」，謂文王也。「終」，謂厲王也。此于詩意爲近。《集傳》謂「人降命之初皆善，而少能以善道自終」，似迂。案：「二說皆可通。厲王性，生之初未必遂與文王異，及其後竟與文王異者，自暴自棄，故鮮克有終耳。《彊禦》暴虐臣也。《拊克》聚斂臣也。《服》事也。《滔》慢也。王氏安石曰：「彊禦拊克，是謂滔德。《興》起也。《力》如力行之力。言任之之堅也。《而》亦女也。《義》善也。《讎》怨也。《流言》浮

浪不根之言。〔侯〕維也。〔作〕集傳：作，讀爲祖。〔祝〕祖，祝，怨謗也。〔無休〕氣健貌。〔背側陪卿〕姚氏際恆曰：「時無背無側」，「以無陪無卿」，何玄子曰：「反面爲背，不正爲側，俱非佳字，皆指小人之敘怨言也。舊說以背爲前後左右之稱，背可謂之前乎？其不該明矣。」漢書·五行志曰：「詩云：『爾德不明，以亡陪亡卿。』不明爾德，以無背無仄」，言上不明，暗昧蔽惑，則不能知善惡，亡功者受賞，有罪者不殺。」顏注云：「言不別善惡，有逆背傾仄者，有堪爲卿大夫者，皆不知之也。」按班、顏之解已得詩意，但背側陪卿四字，俱就小人身上說。〔無背無側〕者，彼實背側，不知其爲背側，故明有而謂之無也。〔無陪無卿〕者，不知其不堪爲陪卿，而漫以之爲陪卿，故雖有而亦猶之無也。〔酒〕飲酒變色也。〔式〕用也。〔止〕容止也。〔蜩蟬〕皆蟬也。朱氏善曰：如蟬之鳴，言其無靜默之時也。〔沸羹〕朱氏善曰：如羹之沸，言其無清淨處也。〔小大〕指政事也。〔罍〕音皮器反，怒也。〔覃〕延也。〔鬼方〕易：高宗伐鬼方。〔老成人〕舊臣也。〔典刑〕舊法也。〔顛沛三旬〕姚氏際恆曰：揭，起也。撥，開也。大樹遭仆拔而揭起之時，其枝葉儼然尚未有害也，而其本實先已撥開于土矣。言本實既無土滋，而枝葉必隨之敝壞也。鄭氏訓揭爲蹶，撥爲絕，未然。〔鑒〕視也。〔夏后〕桀也。

【標韻】辟十一陌同本韻二字字同而義異。民十一真諶十二侵終一東叶韻 克十三職服一屋德職力同叶韻 類四真  
懋同對十一隊內同通韻 祝屋究二十六有叶韻 國職德、德、側並同本韻 明八庚卿同本韻 酒二十五有式職  
臨十一隊夜二十一馬叶韻 蟻七陽羹八庚行陽方同轉韻 時四支舊有叶韻 人真刑九青聽同傾庚通韻 揭九  
屑害九泰撥七曷世八霽叶韻

## 抑 衛武公自儆也。

抑抑威儀，維德之隅。人亦有言，靡哲不愚。名言。庶人之愚，亦職維疾。哲人之愚，亦維斯戾。一章無競維人，四方其訓之。有覺德行，四國順之。訐謏定命，遠猶辰告。敬慎威儀，維民之則。二章其在于今，興迷亂于政。顛覆厥德，荒湛于酒。女雖湛樂從，弗念厥紹。罔敷求先王，克共明刑。三章肆皇天弗尚，如彼泉流，無淪胥以亡。夙興夜寐，灑掃庭內，維民之章。修爾車馬，弓矢戎兵，用戒戎作，用邊蠻方。四章質爾人民，謹爾侯度，用戒不虞。慎爾出話，敬爾威儀，無不柔嘉。白圭之玷，尚可磨也；斯言之玷，不可爲也。五章無易由言，無曰苟矣。莫捫朕舌，言不可逝矣。無言不讐，無德不報。惠于朋友，庶民小子。子孫繩繩，萬民靡不承。六章視爾友君子，輯柔爾顏，不遐有愆。相在爾室，尚不愧于屋漏。無曰不顯，莫予云覲。神之格思，不可度思，矧可射思！七章辟爾爲德，俾臧俾嘉。淑慎爾止，不愆于儀。不僭不賊，鮮不爲則。投我以桃，報之以李。彼童而角，實虹小子。八章荏染柔木，言緡之絲。溫溫恭人，惟德之基。其維哲人，告之話言，順德之行。其維愚人，覆謂我僭，民各有心。九章於乎小子，未知臧否！匪手攜之，言示之事。匪面命之，言提其耳。借曰未知，亦既抱子。民之靡盬，誰夙知而莫成！十章昊天孔昭，我生靡樂。視爾夢

夢，我心慘慘。誨爾諄諄，聽我藐藐。匪用爲教，覆用爲虐。借曰未知，亦聿既耄。十一章於乎小子，告爾舊止！聽用我謀，庶無大悔。天方艱難，曰喪厥國。取譬不遠，昊天不忒。回遹其德，俾民大棘。十二章

右「抑」十二章，三章章八句，九章章十句。此一篇座右銘也。而「序」謂「衛武公刺厲王，亦以自警也」，未免言涉兩岐。朱子駁之云：「不應一詩既刺人，又自警。」以「史記」考之，武公卽位在厲王之後，宣王之時，說者謂是追刺，尤不是。故「集傳」專以武公自警爲言。而姚氏又駁之，以爲此刺厲王之詩，非武公「懿戒」。以「抑」作「懿」，乃韋昭之言，非「國語」左史之言。且篇中句句刺王，無一語自警。乃歷舉「諄諄」、「藐藐」及「聽用我謀，庶無大悔」等語，云「決非自警之辭」，而「四方」、「四國」、「車馬」、「戎兵」等詞，則尤切于刺王。因譏晦翁爲「文義不通，何論經學」？噫，此真文義不通，而乃反脣以譏人乎！此詩雖無戒字，純是戒辭，並無一語刺王。誠有如晦翁云，「其曰『刺厲王』者失之，而曰『自警』者得之」也。如以爲刺王，則「其在于今，興迷亂于政」之言似矣，而「夙興夜寐，澣澣庭內」之語，豈亦爲王咏乎？且「白圭」喻玷，「屋漏」銘心，是何等親切內省之語，而亦謂之爲刺人，有是理乎？此而不知，則真文義之不通矣，而何論乎經學也？至「小子」「告爾」以及「聽我」「用我」等詞，乃詩人自爾而自我，箴戒行文之體應如是耳。豈可執是以爲刺人言乎？若謂「懿」之非「抑」，其言固是，而詩則實自儆也。安知非詩自名「懿」，不以「抑」爲名？懿讀爲抑，乃韋昭之悞，而後人因以悞之耶。姚氏有意力翻朱案，故執此一字層駁不休，遂並詩中正旨亦不之顧。此門戶之見未除也。愚非

佞序，更不宗朱。然平心而論此詩之解，實以《集傳》爲得，而姚與《序》並失焉。詩首章「靡哲不愚」一語，千古學人大病，四字說盡。蓋愚人之愚，其愚也易破；哲人之愚，其愚也難明。自以爲哲，則無乎不愚矣。故欲破其愚，必先針其自哲之病而言乃可入。故發端以此爲第一義也。於是特提訐謏遠猶，以爲人所當圖。不可苟且偷安，是自助正意。而無如今日俗習罔人，非湛樂卽飲酒，敗德亂政，莫此爲甚。而女獨不念所承之緒是何等緒，而乃惟樂是從，「罔敷求先王」之道，以共明刑，其可乎哉？似此違天悖德，天必弗尚，以至淪亡。如泉之流，滔滔莫返，詎能挽回？故不欲自勵則已，如欲自勵，內而庭除之近，外而蠻方之遠，細而寢興灑掃之常，大而車馬戎兵之變，無一非當整飭。所謂「訐謏定命，遠猷辰告」者，不於此益見其實歟？然既定爾人民，謹我侯度，可無意外之虞。而辭氣之間，尤悔易集，能無致謹？夫白圭有玷，磨可使平；斯言有玷，失莫能救。故言尤無易出焉。使其易出而不自持也，是莫捫之舌，苟焉而已，詎可任其一逝不返乎？蓋天下之理無有言而不警者，亦無有德而不報者。誠惠及朋友，以至庶民小子，則「子孫繩繩」、「萬民靡不承」矣。謹言之效，至於如此。然猶不敢自以爲無玷也。大廷之緘默易凜，獨居之私念難防。屋漏之中，鬼神鑒焉。於此而無愧，則真無愧也。慎勿謂幽暗莫顯，遂無人覲而可以縱欲敗度也。當知鬼神之盛，體物不遺，至神莫測，不顯亦臨。雖極敬謹，猶懼有失，況敢厭射之乎？夫修德而欲人法之，猶投桃報李之有必然者。不修德而亦欲人服之，是童牛而角之所必無者。然而我言雖善，聽者難從。其在哲人，告卽能行。其在愚人，聞且未信。故論本以荏染爲成器之本，而論人以溫恭爲人德之基。「於乎小子」，吾不啻手

攜而事示，又不啻耳提而面命之矣！慎無視爲夢夢，慘慘勞我。我之誨爾諄諄然，爾之聽我藐藐然，其可乎哉？「借曰未知」，乃女今則既抱子矣，乃未幾「亦聿既耄」矣。少壯猶可曰「不知」，豈老耄而猶「不知」耶？「於乎小子」，天運方艱，國危可畏。倘不知儆而更「回通其德」也，則君道失於上而小民困於下矣。欲國之無亡也得乎？尚其聽哉，庶幾無悔。此非自儆辭乎？而必謂之刺人也，冤哉！茲並附錄兩家之言於后，讀者詳之。

【附錄】朱子《辨說》曰：此詩之《序》有得有失。蓋其本例以爲非美非刺，則詩無所爲而作。又見此詩之次適出於宣王之前，故直以爲「刺厲王」之詩。又以《國語》有左史之言，故又以爲「亦自警」。以詩考之，則其曰「刺厲王」者失之，而曰「自警」者得之也。夫曰刺厲王之所以爲失者：《史記》：衛武公卽位於宣王之三十六年，不與厲王同時，一也。詩以「小子」目其君而爾汝之，無人臣之禮，與其所謂「敬威儀」、「慎出話」者自相背戾，二也。厲王無道，貪虐爲甚，詩不以此箴其膏肓，而徒以威儀詞令爲諄切之戒，緩急失宜，三也。詩詞倨慢，雖仁厚之君有所不能容者，厲王之暴，何以堪之？四也。或以《史記》之年不合，而以爲追刺者，則詩所謂「聽用我謀，庶無大悔」，非所以望於既往之人，五也。曰自警之所以爲得者：《國語》左史之言，一也。詩曰「謹爾侯度」，二也。又曰「日喪厥國」，三也。又曰「亦聿既耄」，四也。詩意所指，與《洪興》所美，《賁鑑》所悔相表裏，五也。一說之得失，其佐驗明白如此。必去其失而取其得，然後此詩之義明。今序者乃欲合而一之，則其失者固已失之，而其得者亦未足爲全得也。然此猶自其詩之外而言之也。若但卽其詩之本文而各以其一說反復讀之，則其

訓義之顯晦疏密，意味之厚薄淺深，可以不待考證而判然於胷中矣。此又讀《詩》之簡要直訣，學者不可以不知也。○姚氏際恆曰：此刺厲王之詩，不知何人所作也。案《楚語》左史倚相曰：「昔衛武公年數九十五矣，猶箴儆于國曰：『自卿以下至於師長士，苟在朝者，無謂我老耄而舍我，必恭恪于朝，朝夕以交戒我。』於是乎作《懿戒》以自儆。」韋昭曰：「《懿》，《大雅·抑》之篇也。懿讀爲抑。」《序》謂「亦以自警」，與韋說同。然又以詩中實多刺厲王之辭，則先之曰「衛武公刺厲王」。今按以此詩當《懿戒》，其不可信者有五。《詩·賓之初筵》及《假樂》篇皆有「威儀抑抑」之文，與此「抑抑威儀」同，未嘗有以抑爲懿之說。而他詩用懿字，如「好是懿德」，《懿厥哲婦》，亦未嘗有作爲抑也。「抑抑」，《毛傳》訓「密也」；若懿自訓美，義不相同。惟其嚴密，故曰「德隅」，內嚴密則外見廉隅也。若作懿，則爲美，「美威儀」句既淺俚，且下句義亦不貫，豈可以音之偶近而遂不別其義乎？一也。《楚語》云「《懿戒》，今篇中無戒字，亦不合，二也。篇中句句刺王，無一語自警。如曰「借曰未知，亦既抱子」，「借曰未知，亦聿既耄」，「視爾夢夢，我心慘慘。悔爾諄諄，聽我藐藐」，「聽用我謀，庶無大悔」等語，決非自警之辭。若夫切于王之尤著者，如曰「四方其訓之」，「四國順之」，「其在子今，興迷亂于政」，「罔敷求先王，克恭明刑」，「修爾車馬，弓矢戎兵，用戒戎作，用遏蠻方」，「子孫繩繩，萬民靡不承」，「天方艱難，曰喪厥國」，「回遹其德，俾民大棘」等語皆是，固不待識者而知之矣。詩中既皆刺王，非自警，《楚語》何以反言「自警」而不言刺王乎？則可知《楚語》所指非《抑》詩明矣。四也。若爲衛武公自警之詩，何以不入《衛風》，併不入《小雅》，而入《大雅》乎？必不可通。五也。如是，則安得以《抑》詩當武

公之懿戒哉？作序者見相傳說楚語如此，而詩則實爲刺王之辭，于是立兩歧之地，而曰「衛武公刺厲王」，又曰「亦以自警也」。其謬有三。夫人刺王則刺王，自警則自警，未有兩事夾雜可爲文者。自警既使人誦而聽，然則聽刺王之義何居？刺王期王改悟，然則自警爲侯事，與王事又不相涉也。若然，何難作刺王一篇，自警一篇，而必以兩事夾雜爲一篇，此必無之理。一也。孔氏曰：「武公以宣王三十六年卽位，則厲王之世，武公時爲諸侯庶子耳，未爲國君，未有職事，善惡無預于物，不應作詩刺王。」此實錄也。則武公無刺厲王之事甚明。二也。詩中毛傳、鄭箋句句皆言刺王，無一語及武公與自警。毛在序前，固無此說。鄭亦不依序，此明明可見者。奈何自序出而舉世皆以爲武公作乎？三也。如是，則序說尚可用乎？否乎？尤可異者，朱氏之辨序曰：「此詩之序有得有失。以詩考之，則其曰『刺厲王』者失之，而曰『自警』者得之也。」雖非武公刺厲王，然實爲刺厲王，乃反以爲失。若武公自警，則絕無此意，乃反以爲得。是非顛倒，黑白錯互，可笑殊甚！此本不必辨，但恐人惑其說，故畧舉而辨之。其曰「自警之所以爲得，國語左史之言，一也。」按此非國語左史之言，乃韋昭之言也。又曰「詩曰『謹爾侯度』，二也。」案鄭氏解「質爾人民，謹爾侯度，用戒不虞」曰：「侯，君也。此時萬民失職，亦不肯趨公事，故又戒鄉邑之大夫及邦國之君，平女萬民之事，慎爲君之法度，用備不虞度而至之事，義自如此。試平心讀之可見，何嘗是使人告己之說乎？」又曰：「日喪厥國，三也。」鄭氏解謂「下災異生兵寇，將以滅亡。」且國乃天下之通稱，節南山詩云「國既卒斬」，亦侯國乎？又曰：「亦聿既耄，四也。」嗟嗟，文義之不通而尚云通經學乎！上章曰「亦既抱



子」，此云「亦事既羣」，承上章而言。方抱子時，忽然羣矣，凡詩語一章深一層，皆然也，何爲指其一處而言之乎？「既羣」爲指其年九十五，「既抱子」則在壯年，將作何解？又曰：「詩意所指，與《淇奥》所美，《賓筵》所悔相表裏，五也。」案，《淇奥》所美，《賓筵》所悔，與此皆無涉。《賓筵》悔飲酒，此詩刺王荒湛于酒，豈以酒字偶同而遂謂之「相表裏」乎？又曰：「既有得失，其佐驗明白如此，必去失而取其得，然後此詩之意明。」予謂必去其「序」之失而後此詩之意明，其云「取其得」者，正墮「序」之雲霧不淺耳。案：二說各執己是，姚氏雖有意吹求朱《傳》之失，未免強詞求勝，原無是處。亦由晦翁所舉詩中證語，不舉其大而標其細，故使人得以摘其疵而力駁之。愚解此詩，但撮大要，連綴成文，使讀者從容涵泳，領其大旨。則此詩之爲刺人而作乎？亦將爲自警而作乎？可得諸意言之表者矣。何必紛紛聚訟爲哉？

【眉評】「一章」哲、愚二字雙起，先將學者病根剔出，以下方好自砥。〔二章〕特提人字，正言一段。〔三章〕拍合今日亂政。〔四章〕承上意亂政總疏一段，見事無大小常變，內外遠近，無不當警。〔五章〕點明「侯度」，以下容貌辭氣逐段細勘，白圭四句專貼言語，名論不勘。〔六章〕承言語一章。〔七章〕承容止，順推入微。聖學存養工夫，數語括盡。《大學》「誠意」，《中庸》「慎獨」從此而出，却無半點理障氣，所以爲高。〔八章〕就威儀上言德之當修。〔九章〕就話言上言德之當順。〔十、十一章〕二章皆欲其聽言以修德。前章耳提面命是正說，後章諄諄藐藐是反說。自「抱子」以至「既羣」，均不可以「未知」自護，一層深似一層也。〔十二章〕末用危言自警，愈見修省之切。

【集釋】「抑抑」密也。【隅】集傳：隅，廉角也。鄭氏曰：「人密審於威儀者，是其德必嚴正也。故古之賢者，道行心平，可外占而知內。如宮室之制，內有繩直，則外有廉隅也。」【哲】知也。【庶】衆也。【職】主也。【戾】反也。【競】強也。【覺】直大也。【訐】大也。【謨】謀也。【定】審定不易也。【命】號令也。【猶】圖也。【辰】時也。【告】戒也。【則】法也。【興】尚也。【紹】承也。【敷】廣也。【共】執也。【刑】法也。【弗尚】厭棄之也。【遏】遠也。【質】成也，定也。【侯度】諸侯所守之法度也。【虞慮也。【玷】缺也。【捫】持也。【警】答也。【屋漏】李氏如圭曰：「曾子問：謂之當室之白。孫炎云：當室之白，日光所漏入也。【格】至也。【度】測也。【射】數通，厭也。【辟】君也，指武公也。【止】容止也。【僭】差也。【賊】害也。【童】無角曰童。何氏楷曰：童以角爲言，猶「易言童牛」，「詩言童殺」也。【虹】潰亂也。王氏逢曰：字書虹與紅同。【荏染】集傳：荏染，柔貌。【柔木】集傳：柔木，柔忍之木也。【縉】集傳：縉，綸也，被之綸以爲弓也。【覆】猶反也。【僭】不信也。【慘慘】憂貌。【毫】八十、九十曰毫。【舊】舊章也。【止】語詞。【忒】差也。【適】僻也。【棘】急也。

【標韻】隅七虞恩同本韻 疾四質庚八齊叶韻 訓十三同順十二震通韻 告二沃則十三職叶韻 今十二侵政二十四政叶韻 酒二十五有紹十七篠叶韻 王七陽刑九青叶韻 尚二十三漾亡陽叶韻 寐四寘內十二隊通韻 章陽兵八庚方陽轉韻 虞七虞嘉六麻磨五歌爲四支叶韻 苟、有、逝齊叶韻 營十一尤報二十號叶韻 友有子四紙叶韻 緇十蒸承同本韻 顏十五刪愆一先通韻 漏二十六宥觀同本韻 格十一陌度十藥射陌叶韻 嘉麻儀支叶韻 賊職則同本韻 李紙子同本韻 絲支基同本韻 行庚心侵通韻 否紙事寘耳紙子同叶韻 盈庚成

同本韻 昭二蕭樂十九效慘二十七處藐條教教處蕭毫二十號叶韻 子紙止同悔十賄通韻 國職忒、德、棘並同本韻

### 桑柔 芮伯哀厲王也。

菀彼桑柔，比起。其下侯甸，捋採其劉。瘼此下民，不殄心憂。倉兄填兮，倬彼昊天，寧不我矜？呼天自訴。○一章四牡騤騤，旗旐有綽。臣吏奔走，兵役繁興。亂生不夷，靡國不泯。民靡有黎，具禍以燼。於乎有哀，國步斯頻。二章國步蔑資，天不我將。靡所止疑，云徂何往？君子實維，秉心無競。樹一筆。誰生厲階，至今爲梗？暗指厲王。○三章憂心慙慙，念我土宇。我生不辰，逢天憊怒。自西徂東，靡所定處。多我覯瘠，孔棘我國。四章爲謀爲慮，亂況斯削。告爾憂恤，誨爾序爵。誰能執熱，逝不以濯？如火益熱。其何能淑，載胥及溺。如水益深。○五章如彼遡風，亦孔之僂。民有肅心，莽云不逮。好是稼穡，力民代食。稼穡維寶，代食維好。六章天降喪亂，滅我立王。國人逐厲王。降此蟊賊，稼穡卒痒。哀恫中國，具贅卒荒。王出居岐，故若贊然。靡有旅力，以念穹倉。自恨無力挽回天運。○七章維此惠君，民人所瞻。先開一層。秉心宣猷，考慎其相。維彼不順，自獨俾臧。拍合厲王自用，以致大亂。自有肺腸，俾民卒狂。筆陣開合，動盪有勢。○八章瞻彼中林，甡甡其鹿。朋友已譖，不胥以穀。忽然興起，有搔首茫茫。

茫，百憂交集之感。人亦有言，進退維谷。九章維此聖人，瞻言百里。維彼愚人，覆狂以喜。匪言不能，胡斯畏忌？十章維此良人，弗求弗迪。維彼忍心，是顧是復。民之貪亂，寧爲荼毒？十一章大風有隧，有空大谷。比。維此良人，作爲式穀。維彼不順，征以中垢。十二章大風有隧，貪人敗類。比。聽言則對，誦言如醉。匪用其良，覆俾我悖。十三章嗟爾朋友，予豈不知而作？如彼飛蟲，時亦弋獲。既之陰女，反予來赫。十四章民之罔極，職涼善背。爲民不利，如云不克。民之回遹，職競用力。指暴虐。○十五章民之未戾，職盜爲寇。指聚斂。涼曰不可，覆背善譽。外爲正直，陰爲險詐。雖曰匪予，既作爾歌。十六章

右《桑柔》十六章，八章章八句，八章章六句。此詩人皆知爲芮良夫作矣，而不知其作於何時，則又可異。案《左傳》文元年，秦穆公引「大風有隧」篇，稱爲「芮良夫之詩」。故《小序》謂「芮伯刺厲王」。《集傳》以下諸家皆從之，且謂篇中不敢斥言王，而但斥當時執政者信用非人，貪利生事，以致禍亂。蓋厲王暴虐，不敢直諫，故託言規諷僚友以刺王耳。此又何異癡人說夢耶？夫詩不云乎，「天降喪亂，滅我立王」，此時國人已辟，厲王已逐。然王雖被逐，尚居於虢。故又曰「哀憫中國，具餐卒荒」。正《春秋傳》所謂「君若綴旒」時也。朝廷之上雖有周、召二公行政，謂之「共和」，而王至共和十四年始死於虢。則哀此中國誰爲之主？雖曰有君，不且若贅然哉？此詩正作於其時，蓋傷之也，何以刺爲？凡詩中所言，無非追究同朝不能匡救君惡，以至危亡，並恨已無大力拯民水火，可以挽回天意。

此作詩大旨也。若諸家但謂刺王，且並謂借諷友以刺王，不惟臣子拳拳愛君之心無所見，即此詩精神結聚之處亦不能顯。《集傳》雖亦疑爲共和之後作，然又曰不知的在何時，則其心尚無定見，亦由於未能讀詩之佳處故耳。大凡諸儒說《詩》，總不肯全篇合讀，求其大旨所在，而碎釋之，烏能得其要領？晦翁譏《行葦》序，以爲「逐句自生意義，不暇尋繹血脈，管照前後。」又云：「隨文生義，無復倫理。」不知己亦正坐此病。即如此詩，其佳處全在「滅我立王」三章，而乃爲游移無定之解。其餘不過追遡悔恨之詞，偏又呆疏碎釋，豈能抓人癢處哉？

【眉評】「一、二章」征役不息爲亂之本。「三、四章」於是民無所往。「五章」告以救亂如拯水火，卻用翻撥之筆，便不平板。「六章」朝不可仕，不如在野。然即退處亦難安居，更進一層。「七、八、九章」君若綴旒，此何時勢？雖其自取，臣心何安？凡此皆君不能擇相，信任小人之過。三章極沈鬱頓挫之致。「十、十一章」二章以聖愚善惡相形對言，見愚人不能遠慮，忍人未可信用，是追究厲王之失。「十二、十三章」二章皆以風行隧道爲比，凡小人垢由中藏，善不入耳，皆有所自。君臣昏瞶如此，其國焉得不亡！「十四、十五、十六章」以下規諷僚友，見不能匡正君惡皆臣下之失。忠臣愛君之心，千載如見其誠。

【集釋】「苑」音鬱，茂也。「句」徧也。「劉」殘也。「殄」絕也。「倉兄」與愴同，悲悶之意也。「填」姚氏際恆曰：填，填塞之意。愴，愴填塞于胸也。「倬」明貌。「夷」平也。「黎」黑也，謂黑首也。「燼」灰燼也。「步」猶遲也。「頻」急聲也。「蔑資」姚氏際恆曰：蔑資，無所資賴也。《集傳》以資作咨，非。《將》

養也。〔疑〕《集傳》：疑，如《儀禮》「疑立」之立定也。《鄉射禮》：賓升西階上疑立。《注》：疑，正立自定之貌。〔徂〕往也。〔競〕爭也。〔厲〕怨也。〔梗〕萍梗，謂飄泊無定也。〔俾〕厚也。〔瘠〕病也。〔棘〕急也。〔圍〕邊也。〔慙〕慎也。〔況〕滋也。〔削〕歐陽氏脩曰：亂日滋則國日削。〔序爵〕辨別賢否而官人也。〔執熱〕姚氏際恆曰：執熱，執勞煩熱也。逝，往也。謂執勞煩熱之人，誰能不往而洗濯其體乎？「逝不以濯」亦倒字句，猶云「不以逝濯」也。自來解此皆以執熱爲執持熱物，幾曾見人執持熱物之後必濯以水乎？又曰：或亦知執持熱物之非，孫文融解爲「熱氣盈身，如執之然」，鍾伯敬解爲「熱不可解」，何玄子解爲「盛暑之時，誰能執守此熱以往而不思澣濯」，竟無一通者。〔溺〕陷溺也。〔邈〕鄉也。〔僂〕偻也。〔拜〕使也。〔惘〕痛也。〔具〕俱也。〔贅〕屬也。〔卒〕盡也。〔荒〕虛也。〔旅〕與齊同。〔相〕輔也。〔狂〕惑也。〔姓姓〕衆多並行之貌。〔譖〕不信也。〔維谷〕姚氏際恆曰：維谷，嚴氏曰：「言進退皆窮，如陷山谷然。」《毛傳》：直訓爲窮，未明。〔迪〕進也。〔荼毒〕姚氏際恆曰：「姪炳曰：『荼惟以苦名，無毒。』孔氏曰：『荼，苦菜；毒，蟄蟲。』皆惡物。『本爲二物。』《集傳》乃曰：『荼，苦菜也。』味苦氣辛，能殺物，故謂之荼毒。『其附會如此。』《隲》道也。〔征以中垢〕姚氏際恆曰：「征以中垢」，謂行以中藏之汙穢也。或謂「小人以內汙之事誣君子」者，非。〔聽言二句〕姚氏際恆曰：「聽言則對，誦言如醉」，根上文來。謂聽彼之言則喜而對之，誦古人之言以告之則昏昏如醉。《集傳》曰：「王使食人爲政，我以其或能聽我之言而對之，然亦知其不能聽也，故誦言而中心如醉。」一字不可解。〔赫〕威怒之貌。〔職〕專也。〔涼〕鄭讀爲諒，信也。〔善背〕工爲反覆也。〔克〕勝也。〔回通〕邪僻也。〔戾〕

定也。〔覆背善言〕姚氏際恆曰：「覆背善言」，「背善」即上章「善背」，謂覆爲背善，且言我也。從來以善言連言，非。案：《集傳》云：「及其反背也，則又工爲惡言以言君子。」亦通。〔匪予〕姚氏際恆曰：「匪，非也。謂雖必以予言爲非，然不能自己，既爲爾作歌，以冀爾之一悟也。」

【標韻】柔十一尤劉、憂並同本韻隔句韻句十一真民同填一先天同矜十蒸通韻隔句韻駢四支夷同黎八齊哀十灰通韻隔句韻翻先混真燼十二震頻真叶韻隔句韻資支疑、維並同階九佳通韻隔句韻將七陽往二十二養叶韻隔句韻競二十四敬梗二十三梗叶韻隔句韻殷十二文辰真東一東齊十三元叶韻隔句韻字七庚怒七遇處廣同叶韻隔句韻盛四真恤四質熱九屑淑一屋叶韻隔句韻削十藥爵同濯三覺溺藥通韻隔句韻風東心十二侵叶韻 優十一隊遠同本韻隔句韻稽十三職食同本韻 寶十九皓好同本韻 王七陽痒、荒、蒼並同本韻隔句韻賊職國、力並同本韻隔句韻君文膽十四鹽叶韻 相陽臧、腸、狂並同本韻 鹿屋穀、谷並同本韻 里四紙喜同忌真叶韻 迪十二錫復屋毒二沃叶韻 谷屋穀同垢二十五有叶韻 隧真類同對隊醉寔倅隊通韻 作藥獲陌赫同叶韻 背隊克職力同叶韻 戾八霽寇寄真叶韻 予六魚歌五歌叶韻七章以上隔句叶，蓋轉韻也。

### 雲漢 宣王爲民禳旱也。

倬彼雲漢，昭回于天。王曰於乎！何辜今之人？天降喪亂，饑饉薦臻。靡神不舉，總百神。靡愛斯牲。祭品。圭璧既卒，祭儀。寧莫我聽？一章早既太甚，蘊隆蟲蟲。不殄禋祀，自郊徂宮。先尊後親。上下奠瘞，靡神不宗。后稷不克，上帝不臨。先親後尊。耗斁下土，寧丁

我躬？二章旱既太甚，則不可推。兢兢業業，如霆如雷。周餘黎民，靡有孑遺。昊天上帝，則不我遺。胡不相畏，先祖于摧？寫得可畏。○三章旱既大甚，則不可沮。赫赫炎炎，云我無所。大命近止，靡瞻靡顧。羣公先正，則不我助。父母先祖，胡寧忍予？涕泣而道。○四章旱既大甚，滌滌山川。旱魃爲虐，如惓如焚。我心憚暑，憂心如熏。羣公先正，則不我聞。昊天上帝，寧俾我遯？無可奈何。○五章旱既大甚，黷勉畏去。眼上「遯」字轉入正意。胡寧瘝我以旱，僭不知其故？祈年孔鳳，方社不莫。昊天上帝，則不我虞。敬恭明神，宜無悔怒。○六章旱既大甚，散無友紀。鞠哉庶正，疚哉冢宰，趣馬師氏，膳夫左右，靡人不周，無不能止。凡在朝臣，莫不敕旱。瞻卬昊天，云如何里？○七章瞻卬昊天，有嘒其星。應上「雲漢」。大夫君子，昭假無贏。大命近止，無棄爾成。何求爲我，以戾庶正？瞻卬昊天，曷惠其寧？○八章

右「雲漢」八章，章十句。此一篇禱旱文也。而「序」謂「仍叙美宣王」，姚氏譏其「未有考」。然使其實有所考，而篇中所言亦非美王意，乃王自禱詞耳。詩開口卽爲民號冤，仰天訴，曰「於乎！何辜今之人？」祇此一念之誠，哀矜惻怛不能自己，已足爲消災弭禍之本。況又爲民求神，上而后稷、上帝之尊且親，下而祈年、方社之神且靈，「自郊徂宮」，罔不莫瘞，所謂「靡神不宗」，無牲不備者也。凡在朝臣，如庶正，如冢宰，如趣馬、師氏，如膳夫左右，又無不同心敕旱，悉敬悉誠，亦庶幾乎上帝式臨，后稷克勝矣。而乃寧莫我聽乎？夫「旱既大甚，蠲隆蟲蟲」，既不可推，又不可沮。「滌滌山川，旱魃爲



虐」，天降喪亂，曷其有極？於是饑饉薦臻，凶歲頻仍。周雖餘民，「靡有子遺」，其不至散無友紀，「先祖于摧」者，亦幾希矣！夫是以憂心惓惓，「如懷如焚」。欲避之而無可避，即逃之又不能逃。於乎！「昊天上帝」，「胡寧瘼我以旱」，而不我遺，曾亦不知其何故也？嗟嗟！「羣公先正」，縱不我助，亦不我聞。而「父母先祖」，亦寧忍予而「靡瞻靡顧」乎？夫「上帝不臨」，后稷莫勝，是「大命近止」，尊親俱無可恃矣。夫與其耗斂下土，害及蒼生，毋寧禍我一人，猶得以身當之，庶可暫息天怒，而無苦吾民爲也。獨是瞻彼昊天，不唯昭回雲漢，而且「有嘒其星」，天未厭亂，莫能挽回。敢不業業兢兢，如雷如霆，益矢敬恭，以答明神。蓋昭格不懈於前修，天心悔禍於將來，此豈爲吾一人慮哉？殆將以定衆志於庶司也。天乎，天乎！仰視蒼蒼，何時是惠我以寧時乎？此非禱祝詞乎？何以謂之爲「美宣王」也？朱氏善曰：「讀是詩見宣王有事天之敬，有事神之誠，有恤民之仁。敬畏以事天，而天監之，虔恭以事神，而神享之，惻但以恤民，而民懷之。蘊隆之氣消，豐穰之效著，內治既修，外攘斯舉。中興之業，皆自雲漢一念之烈而基之也。」此所以爲「美宣王」意歟？然詩則固脩省恐懼之不暇矣，而何以「美」爲？吾故曰禱旱文也。

【眉評】「一章」開口爲民號冤，哀矜惻怛，其情如見。卽此一語，已足上格穹蒼而消災禍也。「二章」跟上「靡神」句爲民祈澤也。「三章」此又寧以己身爲民當戕，則爲民之心尤切。「四章」恐懼脩省是救災弭患之本。「五章」沈痛語，不忍卒讀。父母至親既忍視予，則上帝至尊豈肯宥我？「六章」此章自閔其格天無術。「七章」此章勸衆人共力回天。「八章」再益求昭格，勿棄前功，總以挽回

天心爲主。王心爲民，可謂切矣！

【集釋】「雲漢」天河也。【昭】光也。【回】轉也。言其光隨天而轉也。【薦】荐通。孔氏穎達曰：「左傳」曰：「晉荐饑」。『釋天』云：「仍饑爲荐」。『臻』至也。『藎』蓄也，陽氣蓄積于中也。『隆』盛也，陽氣驕亢于外也。『蟲蟲』爾雅：「釋訓」：蟲蟲，薰也。蓋早熱薰炙人也。『殄』絕也。『郊』祀天地也。『宮』宗廟也。『上』祭天也。『下』祭地也。『莫瘞』孔氏穎達曰：「莫謂置之於地，瘞謂埋之於土，皆禮神之物，酒食牲玉之屬也。黃氏佐曰：「莫是方祭時事，瘞是祭畢時事。『宗』尊也。『克』勝也。言后稷欲救此苗而不能勝也。『臨』享也。『敷』敗也。『丁』當也。言以身當是裁害也。『推』去也。『子』無右臂貌。『摧』滅也。言先祖之祀將自此而滅也。『沮』止也。『大命近止』死將至也。『羣公先正』『集傳』：「羣公先正」，『月令』所謂「雩祀百辟卿士之有益於民者，以祈穀實」者也。『月令』注云：「百辟卿士，古之上公以下，若勾龍、后稷之類。『滌滌』言山無木，川無水，如滌而除之也。『魃』旱神也。孔氏穎達曰：「神異經」曰：「南方有人長二三尺，袒身而目在頂上，走行如風，名曰魃。所見之國大旱，一名旱母。蓋是鬼魅之物。『憺』燎之也。『瘠』病也。『僭』曾也。『祈年』祈穀于上帝與祈來年于天宗也。『方』祭四方之神也。『社』祭土神也。『虞』度也。『散無有紀』姚氏際恆曰：「君以臣爲友，今以旱故，將離散無紀矣。亦倒字句，謂友散無紀也。『集傳』曰：「友紀，猶言綱紀」，未聞友之訓綱也。『鞠』窮也。『庶正』衆官之長也。『疚』病也。『冢宰』又衆長之長也。『趣馬』掌馬之官。『師氏』掌以兵守王門者。『膳夫』掌食之官也。『周』救也。『集傳』：「歲凶年，穀不登，則趣馬不秣，師氏弛其兵，馳道不

除，祭事不縣，膳夫徹膳，左右布而不脩，大夫不食梁，士飲酒不樂。言諸臣無有一人不周救百姓者。  
〔無不能止〕無以不能而遂止不爲也。〔里〕《集傳》：里，憂也。與《漢書》「無俚」之俚同，聊賴之意也。  
呂氏祖謙曰：《釋文》曰：「里本作廕」。《爾雅》作俚。《釋詁》曰：「俚，憂也。」劉氏瑾曰：《孟子》「稽大不理於口」。《集傳》訓賴，亦引《季布傳》「無俚」之俚爲證，然則里、理、俚，蓋通用。〔嘒〕明貌。〔假〕音格，至也。

【標韻】天一先人十一真臻同性八庚聽九青通韻 蟲一東宮同宗二冬臨十二侵躬東叶韻 推十灰雷同遺四支遺同摧  
灰通韻 沮六脂所同顧七遇助六御予六魚叶韻 川先梵十二文熏、聞並同遯十三阮叶韻 去御故遇莫同虞七虞  
怒遇叶韻 紀四紙宰十脂右二十五有止紙里同叶韻 星青羸庚成、正並同事青通韻

### 崧高 送申伯就封于謝，用式南邦也。

崧高維嶽，駿極于天。維嶽降神，生甫及申。維申及甫，姚氏云：「急轉見主客」。維周之翰，四國于蕃，功。四方于宣。功。○一章臺臺申伯，王續之事，于邑于謝，南國是式。王命召伯，「定申伯之宅。宮室。登是南邦，世執其功」。二章王命申伯，「式是南邦。因是謝人，以作爾庸」。王命召伯，徹申伯土田。賦稅。王命傅御，遷其私人。家人。○三章申伯之功，召伯是營。有俶其城，城郭。寢廟既成，宗廟。既成藐藐。王錫申伯，四牡騶騶，車馬。鉤膺濯濯。四章王遣申伯，路車乘馬。「我圖爾居，莫如南土。錫爾介圭，桓圭。以作爾寶。往近王舅，

南土是保」。五章申伯信邁，於是始行。王餞于郛。郊餞。申伯還南，謝于誠歸。王命召伯，徹申伯土疆，以峙其糧，行糧。式遏其行。六章申伯番番，既入于謝，徒御嘽嘽。就國是行後事。周邦咸喜，戎有良翰。不顯申伯，王之元舅，文武是憲。金德。○七章申伯之德，柔惠且直。全德。揉此萬邦，聞于四國。功。吉甫作誦，作詩人。其詩孔碩，詩品。其風肆好，以贈申伯。點明作收。○八章

右《崧高》八章，章八句。此詩與下篇《烝民》，同爲尹吉甫贈送之作。一送申伯，一送仲山甫，以二臣位相亞，名相符，才德又相配，故於二臣之行也，特贈詩以美之。於申伯則曰嶽降，於山甫則曰天生，二詩發端皆極意經營，工力亦極相敵。是二詩者，尹吉甫有意匹配之作也。有意匹配二臣，爲宣王中興生色。則篇中所謂「生甫及申」之甫，非仲山甫而何？乃諸儒忽曰：「甫，甫侯也，卽穆王時作《呂刑》者。」《集傳》疑二人不同時，難以並舉。又云：「或曰此是宣王時人，而作《呂刑》者之子孫也。」呂氏祖謙亦曰：「甫、申，意者皆宣王時賢諸侯，同有功於王室者。甫雖不見於經，以文意考之，蓋當如此也。」舍現在同見於詩之人不言，而乃爲此猜疑無定之辭，真是可怪！蓋泥申、甫皆國名耳。唯嚴氏榮曰：「舊說謂姜氏之先主四嶽之祀。嶽神福與其子孫，則執著于『嶽降』之文，以辭害意矣。此詩言『嶽降』，猶《烝民》言『天生仲山甫』耳。當時仲山甫爲相，申伯亞于山甫，借山甫以大申伯也。且申伯光輔中興，而遠取周道始衰之甫侯以匹之，非所以褒揚申伯也。或者疑甫爲字，申爲國，則名稱不類，故以申、甫皆爲國。不知古人文辭難以例拘。《舜典》稱「契、稷」，稷以官，契以名。漢稱「絳、

灌」，絳以封邑，灌以姓，皆不類也。此何玄子爲之覈實曰：「或謂吉甫既爲作詩之人，二甫字同，必無自贊之理。」然《燕民》之詩美仲山甫，篇中亦明著爲吉甫所作，則此詩以申甫並言，乃似統爲二詩發端，亦可以見甫之爲仲山甫，又斷斷無疑也。二詩同編，二臣對咏，明白如是，尚煩諸儒辯論如是，則其他有疑難定者，不言可知。噫！經學之難，不難於考證多端，難於通儒一言以決之耳！此詩用筆雖俊爽，而製局甚平，無足爲異。唯發端嚴重莊凝，有泰山巖巖氣象。中興賢佐，天子懿親，非此手筆不足以稱題。以下歷敘王命諸臣代伯經營其國，自城郭、宗廟、宮室、車馬、寶玉，以及土田、賦稅之屬，無不具備。所尤異者，伯之家人，亦令傳御代爲遷徙，赴國行糧，亦命召伯早爲儲備。王之寵臣，可謂至矣！夫古之封建，錫以車馬，畀以寶玉者有之，未有代營其城邑、寢廟者。古之寵賚，予以弓矢，賜以甲第者有之，未有代遷其室家，且並慮及餼糧者。有之，自宣王待申伯始。然則爲之臣者，宜何如感泣忘身以報之耶？此中興業所以不難就也。蓋王之爲是，曲盡恩榮者，非以伯爲元舅之尊也，非以伯有擁戴之勢也，誠以其資兼文武，望重屏藩，論德則柔惠堪嘉，論功則蕃宣足式，故用「以式南邦」，不得不如是之恩意周浹，禮文備至焉爾。然則諸臣之旁觀者，又不知如何感泣，亦將忘身以報之矣。嗚乎！令德聖主，忠藎賢臣，其推誠相與，夫固有非形迹所能喻者。此尹吉甫之所爲長言而歌咏之也歟？

【眉評】「一章」起筆崢嶸，與嶽勢競隆。後世杜甫呈獻鉅篇，專學此種。「二、三、四、五章」中開四章，皆王遣臣代其經營而錫予之，自城郭、宗廟、宮室、車馬、寶玉，以及土田、賦稅之屬，無不具備，且命

傳御遷其家人，則寵榮者至矣。〔六章〕至是始入饒行正面，更爲備及行糧，是何等周密！〔七章〕

人謝乃文章後路應有之意。〔八章〕結尾點明作意，並特表其功德之盛，非徒以親貴邀寵者，亦

詩人自占身分處。

【集釋】〔崧高〕集傳：山大而高曰崧。李氏巡曰：山高者自名崧，本不指中嶽。今之中嶽名嵩高，或取此文以立名乎？〔嶽〕山之尊者，東岱、南霍、西華、北恆是也。〔駿〕大也。〔甫〕卽仲山甫，說見篇中。〔申〕申伯，姜姓國也。孔氏穎達曰：堯之時有姜氏者，掌四岳之祭。周則有甫、申、齊、許，皆姜氏之苗裔也。〔翰〕幹也。〔蕃〕蔽也。〔臺臺〕強勉之貌。〔續〕繼也。〔邑〕國都之處也。王氏安石曰：國之所都亦曰邑，作邑于豐。〔商邑翼翼〕是也。〔謝〕集傳：謝在今鄧州南陽縣，周之南土也。曹氏粹中曰：地理志，南陽宛縣有申伯國，棘陽縣東北百里有謝城，其地蓋相近。〔式〕法也。陳氏飛鵬曰：南國是式者，命爲州牧也。〔召伯〕召穆公虎也。〔登〕成也。〔世執其功〕言使申伯後世常守其功也。〔徹〕何氏楷曰：用徹法以正其土田，則經界之脩明，稅賦之畫一皆在其中矣。此卽黍苗篇所云平原隰，清泉流之事。又曰：韓奕言「實畝實籍」，江漢言「徹我疆土」，而此言「徹申伯土田」，蓋自厲王暴虐，而徹法壞盡矣。宣王中興之美，亦可見其一也。〔傳御〕申伯家臣之長也。〔私人〕家人也。〔遷〕使就國也。〔俶〕始也。〔藐藐〕深貌。〔蹻蹻〕壯貌。〔濯濯〕光明貌。〔介圭〕諸侯封圭，蓋桓圭以朝於天子者也。〔近〕集傳：近辭也。徐氏光敏曰：辭者，語辭也。鄭氏康成曰：聲如「彼記之子」之「記」。案：說文從辵，從丌。今從斤，誤。〔鄆〕今鳳翔府郿縣。孔氏穎達曰：自鎬

適申，塗不經郿。時宜王蓋省視岐周，故餞之于郿。申伯既受命，王餞，還歸於鎬而後適申也。案：此近是。〔信邁誠歸〕何氏楷曰：邁，行也。〔信邁〕，猶云果行也。〔謝于誠歸〕者，鄭云：「誠歸于謝」也。〔峙糧〕《集傳》：峙，積也。糧，糧也。邁，速也。召伯之營謝也，則已斂其稅賦，積其餼糧，使廬市有止宿之委積，故能使申伯無留行也。〔番番〕武勇貌。〔嘽嘽〕衆盛貌。〔戎〕汝也。〔揉〕治也。〔吉甫〕尹吉甫，周之卿士也。〔誦〕工師所誦之辭也。〔碩〕大也。〔風〕姚氏際恆曰：此《雅》也，而曰「其風肆好」，則知凡詩皆可稱「風」，第《雅》《頌》可稱「風」，《風》不可稱「雅」，《頌》耳。〔肆〕遂也。

【標韻】天一先申十一真輪十四寒宜先通韻 事四真式十三職宅十一陌叶韻 邦七陽功一東叶韻 邦陽庸二冬叶韻 田先人真通韻 營八庚成同本韻 伯陌濯三覺藐十七篠驕同隔句韻 馬二十一馬士七廢叶韻 寶十九略保同本韻 郿四支歸五微通韻 疆陽行同本韻 謝二十二遇喜四紙叶韻 翰十五翰憲十四願叶韻 德職直、國並同本韻 碩陌伯同本韻

### 烝民 送仲山甫築城于齊，懷柔東諸侯也。

天生烝民，有物有則。民之秉彝，好是懿德。天監有周，昭假于下。保茲天子，生仲山甫。深源星宿，不獨理精，詞亦粹然。雖宜聖亦不能不爲之心折。此《三百篇》說理第一義也。○一章仲山甫之德，承德字來。柔嘉維則。猷則字。令儀令色，表。小心翼翼。裏。古訓是式，學問。威儀是力。修行。天子是若，明命使賦。事業。○二章王命仲山甫，式是百辟。外總百官。續戎祖考，世官。王躬

是保。內輔君德。出納王命，人司政本。王之喉舌。賦政于外，出治四方。四方爰發。三章肅肅王命，仲山甫將之。承上賦政。邦國若否，仲山甫明之。既明且哲，回顧德宇。以保其身。保身。夙夜匪解，以事一人。致君。○四章人亦有言，柔則茹之，剛則吐之。維仲山甫，柔亦不茹，柔有則。剛亦不吐。剛亦有則。不侮矜寡，不畏彊禦。五章人亦有言，德輶如毛，民鮮克舉之。奇喻。我儀圖之，維仲山甫舉之。愛莫助之。進一層言。衰職有闕，維仲山甫補之。六章仲山甫出祖，人題正面。四牡業業，征夫捷捷，每懷靡及。四牡彭彭，八鸞鏘鏘。王命仲山甫，城彼東方。築城。○七章四牡騤騤，八鸞喈喈。仲山甫徂齊，地名。式遏其歸。吉甫作誦，並點詩人。穆如清風。名句。仲山甫永懷，以慰其心。八章

右《烝民》八章，章八句。《序》謂「美宣王任賢使能，周室中興焉」。而詩中無美王意，故《集傳》改爲送行之作，本詩詞也。郝仲興駁之云：「時厲王流彘，諸侯已不知有天子。齊，遠而區區之城，且以上請，豈非宣王復興之烈哉？」刪《詩》存《烝民》，《春秋》之旨。如解作送行，何關王政？何登於《雅》？姚氏以爲「佞序」，「真腐儒之見」。詩末句明言「仲山甫永懷，以慰其心」，並不及美宣王之意，何緣不讀詩乎？《案》：郝論甚正大，未可厚非。然自是詩外意，非詩中旨也。詩本美仲山甫，故備舉其德性、學行、事業，以及世系、官守，無不極意推美，而總歸之於德，且準以則焉而不過，幾於《中庸》至善學，故能使宣聖三復其言而歎美之。然則仲山甫賢，卽作詩之尹吉甫亦可不謂之爲賢乎？此詩內意也。若



築城於齊，不過尋常卿士任之足矣，何至以才全德備，補袞重臣遠出而司其事？豈非以諸侯久無朝廷，今一旦以築城請，不得不命天子保傅親受其成。雖曰「城彼東方」，實懷柔東諸侯也。故尹吉甫作詩美之，亦此意歟？不然，何云「仲山甫永懷，以慰其心」耶？唯不宜直云「美宣王」，但當曰「送仲山甫築城於齊，則春秋之義自見。惜諸儒說詩，率多半明半暗，未能窺其全旨，故來後人指摘相循而未有已時耳。」

【眉評】「一章」工於發端，與上篇同一高渾有勢。然「嶽降」以氣言，「天生」以理言，妙在說理不腐，三代之異於南宋者以此。「二章」此詩備舉其德，由德行遞到事業。「三章」此章總言職守。「四章」此章由政事轉言德行。「五、六章」二章專表其德，至補袞始微帶政治，然總不脫則字。蓋則字是懿德之準，即是此詩之骨。須看他描寫山甫德行，處處無過乎則。「七、八章」此二章方寫出行，爲作詩送別之由，篇法極爲整飭。

【集釋】「烝」衆也。「則」法也。「秉」執也。「彝」常也。「懿」美也。「監」視也。「昭」明也。「假」至也。「保」佑也。「仲山甫」樊侯字也。孔氏穎達曰：「周語稱樊仲山甫諫宣王」，是山甫爲樊國之君也。韋昭云：「食采於樊」。僖二十五年左傳說晉文公納定襄王，王錫之樊邑，則樊在東都之畿內也。「嘉」美也。「令」善也。「色」顏色也。「翼翼」恭敬貌。「古訓」先王之遺典也。「若」順也。「賦」布也。「戎」女也。「王躬是保」集傳：「所謂保其身體者也。然則仲山甫蓋以冢宰兼太保，抑其世官也與？或問：仲山甫以冢宰兼太保，何以知之？曰：其言「式是百辟」，則是爲宰相可知。其曰「保茲天

子「王躬是保」，則是爲大保可知。「出」承而布之也。「納」行而復之也。「喉舌」所以出言也。「發」發而應之也。「將」奉行也。「若」順也。「否」猶臧否也。「明」謂明於理。「哲」謂察於事。「保身」《集傳》：「蓋順理以守身，非趨利避害而偷以全軀之謂也。」「茹」納也。「輶」輕也。劉氏濟曰：「駟職」曰「輶車」者，亦取其馳逐之輕，故輶有輕之義。「儀」度也。「圖」謀也。「衰職」王職也。「祖」行祭也。「業業」健貌。「捷捷」疾貌。「東方」齊也。「式」適其歸，不欲其久於外也。「穆」深長也。

【標韻】則十三職同本韻 下二十一馬甫七庚叶韻 德職則、色、翼、式、力並同本韻 若十業賦七遇叶韻 甫、辟無韻考十九咍保同本韻 舌九屑發六月通韻 將七陽明八庚轉韻 身十一真同本韻 茹六語吐庚甫同茹 語吐底禦語通韻 舉語助六御補庚叶韻 業十七洽捷十六業及十四緝通韻 彭庚鏘陽方同轉韻 駟四支咍九 佳歸五微通韻 風一東心十二侵叶韻

### 韓奕 送韓侯人覲歸娶，爲國北衛也。

奕奕梁山，維禹甸之。從韓地起，遠溯禹甸爲封建，作勢嚴重有法。有倬其道，韓侯受命。王親命之，  
「續我祖考，無廢朕命！夙夜匪懈，虔共爾位！朕命不易。榦不庭方，以佐戎辟」。一章四  
牡奕奕，孔修且張。韓侯人覲，以其介圭，人覲于王。王錫韓侯，淑旂綬章，簞弗錯衡。玄  
衮赤舄，鉤膺鏤錫，鞞琫淺幘，條革金厄。二章韓侯出祖，出宿于屠。顯父餞之，清酒百盞。  
其殽維何？魚鼈鮮魚，其蔌維何？維筍及蒲。其贈維何？乘馬路車。籩豆有且，侯氏燕

胥。三章韓侯取妻，汾王之甥，蹇父之子。忽人取妻一段，不獨文章生色，事亦極有關係。韓侯迎止，于蹇之里。親迎。百兩彭彭，八鸞鏘鏘，不顯其光。諸娣從之，祈祈如雲。韓侯顧之，爛其盈門。人門。○四章蹇父孔武，靡國不到。爲韓姑相攸，追溯。莫如韓樂。孔樂韓土，順勢逗入韓國。川澤訐訐，魴鱖甫甫，應鹿鳴鳴，有熊有羆，有貓有虎。慶既令居，韓姑燕譽。五章溥彼韓城，燕師所完。以先祖受命，因時百蠻。王錫韓侯，其追其貊，奄受北國，因以其伯。實塘實壑，實畝實籍。獻其貔皮，赤豹黃熊。收筆莊雅得體。○六章

右韓奕六章，章十二句。此不過一篇韓侯初立，人觀受賜，因以便道親迎歸國，詩人美之之作。於國何所關係？《小序》謂「尹吉甫美宣王」，固涉泛泛，卽謂「能錫命諸侯」，亦豈詩中大旨？至《集傳》則又只以爲送別之章，尤屬隔靴搔癢，未可與知人論世也。唯鄭氏忠胤曰：「韓爲望國，諸侯之向背係焉。而又密邇北國，爲一方屏藩。韓侯來朝，猶用繼世稟命之禮。王因令之續舊服，受北國爲伯，其依毗亦隆重哉！而馭下之柄可概見矣。」此差得詩人作詩義旨。然曰「猶用繼世稟命之禮」，亦只說得「能錫命諸侯」一節，非深明當日時勢者也。愚意此詩必作於六月北伐之後，故爲關係中興之作。蓋自玁狁背叛以來，北方諸侯梗命不朝者亦已多矣。茲值北伐有功，韓侯適以受命入覲，而又年少英賢，爲國懿親，更配帝甥，膺茲屏翰，實足以制北狄而衛王家。故宣王因其來朝，特隆以禮。與申伯諸臣同深倚賴，非泛常比也。詩人亦於其歸國便道親迎之日，餞之以詩，亦將以北方保障望

之。故首尾均以受命建國，勸修職貢爲言。至中間親迎兩章，不過借作文章波瀾，且以見其爲國至戚，尤宜輸忠以報天子耳。若天子寵錫之隆，厥父相攸之美，皆詩中極意烘託法，非關正意。然正意亦未嘗不由此而見也。惜後儒說《詩》，專從此等處訝其恩遇非常，則何異矮人觀場，終日不知其何故耶。姚氏際恆，近世善說《詩》者，其於此詩亦僅曰「宣王册命韓侯，韓侯人覲天子，韓侯取天子甥女爲國戚，皆絕大事。如此詩不入《大雅》，而必標曰『美宣王』，然後入《大雅》耶？」噫！以此事爲絕大事，詩爲《大雅》詩，則其識不又出矮人下數等哉！

【眉評】「一章」首章來朝受命，「續戎」以下皆制詞。「二章」此章既朝覲而得天子之錫，奇光異彩，炫睛奪目。「三章」此章祖送歸國。「四章」此章便道親迎，一時盛事，寵榮極矣。且見爲國戚，足以捍衛王室。「五章」此章並及擇壻，文勢更覺舒展。姚氏云，因取妻及擇壻于韓，見韓王之美，仍歸封國本旨。其聯絡脫卸處，幾于無迹可尋。章末落到歸韓，特言「韓姑燕譽」，與上「侯氏燕胥」遙遙相對。「六章」末章仍歸到封建，因其前人之土宇，增今日之疆域，不唯使其勸修職貢，且令其懷柔北狄。

【集釋】「奕奕」大也。「梁山」《集傳》：梁山，韓之鎮也，今在同州韓城縣。李氏樗曰：其後屬晉。《爾雅》：梁山，晉望也。「一」孫炎注曰，晉國所望祭，則是韓滅之後，故以爲晉望也。「旬」治也。「倬」明貌。「韓」國名，侯爵，武王之後也。「受命」《集傳》：受命，蓋卽位除喪，以士服入見天子而聽命也。班氏固曰：世子上受爵命，衣士服何？謙不敢自尊也。「續」繼也。「戎」汝也。「易」改也。「韓」正

也。〔不庭方〕不來庭之國也。梁氏益曰：「左傳」，鄭莊公以王命討不庭。說者曰：下之事上皆成禮於庭中。不庭，言不趨走於庭，故討其罪。〔辟〕君也。〔修〕長也。〔張〕大也。〔介圭〕封圭也。〔淑〕善也。〔綬章〕集傳：綬章，染鳥羽或鹿牛尾爲之，注於旂竿之首，爲表章者也。〔鈎膺鏤錫〕集傳：鏤，刻金也。馬眉上飾曰錫，今當盧也。孔氏穎達曰：當盧者，當馬之額盧，在眼眉之上。案「巾車」，「玉路，錫樊鏤，金路，鈎樊鏤。」注云：「金路，無錫有鈎」，此言鈎膺必金路矣，而得有鏤錫者，蓋特賜之。〔鞞〕鞞，淺鞞。集傳：鞞，去毛之革也。鞞，式中也。謂兩較之間，橫木可憑者，以鞞持之使牢固也。淺，虎皮。鞞，覆式也。字一作帶，又作鞞，以有毛之皮覆式上也。孔氏穎達曰：鞞字，「禮記」作帶，「周禮」作鞞，字異而義同。「玉藻」言「羔帶鹿帶」，「春官·巾車」言「犬裘紆鞞」，皆以有毛之皮爲帶。「少儀」御車之法云：「拖諸帶」，明在軾上，故知覆軾也。「條革金厄」集傳：條革，轡首也。金厄，以金爲環，纏轡轡首也。孔氏穎達曰：厄，大蟲，似蠶。金厄者，以金接轡之端如厄蟲然也。「屠」集傳：屠，地名，或曰，卽杜也。姚氏際恆曰：屠，杜古通用。晉有「杜蒯」，亦作「屠蒯」。「漢志」注云：「古杜伯國，漢宣帝葬其地，因曰杜陵，在長安南十五里。」「顯父」周之卿士也。「藪」菜穀也。「荀」竹萌也。「蒲」蒲弱也。「且」多貌。「侯氏」觀禮：諸侯來朝者之稱。此則指韓侯也。「胥」語辭。「汾王之甥」汾王，厲王也。厲王流于彘，在汾水上，故曰汾王也。甥指韓姑。「顯父」周之卿士，韓姑父也。「姑」姓也。曹氏粹中曰：「說文」曰：「黃帝之後，伯鯀姓。姑，后稷妃家」也，然則顯，蓋其氏也。「諸娣」集傳：諸侯一娶九女，二國媵之，皆有娣姪也。「相攸」擇可嫁之所也。「訐訐甫甫」皆大也。

〔嘖嘖〕衆也。〔貓〕《集傳》：貓，似虎而淺毛。《爾雅》：虎竊毛，謂之號貓。〔慶〕喜也。〔令〕善也。〔燕〕安也。〔譽〕樂也。〔溥〕大也。〔燕師所完〕燕召公之國也。韓初封時，王命以其衆爲築此城。〔追〕追。〔夷狄之國也。〕〔墉〕城也。〔壑〕池也。〔籍〕稅也。〔貔〕猛獸也。

【標韻】句十七聲命二十四敬命同通韻 道十九條考同本韻 解十卦位四寅通韻 易十一陌辟同本韻 張七陽王、章並同衡八庚轉韻 烏陌錫十一錫厄陌通韻 屠七虞壺同魚六魚蒲虞車魚且、胥並同通韻 子四紙止、里同本韻 彭庚鏘陽光同轉韻 雲十二文門十三元通韻 到二十號樂十九效通韻 土七虞許虞甫虞嘖虞虞虎虞譽六御叶韻 完十四寒蠻十五刪通韻 貂陌伯、籍並同本韻 皮四支羆同本韻

校記

〔一〕〔梁〕字原奪，據《爾雅·釋山》補。

### 江漢 召穆公平淮銘器也。

江漢浮浮，武夫滔滔。匪安匪遊，淮夷來求。既出我車，既設我旗。匪安匪舒，淮夷來鋪。一章江漢湯湯，武夫洸洸。經營四方，告成于王。四方既平，王國庶定。時靡有爭，王心載寧。平淮之事止此。○二章江漢之游，王命召虎。以下善後事。〔武辟四方，徹我疆土。匪疚匪棘，王國來極。〕于疆于理，至于南海。三章王命召虎，〔來旬來宣。文武受命，召公維翰。無曰予小子，召公是似。肇敏戎公，用錫爾祉。〕四章〔釐爾圭瓚，秬鬯一卣。告于文人，錫山

土田。于周受命，自召祖命」。受賞。虎拜稽首，「天子萬年」！五章虎拜稽首，「對揚王休，作召公考，天子萬壽」！銘勳於器是主。明明天子，令聞不已。矢其文德，洽此四國。六章

右《江漢》六章，章八句。此似一篇召伯家廟紀勳銘。蓋穆公平淮夷，歸受上賞，因作成於祖廟，歸美康公，以祀其先也。細觀詩意自見。首二章敘平淮之功甚畧，後二章述慶賞報塞之義極詳。反覆祝頌，鄭重廣颺，歌咏不已，則其歸重後層可知。中興復舊典，旬宣遠猷，皆設爲王命之詞，以便歸功祖德，亦無非爲後半作勢。豈非廟器銘哉？《序》以爲「尹吉甫美宣王能興衰撥亂，命召公平淮夷」，不知作何夢囈。《集傳》以爲「詩人美之」者，亦非。蓋自銘其器耳。夫淮夷平自是宣王中興事，然詩非爲宣王作，特編《詩》者錄之，以見宣王之功也。此中界限不可不明。詎得因其平淮夷，遂漫然以爲「美宣王」而無所區別哉？

【眉評】「一章」整師而往。「二章」淮夷患除。「三章」善後安民，不外興復井田，清釐賦稅諸法。「四章」再勉以繼述先業。皆設爲王策命之言，落句卽起下章，論定賞行，鄭重之至。「五、六章」頌揚王休，乃臣子報塞之義，然仍勸君以文德，則寓箴規於廣拜時矣。

【集釋】「浮浮」水盛貌。「滔滔」順流貌。蓋平淮由江、漢率師順流而下也。「淮夷」夷之在淮南者。「鋪」陳也，陳師以伐之也。「洗洗」武貌。「庶」幸也。「虎」召穆公名也。「辟」與闢同。「徹」井其田也。「疾」病也。「棘」急也。「極」中之表也，居中而爲四方所取正也。「旬」徧也。「宣」布也。「召公」召康公爽也。「翰」幹也。「予小子」王自稱也。「肇」開也。「戎」汝也。「公」功也。「釐」賜也。「卣」

《爾雅·釋器》：「卣，中尊也。」《文人》：「姚氏際恆曰：『文人』，自指文王。《毛傳》但訓爲『文德之人』，非。《集傳》曰：『文人，先祖之有文德者也，謂文王也。』爲說難而複，亦非。《周·岐周也》。《召祖》：「穆公之祖康公也。」《集傳》：「古者爵人必於祖廟，示不敢專也。又使往受命於岐周，從其祖康公受命於文王之所，以寵異之。」《對·答也》。《揚·稱也》。《作召公考》：「《集傳》考，成也。言穆公既受賜，遂答稱天子之美命，作康公之廟器，而勒王策命之詞以考其成，且祝天子以萬壽也。古器物銘云：『邠拜稽首，敢對揚天子休命，用作朕皇考虞伯尊敦。邠其眉壽，萬年無疆。』語正相類。但彼自祝其壽，而此祝君壽耳。案：此詩卽銘詞，《集傳》既知考成爲銘器而不敢斷者，何也？《矢·陳也》。

【標韻】浮十一尤酒四豪游尤求同叶韻 車六魚虞、舒並同鋪七虞通韻 湯七陽沈、方、王並同平八庚定二十五徑爭庚寧九青叶韻 游七虞虎、土並同本韻 棘十三職極同本韻 理四紙海十賄通韻 宣一先輪十四寒通韻 子紙似、杜並同本韻 瓊十四旱卣二十五有無韻 人十一真田先命二十四敬年先叶韻 首有休尤考十九瞻壽二十六宥叶韻 子紙已同本韻 德十三職國同本韻

### 常武 宣王自將伐徐也。

赫赫明明，王命卿士，南仲大祖，世爲名將。大師皇父，「整我六師，以修我戎，既敬既戒，惠此南國。」一章王謂尹氏，「命程伯休父，左右陳行。戒我師旅，率彼淮浦，省此徐土。」取道于淮，所征在徐。不留不處，三事就緒。二章赫赫業業，有嚴天子。王舒保作，匪紹匪遊。徐方



繹駭。震驚徐方，如雷如霆，聲勢。徐方震驚。三章王奮厥武，王親指麾。如震如怒。進厥虎臣，猛將。闕如虓虎。鋪敦淮濱，仍執醜虜。生擒。截彼淮浦，奇兵。王師之所。四章王旅嘽嘽，如飛如翰，迅疾。如江如漢，洶湧。如山之苞，靜守。如川之流。勦攻。縣縣翼翼，聯營。不測不克，秘謀。濯征徐國。痛勦。○五章王猶允塞，徐方既來。徐方既同，天子之功。四方既平，徐方來庭。徐方不回，王曰還歸。暢然滿志，凱還。○六章

右《常武》六章，章八句。詩無「常武」字而以名篇，故又啟諸儒紛紛疑議，二千餘年尚無定解，抑又可笑。《小序》曰：「召穆公美宣王也。」不知其何所據？《大序》曰：「有常德以立武事，因以爲戒然。」然篇中有美而無戒，且所謂「常德」者，亦不知其何以謂之「常德」，而始可「立武事」？均覺難解。《辨說》獨不敢非，以爲「於理亦通」，故其言曰：「詩中無『常武』字，召穆公特名其篇，蓋有二義：有常德以立武則可，以武爲常則不可。此所以有美而有戒也。」是又本《序》以爲說，無怪姚氏譏其爲「佞《序》者，莫若朱也」。然姚氏亦無說以解此，則其他又何論耶？愚按：常者，恆也，謂事之有恆者而後可常焉。蓋對變言，而又近乎黷者也。武者，事之變，詎可以爲常武也？不可黷，又豈可視爲恆？唯當其時，不能不用武以定亂，則雖變也，而亦正焉。匪黷也，乃無忘乎恆耳。周之世武功最著者二：曰武王，曰宣王。武王克商，樂曰《大武》；宣王中興，詩曰《常武》，蓋詩卽樂也。此名「常武」者，其宣王之樂歟？殆將以示後世子孫，不可以武爲常，而又不可暫忘武備，必如宣王之武而後爲武之常。然變而不失其正焉者耳，而豈以武爲常哉？又豈如《序》所云「有常德以立武事」之謂哉？詩首命將，次

置副，三乃親征，四五則皆臨陣指麾，出奇進攻諸事。蓋誓師則必敬必戒，整隊則成列成行。循淮而下，直薄徐土。軍未行而先聲已震，陣甫列而醜虜成禽。靜守則如山之苞，勢不可撼；動攻則如川之流，氣莫能當。有猛士尤貴奇謀，故不測而不克；有偏師乃行正道，故縣縣而翼翼。截彼淮浦，防其逸，尤用擊援；濯征徐國，擒渠魁，並勦餘孽。是一篇古戰場文字。迨至「徐方既來」，「徐方來同」，乃歸功天子。而「徐方來庭」，「徐方不回」，天子亦不自有其功。曰：「是豈可以爲常哉？蓋不得已也，可以下令還歸矣。」中興業建，樂舞斯成，名命「常武」，是之謂歟？蓋不敢上媲「大武」，亦不敢下同「騶武」。特恐後世子孫以武爲常，而輕試其鋒；又恐後世臣民與武相忘，而竟無所備，是皆不可以爲常，載咏篇章並觀樂舞，不能不爽然而自失也。於乎！宣王用意可不謂之深且遠哉！

【眉評】「一章」命將。兵凶戰危，故以敬戒爲主，即臨事而懼之意。「二章」置副。循淮而下以至徐土，是師行正道。「三章」以下方寫自將，先聲早已奪人。蓋以順討逆，宜無不克，況親征乎？「四、五章」橫截淮浦，斷其歸路，並扼援師，下章乃能淨洗賊窟，不留遺孽。故曰「濯征」，鍊字新而奇，並有更新之意。「六章」徐方二字回環互用，奇絕快絕！杜甫「即從巴峽穿巫峽，便下襄陽向洛陽」之句，有此神理。標韻案，戎不入韻，諸家叶音汝，不必從。

【集釋】「卿士」即皇父之官也。孔氏穎達曰：「十月之交，皇父與此皇父得爲一人。或皇氏父字，傳世稱之，亦未可知也。」南仲「見」出車篇。「大祖」始祖也。「大師」皇父之兼官也。陳氏飛鵬曰：「自家宰而下謂之六卿，大師而下謂之三公。既曰「王命卿士」，又曰「大師皇父」，周家不特設三公，皆兼職而

已。如周公以冢宰兼大師也。〔尹氏〕吉甫也，蓋爲內史，掌策命卿大夫也。〔程伯休父〕周大夫。孔氏穎達曰：程國之伯，字休父。《楚語》云：「重黎民世敘天地，其在周，程伯休父其後也。當宣王時，失其官守，而爲司馬氏。」濮氏一之曰：程，畿內邑，在豐。〔三事〕姚氏際恆曰：「三事」，《毛傳》謂之「立三有事之臣」。案此卽《書·立政》篇「作三事」，及《詩·十月》篇「擇三有事」，《雨無正》「三事大夫」也。謂分主六軍之三事大夫，無一不盡職以就緒也。鄭氏謂「三農之事」，謬。〔赫赫〕顯也。〔業業〕大也。〔嚴〕威也。天子自將，威可畏也。〔王舒保作〕《集傳》：未詳其義。或曰：舒，徐。保，安。作，行也。言王師舒徐而安行也。曹氏粹中曰：雖以天子之威靈如此，亦安徐詳諦而後動。〔紹〕糾緊也。〔游〕邀游也。〔繹〕連絡也。〔騷〕擾動也。〔進〕鼓而進之也。〔闕〕奮怒之貌。〔虺〕虎之自怒也。〔鋪〕布也。〔敦〕頓也。〔仍〕《集傳》：仍，就也。《老子》曰：「攘臂而仍之。」〔截〕絕也，謂斷絕其出入之路也。〔嘽嘽〕衆盛貌。〔苞〕本也。〔縣縣〕不斷也。〔翼翼〕不單也。〔不測〕不厭詐也。〔不克〕先爲不可勝也。〔濯征〕有洗濯其腥穢之意。〔允〕信也。〔塞〕實也。〔庭〕朝也。孔氏穎達曰：既降服後，朝京師而至王庭。〔回〕不復叛也。〔還歸〕班師而歸也。

【標韻】士四紙父七虞戎一東國十三職叶韻 父虞旅六語浦虞土同處語緒同通韻 子紙作十寒無韻 游十一尤騷四豪叶韻 方七陽驚八庚轉韻 武虞怒七遇虎虞虜、浦並同所語叶韻 翰十五輪漢同本韻 苞三肴流尤叶韻 翼職克、國並同本韻 塞職來十灰叶韻 同東功同本韻 平庚庭九青通韻 回灰歸五微通韻

瞻卬 刺幽王嬖褒姒以致亂也。

瞻卬昊天，則不我惠。孔填不寧，降此大厲。邦靡有定，士民其瘵。蠹賊蠹疾，靡有夷屆。罪罟不收，靡有夷瘳。一章人有土田，女反有之。眼孟賊。人有民人，女覆奪之。此宜無罪，女反收之。眼罪罟。彼宜有罪，女覆說之。二章哲夫成城，哲婦傾城。健句挺接極有力。懿厥哲婦，爲梟爲鴟。婦有長舌，維厲之階。亂匪降自天，生自婦人！匪教匪誨，時維婦寺。三章鞠人忮忒，譖始竟背。豈曰不極，伊胡爲慝？如賈三倍，君子是識。陪一筆。婦無公事，休其蠶織。四章天何以刺？何神不富？舍爾介狄，維予胥忌。不弔不祥，威儀不類。人之云亡，邦國殄瘁！罪罟遺害至於如此。○五章天之降罔，維其優矣。人之云亡，心之優矣。天之降罔，維其幾矣。人之云亡，心之悲矣。六章霱沸檻泉，維其深矣。興。心之憂矣，寧自今矣！不自我先，不自我後。藐藐昊天，無不克鞏。無忝皇祖，式救爾後！七章

右《瞻卬》七章，三章章十句，四章章八句。此刺幽王嬖褒姒致亂之詩。而《序》謂「凡伯作」，則未有考。曹氏粹中曰：「凡伯作《板》詩在厲王末，至幽王大壞時七十餘年矣，決非一人，猶家父也。」然亦不必辯。唯《集傳》謂「刺幽王嬖褒姒任奄人以致亂」，姚氏譏之，以爲「褒姒實有其人，實由以致亂。今以奄人與褒姒並舉爲言，然則何人乎？」使晦翁聞之，亦無以爲對。蓋詩雖以婦寺連言，不過女寵內侍因緣爲奸，故帶言之，非所重也。倘使女寵無實可指，則奄人與嬖妾並舉，亦自無妨。今褒姒既

有其人，而奄人不過虛以對之，其可乎哉？且詩極言女禍之害，以爲亂自婦人，匪由天降。曰「傾城」，曰「長舌」，曰「厲階」，可謂窮形盡相，不遺餘力矣。而奄寺則末句偶一及之，豈可據以爲言耶？又詩之尤爲痛切者，在「人之云亡，邦國殄瘁」二語，而諸家多易忽之，真不可解！夫賢人君子，國之棟梁，耆舊老成，邦之元氣。今元氣已損，棟梁將傾，此何如時耶？蓋詩必有所指，如箕子、比干之死與奴。故曰「人之云亡」而「邦國殄瘁」也。倘使其人無足重輕，雖曰「云亡」，又何足殄人邦國也耶？惜乎無可考耳，然而痛矣！

【眉評】「三章」極力描寫女禍，可謂不留餘力。【五章】言之慘然。【七章】猶望其補救於後，忠厚之至。

【集釋】「填」，集傳：「填，舊說古塵字，又久也。」【厲】亂也。【療】病也。【蠹賊】害苗之蟲也。【疾】害也。【夷】平也。【屈】極也。【罟】網也。【反】覆也。【收】拘也。【說】音脫，赦也。【哲婦】指褒姒也。【懿】美也。【桑扈】惡鳥也。【長舌】集傳：「長舌，能多言者也。」姚氏際恆曰：「長舌，猶言長于舌，指其善爲譖言。故下曰『譖始竟背』，非謂多言也。譖言豈必在多乎？此正指譖申后、廢太子事，故曰『維厲之階』。」【匪教匪誨】，謂不待教誨而能爲譖亂者，惟婦與寺。【集傳】毫末不明。【鞠】窮也。【伎】害也。【忮】變也。【譖】不信也。【竟】終也。【背】反也。【惡】惡也。【賈】居貨者也。【三倍】獲利之多也。【刺】責也。姚氏際恆曰：「天何以刺？何神不富？」鄭氏曰：「王之爲政既無過惡，天何以責王見變異乎？神何以不福王而有災害也？」較【集傳】爲明。【介狄二句】集傳：「言必將有夷狄大患，今王舍

之不息，而反以我之正言不諱爲忌，何哉？〔罔〕咎也。〔優〕多也。〔幾〕近也。〔霽沸〕泉湧貌。〔橙

泉〕泉正出者。〔藹藹〕高遠貌。〔鞏〕固也。

【標韻】惠八舞屬同聲十卦同通韻 收十一尤聲同本韻 田一先人十一真通韻 罪十賄罪同本韻 奪七曷說音

脫同。本韻 城八庚城同本韻 鴟四支階九佳通韻 天先人真通韻 誨十一隊寺四支通韻 忒十三職背隊

極職惡、識、鐵並同叶韻 刺真富二十六宥忌實類、瘁並同叶韻 優尤憂同本韻 幾五微悲支通韻 深十二侵

今同本韻 先天同本韻 後二十五有鞏二應後有叶韻

### 召旻 刺幽王政由內亂也。

旻天疾威，天篤降喪。殄我饑饉，民卒流亡。我居圉卒荒！一章天降罪罟，蝥賊內訌。昏  
椽靡共，潰潰回遘，實靖夷我邦。二章皋皋訛訛，曾不知其玷。兢兢業業，孔填不寧，我位  
孔貶。三章如彼歲旱，草不潰茂，如彼棲苴。我相此邦，無不潰止。四章維昔之富不如時，  
維今之疚不如茲。彼疏斯稗，胡不自替？職兄斯引。五章池之竭矣，不云自頻。泉之竭  
矣，不云自中。溥斯害矣，職兄斯弘。不裁我躬！六章昔先王受命，有如召公，日辟百國  
里。今也日蹙國百里。於乎哀哉！維今之人，不尚有舊！七章

右《召旻》七章，五章章五句，二章章七句。姚氏際恆曰：舊謂四章，章五句；三章，章七句。今正之。從其說。此詩  
命名，蘇氏云：「因其首章稱『旻天』，卒章稱『召公』，故謂之『召旻』，以別『小旻』而已。」然亦不能無意

焉。陳氏傳良曰：「周南」係於周公，「召南」係於召公，豈非化之盛者必有待乎二公也？至於「風」之終係以「邇」，「雅」之終係以「召」，豈非化之衰者必有思乎二公耶？作者雖未必其如是，而編「詩」者豈無意於其間哉？唯序云：「旻，閔也，閔天下無如召公之臣」，殊穿鑿不成文理。「辨說」譏之，是已。而「集傳」云：「此刺幽王任用小人，以致饑饉侵削之詩。」姚氏又以爲「涉泛，無著落」。蓋孟賊仍指褒姒，故曰「內訌」也。然「昏極」以下，有曰「實靖夷我邦」，又似非專主褒姒爲言。大凡朝政之亂，無不出內以及外。況幽王嬖寵褒姒，而褒姒又工於讒譖，爲厲之階。則一時小人「臯臯」說說，因緣倖進，乘隙而弄國家之柄者，又豈少哉？故上章「哲婦傾城」已明刺褒姒，則此章之「昏極」「回遹」者，不定指褒姒左右也，然亦未有不內訌而成者。「孟賊」句特溯其原耳，豈可執是以爲主耶？至謂「凡伯作」，已見上篇，不再辯。

【眉評】「五章」長句甚兀異，篇中多以此見姿態。然在「大雅」中實爲變調。文章風會，日趨愈下也。

【集釋】「篤」厚也。「瘼」病也。「圉」邊陲也。「訌」潰也。孔氏穎達曰：「以訌字從言，是爭訟相陷，故至潰敗。」胡氏一桂曰：「小人之害在內，孟賊之害稼亦在內，故曰內訌。」「昏極」「昏亂極喪之人也。」「共」與恭同。一說與供同，謂共其職也。「潰」潰亂也。「回遹」邪僻也。「靖」治也。「夷」平也。「臯臯」「爾雅疏」：舍人曰：「臯臯，不治之貌。」「說說」蘇氏轍曰：「說說，多讒謗也。」「玷」缺也。「填」久也。「潰」姚氏際恆曰：「潰茂」及「潰止」之潰，皆訓散亂義。曹氏曰：「草散亂則茂盛，故歲旱無雨澤，則草不潰茂。」舊以上潰字訓遂，下潰字訓亂，非矣。「棲苴」「集傳」：棲苴，水中浮草棲於木上者。朱氏善

曰：歲之旱，則草之生於谷中且不能以遂長，況其棲於木上者，安得而不枯槁乎？國之亂，則民優於財用者，且不能以自給，況其窮而無告者，安得而不流亡乎？是以「我相此邦」，無不潰亂者也。〔時〕是也。〔疾〕病也。《集傳》：言昔之富未嘗若是之疾也，而今之疾又未有若此之甚也。〔疏〕癘也。〔裨〕則精矣。〔替〕廢也。〔兄〕悅同。〔引〕長也。《集傳》：彼小人之與君子，如疏與裨，其分審矣。而易不自替以避君子乎，而使我心專爲此故，至於愴愴引長，而不能自己也？蘇氏轍曰：疏，癘也。裨，精也。君子與小人精粗之不同，可指而知也。小人易不自替以避君子，而乃自任以長此亂也？案：蘇說較《集傳》爲明，故再錄之。〔池竭一章〕《集傳》：頻，厓。溥，廣。弘，大也。又曰：池，水之鍾也。泉，水之發也。故池之竭由外之不入，泉之竭由內之不出。言禍亂有所從起，而今不云然也。此其爲害亦已廣矣。是使我心專爲此故，至於愴愴日益弘大，而憂之曰：「是豈不裁及我躬也乎？」〔先王〕文、武也。〔召公〕康公也。〔辟〕開也。〔蹙〕促也。〔舊〕舊臣也。曹氏粹中曰：當是時去宣王中興之日不遠，其舊臣故老無尚存者乎？

【標韻】喪七陽亡、荒並同本韻 訂三江邦同本韻 玷二十八臻貶同本韻 茂二十六宥止四紙叶韻 時四支茲同本韻 裨十卦替八霽通韻 引十二震無韻未詳何叶 頻十一真中一東弘、躬並同叶韻 里紙里同舊宥叶韻

以上《蕩之什》，凡十一篇。案：是什除首尾刺幽、厲數篇外，餘皆宣王中興詩。合觀《小雅》宣王諸什，其中

興事可概言焉。始則安集流民，而有《鴻鴈》之什，繼則爲民積旱，而成《雲漢》之章。蓋初承厲王後，民散久矣，故以安民爲本。迨至《無羊》，司牧攷成，國富兵強。然後北伐獯豸，以其逼近京邑，害先去其太甚也。於是南服蠻荆，



以其形踞江漢，威加無容暫緩也。所以六月甫咏，即歌采芣，二詩實相去未遠耳。南北之患既除，及加兵遠夷，討其不庭。故分兵二路，遠伐淮、徐。一命召公，出江漢，襲取淮揚，斷夷右臂；一自將，循淮流，直搗徐國，深入腹心。故江漢、常武二詩，又同時並咏。蓋至是而四夷賓服，中興勢成，可以復文、武、成、康舊矣。然猶未也。韓侯來朝，因而封之，使爲北衛。申伯入謝，厚以餞之，用式南邦。而且命仲山甫築成于齊，以懷柔諸侯。然後大會東都，近田畿內，有廢必興，無墜不舉。而更勸于視朝，問夜何其。不唯賢臣輔治于外，更達哲后佐理其中，而欲世之不治也得乎？而未已也。鶴鳴則求賢山林，白駒則送客空谷，無非好賢慕士，傳爲美談（一）。故能收功一世，著績千秋。乃未幾而微調失常，敗績千畝。析父受怨，王室遂衰。加以嗣君不德，女戎召亂，驪山烽火，焚及鎬京。王轍既東，宗周不復。蓋治亂之機，捷於影響矣。君子讀詩至此，能無感慨於其際歟！

#### 校記

〔一〕「白駒」，原作「雉駒」。詩僅「白駒」有「在彼空谷」之句，且方氏於「白駒」云：「放驢士還山也。」據改。

## 詩經原始卷之十六

### 頌一

姚氏曰：「大序」云：「頌者，美盛德之形容，以其成功告于神明者也。」孔氏曰：「此特釋『周頌』耳，魯、商之『頌』則異于是。『商頌』雖是祭祀之歌，祭其先王之廟，述其生時之功，正是死後頌功，非以成功告神，其體異于『周頌』也。『魯頌』主咏僖公功德，又與『商頌』異也。」又曰：「『魯頌』之文尤類『小雅』，比于『商頌』，體制又異。」蘇氏曰：「商、周二『頌』皆用以告神明，而『魯頌』乃用以善禱。後世文人獻頌，特效魯耳，非商、周之舊也。」按孔、蘇二氏說『周、魯、商頌』之異，可謂明了矣。然愚謂此特言頌之用耳，非深知乎頌之體者也。章氏潢曰：「頌有頌之體，其詞則簡，其義味則雋永而不盡也。如『天作』與『雅』之『綿』，均之美大王也；『清廟』、『維天之命』與『雅』之『文王』，均之美文王也；『酌』、『桓』與『雅』之『下武』，均之美武王也；試取而同誦之，同乎？否乎？蓋雅之詞俱昌大，在頌何其約而盡也！頌之體於是乎可識矣。『敬之』、『小毖』雖非告成功，而謂之爲雅，可乎哉？魯之『有駟』、『泮水』則近乎風，『閟宮』與商之伍篇則皆近乎雅，而其體則頌也，故謂爲『變頌』也亦宜。」又曰：「宗廟朝廷均有頌也，大約主於祭祀而交神明，頌之道也。敷揚先王之盛德成功，

固不如雅詩之詳盡。然聞清廟之頌，「顯相」、「多士」能無感乎？聞維天之命，「曾孫」能無感乎？聞烈文、天作，「辟公」與其子孫，能無感乎？「於乎前王不忘」之音一入于耳，而思及前王者不容已也。「噫嘻成王」之旨一惕於衷，而思及成王者不容已也。寓悚動儆惕之意於登歌祝頌之間，使在廷、在廟之人莫不精白一心，以對越祖考，洋洋乎如在其上，如在其左右焉。則先人之盛德成功，固已洋溢於升歌之表，而人神懽洽，幽明貫通，此頌之所以爲頌也。書·大傳曰：「周公升歌清廟，苟在廟中嘗見文王者，愀然如復見文王焉。」以此意會通諸頌，頌豈有餘蘊哉？此辨頌體與頌之功用，可謂至矣。然尚從詞意辨之而已，非從聲音以別白之也。案·禮·樂記曰：「清廟之瑟，朱絃而疏越，壹倡而三歎，有遺音者矣。」此真善言頌音也。又曰：「寬而靜、柔而正者，宜歌頌；之音作，而民肅敬；寬裕、肉好、順成和動之音作，而民慈愛。」又曰：「寬而靜、柔而正者，宜歌頌；廣大而靜，疏達而信者，宜歌大雅。」此又善辨乎雅、頌之音也。大約雅音宏而肆，頌音沉而柔。知乎此，則頌之體與用與音，無不瞭然於心矣。又頌之於四序近乎冬。冬之爲氣也，收斂而閉藏，其發而爲聲也，沖融而雋永，肅穆而沉靜。故頌之音象之。讀者苟於此而熟復涵泳，體諸心復會以神，又何患頌體之難辨哉？

## 周頌上

蘇氏曰：「周頌皆有所施於禮樂，蓋因禮而作頌，非如風、雅之詩有徒作而不用者也。文

武之世，天下未平，禮樂未備，則頌有所未暇。至周公、成王，天下既平，制禮作樂，而爲詩以歌之，於是頌聲始作。鄭氏曰：「周頌者，周室成功致太平德洽之詩。其作在周公攝政，成王卽位之初。姚氏駁之，以爲頌有武王時作者，有在昭王時作者。必以此拘釋詩，所以多滯也。信然。」

### 清廟 祀文王也。

於穆清廟，肅雝顯相。濟濟多士，秉文之德，對越在天，駿奔走在廟。不顯不承，無射于人斯！

右「清廟」一章，八句。「序」謂「周公既成洛邑，朝諸侯，率以祀文王焉。」「集傳」從之，姚氏以爲謬。蓋「洛誥」之文有曰「則禋于文王、武王」，又曰「文王騂牛一，武王騂牛一」，是洛邑既成，兼祀文、武。此詩專祀文王，故不可通。而劉氏璣曰：「書言『烝祭文、武』，而此樂歌止頌文王之德者，父子並祭，統於尊也。」則又曲爲之說，於理殊未當也。然此自祀文王之樂歌，不必執泥洛成告廟之言。且詩中亦無此意，安見其必爲洛邑祭乎？至謂「朝諸侯，率以祀文王」，則尤謬。蓋本「明堂位」周公踐天子位，朝諸侯以爲言耳。姚氏闢之，以爲「誣妄」，是已。「明堂位」本漢儒僞書，烏足以爲據，而乃以之誣周公耶？據「序」言，是周公之寃且未白，又安能以定文王之樂？無怪其滯礙難通也！胡氏一桂曰：「此詩只第一句說文王之廟，餘皆就祀文王者身上說。雖未嘗明頌文王之德，自有隱然見於辭意之

表者。何則？文王往矣，今助祭之公侯執事之人所對越者，已不見其有顯然之迹；所奔走者，亦不見其有可承之實。而人心之敬恭嚴事者無厭射乃如此。於此可以見盛德至善，淪肌浹髓，沒世自有不能忘者矣。」愚謂此正善於形容文王之德也，使從正面描寫，雖千言萬語何能窮盡？文章虛實之妙，不於此可悟哉？

【集釋】「於」歎辭。「穆」深遠也。「清」姚氏際恆曰：「清廟，鄭氏曰：『祭有清明之德者之宮也；天德清明，文王象焉。』此釋『清廟』是。自杜預始以爲『清靜之廟』。『集傳』仍之，釋清爲清靜。夫清與靜其義各殊，安得以靜釋清乎？『集傳』于下篇『維清』，又釋清爲『清明』，何居？『肅』敬也。『離』和也。『顯』明也。『相』助也，謂助祭之公卿諸侯也。『濟濟』姚氏際恆曰：「濟濟，整齊之意。『集傳』釋爲衆，亦非也。于『棫樸』，『濟濟辟王』則說不去，又釋爲『容貌之美』，何居？然『濟濟辟王』之『濟濟』，亦只是儀度整齊，非容貌之美也。皆誤。『越』於也。『駿』大而疾也。『不』姚氏際恆曰：「不，皆作丕。『承』尊奉也。『斯』語辭。」

【標韻】無韻姚氏際恆曰：案『頌』爲奏樂所歌，尤當有韻。今多無韻者，蓋謂一句爲一章，一人歌此句，三人和之，所謂「一唱三嘆」，則成四韻。愚謂此說是已。然「一唱三嘆」，恐不必如是泥解，即一人唱，一人和，便已成韻，未爲不可也。其說近是，存之。

## 維天之命 祀文王也。

維天之命，炤起。於穆不已。緊接。於乎不顯，文王之德之純！假以溢我，乘勢順折而下，省却無數

筆墨。我其收之。駿惠我文王，曾孫篤之。回斡文王句，單煞。

右《維天之命》一章，八句。此詩解者又如聚訟。序謂「太平告文王」之非，固不足辯。《集傳》與鄭《箋》本《中庸》以說理釋《詩》，義既非詩之本旨，卽姚氏本歐、蘇說，謂「天命文王以興周，文王中道而崩，天命久而不已，王其後世，乃大順文王之德，更以溢及于我，我今其承之，以大順文王之德不敢違，而爲曾孫者益宜篤承之也」。亦不知其何所謂。「天命文王興周」是已，文王豈「中道而崩」哉？「王其後世」之「王」爲誰？「溢及于我」之「我」又爲誰？都不可解。愚謂此詩並非說理，命字亦不可訓爲道字。其意若曰：自來曆數，維天所命，而天命至深且遠，又恆悠久不息。唯「文王之德之純」，足以誕膺天命而大順王業。乃王身未及受命，而使其澤洋溢及我後王。我後王其承受之，以大順我文王之德而不敢違。則爲之曾孫者宜何如篤承之也？然天命於穆，及「文王之德之純」，此中自有理在，故《中庸》引之以釋至誠無息之道。蓋《詩》自《詩》，而引者自引也。兩義原不相涉，說者何得引以釋《詩》？姚氏之言未爲無見，惜其所解又不明晰，且謂周公之作必不說理，亦好爲排擊者之過耳。茲並錄其說於後，使覽者自詳焉。

【附錄】姚氏際恆曰：此篇文氣一直下，謂天命文王以興周，文王中道而崩，天命久而不已，王其後世，乃大順文王之德，更以溢及于我，我今其承之，以大順文王之德不敢違，而爲曾孫者益宜篤承之也。歐、蘇二氏皆如此解。上四句猶之「周雖舊邦，其命維新。有周不顯，帝命不時」，「天監在下，有命既集」，「有命自天，命此文王」諸語也。自《中庸》引用爲說理之辭，于此詩上二句曰，「蓋曰天之所以爲天

也」，下二句曰：「蓋曰文之所以爲文也，純亦不已」，將「天命」與「文德」說作兩事，謂「文王之純」與「天之不已」無異，是與天爲一。按「天命」命字，必不可作實字用，固已難通，且前古之人從未敢以人比天，此自後世意見。《中庸》引《詩》，斷章取義，豈可據以作解？《中庸》亦在《禮記》中，凡《禮記》諸篇之引《詩》者，可盡據以作解乎？前古之人又未嘗深刻談理，亦起於後世。必以「天命」與「文德」對，「於穆」與「不顯」對，「不已」與「純」對，有如是之深刻談理者乎？自鄭氏依《中庸》解《詩》，然于「天命」命字難通，乃訓爲「道」。嗟乎，《詩》之言「天命」者多矣！何以彼皆不訓道而此獨訓道乎？歐、蘇爲前宋之儒，故尚能闢鄭，不從其說，猶見《詩》之真面目。後此之人，陷溺理障，卽微鄭亦如是釋矣！況又有鄭以先得我心，于是毅然直解，更不復疑。至今天下人從之，乃盡沒《詩》之真面目，可嘆哉！「假以溢我，我其收之」，《左》襄二十七年引《詩》曰：「何以恤我，我其收之」，杜預以爲「逸詩」。然卽此二句，非逸詩也。但古人引《詩》，原多異字，《左傳》、《禮記》皆然，不可爲據，自當依本詩作解，不必惑于所引詩也。假，使也。溢，歐陽氏曰「及也，如水溢而旁及也」，其解亦自明順。《集傳》曰：「何之爲假，聲之轉也。」按，何、遐爲聲之轉，不聞何，假也。又曰：「恤之爲溢字之訛也。」據傳以改經，失理甚矣！且不明標《左傳》而若自爲說者，更奇。《烝民》，宣王時之詩也，故予謂漸開說理之端。此詩周公作，豈亦說理乎？故《中庸》之說斷乎不可用于此詩也。

【眉評】首二句從天命總起，下乃接人文王，一氣直下。如曰皇天無親，惟德是輔之意。天與文非兩平對也。《集傳》依《中庸》，以文與天對作一截，假以下作一截，殊非語氣。

【集釋】「命」猶運也。《集傳》作道，非。「純」誠也。「假溢」已見姚說。「收」受也。「駿」大也。「惠」順也。「曾孫」後王也。「篤」厚也。

【標韻】無韻說見前

### 維清 祀文王也。

維清緝熙，文王之典。肇禋。迄用有成，維周之禎。姚氏以「維清」作句。其言曰：「緝熙敬止，言文王也，故『緝熙文王之典』爲句。若曰『維清緝熙』，則不類矣。且清字爲起韻。」亦通。然清字雖有韻而無著，故不若從舊爲善。

右《維清》一章，五句。古樂既亡，樂章亦不知其何所用。後儒循文案義，率皆臆測，非真知也。此詩本祀文王，而《序》忽云「奏象舞也」，遂啓後人無限疑議。案《象舞》者，象武功之樂而爲之舞也。武王克商有天下，周公作樂，《象》之名曰《大武》。即《下武》詩。凡樂有歌有舞，歌以爲聲，舞以爲容，聲容備謂之奏。容所以象也，故謂之《象》，此《象舞》之名所由來也。然必有大武功若武王然，乃可象之。文王則以文德顯也，夫何《象》爲？雖伐密、伐崇，不無擊刺之事，而豈文王之至歟？是知象文王者，必非一擊一刺之事已也。朱子不用《序》言，誠爲有見。然僅曰「詩中未見奏《象舞》之意」，故不足以服佞《序》者之心。然愚又有疑焉：凡樂有聲有容，是武功固可舞，文德亦未嘗不可舞。《序》云「《象舞》」，非云「象武」，安知其言卽爲武功乎？季札觀樂，「見舞《象箭》、《南籥》者」，杜預云：「文王樂也。」又



「見舞<sub>△</sub>韶<sub>△</sub>箭<sub>△</sub>者」，杜預云：「舜樂也。」是<sub>△</sub>象<sub>△</sub>有<sub>△</sub>「箭」，<sub>△</sub>韶<sub>△</sub>亦有<sub>△</sub>「箭」。說者謂以竿擊人曰箭，然則執箭以舞猶干舞也，執箭以舞即箭舞也。文王伐密、伐崇，爲周室武功之始，固可象而爲武，豈舜之揖讓垂裳，無爲而治者，亦有武功之可象耶？舞<sub>△</sub>韶<sub>△</sub>箭<sub>△</sub>者既非象武功，則舞<sub>△</sub>象<sub>△</sub>箭<sub>△</sub>者亦非象武功也明矣。諸儒讀<sub>△</sub>詩<sub>△</sub>，泥<sub>△</sub>「舞<sub>△</sub>爲<sub>△</sub>武」，故致疑議滋生，極爲可笑！此詩首四字曰「維清緝熙」，此正文王之德之盛。非清無以立熙之本，非熙亦無以成清之功。文王之典，既本清明之德以出之，而日新月盛，時時繼續，以底乎熙明而益著其效，則王業之成，實肇乎此。遂至於後而有成，謂非周家之禎祥不得也。故<sub>△</sub>象<sub>△</sub>舞<sub>△</sub>者，象其清明之德而爲舞耳，非象其刺伐之功而爲樂也。故<sub>△</sub>禮<sub>△</sub>記<sub>△</sub>·文王世子<sub>△</sub>曰：「下管<sub>△</sub>象<sub>△</sub>，舞<sub>△</sub>大武<sub>△</sub>。」<sub>△</sub>武<sub>△</sub>本<sub>△</sub>武<sub>△</sub>詩<sub>△</sub>，<sub>△</sub>象<sub>△</sub>即此篇，兩不相混，何至指<sub>△</sub>舞<sub>△</sub>而爲<sub>△</sub>武<sub>△</sub>耶？至<sub>△</sub>仲尼<sub>△</sub>燕居<sub>△</sub>曰：「下管<sub>△</sub>象<sub>△</sub>，<sub>△</sub>武<sub>△</sub>。」蓋文、武二樂並題耳。故下又云：「升歌<sub>△</sub>清廟<sub>△</sub>，示德也；下而管<sub>△</sub>象<sub>△</sub>，示事也。」事即典也。可見<sub>△</sub>象<sub>△</sub>自<sub>△</sub>象<sub>△</sub>，<sub>△</sub>武<sub>△</sub>自<sub>△</sub>武<sub>△</sub>，非可混而爲一者也。蓋<sub>△</sub>象<sub>△</sub>者，文王之樂；<sub>△</sub>武<sub>△</sub>者，武王之樂，皆樂中之舞者。然舞亦必有詞，詩即其詞也。<sub>△</sub>序<sub>△</sub>於此篇曰：「奏象舞也」；於<sub>△</sub>武<sub>△</sub>曰：「奏大武也」，其授受必有所自。不然，詩無奏<sub>△</sub>象<sub>△</sub>舞<sub>△</sub>意，何以知其爲「奏<sub>△</sub>象<sub>△</sub>舞<sub>△</sub>」耶？<sub>△</sub>集傳<sub>△</sub>既不深考，故孔<sub>△</sub>疏<sub>△</sub>亦時有出入，即諸儒之違<sub>△</sub>序<sub>△</sub>者亦未能洞見其所以然，但以爲自古而存之。若姚氏又攻之不遺餘力，皆非真知<sub>△</sub>詩<sub>△</sub>義者也。然詩之用，則祀文王也，故但曰「祀文也」云爾。

【附錄】姚氏際恆曰：「小序謂『奏象舞』，妄也。朱仲晦不從，以爲詩中無此意，是已。然未嘗深考而明辨之，則何以使後人不疑乎？今按其說，莫詳於孔疏矣。孔疏本非闢<sub>△</sub>序<sub>△</sub>，今節錄其說可爲闢<sub>△</sub>序<sub>△</sub>。」

用。其曰：「序者於此云『奏象舞』，於武之篇不可復言『奏象』，故指其樂名，言『奏大武』耳。其實大武之樂亦爲象，故禮記文王世子明堂位祭統皆云『升歌清廟，下管象』，象與清廟相對，俱是詩篇，故明堂註『象』，謂周頌武也。謂武詩爲象，明大武之樂亦爲象矣。但記文於管之下別云『舞大武』，謂武詩則簫管以吹之，武樂則干戚以舞之，所以並設其文。故鄭併武解其意，於文王世子註云『象』，周武王伐紂之樂也，以管播其聲，又爲之舞，於祭統註云『管象』，吹管而舞武，象之樂也，皆武詩、武樂並解之也。必知彼象非此篇者，以彼三文皆云『升歌清廟，下管象』，若是此篇，則與清廟俱是文王之事，不容一升一下；今清廟則升歌，象則下管，明有父子尊卑之異。文王世子於升歌、下管之後覆述其意，云『正君臣之位，貴賤之等，而上下之義行焉』，言君臣上下之義，明象非文王之事，故知『下管象』者，謂武詩。但序者避此象名，不言象耳。按孔說謂禮記諸篇『下管象』皆指武詩甚明。蓋象者，象武王之武功也。且謂武詩爲『象武』，可也，亦不得謂之『象舞』。蓋用以爲舞，此後世事，當時原詩安得即以『舞』名乎？是武詩且不可謂之『象舞』，何況維清之詩於象舞何涉耶？諸儒好穿鑿者誤信序『象舞』之說，謂禮記諸篇所言象者即此篇，反以鄭註爲武詩及孔疏爲非，此悞序之過也。鄭註禮記皆是，獨於此篇下云『象舞』，象用兵時刺伐之舞，武王制焉，似以用兵時制伐屬文王者，謬矣。文王雖未嘗無武功，而武功豈足以盡文王文王之德至矣，作樂象功，乃獨象其刺伐耶？又仲尼燕居云『下管象武』，則直言武，此尤明

證。而說者猶以「下管象」爲句，「武」夏簫序與「爲句」，斯誠何心哉！又墨子曰：「武王因先王之樂，命曰『象武』」，董子曰：「武王作『象樂』」，則「象」自屬「武」詩，而不可混入「維清」之詩明矣。案：此亦誤認「舞」爲「武」耳。其意謂武乃可舞，故武乃可象也。殊不知文德亦可象，則文德亦可舞。若謂文德不可象而爲舞，則舜之「韶」又何舞耶？凡樂有聲則有容，故有歌必有舞，奚獨「大武」之樂乃可舞者？「左傳」在董子之前，其言當更可信。至「禮記」：「下管象、武」乃二樂並言，解者以「武」屬下句，自是不通，而以「象武」爲一名，又豈可通？何不讀下文「下而管象」以示事也」之句耶？

【集釋】「清」清明也。「緝」續也。「熙」明也。「肇」始也。「禋」祀也。「迄」至也。

【標韻】裡十一真。成八庚。同通韻案：上「清」字本一頓，與下諸韻叶，唯姚氏竟以「維清」作句者則非。

### 烈文 成王戒助祭諸侯也。

烈文辟公，錫茲祉福，惠我無疆，子孫保之。無封靡于爾邦，維王其崇之。念茲戎功，繼序其皇之。無競維人，四方其訓之。不顯維德，百辟其刑之。於乎前王不忘！

右「烈文」一章，十三句。「小序」謂「成王即政，諸侯助祭」。「集傳」謂「祭於宗廟而獻諸侯助祭之樂歌」。姚氏謂「成王或可，但不必即政耳」。今案詩「念茲戎功」，則是成王初年，所與祭者皆與前王定天下之諸侯也，故曰「戎功」。若槩言「諸侯助祭」，則何大功之有？是序義又較「集傳」爲強矣。唯詩

意上下若成兩截，歐陽氏分「繼序其皇之」以上爲君敕臣之辭，「無競維人」以下爲臣戒君之意。姚氏駁之，以爲一詩不可作兩人語。而自謂「此詩當是周公作，以爲獻助祭諸侯之樂歌，而未因以勉王也」。夫一詩不可作兩人語，而一詩又豈可勉兩人乎？且祭禮賓三獻尸之後，主人酌酒獻賓，因以有歌。此時之歌自當以主人爲主，主人爲誰？成王也。成王既爲祭主，又何煩周公代爲獻賓而因以勉王耶？此皆不通之論也。蓋詩起四句乃勞諸侯以助祭之意，言王祭而受福，以及其子孫，皆諸侯相助以成之。中四句則戒辭而兼以慰意也，戒則戒其無封而無靡，無靡則用之有節，無封則取之有制，慰則慰其先人既夾輔王室以有功，其後嗣亦將世繼屏藩而昌大，皆專以對諸侯之辭也。後五句忽題先王之所以能感激人心至沒世而不忘者，實由其生前之能得人，能務德也。以此互相教勉，蓋不唯有望諸列辟，亦將以自勵耳。此君臣交儆之意，而豈一詩兩語，又豈一詩兩勉之說乎？古人說「詩」，正意既畢，言外必有餘波層出不窮，乃能使人領畧不盡。試思此詩若無後段，則不過戒諸侯辭耳，有何意味？解者不知，妄生別議，豈能得詩中妙旨哉？

【眉評】末段忽提先王所以能使後人不忘之故，君臣交相勉勵，神味尤覺無窮。

【集釋】「烈」光也。「辟公」諸侯也。「封靡」封，專利以自封殖也。靡，侈汰也。「崇」尊尚也。「戎」大也。「皇」大也。「人」人，通也。一說賢人也，亦通。

【標韻】公一東 疆七陽 邦三江 崇東功同皇陽轉韻 人十一真 訓十三問 刑九青 叶韻 王陽忘同本韻

天作 享岐山也。

天作高山，大王荒之。彼作矣，文王康之。彼徂矣岐，有夷之行，子孫保之。

右「天作」一章，七句。此詩首四句特題大王、文王，其意蓋以大王遷岐爲王業之基，文王治岐爲王業之盛，光前裕後，二君爲大。故「序」以爲「祀先王先公」，似矣。然何以下乃接云「彼徂矣岐，有夷之行，子孫保之」，則又似專重在岐，而非「祀先王先公」之謂也。季明德曰：「竊意此蓋祀岐山之樂歌。案《易·升卦》六四爻曰：『王用享于岐山』，則周本有岐山之祭。」鄭肇敏亦云：「天子爲百神主。岐山王氣攸鍾，豈容無祭？祭，豈無樂章？不及王季者，以所重在岐山，故止挈首尾二君言之也。」愚案：二說頗有見，姚氏亦取之，不似《集傳》但見「大王」字，卽漫以爲「祭大王之詩」。此詩若果爲祭大王，則將置文王於何地？天下斷未有祭其祖而並頌其孫者，亦斷未有兼頌二君而可指爲專祭一王者；況下文並二君亦不之及，詎可曰「此祭大王之詩」乎？讀《詩》如此，何能得其精意？真令人莫解其故！

【集釋】「高山」謂岐山也。「荒」治也。輔氏廣曰：「治荒謂之荒，猶治亂謂之亂也。」《康》安也。「徂」《彙纂》：沈括曰：「《後漢書·西南夷傳》作『彼徂者岐』。」今案彼書「徂」但作「徂」，而引《韓詩·薛君章句》，亦但訓爲往。獨「矣」字正作「者」，如沈氏說。然其注末復云：「岐雖阻僻」，則似又有「徂」意。韓子亦云「彼岐有徂」，疑或別有所據，故今從之，而定讀岐字絕句。姚氏際恆曰：「徂，沈括《筆談》改作「咀」，妄改經文，以就我解，最爲武斷。《集傳》從之，何也？王伯厚曰：「《筆談》引《朱浮傳》作『彼徂者岐』，今按《後漢書·朱浮傳》無此語。《西南夷傳》朱輔上疏曰：『彼徂者岐，有夷之行。』」註云：

「祖，往也。」蓋誤以朱輔爲浮，亦非咀字。案：字義當以咀字爲是，但諸家皆無確證，故難從。不如仍其舊之爲當也。「夷」平也。「行」路也。

【標韻】荒七陽康、行並同本韻 保十九陽無韻不叶

### 昊天有成命 祀成王也。

昊天有成命，二后受之。成王不敢康，夙夜基命宥密。於緝熙，單厥心，肆其靖之。

右「昊天有成命」一章，七句。「序」謂「郊祀天地」，不知何所取義？詩唯首句及天，「二后」下皆言文、武受命，及成王之德。曰「不敢康」，曰「宥密」，曰「緝熙」，而終之以「單厥心」，所以上基天命，續成王業，而能安靖天下者於是乎在。於天地毫不相涉，天下豈有此等祭天地文乎？尚何煩諸儒之紛紛辯論爲哉！《集傳》本歐說，援引《國語》以爲祭成王之詩。蓋依經爲解，辭無紆曲。其說較正，姚氏亦從之而不肯明言，且更引及揚雄、賈誼之言以爲證，其亦費盡無數唇舌矣！何不憚煩若是耶？茲並附錄諸儒之說於後，覽者可以自辨其得失焉。

【附錄】「序」：「昊天有成命」，郊祀天地。鄭氏康成曰：「有成命」者，言周自后稷之生而已有王命也。文王、武王受其業，成此王功，不敢自安逸，早夜始信順天命，行寬仁安靜之政以定天下。孔氏穎達曰：詩，郊祀天地之樂歌也。天地神祇佑助周室，文、武受其靈命，王有天下。詩人見其郊祀，思此二王能受天之命，勤行道德，故述之而爲此歌焉。經之所陳，皆言文、武施行道德，撫民不倦之事也。又曰：

此經不言地，序云地者，作者因祭天地而爲此歌。王者之有天下，乃是天地同助，言天可以兼地，故辭不及地。序知其因此二祭而作，故具言之。又曰：此詩作在成王之初，不得稱成之謚，所言成王，有涉成王之嫌。韋昭云：謂文、武脩己自勤，成其王功，非謂周成王身也。鄭、賈、唐說皆然。是時人有疑是成王身者，故辨之也。杜氏佑曰：周制，禋祀畢獻之後，天子舞六代之樂。若感帝及迎氣，卽天子舞當代之樂。其樂章用昊天有成命也。古制，天子親在舞位。蘇氏轍曰：此詩有「成王不敢康」，而執競有「不顯成康」，世或以爲此言成王誦，康王釗也。然則周頌有康王子孫之詩矣。周公制禮，禮之所及，樂必從之；樂之所及，詩必從之。故頌之施於禮樂者備矣，後世無容易之。且詩曰「成王不敢康，夙夜基命宥密」，又曰「自彼成康，奄有四方」，成王非基命之君，而周之「奄有四方」非自成、康始也。案：以上皆遵序以爲郊祀天地之樂歌者。蓋泥康王以後詩不當次於此間，故改成王二字爲「成其王功，非謂周成王身也」。其說頗紆曲而難通，然正使其能通，而詩所云皆王成功，與天地何與？豈有祭天地不告天地而專頌王成功之理？其謬不言而自見矣。至疑周頌三十一篇不當有康王以後詩，且文公制禮，禋祀大典不可或闕。三代至今，世已遠矣，況經秦火，斷簡遺經，能無錯亂？豈可抱「雅、頌得所」之言，譴古聖樂歌悉有條而不紊耶？後人釋經，總要眼光如炬，照徹上下，不爲舊說所囿，乃能見詩真面。若囿於一偏，或妄逞武斷，均之一失，鮮有當也。集傳：此詩多道成王之德，疑祀成王之詩也。言天祐周以天下，既有定命，而文、武受之矣。成王繼之，又能不敢康寧，而其夙夜積德以承天命者，又宏深而靜密。是能續光明文、武之業而盡其心，故今能安靖

天下，而保其所受之命也。《國語》叔向引此詩而言曰：「是道成王之德也。成王能明文昭，定武烈者也。」以此證之，則其爲祀成王之詩無疑矣。姚氏際恆曰：「小序」謂「郊祀天地」，妄也。《詩》言天者多矣，何獨此爲祀天地乎？郊祀天地不但于成王無與，卽武王亦非配天者，而言二后何耶？漢儒惑其說，宋儒且引此詩以爲合祀之證，其經術之疏謬可知矣。此詩成王自是爲王之成王。《國語》叔向曰：「道成王之德，及武王能明文昭，定武烈」，此一證也。賈誼《新書》曰：「后，王也。二后，文王、武王也。成王，武王之子，文王之孫也。文王有大德而功未既，武王有大功而治未成，及成王承嗣，仁以蒞民，故稱『昊天』焉。」此一證也。揚雄謂「康王之時，頌聲作于下」，班固謂「成、康沒而頌聲寢」，此一證也。然則毛、鄭輩必以成王作「成其王」解，固泥于凡「頌」皆爲成王時周公作耳。案《集傳》說《詩》，鮮有如是通明圓當者。姚氏最攻《集傳》，至此亦不能不用其說。然而不及《集傳》者何哉？又黃氏震曰：「古注、晦菴凡二說，在學者詳之。」愚謂晦庵是，古注直可刪耳。

【眉評】姚氏曰：「通首密鍊。」

【集釋】「二后」文、武也。「成王」名誦，武王子也。「基」《集傳》：「基，積累於下，以承藉乎上者也。」「有」宏深也。「密」靜密也。何氏楷曰：「有，《說文》云：『寬也。』密當依《新書》作謹，《說文》云：『靜語也。』一曰無聲也。」《禮·仲尼燕居》篇：「孔子曰：『夙夜基命宥密。』無聲之樂也。」今案，密爲謹，乃無聲之義。「靖」安也。

【標韻】無韻



我將 祀帝于明堂，以文王爲之配也。

我將我享，維羊維牛，維天其右之。儀式型文王之典，日靖四方，伊嘏文王，既右饗之。我其夙夜，畏天之威，于時保之。

右「我將」一章，十句。「小序」曰：「祀文王于明堂也。」蓋本「孝經」：「宗祀文王于明堂，以配上帝」之文，其說自無可議。然詩以祀帝爲主，文王配焉，自當云「祀帝于明堂，而以文王配之也」。若「序」言，是專祀文王，而無所謂配天之說矣。程子曰：「萬物本乎天，人本乎祖，故冬至祭天而以祖配之，以冬至氣之始也。萬物成形於帝，而人成形於父，故季秋享帝而以父配之，以季秋成物之時也。」陳氏曰：「古者祭天於圓丘，埽地而行事，器用陶匏，牲用犢，其禮極簡。聖人之意以爲未足以盡其意之委曲，故於季秋之月有大享之禮焉。天卽帝也。郊而曰天，所以尊之也，故以后稷配焉。后稷遠矣，配稷於郊，亦以尊稷也。明堂而曰帝，所以親之也，以文王配焉。文王親也，配文王於明堂，亦以親文王也。尊尊而親親，周道備矣。然則郊者古禮，而明堂者周制也。周公以義起之也。」東萊呂氏曰：「於天維庶其饗之，不敢加一辭焉，於文王則言儀式其典，『日靖四方』。天不待贊，法文所以法天也。卒章惟言『畏天之威』，而不及文王者，統於尊也。畏天所以畏文王也，天與文王一也。」合觀數說，是詩無餘蘊矣。「集傳」備引之篇末，旨深哉！

【眉評】首三句祀天，中四句祀文王，末三句則祭者本旨，賓主次序井然。觀此，則上章並非天地合祭並

顯然矣。

【集釋】「將」奉也。「享」獻也。「羊牛」王氏志長曰：案彭山季氏云：「《周禮》：羊人曰：『積其羊牲』，謂積柴祭天，則用羊實柴也。先柴而後獻，故『維羊』文在『維牛』之上。將者，奉羊以共柴。饗者，獻牛以共祀。理或然歟？」「右」古人尚右，故以右爲尊。朱氏公遷曰：明堂之位，帝居中，文王居西南，主皆西坐東向，東左西右，則饗在左而神在右矣。「儀式刑」皆法也。「嘏」錫福也。

【標韻】牛十一尤右二十五有叶韻 方七陽饗二十二養叶韻 威五微之四支通韻

### 時邁 武王巡守告祭柴望也。

時邁其邦，昊天其子之。實右序有周，薄言震之，莫不震疊。懷柔百神，及河喬嶽。允王維后！明昭有周，式序在位，載戢干戈，載櫜弓矢。我求懿德，肆于時夏。允王保之！

右《時邁》一章，十五句。姚氏本何玄子，分「明昭有周」以下爲第二章。今案之首二句若總提，下乃分二段。若照何本，不惟章法長短不齊，即文氣亦覺繁縷不順，故不若從舊爲當。此詩自宜從《序》爲是。陳氏大猷曰：「天下非一人所能獨

理，於是有封建諸侯。不能保其長治，於是有巡守。巡守所以維持封建也。」案此乃古常制，若詩則實武王初克商後，告祭柴望朝會之樂也。故首二句云：「時邁其邦，昊天其子之。」若不敢必天之以我爲子也者，蓋初有天下之辭耳。下乃接云若果「實右序有周」也，則使我治人，而人無不震疊，使我事神，而神莫不懷柔，乃信君道之克盡。又言果「明昭有周」也，則慶讓黜陟而刑賞行，偃武修文而好尚

定，乃益見天命之有常。故《春秋傳》曰：「昔武王克商，作《頌》曰『載戢干戈』。」而《外傳》又以爲「周文公之《頌》」，則此詩爲周公作無疑矣。然《外傳》又云：「金奏《肆夏》、《樊》、《遏》、《渠》，天子以饗元侯也。」韋昭注云：「《肆夏》一名《樊》，《昭夏》一名《遏》，《納夏》一名《渠》，卽《周禮》《九夏》之三也。」呂叔玉云：「《肆夏》，《時邁》也。《樊》、《遏》，《執競》也。《渠》，《思文》也。」夫以此詩爲《肆夏》，特詩有「夏」之語耳。《肆夏》，《集傳》謂陳布懿德于中夏，鄭氏謂陳其功于是，大而歌之。訓義各別，姑不具論。案《周禮》：鐘師「凡樂事以鐘鼓奏《九夏》」。杜子春曰：「王出入，奏《王夏》；戶出入，奏《肆夏》；牲出入，奏《昭夏》；四方賓來，奏《納夏》；臣有功，奏《章夏》；夫人祭，奏《齊夏》；族人侍，奏《族夏》；客醉而出，奏《陔夏》；公出入，奏《騶夏》。」既以《時邁》爲《肆夏》，而《時邁》之文乃周武王初有天下朝祭之文，固不可以之饗元侯，亦與戶出入無干，何以奏爲？至《思文》之奏于四方賓來，尤爲無理，其可信乎？故《詩》至今日，第循文以求其義焉，可矣。如必指某詩配某樂，非鑿卽妄，誠未見其能當也！

【集釋】「邁」行也。「邦」諸侯之國也。「右」尊也。「序」次也。「震」動也。「疊」懼也。「懷」來也。「柔」安也。「允」信也。「戢」聚也。「樂」輶也。「肆」陳也。「時」姚氏際恆曰：「時，是也。」《夏》《集傳》曰：「夏，中國也。姚氏曰：夏，大也。」

【標韻】無韻

### 執競 祀武王也。

執競武王，無競維烈。不顯成康，上帝是皇。自彼成康，奄有四方，斤斤其明。鐘鼓喤喤，磬筦將將，降福穰穰。降福簡簡，威儀反反。既醉既飽，福祿來反。

右《執競》一章，十四句。此詩或以爲「祭武王」，《小序》、《毛傳》、《鄭箋》、《孔疏》及范氏景仁。或以爲「祭成王」，朱鶴儀、李明德、何玄子。又或以爲「三王並祭」，歐陽氏、《集傳》及姚氏際恆。紛紛辯論，迄無定解，總爲「成王」二字所誤耳。「昊天有成命」之「成王」，分明是成王誦，而毛、鄭輩乃以爲「成此王功，不敢自安逸」作解。此篇之「成康」，本是武王「成功康定天下」，而歐陽氏以下諸家又偏以「成王誦、康王釗」爲訓。讀書固執如此，說《詩》焉能解頤？詩發端特題「武王」，勢極嚴重。下二句歷言其功德之著。「不」讀作丕，大也，「顯」，明也。「成」，武成也。「康」，康定也。一字一義，如《舜典》之「濬哲文明」，「溫恭允塞」等句。而因成爲無競之烈，雖在上帝亦不能不以君人之道望之也。故自其成功康定，「奄有四方」以來，明無不照，知無不周，故曰「斤斤其明」也。所以不祭則已，祭必降福。當其祭也，鐘鼓則喤喤然，磬筦則將將然，降福則穰穰然。而神之降福雖多，而大祭者之威儀愈益謹重，不敢以醉飽而失其度。天是以福祿頻來，常反覆而不厭也。此非專祭武王之詩乎？若謂「三王並祭」，無論典禮無稽，即文勢亦隔閡難通。蓋「烈」則歸之武王，「皇」則屬諸成、康，而「奄有四方」者又始自成、康矣。通乎不平？當亦不言而自辨已。即謂合祀成康，推本武王，而「奄有四方」亦非自彼二后也。故詩又當從《序》，爲「祀武王」之

說爲是。唯范氏景仁曰：「祀武王而述成、康，見子孫之善繼。」與呂涇野之言曰：「自成、康以來，其功則能崇天下，其德能和敬以奉祭祀，武王其必享之。」仍泥「成康」字爲成王、康王，而更曲爲之說，真所謂腐儒迂論，徒增人厭耳！呂說愈不通，可恨，可恨！至呂叔玉謂「執競」也，杜子春謂「牲出入奏昭夏」，卽此詩。其附會之謬，已見上篇。然終不知「執競」之「武王」，與「牲出入」何所干涉，而必用而奏之也。

【附錄】李氏樗曰：歐陽公曰：「昊天有成命」曰：「成王不敢康，夙夜基命宥密。」則成王者，成王也，當是康王以後之詩。而毛、鄭之說，以「頌」皆是成王時作，遂以「成王」爲「成此王功不敢康」。「執競」之詩曰：「自彼成康，奄有四方。」則「成、康」者，乃成王、康王也，當是昭王已後之詩。而毛氏以爲「成大功而安之」，鄭氏以爲「成安祖考之道」。觀毛、鄭之說，雖不如歐陽之簡直，然觀諸詩亦有窒礙者。成王之時，但持盈守成而已，不可以爲基命也。今曰「基命」，則非持盈守成也。「執競」之祀武王，如果是成康，則是祀武王之詩。其言成、康之文如此，其屢言武王無幾矣。豈古人祀先祖之意乎？不當以成王、康王爲說。「書」曰「成王畏相」，又曰「惟助成王德」，「書」之所言，不是周之成王矣。郝氏敬曰：祀成、康，則此詩作於康王以後。周之禮樂，定自周公。是篇所謂「遏」，卽「昭夏」者也。「禮」：「牲出入奏昭夏」，「天子以遏饗元侯」。康王以後，昭穆之季，未聞有繼周公作禮樂者矣。卽有新聲，豈可以配「九夏」乎？云「成康」者，成王成功，康定天下。猶「酒誥」言「成王」，「大誥」言「寧王」云爾。凡「詩」、「書」言武、成、康、寧，多頌武王，而王誦、王釗，率祖考以爲諡耳。豈凡言「成康」者卽爲二王

乎？姚氏際恆曰：「小序謂『祀武王』，固非。《集傳》謂『祀武王、成王、康王』，是已。然三王並祭出何典禮？得毋兩葬耶？後之主祭三王之說者，鄭肇敏曰：『文王廟在豐，武王廟在鎬，其成、康亦祔於武廟可知。而此祭非祔非禘，故止及三王耳。』案，成、康各有專廟，何得謂祔于武廟？此妄說也。惟新主未成廟乃祔，然亦只一王，如成王崩，康王祔之，武王廟不應有兩王也。朱允升曰：『祭三王無其例，然武王有世室，則必有專祭矣，豈昭王以後祭武世室而配以成、康歟？』此亦臆測，毫無稽據。主祭武王之說者，范景仁曰：『祀武王而述成、康，見子孫之善繼也。』呂涇野亦曰：『自成、康以來，其功能崇天下，其德能和敬奉祭祀，武王以其必享之。』然則祀武王之詩，周公豈不曾作，而直待昭王之臣作乎？主祭成、康之說者朱鬱儀曰：『祀成王、康王而推本於武王也。』案祭禮或分或合，昭王獨祀成、康二王，此何說也？季明德曰：『此蓋昭王時以成、康二王祔食于武王廟之詩也。』又曰：『但不知何故而舉此祭耳。』案時祭不當祔，祔祭只一尸，其辭在己亦疑之，何待人駁乎？何玄子曰：『昭王之世，始以成、康備七廟。然武王崩，周人祀之于廟，則有『昊天有成命』及『下武』二詩，而康王祀廟之始無聞焉。』《執競》之詩爲成、康作，但二詩而以二王並言，則又心疑之。已乃恍然悟曰：此即所謂『日祭』之詩也。《周語》祭公謀父曰：『日祭、月祀、時享、歲貢、終王，先王之訓也。』《楚語》觀射父曰：『古者先王日祭、月享、時類、歲祀。』劉歆曰：『祖、禰則日祭。』案日祭之典雖于他經無所見，而《國語》兩及之，然則成于昭爲祖，康于昭爲禰，《執競》之詩當是于日祭上食歌之，故以二王並言。愚按：『日祭』雖出《國語》，而『祖、禰日祭』，僅見于劉歆之言，然耶否耶？然何氏搜索及此，亦爲難能，聊存之以逆此詩之

難可也。

【集釋】「競」強也。「斤斤」明之察也。「嗶嗶」和也。「將將」集也。「穰穰」多也。「簡簡」大也。「反反」謹重也。「反」覆也。

【標韻】王七陽康、皇、方並同明八庚噍屬將、穰並同轉韻 簡十五潛反十三阮反同通韻

## 思文 后稷配天也。

思文后稷，克配彼天。立我烝民，莫匪爾極。貽我來牟，帝命率育。無此疆爾界，陳常于時夏。

右「思文」一章，八句。「小序」云「后稷配天」，是也。而經無祀天之文，故「集傳」疑之，不言「郊祀」，但云「后稷之德真可配天」而已。然「孝經」嘗云：「昔者周公后稷以配天」矣，古人文字類多簡質，況天功又有不待人述者乎？即「我將」祀帝，亦言牛羊，「維天其右之」，而此則更簡益從簡耳，夫何怪焉？「立我烝民」，「集傳」從鄭「饒」，「立當作粒」，與「尚書·益稷」篇「烝民乃粒」義同。「孔疏」，「立」古讀如字。時烝民阻飢，教化不得施，無以立人之道。后稷播種，民人率育，而陳常時夏，是立我烝民，皆后之功也，故曰「莫匪爾極」，義較直捷。「毛傳」訓「極」爲中，又不若「集傳」之訓「極」爲至，不待紆曲費解矣。「陳常于時夏」，「集傳」謂「陳其君臣父子之常道於中國」，姚氏謂「郊祀每歲常行，時是夏，大爲陳此常行之禮于是大之樂歌也」。朱固近腐，姚亦未通。愚謂烝民阻飢久矣，失其常性，今方率

育，無此疆而爾界，則有常產者有常性，卽五常之道亦于是乎大立矣。此訓時爲是，夏爲大之說也。若訓夏爲中夏，則其義亦豈能外此哉？后稷之功與天無極，周公制禮以祖配天，夫豈一朝一代、一家之私情已哉！

【集釋】「思」語辭。「文」文德也。「貽」遺也。「來」小麥也。「牟」大麥也。劉氏璣曰：「本草」曰：「小麥味甘，大麥味鹹，爲五穀長。」注：「大麥，今稞麥，一名粹麥。形似小麥，皮厚，故謂大麥。」「率」徧也。「育」養也。

【標韻】稷十三職極同本韻 育一屋夏二十一馬叶韻

### 臣工 王耕籍田以勸農官也。

嗟嗟臣工！敬爾在公。王釐爾成，來咨來茹。嗟嗟保介！維莫之春，亦又何求？如何新畚？於皇來牟，將受厥明。明昭上帝，迄用康年。命我衆人：「庀乃錢鎛，奄觀銍艾。」

右「臣工」一章，十五句。姚氏曰：「《小序》謂『諸侯助祭遣于廟』，甚迂。詩既無祭事，天子于諸侯何下敢斥言之，而呼臣工、車右，如以卑告尊不敢斥言之例乎？」《集傳》謂「戒農官之詩」，若是則當在「雅」，何以列於「頌」乎？鄭肇敏曰：「明堂朝覲，則『我將』、『載見』諸詩是已。至耕籍豈容無詩？」「嗟臣工」，正指公卿大夫之屬，至「嗟保介」，則義益顯然。其爲耕籍而戒農官，益可據矣，其說近是。」故從之。然天子耕籍乃孟春事，而此云「暮春」者，得無謬乎？鄭氏謂周之莫春，于夏爲孟春。然則周



正可改寅爲子，天時亦可易孟爲季乎？何其不通如是也！周正不唯不改置仲冬之月，且並仍在孟春之令，特以孟春爲建子而不建寅耳。蓋建可改而時不能更，觀此益信周之歲首與夏、商無異矣。詩固因孟春耕籍而戒以終歲之事，非專爲暮春言也。故末言「奄觀銍艾」，非秋成時乎？若泥「暮春」，則以辭而害意矣。姚氏雖亦見及鄭「變」之謬，而究無說以解「暮春」之語，則以其未知周正改建未改時耳。至「保介」，《集傳》以爲「農官之副」，固屬杜撰。然保介之在車右，實無與于農事，何敕之有？古今官名，隨時更易，未可據秦漢僞書以解成周真「頌」也，識者詳焉。

【集釋】「公」公家也。【釐】賜也。【成】成法也。【茹】度也。【保介】姚氏際恆曰：保介，鄭氏曰：「車右也。《月令》：孟春，天子親載耒耜，措之于參、保介之御間。介，甲也。車右，勇力之士，披甲執兵也。」孔氏曰：「知『保介』爲車右，故即引《月令》以證之。彼說天子耕籍田之禮，天子親載耒耜，措置之于參乘之人，保介之與御者二人間。君之車上止有御者與車右二人而已。今言『保介』與『御』，明保介卽車右也。以農事勅車右者，此人與之同車，而置田器于其間，常見勸農之事，故敕之也。不敕御人，以御人專主于御車也。」其說甚爲詳明。是保介爲車右，本無與于農事；此因農事而出，措耒耜于車右，故敕之也。作《集傳》者並不閱《註》、《疏》，曰「保介見《月令》、《呂覽》，其說不同，然皆爲籍田而言，蓋農官之副也。」以保介爲籍田之官，杜撰殊甚。夫保介爲農官之副，不知何者爲農官之正乎？案：姚氏本《註》、《疏》駁《集傳》，固是。第《月令》之「保介」，亦不知其果爲「周頌」之「保介」否也？說已詳篇中。《暮春》亦詳見篇中。《禽》三歲田也。朱氏謀埠曰：稱新畬者，田野之日闢也。《於皇》歎

美之辭。〔來牟〕麥也，說見上篇。〔明〕《集傳》：明，上帝之明賜，言麥將熟也。〔迄〕至也。〔康年〕猶豐年也。〔衆人〕甸徒也。〔唐〕具也。〔錢鑄銍〕孔氏穎達曰：《說文》云：「錢，銍，古田器。」《世本》云：「垂作銍。」宋仲子注云：「銍，刈也。」然則銍，刈物之器也。《說文》云：「鑄，田器也。」《釋名》云：「鑄，鉏類也。鑄，迫地去草。」《世本》云：「垂作鑄。」《呂氏春秋》高誘注云：「鑄，芸苗也。六寸，所以入苗間。」鑄、鑄當是一器。《釋名》云：「銍，穫禾鐵也。」《管子》云：「一農之事，必有一銍、一鑄、一銍，然後成農。」是三者皆田器。錢氏天錫曰：錢以起土，用於耕；鑄以去草，用於耘；銍以穫禾，用於穀。〔艾〕穫也。【標韻】工一東公同本韻 茹六魚舍同本韻 求十一尤牟同本韻 帝八霽艾九泰，叶音刈。通韻 年一先人十一真通韻

### 噫嘻 春祈穀也。

噫嘻成王，既昭假爾，率時農夫，播厥百穀。駿發爾私，終三十里。亦服爾耕，十千維耦。

右《噫嘻》一章，八句。《小序》謂「春夏祈穀於上帝」，是也。姚氏駁之，以爲「春祈穀，夏則雩矣」。其實雩、祈穀，義本相通，故可並，勿庸疑也。唯《集傳》以爲「戒農官之詩」，則非。「戒農官」何必禱及成王？此易辨者。乃又云「成王始置田官」，則尤謬。季明德曰：「農事，古人所急。治農之官，自古有之。況武王所重者民食，豈待成王而始置哉？」何玄子亦曰：「此康王春祈穀也。既得卜于禰廟，因戒農官之詩。」家語：孔子對定公曰：「臣聞天子卜郊，則受命于祖廟而作龜于禰宮，尊祖親考之義。」

也。又《左》襄七年，「夏四月，三卜郊，不從。孟獻子曰：『吾乃今而後知有卜筮。』」夫郊祀后稷，以祈農事也。啟蟄而郊，郊而後耕。今既耕而不郊，宜其不從。」愚以此詩章首有「成王昭格」之語，是此詩作于康王之世，乃主作龜欄宮而言。不然，周自后稷以農事開國，即欲教農官，何不于始祖之廟舉始祖為辭，而顧于成王，何取乎？此論較是。然非戒辭，乃祝辭，故入《頌》也。詩意云：王既已政教光明如是，猶能敬重農事，率是典田之官。今之教民耕田，各極其望，「終三十里」而遙，萬夫齊力，及時務功，以大發其私。故地無遺利，人無遺力，豐穰乃可望，要非王之惠不及此。其不言公田者，為民祈故耳。《集傳》不知，乃云：「此必鄉、遂之官，司稼之屬，其職以萬夫為界者。溝洫用貢法，無公田，故皆謂之私。」豈知詩意者哉？又本鄭《箋》解「三十里」句，云：「三十里，萬夫之地。四旁有川，內方三十里有奇，亦為姚氏所駁。竊意詩言「三十里」者，一望之地也。」言「十千維綱」者，萬衆齊心合作也。一以見其人之衆，一以見其地之寬，非有成數在其胸中。不意後儒竟為之持籌核算，計畝受夫，絲釐弗爽。有謂「萬夫之地，方三十里少半里」者，有謂「三十里有奇」者，又有謂「萬綱」當云「五千綱」者，真是癡人說夢，烏足當人一哂哉？《詩》本活相，釋者均默，又安能望其以意逆志，得詩人言外旨耶？

【附錄】姚氏際恆曰：「駿發爾私，終三十里」，《毛傳》曰：「私，民田也。言上欲富其民而讓于下，欲民之大發其私田耳。」終三十里，言各極其望也。孔氏曰：「各極其望，謂人目之望所見極于三十，每各極望則徧及天下矣。」三十以極望為言，則「十千維綱」者，以萬為盈數，故舉之以言，非謂三十里內十

千人也」。按《傳》、《疏》之說甚明，詩意只如此，非可鑿然以典制求之。是「三十里」與「十千」之義各別，不得聯合以解，明矣。自鄭氏篤信《周禮》，引之曰：「凡治野田，夫間有遂，遂上有經，十夫有溝，溝上有畛，百夫有洫，洫上有澮，千夫有澮，澮上有道，萬夫有川，川上有路。此萬夫之地，方二十三里少半里也。一川之間萬夫，故有萬耦。言三十里者，舉成數。」孔又疏之曰：「計此萬夫之地，一夫百畝，方百步，積萬夫方之，是廣長各百夫，以百乘百，是萬也。既廣長皆百夫，夫有百步，三夫爲一里，則百夫爲三十三里又少半里也。」按《周禮》之說本襲《考工記》。匠人「九夫爲井」句，而增廣爲此說，必不可據。詳見《周禮通論》。孟子曰「方里而井」，則三十里爲三十井。一夫百畝，一井八夫，三十里之地僅二百四十夫耳，安得有萬夫？今欲以萬夫合三十里之地，只得謂「以百乘百」。嗟乎！詩意果如是乎？且一里八夫，乃云「三夫爲一里」，尤謬。不特詩言萬夫，非百夫之以百乘百，而三十里亦非百夫也。其曲紐妄合，誤而又誤，欺世乃如此！《集傳》本之曰：「三十里萬夫之地，四旁有川，內方三十三里有奇。言三十里，舉成數也。」嗟乎！無論其不當從鄭之妄說也，且于《鄭箋》、《孔疏》毫釐不解。鄭、孔謂三十里百夫之地，非謂萬夫之地也。鄭引《周禮》「萬夫有川」之文，非謂「四旁有川」也。《周禮》「萬夫有川」，是一川萬夫；今作「四旁有川」，是爲四川，當四萬夫矣。鄭三十三里少半里，今言三十三里有奇，又誤也。不詳來歷，不解文義，直與稚子塗鴉何異？乃以註經，而後世羣遵之而習讀之，不可曉也。又曰「此必鄉、遂之官，司稼之屬，其職以萬夫爲界者。溝洫用貢法，無公田，故皆謂之私」，亦謬。君言「私」，民言「公」，正見其交相忠愛處。乃因詩無「公」字，遂認「私」字爲

無公田之貢法，可乎？且依其解，爲戒農官。國中地少，郊野地多，何爲僅戒國中之農官而不及郊野乎？又其云「溝洫用貢法」，亦誤。辨見《孟子通論》。

【集釋】「噫嘻」歎辭。【昭】明也。【假】音格。【時】是也。【駿】大也。【發】耕也。【私】私田也。【三十里】說見篇中。【耦】二人並耕爲耦。

【標韻】爾四紙里同本韻 數一屋耦二十五有叶韻

校記

【「詩言三十里」者，底本「者」下衍「者」字，今刪。

### 振鷺 微子來助祭也。

振鷺于飛，于彼西雝。我客戾止，亦有斯容。在彼無惡，在此無斁。庶幾夙夜，以永終譽。

右《振鷺》一章，八句。姚氏曰：「《小序》謂『二王之後來助祭』，宋人悉從之，無異說。自季明德始不從，曰：『《序》似臆說。武王既有天下，封堯後于蓁，封舜後于陳，封禹後于杞，而陳與杞、宋爲三恪。此來助祭，獨言二王之後，何爲不及陳耶？竊意此詩必專爲武庚而發，蓋武庚庸愚，不知天命，故使之觀樂辟離以養德，庶幾其能忠順耳。』鄭肇敏踵其意而爲說曰：『武王西雝之客，蓋指祿父，而夏之後不與。何者？鷺，白鳥也。殷人尚白，武王立受子祿父爲殷公，以撫殷餘民，而不改其色，故亦有斯

容「與」亦白其馬，皆不改色之證者。後儒見武庚以叛見誅，舉而棄之不屑道，必以「我客」屬嗣封之微子。夫由後而知鴟鴞毀室，罪在不貲。由武王之世觀之，則武庚固殷之冢嗣，亦猶丹朱在虞，商均在夏，三恪莫敢望焉。周之嘉賓孰先武庚者？無問其賢否也。較季說尤爲宛轉盡致矣。何玄子又踵兩家之意而別爲說曰：「周成王時，微子來助祭于祖廟，周人作詩美之。此與「有瞽」、「有客」皆一時之詩，爲微子作也。何以知其爲微子也？微子之封宋也，統承先王，修其禮物，作賓于王家，故「有客」之詩曰「亦白其馬」。商尚白也，鷺乃白鳥，而「我客」、「有客」似之。意者其衣服車旂之類皆用白與？此以知其爲微子也。何以知其成王時來助祭也？「書序」曰：「成王既黜殷命，殺武庚，命微子啟，作「微子之命」，是則微子之封宋自成王始命之，此以知微子在成王時來助祭也。」愚按，「微子之命」篇語乃僞古文，不足據。若以尚白爲言，則武庚亦必仍舊制，安見非武王時武庚來助祭，而必成王時微子來助祭乎？是仍與季、鄭揣摩之說無異也。總之，「序」說原有可疑者三：周有三恪助祭，何以獨二王後，一也。詩但言「我客」，不言「二客」，二也。此篇言有振鷺之容，白也；「有客」篇明言「亦白其馬」，似指殷後而不指夏後，三也。有此三者，故或以爲武庚，或以爲微子，所自來矣。以今揆之，微子之說較優于武庚，且有「左傳」以證。「左傳」皇武子曰：「宋，先代之後，于周爲客。天子有事，膳焉；有喪，拜焉。」按周之隆宋自愈于杞，蓋一近一遠，近親而遠疏，亦理勢所自然也。「商頌」亦稱「嘉客」，指夏後，此稱「客」，指殷後也。宋國之臣言宋事，則宜爲微子而非武庚也。「有事膳焉」，亦來助祭之證。「集傳」引「序」說者，乃引「左傳」「天子有事，膳焉；有喪，拜焉」之語，然則只說得宋，遺卻杞矣。

案：姚氏引季、鄒、何三家之說，闕《小序》及《集傳》「二王之後來助祭」之非，是已。而又謂何氏微子之說較優于武庚，而不言其所以優之之故，但引《左傳》皇武子之言爲證。夫武子之言，僅云「宋，先代之後，于周爲客；有事，膳焉；有喪，拜焉」，是泛舉宋之于周爲客也云爾，非謂此詩爲微子助祭發也。且下《有客》篇序，亦明言「微子來見祖廟」矣，安見微子助祭非《有客》篇，而必爲此詩？是烏足以爲證耶？愚謂詩前四語雖似贊，後四語乃戒辭。在武庚則勉其令終，在微子則令其鑒往。故曰「庶幾」，曰「以永終」，二者均有可通。若夏王後同來，則斷斷不出此也。況詩明言容似白鷺，則客僅商客而無夏客也可知。但武庚被誅，雖有詩亦當刪黜，微子嗣封，縱能賢尤應箴規，此指微子較優于武庚之說也。惜諸家均未見及此耳。然則《有客》之詩又將誰屬？曰：此自當以鄒說「爲箕子發也」近是。《序》蓋誤以箕子爲微子，遂不能不謂此篇爲「二王後」，一誤而無平不誤耳。

【眉評】姚氏曰：「全在意象之間，絕不著迹。」

【集釋】《振》羣飛貌。《鷺》白鳥。《離》澤也。王氏安石曰：西離，蓋辟廡也。辟廡有水，鷺所集也。《客》指微子也。《彼》其國也。

【標韻】離二冬容同本韻 惡七遇敦同聲六御通韻

以上《周頌》上，凡十三篇。舊用分什法，今以其篇什無多，但分上下二卷。

## 詩經原始卷之十七

### 頌二

#### 周頌下

#### 豐年 秋冬大報也。

豐年多黍多稌。亦有高廩，萬億及秭。爲酒爲醴，烝畀祖妣，以洽百禮，降福孔皆。

右《豐年》一章，七句。《彙纂》曰：「《豐年》序以爲『秋冬報也』。箋以秋冬報爲嘗烝，王安石以豐年屬天地之功，故以此詩爲祭上帝。陳祥道引《豐年》以證『禮』，謂秋報者，季秋之於明堂也。呂祖謙謂以祈爲郊，則季秋大饗明堂，安知不併歌《豐年》之詩以爲報歟？曹粹中謂秋冬大饗，及祭四方八蜡，天地百神，無所不報，同歌是詩。漢、唐、宋諸儒之說，大約如是。《集傳》定爲『報賽田事之樂歌』，蓋指田祖先農、方社之屬。然詳觀此詩言黍稌之多，倉廩之富，而得爲此酒醴以饗祖考，洽羣神，祀事無缺，而百禮咸備，皆上帝之賜，故曰『降福孔皆』也。考祀典，秋冬大報，上自天地，以至方蜡，靡祀不舉，祀則有樂。是詩樂爲報祭之樂章，故《序》不明斥所祭爲何神也。《案》，《序》不言祭何神，但云『秋



冬報」，故後多疑議。若云「大報」，則其義自明矣。總之，古禮既廢，古樂又亡，第從樂章以考祀典，詎能有符？縱極切合，亦不過懸揣以求其義焉云爾。

【集釋】「稌」音杜，稻也。郭氏璞曰：「今沛國呼稻爲稌，是也。」〔亦〕助語辭。〔億秭〕數萬至萬曰億，數億至億曰秭。〔烝〕進也。〔畀〕予也。〔洽〕備也。〔皆〕徧也。

【標韻】康二十六寢秭四紙醴八齊妣紙禮齊皆九佳叶韻

### 有瞽 成王始行禘祭也。

有瞽有瞽，在周之庭。設業設虞，崇牙樹羽，應田縣鼓，執磬祝圉。既備乃奏，簫管備舉。嘒嘒厥聲，肅雝和鳴，先祖是聽。我客戾止，永觀厥成。

右「有瞽」一章，十三句。姚氏曰：「『小序』謂『始作樂而合乎祖』，近是。祖，文王也；成王祭也。何玄子因以爲『大禘』，禘，合也。又曰：『『序』意謂成王至是始行合祖之禮，大奏諸樂云爾，非謂以新樂始成之故合乎祖也。』案，諸家多以樂初成而薦之祖考爲言，樂初成而薦之祖考，何勞「我客戾止」？今「先祖是聽」，我客亦止，則必舉行禘祭大典可知。故何說較諸家爲尤精耳。「我客」而與「先祖」並題，亦猶舜之虞賓在位，其所以尊之者爲何如哉！謝氏枋得曰：「舜作樂而曰：『虞賓在位，祖考來格』；成王合樂而曰：『先祖是聽，我客戾止』，以先代之後與先祖並言，尊之至也。」《書》曰「崇德家寶」，統承先王修其禮物，非尊其後，尊聖帝明王也。」

【眉評】姚氏曰：「此詩微類『商頌』那篇，固知古人爲文亦有藍本也。」

【集釋】「鼗」樂官，無目者也。『樂府』見『靈臺』篇。『樹羽』置五采之羽於崇牙之上也。『應』小鞀。

「田」大鼓也。『縣鼓』周制也。夏后氏足鼓，殷禮鼓，周縣鼓。『鼗』如鼓而小，有柄，兩耳，持其柄而搖之，則旁耳還自擊。『鼗』石鼗也。『祝』狀如漆桶，以木爲之，中有椎連底，捐之令左右擊，以起樂者也。『圉』亦作攷。狀如伏虎，背上有二十七鉏鋸刻，以木長尺櫟之，以止樂者也。『簫』編小管爲之。『管』如笛，併兩而吹之者也。『我客』二王後也。『成』樂闋也。如『簫韶九成』之成也。

【標韻】警七虞六語羽虞鼓同國語舉同通韻

## 潛 冬薦魚也。

猗與漆沮，潛有多魚。有鱸有鮪，鰈鰒鰓鯉。以享以祀，以介景福。

右『潛』一章，六句。『小序』云：「季冬薦魚，春獻鮪。」魚是總名，鮪乃下六魚之一，何以冬則總薦魚，春則單薦鮪？且單薦鮪，則文當言鮪，何以仍用總魚名？周庭縱極不文，亦不難別作樂歌以薦之，何至用此不通之文以獻諸祖考前乎？案『月令』季冬，「命漁師始漁，天子親往，乃嘗魚，先薦寢廟」，季春，「薦鮪于寢廟」。孔氏曰：「冬則衆魚皆可薦，故總稱魚，春惟獻鮪而已。」又曰：「冬月既寒，魚不行，乃性定而肥充，故冬薦之也。」然則魚本二季皆可薦，而詩云「潛有多魚」，下並舉六魚以實之者，是冬令魚潛不行而肥美，凡魚皆可薦之時也。故總舉六魚，隨薦皆可，用以爲樂。若季春，鮪始出而浮，

陽魚之先至者也，故單薦鮓。此詩非其樂矣。《序》乃統而言之，《集傳》亦不敢有異說，豈深知文義者乎？

【集釋】「猗與」歎辭。〔潛〕《集傳》：潛，慘也。蓋積柴養魚，使得隱藏避寒，因以薄取之也。或曰：藏之深也。孔氏穎達曰：《釋器》云：「慘謂之潛」。李巡曰：「今以木投水中養魚曰慘」。孫炎曰：「積柴養魚曰慘」。潛，潛古今字。〔鱣〕白鱣也。

【標韻】沮六魚魚同本韻 鮓四紙鯉同本韻 祀紙福一屋叶韻

## 離 祭文王以徹俎也。

有來離離，至止肅肅。相維辟公，天子穆穆。一章於薦廣牡，相予肆祀。假哉皇考，綏予孝子。二章宣哲維人，文武維后。燕及皇天，克昌厥後。三章綏我眉壽，介以繁祉。既右烈考，亦右文母。四章

右《離》四章，章四句。從姚氏陳恒本。《序》謂「禘太祖」，朱子辨之云：「《祭法》：『周人禘嘗。』」又曰：「天子七廟，三昭三穆及太祖之廟而七。周之太祖即后稷也。禘嘗於后稷之廟，而以后稷配之，所謂禘其祖之所自出，以其祖配之者也。《祭法》又曰：『周祖文王』，而春秋家說三年喪畢，致新死者之主於廟，亦謂之吉禘，是祖一號而二廟，禘一名而二祭也。今此《序》云：『禘太祖』，則宜爲禘嘗於后稷之廟矣，而其詩之詞無及於嘗、稷者，若以爲吉禘于文王，則與《序》已不協，而詩文亦無此意，恐《序》之誤也。」

此詩但爲武王祭徹俎之詩，而後通用於他廟耳。案，此說頗爲明晰，可無疑義矣。若如《箋》、《疏》以爲成王禘祭文王之詩，則詩中「烈考」、「皇考」之稱既不可通，卽文母之祭亦與諸義無涉，故不若從《集傳》之爲當也。而篇末又引用《禮·樂師》及《徹》率學士而歌《徹》之文，姚氏譏爲「蛇足」，云「此詩徹時用，豈名《徹》乎？」《周禮》之妄也。案《論語》分明言「以《離》《徹》，非云「以《徹》《徹》，何得而更有《徹》之名耶？凡若此者，皆讀書粗率，未能悉心體認之過耳。

【集釋】《離》《離》和也。《肅肅》敬也。《相》助祭也。《辟公》諸侯也。《穆穆》美也。《於》歎辭。《廣牡》大牲也。《肆》陳也。《假》大也。《皇考》文王也。《綏》安也。《孝子》武王自稱也。《宣》通也。《哲》知也。《燕》安也。《昌》大也，謂昌大其後也。蘇氏徹曰：周人以諱事神，文王名昌，而此詩曰「克昌厥後」，何也？曰，周之所謂諱，不以其名號之耳，不遂廢其文也。諱其名而廢其文者，周禮之未失也。姚氏際恆曰：愚按，或謂周公始定諱，武王時尚未有此，亦一說。《右》尊也。《烈考》姚氏際恆曰：烈考，亦文王。《集傳》是。《毛傳》謂武王，嚴氏主之。《烈考》、《文母》，明相對偶，子豈可與母對而且居母上耶？右爲尊，故謂其神在右，猶云「如在其上」也。《毛傳》訓助，于此處難通。《文母》大妣也。

【標韻】雖二冬公一東通韻 肅一屋穆同本韻 牡二十五有考十九略叶韻 祀四紙子同本韻 人十一真天一先通韻 后有後同本韻 壽有考略叶韻 祉紙母有叶韻姚氏際恆曰：此詩每句有韻，甚奇。又凡四章，二、三、四章皆「有」韻，而一、四兩章皆先「有」韻，後「紙」韻。前後相關，音調纏綿綿繞，尤爲奇變。愚案：此真所謂纏綿韻也。而用韻之奇，亦無過乎。

是者。

### 載見 諸侯入朝，始助祭于武王廟也。

載見辟王，曰求厥章。龍旂陽陽，和鈴央央，絳革有鵠，休有烈光。率見昭考，以孝以享。以介眉壽，永言保之，思皇多祐。烈文辟公，綏以多福，俾緝熙于純嘏。

右「載見」一章，十四句。「序」謂「始見乎武王之廟也」。毛萇訓載爲始，朱子以爲恐未然，故以載作「發語辭」。姚氏謂「集傳」既訓載爲則，則不當云「發語辭」。若爲虛字之「則」，則乃承接之辭，豈可作發語用？「一虛字也，而諸儒辯論莫定，其他可知。然從毛、鄭訓始者多，則以下文「率見昭考」與首句相應故也。「彙纂」亦曰：「成王新卽政，率是百辟見於昭廟，以隆孝享。一以顯耆定之大烈彌光，一以彰萬國之歡心如一。有不承王業，畏懷天下氣象，故曰始也。若泛言諸侯助祭，則烈祖有功德之廟多矣，何獨詣武王一廟而作此歌乎？」案：此乃作詩大旨，亦存詩者之微意也。而「集傳」必欲訓載爲發語辭者，何哉？朱氏善曰：「諸侯之來朝，將以稟受法度也。而我乃率之以祀武王，何也？蓋先王者，法度之所從出，而宗廟者，又禮法之所由施也。」此又讀書別有所見，亦實詩中要義，不可不參觀而並詳焉者也。

【集釋】「章」法度也。「旂」交龍曰旂。「陽」明也。「和鈴」軾前曰和，旂上曰鈴。「絳革」轡首也。「有鵠」聲和也。姚氏際恒曰：有鵠，「毛傳」謂「有法度」，鄭謂「金飾貌」，其謂金飾貌者，「韓奕」：「絳革金鵠」聲和也。

厄」，蓋依像金厄而言也。《集傳》謂「聲和」，蓋本《商頌》「八鸞鸛鳴」而言也。當于後二說中求之。案：鄭說言其貌，《集傳》言其聲。蓋鸞首必以金飾像鸛而又有聲，故合二說而義乃備也。《休》美也。《昭考》、《集傳》、《昭考》、武王也。廟制，大祖居中，左昭右穆。周廟文王當穆，武王當昭，故《書》稱「穆考文王」，而此詩及《訪落》皆謂武王爲「昭考」。《思》語辭。《皇》大也。

【標韻】王七陽章、陽、央、鶴、光並同享二十二養叶韻。姚氏際恒曰：此八句惟一句出韻，餘皆一韻。漢《柏梁詩》本此。虞綴二十一馬，又叶古。叶韻姚氏際恒曰：三句一韻，秦《功銘碑》本此。

### 有客 箕子來朝見祖廟也。

有客有客，亦白其馬。有萋有且，敦琢其旅。一章有客宿宿，有客信信，言授之繁，以繫其馬。二章薄言追之，左右綏之。既有淫威，降福孔夷。三章

右「有客」三章，章四句。從姚氏本。姚氏曰：「《小序》謂『微子來見祖廟』，向從之。唯鄭肇敏曰：『愚以爲箕子也。』《書》武王十三祀，王訪于箕子，乃陳《洪範》。此詩之作，其因來朝而見廟乎？『淫威』、『降福』，亦既就《箕子》中「嚮用五福，威用六極」，遂用其意，言前之非常之凶禍，今當酬以莫大之福饗，蓋祝之也。此說甚新，以「威、福」合《洪範》，尤巧而確，存之。」愚謂此詩之切合箕子，並不在「威、福」字有符《洪範》，蓋「繫馬」、「追綏」等句，非箕子不足以當武王之眷顧如是也。蓋武王之訪于箕子者爲道，箕子之來見武王者亦爲道，兩聖相投，自有來之不能不來，亦即有去之不容即去者。故一宿

不已，必曰「信宿」，信宿不已，欲繫其馬而不使之去，即使或去，亦必追還而安留之。果何爲哉？凡以爲此「洪範」之道故耳。豈區區「威福」字偶合「範」言，遂足據以爲證哉？若微子縱極賢德，不過寵以封賜，俾承殷祀足矣，何必眷顧羈留若是？且前懲武庚之禍，後尤當警以戒詞，乃爲得體。故「振鷺」愚信其爲微子發，此詩愚尤信其爲箕子咏也。蓋此乃千古之公論，非一人之倂言。知言者其亦有以諒之也夫！

【眉評】起得飄然。

【集釋】「有妻且二句」姚氏際恒曰：「有妻有且，敦琢其旅，鄭肇敏曰：『有妻有且』，薦其簋豆也。『敦琢』爲玉，『旅』爲陳，蓋來朝之享禮，所謂『旅幣無方』也。『禮器』云：『簋豆之薦，四時之和氣也。內金，示和也。束帛加璧，尊德也。龜爲前列，先知也。金次之，見情也。丹漆絲纁竹箭，與衆共財也。其餘無常貨，各以其國之所有，則致遠物也。』『郊特性』曰：『旅幣無方，所以別土地之宜，而節遠邇之期也。龜爲前列，先知也。以鐘次之，以和居參之也。虎豹之皮，示服猛也。束帛加璧，往德也。』以此觀之，妻且、敦琢之義曉然矣。又案『巷伯』：『妻令斐令』，『韓奕』：『簋豆有且』，皆可互證，何以作『敬慎』解？『械機』：『追琢其章』，豈選擇之謂乎？案鄭釋此二句詩，可謂發千古之蘊矣。何玄子因鄭言『巷伯』：『妻斐』，遂謂『妻當作斐』，且即『簋豆有且』之且。乃薦帛之具，薦饌于且，故曰『有妻有且』。『禮器』言諸侯助祭之事，『郊特性』言諸侯朝享之事，而皆言束帛加璧之禮，則此詩言『有妻有且』之即爲束帛，『敦琢其旅』之即爲加璧，明矣。」亦通。『信』再宿曰信。

【標韻】馬二十一馬旅六韻叶韻 宿一屋馬馬叶韻 綏四支夷同本韻

### 武 奏大武也。

於皇武王，無競維烈。允文文王，克開厥後。嗣武受之，勝殷遏劉，耆定爾功。

右《武》一章，七句。《小序》曰：「奏大武也。」《左》宣十二年，楚子亦曰：「武王克商，作《武》，其卒章曰『耆定爾功』。孔氏以卒章爲終章之句，是。此詩卽《大武》可無疑矣。然《集傳》云：「《傳》以此詩爲武王所作，則篇內已有武王之謚，而其說誤矣。」此又以辭而害意也。《傳》云：「武王克商作」，非云「自作」，自誤而反云人誤者，何哉？姚氏知《集傳》之誤，而又誤以此詩卽「下管《象》」之《象》，是未嘗讀季札觀周樂之文矣。案《左》襄二十九年，吳公子札來聘，請觀周樂。「見舞《象》、《南》、《箛》者」，杜預注云：「文王樂也。」「見舞《大武》者」，杜預注云：「武王樂也。」《象》卽《維清》，《武》乃此篇。《武》原非一詩，何云或吹或舞皆此詩耶？蓋泥《禮記·仲尼燕居》「下管《象》、《武》」之句爲一樂名，又誤讀「象武」爲「象舞」，其說已見《維清》篇內，茲不贅。姚氏最自負，而其讀《詩》亦疏畧如此，以此見說《詩》之難也。

【集釋】〔於〕歎辭。〔皇〕大也。〔遏〕止也。〔劉〕殺也。〔耆〕致也。

【標韻】無韻



### 閔予小子 祔武王主于廟也。

閔予小子，遭家不造，嬛嬛在疚。於乎皇考，永世克孝！念茲皇祖，陟降庭止。維予小子，夙夜敬止。於乎皇王，繼序思不忘！

右「閔予小子」一章，十一句。「小序」謂「嗣王朝于廟」，而不言何時。「集傳」以爲「成王免喪，始朝于先王之廟，而作此詩」，蓋本鄭氏說也。然「遭家不造，嬛嬛在疚」等語，豈「免喪」之言乎？姚氏曰：「何玄子引殷大白副墨曰：『武王既葬而祔主于廟，似爲得之。』」此正其時詩也，何云「似耶」？蓋首三句方在喪中，下又將有事朝政，故知其爲既葬而祔主于廟之時耳。然詩似祝辭，非頌體，而亦列之「頌」者，「頌」之變也。周家聖聖相承，家學淵源不外一敬字。文王之學曰「緝熙敬止」，武王之學曰「敬勝怠者吉」，今成王方嗣統，欲上繼祖父之緒于不忘，亦曰「夙夜敬止」，其心傳之要不在是歟？故每於對越在天之時，常若其「陟降庭止」，不以喪中而忘道德也。此當爲成王沖幼第一章詩，而其志向已如此，無怪其能繼承文武大業，爲聖世明王，夫豈無因而致此哉？

【集釋】「閔」痛也。「造」成也。「嬛」與「紈」同。何氏楷曰：「石經作『紈』。李氏樛曰：『嬛字與『哀此紈獨』之義同。』」嬛者，孤獨而已。「疚」哀病也。「皇考」武王也。「皇祖」文王也。「皇王」兼指文、武也。

【標韻】造二十號孝十九效通韻 庭九青敬二十四敬叶韻 王七陽忘同本韻

訪落 成王卽政告廟，以咨羣臣也。

訪予落止，率時昭考。於乎悠哉，朕未有艾！將予就之，繼猶判渙。維予小子，未堪家多難。紹庭上下，陟降厥家。休矣皇考，以保明其身！

右「訪落」一章，十二句。此詩諸家所言大畧相同，蓋成王初卽政而朝于廟，以延訪羣臣之詩。名雖延訪，而意實屬望昭考，蓋家學原有素也。故「於乎」以下，一往追維皇皇如有所求而弗獲之心，所謂學如不及，猶恐失之者，其慕道而謂切矣。至「維予小子」而下，忽覺蕪蒿懷愴，若或見之，則又孝思之感動不能自己。此初告廟時景象。末乃以保身收住，仍歸重學術上。言三代聖君治道本乎學術，事業始自宮庭，不於此益信然哉？

【眉評】姚氏曰：「多少宛轉曲折。」

【集釋】「落」始也。曹氏粹中曰：「凡宮室始成則落之，故以落爲始。」「悠」遠也。【艾】集傳：「艾如夜未

艾」之艾。許氏謙曰：「庭燎傳：『艾，盡也。』則此「朕未有艾」謂未能盡率昭考之道也。【判】分也。

「渙」散也。【保】安也。【明】顯也。

【標韻】無韻

敬之 成王自箴也。

敬之敬之，天維顯思，命不易哉！無曰高高在上，陟降厥士，日監在茲。維予小子，不聰敬止。日就月將，學有緝熙于光明。佛時仔肩，示我顯德行。

右「敬之」一章，十二句。此詩本一氣呵成，人多讀作兩截，真不可解。《小序》謂「羣臣進戒嗣王」，只說得上半截文意。《集傳》于上截云：「成王受羣臣之戒而述其言」，于下截云：「此乃自爲答之言」。姚氏曰：「愚向者亦不敢以一詩硬作兩人語，惟此篇則宛肖。上章先以『敬之』直陳，意甚懇切，下皆規戒之辭；下章則純乎成王語」，故敢定爲羣臣答「訪落」之意而成王又答之也。然與《集傳》所言又何以異？是皆未察文義之過耳。蓋此詩乃一呼一應，如自問自答之意，並非兩人語也。一起直呼「敬之敬之」，至「日監在茲」，先立一案；見天道甚明，命不易保，無謂其高而不吾察，當知其聰明明畏，常若陟降於吾之所爲，而無日不臨監於此者。蓋一俯仰間而如或見諸目前也。「維予小子」，性既不聰，行又弗敬，不能體天命于無形，則唯有「日就月將」，勉強而行，庶幾積續以至於光明耳。然必賴羣臣輔助我所擔荷之任，而示我以顯明之德行，乃可追吾所見而能及也。故「維予小子」以下，亦即緊承上文，相應而下，機神一片，何容分作兩截，並謂二人語耶？此亦尋常文格，非成王奇創，諸儒何至迷惑若是？姚氏又謂「此三百篇言『學』之始」，意謂詩不可以言學也。夫詩非不可以言學，唯言學而人于理障則不可耳。姚氏於「烝民」之詩，則識其漸開說理之端，於「維天之命」，則謂其爲周公作，非說理者，於此篇又以爲言學之始，何其自相矛盾如是耶？

【集釋】「顯」明也。「思」語辭。「士」事也。何氏楷曰：案《說文》，「事乃士之本訓」。其以士爲人品之稱

者，則謂其人足任事，故亦以士名之。〔將〕進也。〔佛〕弼通。〔仔肩〕任也。

【標韻】之四支思同哉十灰茲支通韻 子四紙止同本韻 將七陽明八庚行陽轉韻

### 小毖 成王懲管蔡之禍而自儆也。

予其懲，而毖後患！莫予弄蜂，自求辛螫。肇允彼桃蟲，拚飛維鳥。未堪家多難，予又集于蓼。

右《小毖》一章，八句。《小序》謂「嗣王求助」，語雖混而近是。《集傳》謂「亦《訪落》之意」，則全非。蓋《訪落》欲紹前徵，此詩乃懲後患，用意各有所在，辭氣亦迥不侔。豈因其一謀始，一毖小，遂謂相同耶？然武庚之禍亦非小者，向非周公，王室存亡尚不可知，而猶謂之爲小耶？此詩名雖「小毖」，意實大戒，蓋深自懲也。故開口卽言懲患，不知如何自儆而後可免於禍，慮之深則惕之至耳。「弄蜂」二句，本無毒于予，而自取其毒者。管、蔡之變，誰爲之？咎非自取歟？「桃蟲」二句，向以爲小物竟成大禍者。武庚之叛，人不及防，豈所料哉？凡此皆非常禍亂，而予方沖幼，未堪多難，偏又集于辛苦之地，如嘗蓼而不可堪其味也，奈之何哉？自《閔予小子》至此，凡四章，皆成王自作。若他人，則不能如是之親切有味矣。然除《閔予小子》一篇似祝辭外，餘皆箴銘體，非頌之正也，不可不知。蓋箴銘體近頌，故附乎《頌》耳。至於筆意清矯，思致纏綿，四詩實出一手，故知其爲成王作。至今讀之，令人想見其憂深慮遠，道醇術正氣象，非太平有道明王而能若是哉？

【眉評】姚氏曰：「憤懣、蟠鬱，發爲古奧之辭。偏取草蟲等作喻，以見姿致，尤奇。」

【集釋】「懲」有所傷而知戒也。〔懲〕慎也。〔拜〕使也。〔蜂〕小物而有毒者。許氏慎曰：「飛蟲螫人者。」

陸氏佃曰：「其毒在尾，垂穎如蜂，故謂之蜂。」〔肇〕始也。〔允〕信也。〔桃蟲〕姚氏際恆曰：「肇允彼桃蟲，拚飛維鳥。」毛傳云：「桃蟲，鷦也。」本〔爾雅〕。又云：「鳥之始小而終大者。」郭璞曰：「鷦鷯，小鳥而生鵲、鴉。」陸氏璣曰：「俗語『鷦鷯生鵲』。」案，鷦鷯雖小鳥，亦鳥也，安得以蟲名？且〔莊子〕謂其所棲不過一枝，不云桃枝也。〔爾雅〕之說已自難信，而郭璞復實之以生鵲、鴉之說，幾曾見鷦鷯生子爲鵲、鴉來？其附會更何疑！若鷦鷯生子爲鵲、鴉，不知鷦鷯又何物所生乎？且詩但云「鳥」，不云大鳥也。今爲彼說，以「桃蟲」爲小鳥，勢必以「鳥」爲大鳥，增添語字，以就已說，可乎？總之，若使桃蟲爲鳥，詩決不又云「拚飛維鳥」矣。蓋謂蟲之小物忽變而爲飛鳥，以喻武庚其始甚微，而臣服後乃鳴張也。〔詩緝〕載張氏曰：「猶言『向爲鼠，後爲虎』，不必謂桃蟲化爲鳥也。」其見與予合。〔蓼〕辛苦之物也。

【標韻】蜂二冬蟲一東通韻 鳥十七篠藥同本韻案：此詩中二句「蟲」字與上「蜂」字叶，「鳥」字與下「蓼」字叶，甚奇。

## 載芟 春祈社稷也。

載芟載柞。其耕澤澤，千耦其耘，徂隰徂畛。侯主侯伯，侯亞侯旅，侯疆侯以。有嘏其餼，思媚其婦。有依其士，有略其耜，俶載南畝。播厥百穀，實函斯活。靡稌其達，有厭其傑。

厭厭其苗，綿綿其麋。載穫濟濟，有實其積，萬億及秭。爲酒爲醴，烝畀祖妣，以洽百禮。有飴其香，邦家之光。有椒其馨，胡考之寧。匪且有且，匪今斯今，振古如茲。

右《載芣》一章，三十一句。《小序》謂「春籍田而祈社稷」。朱子《辯說》以爲與下篇兩詩未見有祈報意。故《集傳》云「未詳所用」，然又謂「辭意與《豐年》相似，其用應亦不殊」，是以爲報而非祈也。姚氏亦云：「詩無耕籍事，亦未見有祈意。」今案詩辭果如二家所云，然下篇《良耜》有曰「穀時稌牡」，是秋報無疑矣，且王者之報社稷亦無疑矣。此詩與之同，序且居其前，下篇云報，不應此篇又云報也。似《序》所言，或有所本，唯不必定耕籍耳。沈氏守正云：「《小序》曰：『《載芣》，春籍田而祈社稷也。《良耜》，秋報社稷也。』朱子傳以爲報詩，亦不相遠。但言祈，則章中耕耘、收穫、祭祀、尊賢、養老諸事，皆預言之，冀望之，言報則直述其已然，以昭神貺耳。」言亦有理。古人文字簡質，不似後人曲折分明。此等詩歌又不得以後世文法相拘。且《噫嘻》春祈，亦無甚祈意，不能不以之爲祈穀用，則此詩之用于春祈社稷也，亦何疑哉？

【眉評】一家叔伯以及傭工婦子，共力合作，描摹盡致，是一幅田家樂園。

【集釋】《芣》除草曰芣。《柞》除木曰柞。孔氏穎達曰：「隱六年《左傳》云：『如農夫之務去草焉，芣夷蘊崇之。』是除草曰芣也。《秋官·柞氏》：『掌攻草木及林麓』，是除木曰柞。《澤澤》姚氏際恆曰：『澤澤，鄭氏訓「解散」，若是，則以澤作「釋」，何如依本字，謂「方春土脈動，潤澤可耕」之爲得乎？《耘》除草根也。《隰》爲田之處也。《畛》田畔也。《主》家長也。《伯》長子也。班氏固曰：子最長，迫近父

也。〔亞〕仲叔也。〔旅〕衆子弟也。〔疆〕民之有餘力而來助也。〔以〕能左右之曰以，若今時傭力之人，隨主人所左右者也。〔噉〕衆飲食聲也。〔媚〕悅也。〔依〕倚也。〔士〕夫也。〔畧〕利也。何氏楷曰：畧，當依《書》通作畧。《說文》云：「刀劍刃也」，言有銳利如刀劍刃之耜也。〔倣〕始也。〔載〕事也。〔函〕含也。〔活〕生也。〔驛驛〕苗生貌。〔達〕出土也。〔厭〕受氣足也。〔傑〕先長者也。〔綿綿〕詳密也。〔麤〕耘也。〔積〕露積也。〔飴〕姚氏際恒曰：飴，毛傳曰：「飴，芬香也」。是使飴爲芬，不當又云「其香」矣。飴字從食，只是飯食之類，所謂「于豆于登，其香始升」是也。〔胡〕姚氏際恒曰：胡，毛傳曰：「壽也」。胡之訓壽，亦未聞。案《儀禮·士冠》曰：「胡福」，「少牢」曰：「胡壽」，皆與遐通。使胡爲壽，「少牢」不當云「胡壽」矣。又《解頤新語》曰：「《說文》云：『胡，牛領垂也』，老狼亦垂胡。今老者或有此狀，故詩人取之。」然據此亦只是老人之狀，非訓壽也。〔且〕猶「籩豆有且」之且，薦也。〔振〕極也。

【標韻】柞十二陌澤、伯並同本韻 旅六語以四紙婦二十五有士紙相同畝有叶韻 活七曷達同傑九屑通韻 苗二蕭  
麤同本韻 濟八齊積陌祗紙體齊批紙禮齊叶韻 香七陽光同本韻 馨九青寧同本韻 且六魚茲四支通韻

## 良耜 秋報社稷也。

畎畝良耜，倣載南畝。播厥百穀，實函斯活。或來瞻女，載筐及筥，其饌伊黍。其笠伊糾，其鉶斯趙，以薅荼蓼。荼蓼朽止，黍稷茂止。穫之挈挈，積之栗栗。其崇如墉，其比如櫛，

以開百室。百室盈止，婦子寧止。殺時特牡，有捄其角。以似以續，續古之人。

右《良耜》一章，二十三句。姚氏曰：「《小序》謂『秋報社稷』，近是。詩云『殺時特牡』，是王者以大牢祭也。嚴氏曰：『此詩爲報社稷，必陳農功之本末，故當秋時而追述春耕，預言冬穫也。』」案，此詩當秋祭而預言冬穫，則前詩當春祭何不可以預言秋成？是《載芣》爲春祈無疑矣。蓋二詩皆舉農工本末而言。此殺特牡，彼言餼香，並云「邦家之光」，非王者之祭而誰祭哉？《集傳》又云：「或疑《思文》、《臣工》、《噫嘻》、《豐年》、《載芣》、《良耜》等篇，卽所謂《豳頌》，未知其是與否。」無論《豳風》、《豳雅》、《豳頌》之文不必如此分，即使如此分，《思文》乃后稷配天之樂，《噫嘻》實成王昭格之詩，豈古公未遷豳以前，卽有此二詩乎？不然，何以謂之「豳頌」耶？此等明顯易見之事尚多疑議，何論其他？迂儒談《詩》，鮮所當也！

【眉評】如畫。

【集釋】《晏嬰》嚴利也。《瞻女》婦子之來饁者。瞻猶省也。《糾》姚氏際恒曰：「其笠伊糾」，謂以繩糾結于項下也。《趙》刺也。孔氏穎達曰：趙是用縛之事，縛是鉏類，故趙爲刺地也。《藹》音呼毛反，拔田草也。《茶》陸地穢草。《蓼》澤中水草。《捄捄》穫聲也。《栗栗》積之密實也。《櫛》理髮器，言密也。《盈》滿也。《寧》安也。《特牡》黃牛墨脣特。孔氏穎達曰：《地官·牧人》云：「凡陰祀，用黝牲毛之。」注云：「陰祀，祭地北郊及社稷也。」然則社稷用黝牛角以黑，而用黃者，蓋正禮用黝，至於報功以社，是土神，故用黃色，仍用黑脣也。社稷太牢，獨云牛者，牛，三牲爲大，故特言之。《捄》曲貌。毛氏棻



曰：社稷之牛角尺。〔續〕謂續先祖以奉祭祀。

【標韻】相四紙敵二十五有叶韻 穀一屋活七曷叶韻 女六韻宮黍並同本韻 趙十七蘇夢同本韻 朽有茂二十六有叶韻 桎四質栗、櫛、室並同本韻 盈八庚寧九青人十一真通韻

### 絲衣 闕疑。

絲衣其紕，載弁俅俅。自堂徂基，自羊徂牛，鼐鼎及鼯。兕觥其觶，旨酒思柔。不吳不敖，胡考之休！

右《絲衣》一章，九句。此詩爲繹祭不難辨，唯《序》既曰：「繹、賓尸」，又曰：「高子曰：『靈星之尸也』」，則不可解。夫高子爲誰？「靈星」與「繹祭」何涉？孔氏曰：「高子不知何人，唯公孫丑稱高子之言以問孟子，是高子與孟子同時。趙岐以爲齊人也。靈星則《漢書·郊祀志》云：『高祖詔御史，其令天下立靈星祠。』張晏曰：『龍星左角曰天田，則農祥也，晨見而祭之。』故高子論他事云『靈星之尸』，後人因引以爲證。然上文言『繹賓尸』，下卽云『靈星之尸也』，似此賓尸非他，卽靈星之尸之意，故不可解。且高子與孟子同時，去子夏已遠，胡爲子夏作序而引高子之言？若云後人引以爲證，則後人爲誰？又胡爲而因高子之言以證此尸耶？《集傳》既知其誤，而又云：「此亦祭而飲酒之詩」。案詩云繹祭詳矣，飲酒則無一語及之，又何必沾沾必飲酒爲言也？姚氏曰：「且闕疑」，愚亦曰：「且闕疑也！」

【附錄】《集纂》曰：宗廟正祭之明日又祭曰繹。繹禮在廟門，而廟門側之堂謂之塾。今詩云「自堂徂基」，則基是門塾之基，蓋謂廟門外西夾室之堂基也，其爲繹祭明矣。天子宗廟正祭，小宗伯「視滌濯」祭之日，逆盥，省饌，告時告備於王。今詩言「絲衣」、「爵弁」之士，告濯具，告充，告潔，則非王祭而爲繹祭又明矣。《禮記》「爲祫乎外」注：「祫祭，明日之繹祭也。謂之祫者，於廟門之外因名焉。其祭之禮，既設祭於室，而事尸於堂。」是祫之與繹，一時之事。祫於廟門外之西室，繹又於其堂，而統名曰繹。疏引《頌·絲衣》篇證繹祭在堂事尸。士之省視，從堂上往於堂下之基，故曰「自堂徂基」。此又繹祭之明證矣。朱子辨《序》說以爲誤，而以爲亦祭而飲酒之詩，然未嘗指其爲何祭。但士而祭，祭而飲酒，何與於天子，而列之於《頌》耶？案：此云「繹祭」，而亦不以《集傳》爲然也。唯高子「靈星之尸」未說，則此詩終未明耳。姚氏際恒曰：「小序謂『繹、賓尸』，其非有三。天子、諸侯名『繹』，大夫名『賓尸』，此舊說，具見《春秋》、《儀禮》，今以『繹、賓尸』連言。一也。彼既以『賓尸』爲言，卽以『有司徹』證之，其云「壝堂，綴尸俎」，非別殺牲先夕省視也。今何以告濯、告充、告潔一如正祭乎？倭《序》之徒爲之說曰：「自堂徂基」，尸饌于門基，「自羊徂牛，鼎俎及簋」，羊先出而牛從之，鼎先出而簋從之。」意謂正祭日不卽徹，至繹之日始徹于門外。然則《詩》何以言「廢徹不遲」乎？卽《儀禮》果如是，亦不可據《儀禮》以解《詩》也。二也。據舊解，絲衣、爵弁爲士服，然何以天子之繹獨使士？鄭氏曰：「繹禮輕，故使士」，非杜撰禮文乎？三也。《集傳》不用「繹賓尸」之說，是已。但謂祭而飲酒之詩，甚混。鄭肇敏主蜡祭，亦臆測。故且闕疑。又曰：「序下有「高子曰：『靈星之尸也。』」按其言「尸」與「序」

同，其言「靈星」與「序」大異。古祭天地、日月、星辰、山川之屬無尸，其謂有尸者，妄也。孔氏曰：「漢郊祀志云：『高祖詔御史，其令天下立靈星祠。』史傳之說『靈星』，惟有此耳。未知高子之言是此否？而或者宗之，以爲祭靈星之詩。」愚按「漢志」張晏註，附會「靈星」卽「農祥」，故樂從其說者以爲卽祭農祥之星。孔謂漢高始立靈星祠，他史傳無見，則是漢人之語無疑，而詭託之高子者也。又案高子卽公孫丑所引論「小弁」之詩，而孟子所斥爲「固哉」者。無論其僞，卽使屬真，亦同爲固執而不可從矣。宋陳祥道宗之，而明之鄭氏、何氏，或竭力以證其說。甚矣，末世之好誣也！案：此關「靈星」之說，可謂盡矣。而謂「鐸、賓尸」不可連言者，過也。孔氏云：「天子、諸侯禮大，異日，爲之別爲立名，謂之爲鐸。卿、大夫禮小，同日，爲之不別立名，直指其事，謂之賓尸耳。此「序」言「鐸」者，是此祭之名；「賓尸」是此祭之事，故特詳言之也。」

【集釋】「絲衣」祭服也。【紕】潔也。【載】戴也。【弁】爵弁也，士祭于王之服。【條條】恭順貌。【基】門塾之基。【蕭】大鼎。【肅】小鼎。【思】語辭。【柔】和也。【吳】譁也。

【標韻】紕十一尤條、牛、鯨、柔、休並同本韻

### 酌 美武王能酌時宜也。

於鑠王師，遵養時晦。時純熙矣，是用大介。我龍受之，蹻蹻王之造。載用有嗣，實維爾公允師。

右《酌》一章，八句。此詩雖不用詩中字，而以「酌」名篇，其所言皆頌武王能酌時宜之意，義旨極明。不知《序》何以謂「能酌先祖之道以養天下也」。詩本云「養晦待時」，而《序》偏云「養天下」；詩本云「酌時措之宜」，而《序》偏云「酌先祖之道」，語語相反，何以解經？朱氏善曰：「方其『遵養時晦』，聖人非忘天下也，及其『是用大介』，聖人非利天下也。聖人無忘天下之心，亦無利天下之心，此所以爲聖人之武也。」數語頗得詩中要義。故或謂《左氏傳》以《武》爲《武》之卒章，以《賁》爲《武》之三，以《恒》爲《武》之六。《恒》、《賁》二篇既入《大武》，則此詩與《賁》、《般》皆一體，而獨不可以入《大武》乎？聖人編《詩》，《酌》、《賁》、《般》皆不用詩中字名篇，而皆同序於《周頌》之末，未必無意，特不知其所用之確，故難臆測耳。姚氏必駁《左傳》楚子之言，以爲「支離，不可信」，又安見其爲支離不足信哉！

## 【眉評】語雄健。

【附錄】姚氏際恒曰：《小序》謂「告成《大武》」，又謂「言能酌先祖之道以養天下也」。按《左》宣十二年，隋武子曰：「《酌》曰：『於鑠王師，遵養時晦』。《武》曰：『無競維烈』，明《酌》之與《武》，不得以此詩爲《大武》也。特以《左》宣十二年，楚子以「著定爾功」爲《武》之卒章，《賁》爲三章，《桓》爲六章，其說支離，未可信。杜預曰：「三、六之數與今《頌》篇次不同，蓋楚樂歌之次第」，其說當矣。不知者以楚子所云，缺一、二、四、五章，故以《酌》屬之《大武》耳。又《漢書·禮樂志》曰：「周公作《勺》、《勺》言能酌先祖之道也。」《序》似襲之，而增以「養天下」，其于詩之言「遵養」者亦不切，故《序》說皆不可用也。《集傳》云：「頌武王之詩，但不知所用」，此固關疑之意，然又云「《酌》及《賁》、《般》皆不用詩中字」。

名篇，疑取節樂之名，如云『武宿夜』云爾，其說亦支離。他詩篇名亦有不用詩中字者，又何居？  
『武宿夜』僅見于『祭統』，他經傳亦無見也。

【集釋】『鏜』盛也。『遵』循也。『熙』光也。『介』甲也，所謂『一戎衣』也。『龍』寵也。『蹕蹕』武貌。『造』爲也。『載』則也。『公』事也。

【標韻】師四支熙之並同圖四寅師支叶韻

### 桓 祀武王于明堂也。

綏萬邦，屢豐年，天命匪解。桓桓武王，保有厥士，于以四方。克定厥家，於昭于天，皇以聞之。

右『桓』一章，九句。『小序』謂『講武類禡』，亦未盡非，但不若鄭肇敏云『祀武王於明堂』之說爲較切耳。案『以聞之』之『聞』，『集傳』未詳其義，『毛傳』曰：『代也。』嚴氏曰：『『多方』云：『有邦聞之』。鄭氏駁之曰：『按『多方』之語曰：『乃惟有夏圖厥政，不集于享，天降時喪，有邦聞之。』蓋言夏喪邦而殷代之，與此處『聞之』不同。彼『之』字屬夏，此『之』字屬天，能左右之曰『以』。『於昭于天，皇以聞之』，蓋儼然以武配天也。愚意『桓』詩即明堂祀武之樂歌。此論甚是，不然，何云『皇以聞天』耶？蓋問天即參天之意，德可參天，故祭用配天，與文王並配上帝於明堂也。其序當次『我將』之後，而編之於此者，以連篇皆武詩故耳。若如『序』言，則只說得中數句，於首尾詩意皆不相涉。愚故舍『序』而從鄭

也。至《春秋傳》以此爲《大武》六章，或楚樂則然，本義恐不如是。《集傳》因此又疑今之篇次已失其舊。姚氏駁之曰：「《詩》三百五篇，經孔子手定，故曰『《詩》三百』，其無關失可知。又曰『《雅》《頌》各得其所』，則《雅》《頌》尤自無關失也。若如所云，是孔子從闕失之餘，撿拾其殘編斷簡而已，何以云『各得其所』耶？可謂不察而妄談矣。」案「《詩》三百」，非孔子所定，自季札觀樂時而已然矣。孔子正樂，是自衛反魯時，年已近七十。其平昔教人學《詩》，莫不曰「《詩》三百」，是「三百」之名，其來已舊，非至夫子而始有其名也。《集傳》固未見及於此，姚氏過信「得所」之言，遂得「三百篇」無一殘闕失次者，豈定論乎？現今《周頌》三十一篇，世序頗覺顛倒，不能有康、昭以後詩而越在文、武以前者，則又何說？蓋所謂「得所」者，夫子之時則然，豈秦火以後而亦得所耶？又況古樂既亡，《詩》篇僅存，其得失都無所考，姚氏能必三《頌》無一失所之樂章乎？此真所謂「不察而妄談」者矣，尚何反唇以譏人耶？愚非宗朱者，蓋論闕《詩》教，不能不辯以附於此云。

【集釋】「綏」安也。「桓桓」武貌。

【標韻】邦三江王七陽方同通韻 天一先聞十六緯叶韻

### 賚 武王克商，歸告文王廟也。

文王既勤止，我應受之。敷時繹思，我徂維求定，時周之命。於繹思！

右《賚》一章，六句。《小序》以爲「大封於廟」，而詩中無大封之義，凡爲之曲說者，皆倣《序》者也。蓋

詩以「賚」名篇，故依篇名以立說耳。姚氏云：「此等篇名實不知何人作，亦不知其意指所在，千載後人豈能測之，乃據此釋『詩』，可乎？」愚謂詩名不獨此數篇不以詩中字名篇者不可知爲誰作，即凡「三百」之以詩中字名篇者，又可知其爲誰作耶？竊意古人作詩，雖多不自立題，要亦未始盡無題者，特世遠年湮，又遭秦火，難復舊觀。故偶「序」得以竊出其間，此千秋一大疑案也。此詩既不從序說，自當以姚氏說爲當。蓋武王初克商，歸祀文王廟，大告諸侯所以得天下之意耳。其言曰：「『集傳』云，『此頌文、武之功，而言其大封功臣之意』，其言『大封功臣』，固不能出『序』之範圍，而云『頌文、武之功』，尤謬。此篇與下『殷』詩皆武王初有天下之辭，二篇皆無『武王』字，故知爲武王；又以詩中皆曰『時周之命』，是武王語氣也。此篇上言『文王』，下言『我』者，武王自我也。若謂頌文、武之功，則必作于成王，詩即無『武王』字，其云『我應受之』及『我祖維求定，時周之命』，豈成王語氣耶？『大凡說』詩，不可徒泥詩名及執『序』說，總以涵泳經文，求其意旨所在爲主。雖不能言皆有中，要亦十得八九。姚說此詩，蓋庶幾焉！」

【集釋】「應」當也。「敷」布也。「時」是也。「繹」姚氏際恒曰：「繹，聯續不絕意。思，語辭。布施是政，使之續而不絕，不敢倦而中止也。正對上『文王勤止』意。『我祖二句』姚氏際恒曰：『我祖維求定』二句，明是返商以求之辭，云我往而求定者，是周之所以受天命而得王也。〔於繹思〕姚氏際恒曰：『於繹思』，又重申己與諸侯始終無倦勤之意。」

【標韻】思四支思同本韻二「思」字自爲韻，本姚氏。

### 般 武王巡守祀嶽瀆也。

於皇時周！陟其高山，陟山喬嶽，允猶翕河。敷天之下，哀時之對，時周之命。

右《般》一章，七句。篇名諸家多未詳，或曰：「般，樂也。」鄭氏。或曰：「遊也。」蘇氏。又或以爲「般旋」，范氏。取盤旋之義，謂巡守而徧乎四岳，所謂盤旋也。皆以篇名解詩，意與上篇同蹈一弊。然此猶稍近焉。姚氏曰：「《小序》謂『巡守而祀四嶽河海』，近是。此亦武王之詩。《時邁》亦武王巡守。意彼之巡守，封賞諸侯，此則初克商，巡守柴望嶽瀆，告所以得天下之意，固在《時邁》之先也。《詩》原無次第，不得拘求之。」

【眉評】姚氏曰：「寫得精采。」

【集釋】《陸》《集傳》：「陟，山之狹而長者。何氏楷曰：『《爾雅》云：『陟山曰陟。』《說文》云：『山之陟陟者。』」  
〔翕河〕嚴氏粲曰：「禹貢：『河自大陸北播爲九河，同爲逆河。』注云：『同合爲一大河，名爲逆河。』然翕卽逆河也。〔哀〕聚也。〔對〕答也。」

【標韻】無韻

以上《周頌》下，凡十八篇。



# 詩經原始卷之十八

## 頌三

### 魯頌

《集傳》：魯，少皞之墟。在禹貢徐州蒙羽之野，成王以封周公長子伯禽，今襲慶、東平府、沂、密、海等州即其地也。成王以周公有大勳勞於天下，故賜伯禽以天子之禮樂。魯於是乎有《頌》，以爲廟樂。其後又自作詩以美其君，亦謂之《頌》。舊說皆以爲伯禽十九世孫僖公申之詩，今無所考。獨《閟宮》一篇，爲僖公之詩無疑耳。夫以其詩之僭如此，然夫子猶錄之者，蓋其體固列國之風，而所歌者乃當時之事，則猶未純於天子之頌。若其所歌之事，又皆有先王禮樂教化之遺意焉，則其文宜若猶可予也。況夫子魯人，亦安得而削之哉？然因其實而著之，而其是非得失，自有不可掩者，亦《春秋》之法也。姚氏際恒駁之云：按謂成王賜周公以天子之禮樂，此本《明堂位》之邪說。且因之謂「魯于是乎有《頌》，以爲廟樂」，此非揣摩杜撰之說乎？于是明知其無廟頌，謂「自作詩以美其君，亦謂之《頌》」，始指其實焉。然則以前何必爲此誣妄之說，多其曲折乎？又曰：「夫子因其實而著之，是非得失，自有不可掩者，亦《春秋》之法也。」嗟乎！豈不冤

哉？魯頌有何非何失？商、周之頌爲廟頌，惟天子有之，諸侯不得有也。今魯頌多變而爲頌其君上，若是，則天下之民可以頌天子，一國之民亦可以頌諸侯，安見諸侯之不可有頌而爲僭哉？謂夫子存魯頌所以彰君上之過，爲春秋之法，既冤魯，又冤夫子，吾誠不知其何心也！案姚氏駁集傳，謂夫子存魯頌爲春秋書法之謬，可謂痛快，足以爲夫子洗冤矣。然謂廟頌惟天子有之，諸侯不得而有，亦未盡然。夫頌者，所以頌功與德耳。非天子則功德必不盛，故頌惟天子有之。倘使諸侯盛德隆功，則何不可頌之有？既可頌君，即可告廟，又安見廟頌惟天子有之，諸侯不得而有耶？魯無大功德而有頌，且變爲頌君而非告廟，則其無大功德堪以告廟，不得不變而爲頌君之辭也可知。然未免近浮而夸矣。此頌之變也。頌既變爲此體，編詩者雖欲刪而除之，其可得乎？是編詩而存魯頌，非存魯之頌，乃存頌之變者耳。不然，周公爲魯受封始祖，其廟樂當有可歌，何以不存？而必存庸常無奇之僖公頌乎？且雅、頌雖正自夫子，而三百非定自夫子。夫子又何容心於其際耶？至魯用天子禮樂，爲「本明堂位」之邪說，則尤不可以不辯。明位固屬僞書，未可據以爲信，而論語「八佾舞於庭」之言獨不可信乎？夫使魯不用天子禮樂，則三家亦必無「八佾」之舞，三家既舞「八佾」，則魯用天子禮樂無疑。明堂位言「周公踐阼而朝諸侯」，此誠誣枉，至謂「成王賜魯以天子禮樂」，不爲無過。然在成王之心，則猶以爲不足酬周公之勳勞於生前也，故非虛也。集傳不謂其禮樂之僭，而獨謂其頌君之僭，姚氏不信明堂位之誣，而亦並忘論語「八佾」之舞，均屬夢夢，

可乎哉？

### 駟 喻育賢也。

駟駟牡馬，在坰之野。薄言駟者，有騶有皇，有驪有黃，以車彭彭。思無疆，思馬斯臧。一章  
駟駟牡馬，在坰之野。薄言駟者，有騶有駟，有騂有騏，以車伋伋。思無期，思馬斯才。二章  
駟駟牡馬，在坰之野。薄言駟者，有騶有駟，有騂有維，以車繹繹。思無斁，思馬斯作。三章  
駟駟牡馬，在坰之野。薄言駟者，有駟有騶，有鐔有魚，以車祛祛。思無邪，思馬斯徂。四章

右《駟》四章，章八句。此諸家皆謂「頌僖公牧馬之盛」，愚獨以爲喻魯育賢之衆，蓋借馬以比賢人君子耳。其爲頌魯何公不可知，但觀每章「思無疆」、「思無期」、「思無斁」、「思無邪」句，必非歎咏馬者。上四思字當屬馬言，下四思字乃屬牧人言。意謂德之良者，其智慮必深廣而無窮也；才之長者，其幹濟必因應而無方也；神之王者，其舉動必振興而無厭也；心之正者，其品行必端向而無曲也。此雖駟馬歌，實一篇賢才頌耳。不然，牧馬縱盛，何關大政，而必爲之頌，且居一國頌聲之首耶？竊意伯禽初封，人材必衆，故詩人假牧馬以頌育賢，爲一國開基盛事。其後東山、泗水間果多英賢，甲於列邦。編《詩》者追溯其原，實由於是，故以此篇冠《魯頌》之首，未必無所取意。其奈諸儒說《詩》，專以馬論馬，致滋多疑。或謂「頌僖公」，序與《集傳》或謂「美伯禽」，黃東發、李明德都無所考，焉有定論？頌

體本告成功，用之效廟，此獨虛頌馬德，以喻賢才，於朝廟無所用之，故又爲頌中變體，已開後世  
▲天馬歌、▲白馬篇等詩之先，故又不可不存，以備頌中一體也。

【眉評】一章馬之德。 二章馬之力。 三章馬精神。 四章馬志向。

【集釋】駟駟腹幹肥張貌。【坰】邑外謂之郊，郊外謂之牧，牧外謂之野，野外謂之林，林外謂之坰。【騶】驢馬白跨曰騶。【皇】黃白曰皇。【驪】純黑曰驪。【黃】黃驂曰黃。【彭彭】盛貌。【騅】蒼白雜毛曰騅。【駉】黃白雜毛曰駉。今之桃華馬也。【騂】赤黃曰騂。【騏】青黑曰騏。【伾伾】有力也。【騶】青驪驂曰騶。色有淺深，斑駁如魚鱗，今之連錢驄也。【駉】白馬黑鬣曰駉。【騊】赤身黑鬣曰騊。【維】黑身白鬣曰維。【駉】不絕貌。【駉】厭也。【作】奮起也。【駉】陰白雜毛曰駉。陰，淺黑色，今泥驄也。【駉】形白雜毛曰駉。【駉】豪肝曰駉。肝，膝下之名。【魚】二目白曰魚，似魚目也。馬之大病，故次在後。【祛祛】彊健也。【徂】行也。

【標韻】馬二十一馬野同本韻 皇七陽黃、彭、減並同本韻 駉四支騏、伾、期並同才十灰通韻 駉十寒維同韻十  
一陌駉同作葉叶韻 駉六麻魚六魚祛同邪麻徂盧叶韻

### 有駉 頌魯侯燕不廢公也。

有駉有駉，駉彼乘黃。夙夜在公，在公明明。振振鷖，鷖于下。鼓咽咽，醉言舞。于胥樂  
兮！一章有駉有駉，駉彼乘牡。夙夜在公，在公飲酒。振振鷖，鷖于飛。鼓咽咽，醉言歸。

于胥樂兮！二章有駉有駉，駉彼乘駟。夙夜在公，在公載燕。自今以始，歲其有。君子有穀，詒孫子。于胥樂兮！三章

右有駉三章，章九句。小序謂「頌僖公君臣之有道」。姚氏云：「頌僖公」，未有據。云「君臣之有道」，尤不切合。季明德以爲「美伯禽」，亦屬臆測，未有以見其然也。故集傳但以爲「燕飲而頌禱之辭」。然燕飲不忘在公，頌禱專稱歲有，既無怠政，又勿忘本，君臣同樂，所謂「有道」。唯其措詞過寬，致招譏刺，亦不善立言者之過耳。愚謂此詩因飲酒而稱頌，又開後世柏梁燕饗、賦詩獻頌之漸，與前虛頌良馬喻賢材者，別爲一體。故亦不可以不存也。唯頌何公，因何飲酒，則皆不可考。不必強爲之辯，然亦何必爲之深辯哉？

【集釋】「駉」馬肥強貌。「明明」辨治也。「振振鷖」姚氏際恒曰：「振振鷖」，亦興也。集傳以爲鷖羽之舞。下文「醉言舞」，始言舞事，不應先言舞器。又二章「醉言歸」，不言舞，上何以言舞器乎？「咽」與淵同，鼓聲之深長也。「駉」今鐵馳也。「載」則也。「有」有年也。「穀」善也。「詒」遺也。

【標韻】黃七陽明八庚轉韻 下二十一馬舞七虞叶韻 杜二十五有酒同本韻 飛五微歸同本韻 駉一先燕十七震叶韻 有有子四紙叶韻

## 泮水 受俘泮宮也。

思樂泮水，薄采其芹。魯侯戾止，言觀其旂。其旂茷茷，鸞聲噦噦。無小無大，從公于邁。

一章思樂泮水，薄采其藻。魯侯戾止，其馬蹻蹻。其馬蹻蹻，其音昭昭。載色載笑，匪怒伊教。二章思樂泮水，薄采其芣。魯侯戾止，在泮飲酒。既飲旨酒，久錫難老。順彼長道，屈此羣醜。三章穆穆魯侯，敬明其德。敬慎威儀，維民之則。允文允武，昭格烈祖。靡有不孝，自求伊祐。四章明明魯侯，克明其德。既作泮宮，淮夷攸服。矯矯虎臣，在泮獻馘。淑問如皋陶，在泮獻囚。五章濟濟多士，克廣德心。桓桓于征，狄彼東南。烝烝皇皇，不吳不揚。不告于訥，在泮獻功。六章角弓其觶，束矢其搜。戎車孔博，徒御無斁。既克淮夷，孔淑不逆。式固爾猶，淮夷卒獲。七章翩彼飛鴉，集于泮林。食我桑黽，懷我好音。憬彼淮夷，來獻其琛。元龜象齒，大賂南金。八章

右《泮水》八章，章八句。《小序》謂「頌僖公能修泮宮也」，《集傳》不言僖公，不信其能修，但以爲「飲於泮宮而頌禱之詞」。又云，「泮水，泮宮之水也，諸侯之學」，蓋雖不信其爲僖公之詩，而實指泮宮爲諸侯之學者也。「姚氏均兩闕之，以爲泮者，水名，諸侯作宮其上，謂之泮宮，非學也。自《王制》以辟雍爲天子之學，泮宮爲諸侯之學，漢儒承襲其偏，遂相沿以至於今。唯宋戴仲培、明楊用修始以爲非，其說誠然。又引許魯齋之言，謂此「頌伯禽之詩」，蓋伯禽有征淮夷，而爲齊執，明年九月乃得釋歸。詩言縱夸大，不應以醜爲善，至于如此也。愚案：是詩以爲「頌伯禽」者，近是。至泮宮爲學之說，未可盡非，當日作宮泮水，未必有意於學也；後世振興學校，或卽其地以開講堂，遂至相沿以爲典

制，更襲其名而不能改者，大都如是。卽如辟廱，其始亦不過文王苑囿遊獵之地，其後武王鎬京，則有事辟廱以爲學矣。鎬之辟廱，豈尚是豐之辟廱哉？楊、戴之論「泮宮」，蓋原其始作意耳；毛、鄭之釋「泮水」，乃因其成制言也。唯此時之泮水，則尚未可以爲學；以泮本水名，故宮曰泮宮，林曰泮林。乃始作宮於泮水之上，非如後儒所云泮之言半，到處學宮皆然也。魯侯既作泮宮，而征淮適來獻賦，故奏凱書勳，飲酒受俘。其地若已建學，則豈獻因獻功處哉？國家命將收功，自有廟廷重地，斷不至以元戎執訊獲醜，與諸生論道講學混而爲一。詩前半皆飲酒落成新宮，後半乃威服醜夷，故中間云「既作泮宮，淮夷攸服」，詩旨甚明。何《小序》僅釋前半文義，而《集傳》又以獻賦實事爲頌禱虛詞，豈不謬哉？

【附錄】姚氏際恒曰：「泮宮」，宋戴仲培、明楊用修皆以爲泮水之宮，非學宮。其說誠然。按《通典》載「魯郡泗水縣，泮水出焉」，泮爲水名可證。魯侯新作宮于其上，其水有芹藻之屬，故詩人作頌，因以采芹藻爲興，謂既作泮宮而淮夷攸服，言其成宮之後發祥而獲吉也。故飲酒于是，獻賦于是，獻因于是，獻功于是。末章乃盼泮水之前有林，而林上有飛鵲集之，因託以比淮夷之獻琛焉。通篇意旨如此。自《王制》以爲諸侯之學宮，此漢儒之說，未可信也。使「泮宮」爲諸侯學宮，則諸侯作學宮乃其常事，詩何以便謂使「淮夷攸服」乎？說者曰：「漢儒謂學者，以詩中『匪怒伊教』一語」。夫先之以「其馬蹢躅，其音昭昭」，不過晏遊之和樂耳。又「濟濟多士，克廣德心」，下卽繼以「桓桓于征，狄彼東南」，此自指從邁之多賢言，非關學也。又有四說可以直折其非。詩曰「泮水」，又曰「泮宮」，言泮水者，水

名也，言泮宮者，泮水之宮也，文義自明。名泮宮者，猶楚之渚宮，晉之廐祈之宮也。今解之者曰：「築水形如半壁，以其半于辟廡之水，而作字爲泮以名之」，何其展轉曲折，可笑之甚乎！若泮宮本爲泮水之宮，今以泮水爲泮宮之水，顛倒不順，一也。詩又曰「泮林」，明是泮水之林，今既以泮爲半壁之形，呼其林爲「泮林」，可通乎？亦將爲半林乎？二也。首曰「思樂泮水，薄采其芹」，猶之如「鸛鳴于桑，言采其芹」，于水澤之地多水草而云也。今以爲築土所製半壁之形，其水幾何？恐未必遂多芹藻之類。又此詩爲魯人所咏，言「思樂泮水，薄采其芹」，就泮水所有以興作泮宮之意，必當時魯人原得人而遊樂焉，故如此云。若以爲魯侯所製之泮水，則魯人安得思樂于此乎？故孔氏知其弊，爲之說曰：「此美僖公之修泮宮，述魯人之辭而云『思樂泮水』，故知泮水卽泮宮之外水也」。此因說「詩」者不順其義，故疏之者每致難通，必爲之迂回其說，以「泮水」爲「泮水之外」，試問詩言「思樂泮水」，固是思樂「泮水之外」否乎？三也。詩曰「從公于邁」，曰「魯侯戾止」，泮宮必在郊外之地，若夫學校，豈有不在國都中者？四也。此四者，人自不細心察耳。作「序」者祖述「王制」以說「詩」，而其言遂牢不可破。後人且繪辟廡爲全壁之形，泮宮爲半壁之形，俗語不實，流爲丹青，不信然乎？又「明堂位」：「頤，周學也」。《說苑》云：「泮，諸侯鄉射之宮」。鄭氏注《禮記》云：「頤，班也，所以班政教」。孔氏疏：「魯人有事于上帝，必先有事于頤宮」云：「謂于頤宮之中告后稷，將以配天也」。當時解「泮宮」者，又或以謂周學，或以謂諸侯鄉射之宮，或以謂后稷廟，而鄭氏亦復二三其說，可見原無一定之說如此。則安得信《王制》謂諸侯學，鑿然不可易哉！《集傳》知于僖公不合，故但曰「此飲于泮宮而頌禱之辭」，于第三



章下云：「此章以下皆頌禱之辭」，謂獻誠、獻囚、獻功、獻琛，皆是祝其未來事，尤堪絕倒。

【眉評】「八章」收尚堂皇典重。

【集釋】「蓂莢」飛揚也。【騶騶】毛氏甚曰：「其馬騶騶」，言彊盛也。【菲】集傳：「菲，艸也。葉大如手，赤圓而滑，江南人謂之蓂莢者也。」【長道】猶大道也。【屈】服也。【醜】衆也。【誠】所格者之左耳也。【狄】蘇氏轍曰：「狄，古遼通。」【東南】謂淮夷也。【不吳不揚】肅也。【不告于讒】不爭功也。【鯨】弓健貌。【束】五十矢爲束。【搜】矢疾聲。【無斃】言競勸也。【逆】違命也。【騶】桑實也。【憬】覺悟也。【琛】寶也。【元龜】尺二寸龜。【賂】遺也。【南金】荆、揚之金也。

【標韻】芹十二文旂四支叶韻 蓂九泰職同太同邁十卦叶韻 藻十九略騶十七篠昭同笑十八嘯教十九效叶韻 菲二十五有酒同老略醜有叶韻 德十三職則同本韻 武七虞祖、祐並同本韻 德職服一屋誠十一陌叶韻 陶蕭囚十一尤叶韻 心十二侵南十三覃通韻 皇七陽揚同本韻 訥二冬功一東通韻 鯨尤搜同本韻 斃陌逆、獲並同本韻 林侵音、琛、金並同本韻

校記

【一】「侯」字原奪，據文義補。

## 閼宮 美僖公能新廟祀也。

閼宮有恤，實實枚枚。直起。赫赫姜嫄，其德不回。溯源。上帝是依，無災無害，彌月不遲。

是生后稷，降之百福。黍稷重穰，植穰苴麥。奄有下國，俾民稼穡。有稷有黍，有稻有秬。奄有下土，續禹之緒。一章后稷之孫，實維大王，居岐之陽，實始翦商。至于文武，續大王之緒，致天之屆，于牧之野。無貳無虞，上帝臨女！敦商之旅，克咸厥功。王曰：「叔父，建爾元子，俾侯于魯。」大啟爾宇，爲周室輔。二章乃命魯公，俾侯于東。錫之山川，土田附庸。周公之孫，莊公之子，龍旂承祀，六轡耳耳。春秋匪解，享祀不忒。皇皇后帝，郊天。皇祖后稷，配以后稷。享以騂犧，牲是饗是宜，降福既多。周公皇祖，亦其福女！三章秋而載嘗，夏而福衡，白牡騂剛。犧尊將將，毛魚載羹，簋豆大房。《萬舞》洋洋，孝孫有慶。俾爾熾而昌，俾爾壽而臧！保彼東方，魯邦是常。不虧不崩，不震不騰。三壽作朋，如岡如陵。四章公車千乘，朱英綠縢，二矛重弓。公徒三萬，貝冑朱綬，烝徒增增。戎狄是膺，荆舒是懲，則莫我敢承。俾爾昌而熾，俾爾壽而富！黃髮台背，壽胥與試。俾爾昌而大，俾爾耆而艾！萬有千歲，眉壽無有害。五章泰山巖巖，魯邦所詹。奄有龜蒙，遂荒大東，至于海邦，淮夷來同。莫不率從，魯侯之功。六章保有鳧繹，遂荒徐宅，至于海邦，淮夷蠻貊，及彼南夷，莫不率從，莫敢不諾，魯侯是若。七章天錫公純嘏，挺接。眉壽保魯，居常與許，復周公之宇。總魯境一筆。魯侯燕喜，令妻壽母，宜大夫庶士，邦國是有。既多受祉，黃髮兒齒。八章徂來之松，新甫之柏，是斷是度，是尋是尺。松栢有鳥，路寢孔碩。新廟奕奕，新字是題。

中眉目。奚斯所作，監工之人。孔曼且碩，萬民是若。九章

右「閟宮」九章，四章章十七句，一章十六句，二章章八句，二章章十句。姚氏曰：章從《集傳》。《集傳》謂第四章脫一句，故謂「五章，章十七句」。今案第四章本無脫句，又正之。《小序》謂「頌僖公能復周公之宇也」。雖辭出於經，然與經異，且非詩旨。詩首尾皆以廟言，是「頌」爲廟祀作也，復土宇僅詩中一端，何以能賅全詩耶？「閟宮」「新廟」當是一事，但不知爲魯何廟。新之云者，或以爲作新之，或以爲修舊而新之，似皆可通。朱氏公遷曰：「但曰姜嫄廟，則不當及大王以下，曰閟公廟，則不當及周公皇祖以上，曰僖公廟，則詩正爲公祝頌之，僖固未嘗薨也。」姚氏主閟公廟言。《集傳》以爲魯之羣廟都不可考。唯嚴氏粲云：「《春秋》不書，則知其非大工役，止爲僖公能修寢廟，史臣張大其事而爲頌禱之辭，猶《斯干》之意耳。」斯言也差爲得之。不然，魯有大工役，豈無可考歟？竊意閟者，閉也，嚴肅之謂。凡廟皆然，不必姜嫄廟始稱「閟宮」，則其爲魯舊有之廟可知。至僖公始命奚斯葺而新之，詩人於是鋪張揚厲，發爲茲頌。以致後之儒者，多方考證，毫無實據，焉能符合？亦可哂也！詩洋洋鉅篇，詞雖多複，法實整飭。首二章歷叙源流，推本所自，是爲總冒。三章落到僖公，乃入正位。特題郊祀，爲魯生色。四、五兩章，一寫承祭，一寫征伐，皆極其稱揚，無中生有。六、七兩章，又就魯之境土，誇耀一番。八章總束「周公之宇」一筆，願祝其家人臣庶，可謂備矣。九章始言作廟取材於徂來、新甫二山，命重臣爲之監修，則規模崇煥，鄭重其役也可知。姚氏曰：「此《三百篇》中最爲長篇，然序近冗而辭亦趨美熟一路，文章風氣洵有升降也。」愚謂此詩褒美失實，制作又無關緊要，原不足存。其所以存者，以備體耳。

蓋頌中變格，早開西漢揚、馬先聲，固知其非全無關係也。

【眉評】「一章」題本因官作頌，故先總起，二句乃追溯祖德。 「二章」歷敘諸系，落到分封，乃全詩

總冒。 「三章」又由受封之始遞到僖公，乃是正位。魯用天子禮樂，得以郊天，故特題之。 「四章」

此頌其祭祀之誠，能以受福。 「五章」此頌其征伐之勞，能以昌大。皆虛詞溢美，開後世詞賦家虛

誇之漸。 「六、七章」就魯地特起有勢。 「八章」並及其家人臣庶。 「九章」點清作意，並應篇首

闕官及所作之人。

【集釋】「闕官」闕，深閉也。呂氏大臨曰：「闕官，魯廟，非姜嫄廟也。」「恤」清靜也。「實實」鞏固也。「枚

枚」蟄密也。「回」邪也。「植」先種曰植。「穡」後種曰穡。孔氏穎達曰：「重穡、植穡」，生熟早晚之異

稱，非穀名。「翦商」周之克商，雖非大王，推其克商之由，實自大王始。「屆」極也。「敷」治之也。「王」

成王也。「叔父」周公也。「元子」魯公伯禽也。「附庸」猶屬城也。「莊公之子」僖公也。「耳耳」柔從

也。「忒」差也。「后帝后稷」孔氏穎達曰：「明堂位」稱成王以周公爲有大勳勞於天下，是以魯君祀於

郊帝，配以后稷，天子之禮也。是成王命魯郊天亦配以后稷之事。朱氏公遷曰：「天子以冬至祭天。魯，

諸侯也，不敢純用天子之禮，故用夏之正月。冬至，陽之始，正月，歲之始也。姚氏際恒曰：「此祈穀之

郊，非冬至之郊也。祈穀之郊，諸侯皆得行之。」「騂犧」騂，赤也。犧，純也。周色尚赤，魯以天子命

郊，故以騂。「嘗」秋祭也。「福衡」集傳：「福衡，施於牛角，所以止觸也。」周禮：「封人」云：「凡祭，飾

其牛牲，設其福衡」是也。秋將嘗而夏福衡其牛，言夙戒也。「白牡騂剛」何氏楷曰：「剛，通作綱。孔

氏穎達曰：「公羊傳云：『周公用白牡，魯公用騂犂。』」說文云：「犂，特也。」白牡謂白特，騂犂謂赤特也。姚氏際恒曰：「白牡騂犂，見周亦不專用騂，言其無不備也。且以白騂成文，猶後言『朱英絲膝』之意。」毛傳遂謂「白牡，周公牲；騂犂，魯公牲」。鑿說也，何據而分之耶？「集傳」復爲之說曰：「白牡，股牲也。周公有王禮，故不敢與文、武同。魯公則無所嫌，故用騂犂。」尤爲飾說。此絕類三家村老人說古事，毫無稽據也。「犧尊」王氏肅曰：「太和中，魯郡於地中得齊大夫子尾送女器，有犧尊，以犧牛爲尊也。馮氏復京曰：『宋蔡條云，徽宗崇尚古器，政和間尚方所貯盡三代冢墓中物，今博古圖所載是也。其犧尊正如王肅所言，全作牛形，開背受酒。則阮瞻之言殆臆度耳。』」毛魚「周禮·封人」：「祭祀有毛魚之豚，」注：「燂去其毛而魚之也。」「羹」集傳：「羹，大羹，鉶羹也。大羹，太古之羹，泔煮肉汁不和，盛之以登，貴其質也。鉶羹，肉汁之有菜和者也。盛之鉶器，故曰鉶羹。」大房「集傳」：「大房，半體之俎，足下有附，如堂房也。」萬「舞名」。「三壽」集傳：「或曰，顯公壽與岡陵等而爲三也。」千乘「集傳」：「千乘，大國之賦也。成方十里出革車一乘，甲士三人，左持弓，右持矛，中人御。步卒七十二人。將重車者二十五人。千乘之地則三百十六里有奇也。」朱英「所以飾矛」。「綠騰」所以約弓。「二矛」夷矛、酋矛也。「重弓」備折壞也。「徒」步卒也。「貝冑」貝飾冑也。「朱綬」所以綴也。「增增」衆也。「龜蒙」二山名。曹氏粹中曰：「龜則鄭之龜山，蒙則費之東蒙山。案：蒙山卽東山。」「鳧繆」二山名。「宅」居也。「若」順也。「常」集傳：「常或作嘗，嘗在薛之旁。」許「集傳」：「許，許田也，魯朝宿之邑也。皆魯之故地，見侵於諸侯而未復者，故魯人以是顯愷公也。」令妻壽母「集傳」：「令妻，令善。」

之妻，聲姜也。壽母，壽考之母，成風也。閔公八歲被弑，必是未娶，其母叔姜，亦應未老，此言「令妻壽母」，又可見公爲僖公無疑也。〔兒齒〕齒落更生細者，亦壽徵也。〔徂來新甫〕二山名。〔烏〕大貌。〔路寢〕正寢也。黃氏佐曰：路寢在廟之後，所以藏衣冠。〔新廟〕鄭氏康成曰：修舊曰新。劉氏瑾曰：卽前闕宮也。〔奚斯〕公子魚也。孔氏穎達曰：奚斯爲之主帥，教令工匠，監護其事，屬付功役，課其章程而已。〔曼〕長也。〔碩〕大也。〔萬民是若〕順萬民之望也。

【標韻】枚十灰回同本韻 依五微遲四支通韻 稷十三職福一屋穆同麥十一陌國職同叶韻 黍六語柜同土七庚緒語通韻 王七陽陽、商並同本韻 武庚緒語野二十一馬女語旅同父庚魯、宇、輔並同叶韻 公一東東同庸二冬通韻 子四紙祀、耳並同本韻 忒職稷同本韻 犧四支宜同本韻 祖廣女同本韻 營陽衡八庚剛陽將同義庚房陽洋、慶、昌、咸、方、常並同轉韻 崩十蒸騰、朋、陵並同本韻 滕蒸綬十二侵增蒸膺、懲、承並同通韻 熾真富二十六宥試真叶韻 大九泰艾、害並同本韻 巖十五咸詹十四鹽通韻 蒙東東、同並同從二冬功東通韻 繹陌宅、貊並同本韻 諾十藥若同本韻 緬馬魯虞許語字、字虞通韻 喜紙母二十五有士紙有有祉紙齒同叶韻 柏陌度藥尺、烏陌碩藥奕陌作藥碩、若並同叶韻

以上《魯頌》，凡四篇。案是册名雖曰《頌》，而《廟》實近雅，《有騶》、《泮水》則兼風，《閟宮》不惟體類大雅，且

開漢賦之先，是《詩》變爲《騷》，《騷》變而賦之漸也。又況《廟》本虛頌，《有騶》徒飲酒，《泮水》雖受俘，《閟宮》亦祭祀，而皆以新宮告成，不免虛張，褒美失實。其所謂「美盛德之形容，以其成功告於神明者」，果安在哉？然後世之所謂「頌」者，又專學此體而未至焉者也。則何怪編《詩》者之取以《廟》、《頌》聲之末，而猶可彷彿於文、武、成、康之遺

意哉！

## 商頌

《集傳》云，契爲舜司徒，而封於商，傳十四世，而湯有天下。其後三宗迭興，及紂無道，爲武王所滅。封其庶兄微子於宋，修其禮樂以奉商後。其地在禹貢徐州泗濱，西及豫州盟豬之野。其後政衰，商之禮樂日以放失。七世至戴公時，大夫正考甫得商頌十二篇於周大師，歸以祀其先王。至孔子編詩而又亡其七篇。然其存者亦多闕文疑義，今不敢強通也。楊子亦疑商頌爲正考父所作。姚氏曰，商頌五篇，文字風華高貴，高質樸于敷腴，運清緩于古峭，文質相宜，允爲至文。孰謂商尚質耶？妄夫以爲春秋時人作，又不足置辯。虞廷賡歌，每句用韻。商頌多爲此體，正見去古未甚遠處。又曰：《集傳》云「多闕文疑義，今不敢強通」。按商頌無闕文，亦無疑義。後於殷武第三章下云，疑脫一句。《集傳》所謂「多闕文」者，惟此而已。愚案之果然。然商頌之編，不始於孔子。頌之名，自商始有之。蔣氏惺生曰，樂之作，自黃帝時已有之。藝之樂，神人以和。祭祀有樂，虞夏時皆然，但頌之名始於商耳。說者謂夏之篇章混棄，惟商有頌。及魯、宋無風，乃王者聖人之後，天子巡守，不敢陳其風，聖人因取魯、商二頌以附周頌之末，所以褒周公後比於先代之說，皆妄談也。又或謂孔子殷人而生於魯，存魯與商二頌，不忘其所生之意。均皆以私意測聖人，況詩又非夫子所定歟？愚謂頌之體始

於商，而盛於周。魯，其末焉者耳。然必合三詩而其體始備，亦猶後世之論唐詩有盛、中、晚三唐之分，此三頌之體所由辨也。而乃先周而後商者，何哉？蓋先周者，尊本朝；後商者，溯詩源，編詩體例應如是耳。至雅頌得所，在乎音節，不在此例。讀者亦可無疑義於其中也歟？

### 那 祀成湯也。

猗與那與，置我鞀鼓。奏鼓簡簡，衍我烈祖。湯孫奏假，綏我思成。鞀鼓淵淵，嘒嘒管聲。既和且平，依我磬聲。於赫湯孫，穆穆厥聲！庸鼓有數，萬舞有奕。我有嘉客，亦不夷憚。自古在昔，先民有作，溫恭朝夕，執事有恪。顧予烝嘗，湯孫之將。

右「那」一章，二十二句。「小序」以爲「祀成湯」，諸家從之。但不知何王所祀，然亦不必深考也。鄭氏必以爲太甲，金燦氏必以爲武丁，皆屬臆測，亦徒辭費，何必然哉？然詩雖祀湯，而不言湯之功德，獨舉鞀鼓管磬庸鼓之聲與「萬舞」之奕者，則又何故？說者謂商人尚聲，聲之盛是德之盛也。湯之功德，自有「大濩」之樂，此所謂聲，卽「大濩」之聲耳。凡聲屬陽，故曰樂由陽來。首章是將祭之時，先作樂以求神，亦如周人取蕭祭脂之意。「記」曰：「臭味未成，滌蕩其聲，樂三闋，然後出迎牲」是也。全詩辭意與周之「有瞽」備舉諸樂以成文者，亦復相類。第彼以作樂合祖，「永觀厥成」，是樂之終；此以聲音詔神，冀其來享，是樂之始。而又曰「綏我思成」者，是求神雖以聲爲先，而格神仍以思作主耳。



陳氏際泰曰：「商人尊鬼而尚聲。聲者，所以詔告於天地之間。聲召風，風召氣，氣召神。懼其雜而集焉，則有湯孫之思矣。思者，氣之精者也。鬼神非其類也，不至，心有精氣而借聲以召之，神無不格矣。」此可謂深得詩人大旨者也。朱氏善又曰：「湯孫奏假，綴我思成」始焉，人固因樂以致其感格之效也。『於赫湯孫，穆穆厥聲』終焉，樂復因人而成其和聲之美也。至於鑄鼓之數數然而盛也，『萬舞』之奕奕然有次序也，則不特幽有以感乎神，而嘉賓在位，亦無不夷懌者矣。此又人神交感，實合聲與思而一以致之。音聲之道，豈不微哉？是故審音以知樂，觀樂而知德。非湯盛德，孰克當此？故『商頌』以『那』爲首者，此爾。

【集釋】『猗歎美之辭。』〔那〕多也。美之不足，又嗟歎而多之也。〔置〕陳也。〔簡簡〕和大也。〔衍〕樂也。〔烈祖〕湯也。〔湯孫〕湯之孫，自大甲以下之時王皆是也。〔假〕與格同。〔綴〕安也。〔思成〕集傳：鄭氏曰：「安我以所思而成之人，謂神明來格也。」〔禮記〕曰：「齊之日，思其居處，思其笑語，思其志意，思其所樂，思其所嗜。齊三日，乃見其所爲齊者。」祭之日，入室，僂然必有見乎其位。周旋出戶，肅然必有聞乎其容聲。出戶而聽，愀然必有聞乎其歎息之聲。此之謂思成。蘇氏曰：「其所見聞本非有也，生於思耳。」此二說近是。蓋齊而思之，祭而如有見聞，則成此人矣。〔淵淵〕深遠也。〔嘒嘒〕清亮也。〔磬〕姚氏際恒曰：磬，鄭氏謂玉磬，未然。磬有玉，有石，古人隨用，何以知其爲玉磬乎？孔氏因以爲非石磬，要是倣說。夫樂惟有八音，今分玉石，不成有九音耶？〔集傳〕周以『磬』爲堂上升歌之樂，尤謬。磬在堂下，玉石同之，決無玉磬在堂上，石磬在堂下之理。堂上之樂以笙爲主，堂下

之樂以磬爲主。故《小雅》笙、磬同音，此云「依我磬聲」也。《庸》鋪通。《敦》盛也。《奕》有次序也。

〔嘉客〕先代之後來助祭者也。〔夷〕悅也。〔恪〕敬也。〔將〕奉也。

【標韻】鼓七虞祖同本韻 成八庚聲、平、聲並同本韻 敦十一陌奕、客、擇並同本韻 昔陌作十藥夕陌恪藥叶韻

嘗七陽將同本韻

### 烈祖 祀成湯也。

嗟嗟烈祖！有秩斯祜，申錫無疆，及爾斯所。既載清酤，賚我思成，亦有和羹，既戒既平。釐假無言，時靡有爭。綏我眉壽，黃耇無疆。約軼錯衡，八鸞鸛鶴。以假以享，我受命溥將。自天降康，豐年穰穰。來假來饗，降福無疆。顧予烝嘗，湯孫之將。

右《烈祖》一章，二十二句。姚氏曰：「《小序》謂『祀中宗』，本無據，第取別于上篇，又以下篇而及之耳。然此與上篇末皆云『湯孫之將』，疑同爲祀成湯，故《集傳》云然。然一祭兩詩，何所分別？輔氏廣曰：『《那》與《烈祖》皆祀成湯之樂，然《那》詩則專言樂聲，至《烈祖》則及于酒饌焉。商人尚聲，豈始作樂之時則歌《那》，既祭而後歌《烈祖》歟？』此說似有文理。」愚案，周制，大享先王凡九獻，商制雖無考，要亦大畧相同。每獻有樂則有歌，縱不能盡皆有歌，其一獻降神，四獻、五獻酌醴、薦熟，以及九獻祭畢，諸大節目，均不能無辭。特詩難悉載，且多殘闕耳。前詩專言聲，當一獻降神之曲；此詩兼言清酤和羹，其五獻薦熟之章歟？不然，何以一詩專言聲，一詩則兼言酒與饌耶？此可以知其各

有專用，同爲一祭之樂，無疑也。

【集釋】「烈祖」湯也。「秩」常也。「醴」中庸作奏，正與上篇意同。「約軹錯衡」見采芑篇。「鶴」見載見篇。「溥」廣也。「將」大也。「穰穰」多也。

【標韻】祖七虞姑同所六語通韻 成八庚羹、平、爭並同本韻 疆七陽鶴、將、康、穰、疆、嘗、將並同本韻

### 玄鳥 祀高宗也。

天命玄鳥，降而生商，宅殷土芒芒。古帝命武湯，正域彼四方。方命厥后，奄有九有。商之先后，受命不殆，在武丁孫子。武丁孫子，武王靡不勝。龍旂十乘，大糴是承。邦畿千里，維民所止，肇域彼四海。四海來假，來假祈祈。景員維河，殷受命咸宜，百祿是何。

右「玄鳥」一章，二十二句。「序」謂「祀高宗」，而「集傳」不之信，故泛以爲「祭宗廟」之詩。然詩前半追述湯之「奄有九有」，後半歸重武丁之中興，能「肇域彼四海」，以復成湯之舊，辭意俱極顯然，尚何疑哉？若泛言祭宗廟，而「武丁孫子」又將誰屬？殷至武丁後，別無顯王可當斯「頌」。所謂「孫子」者，武丁也。對湯言，故曰「孫子」。如必泥孫子爲主祭時王，則「武王靡不勝」之言，未有自祭而自贊之理。故諸儒多是「序」而非朱者，此也。「天命玄鳥，降而生商」，「毛傳」云：「玄鳥，貺也。春分玄鳥降。湯之先祖有娥女簡狄配高辛氏帝，帝率與之祈于郊禱而生契，故本爲天所命，以玄鳥至而生焉。」自「呂覽」好爲附會，遂以爲吞黿卵而生，「史記」從之，鄭氏更本以說經。蓋因姜嫄有履迹生稷之異，故並

此亦以爲妃卵所生，是何天之好異，而古聖之生如出一轍哉？夫履迹而生，亦偶然之事，豈可襲以爲常？彼蓋秉天地陰陽之和，適與兩間靈異相感觸，故一遇而成胎，雖非人道之常，實亦天靈所聚，乃獨鍾爲異產。若夫妃卵，則何靈異之有？縱使靈異，亦禽種耳，豈可以是經聖人哉！大凡詩人造語，故作奇異，借以驚人。不謂後儒信以爲真，豈堪一嘆？且簡狄與姜嫄同配帝嚳，姜嫄祀郊禘，簡狄亦祀郊禘，文章犯複，其爲附會，不言可知。詩骨奇秀，神氣渾穆，而意亦復雋永，實爲三頌壓卷。周詩所不能及，況在魯頌？而揚子雲猶以爲春秋時人作者，何哉？

【眉評】意本尋常，造語特奇。遂使小儒咋舌，驚爲怪事，創爲無稽妄談。皆不知詩人「語不驚人死不休」之過也。

【集釋】「芒芒」大貌。「帝」上帝也。「武湯」湯有武德，故號之也。「正」治也。「域」封境也。「方命厥后」四方諸侯無不受命也。「九有」九州也。「武丁」高宗也。「肇」開也。「假」與格同。「景員維河」姚氏際恒曰：「景員維河」，朱鬱儀曰：「湯有景亳之命，高宗亦自河徂亳，此云「景員維河」，殷受命咸宜」，舉湯暨武丁會諸侯之地而言也。員與云通，語助辭。」【集傳】云：「員與下篇「幅隕」義同，蓋言周也。河，大河也。言景山四周皆大河也。殷氏絜曰：「武丁至庚丁八世，皆居亳。此詩所言河，正指亳也。亳有三，蒙爲北亳，穀熟爲南亳，偃師爲西亳。湯自南亳遷西亳，盤庚所遷，卽西亳偃師是也。」【何】「集傳」何，在也。「春秋傳」作荷。

【標韻】商七陽芒、湯、方並同本韻 后二十五有同本韻 殆十脂子四紙通韻 勝十蒸乘、承並同本韻 里紙止

同海賄通韻 祈五微宜四支通韻 河五歌何同本韻

## 長發 大禘也。

濟哲維商，長發其祥。洪水芒芒，禹敷下土方。外大國是疆，幅隕既長。有娥方將，帝立子生商。一章玄王桓撥，受小國是達，受大國是達。率履不越，遂視既發。相土烈烈，海外有截。二章帝命不違，至于湯齊。湯降不遲，聖敬日躋。昭格遲遲，上帝是祗。帝命式于九圍。三章受小球大球，爲下國綴旒。何天之休，不競不綽，不剛不柔。敷政優優，百禄是遒。四章受小共大共，爲下國駿廐。何天之龍，敷奏其勇，不震不動，不懋不疎。百禄是總。五章武王載旆，有虔秉鉞，如火烈烈，則莫我敢曷。苞有三蘂，莫遂莫達。九有有截，韋顧既伐，昆吾夏桀。六章昔在中葉，有震且業。允也天子，降予卿士。實維阿衡，實左右商王。七章

右《長發》七章，一章八句，四章章七句，一章九句，一章六句。《序》曰：「大禘也。」諸儒皆疑之。《禮記》曰：「王者禘其祖之所自出，以其祖配之。」今詩唯上及契，而不及契之所自出；下及湯，而不及羣廟之主。中間雖言相土，相土未稱王，不得有廟。故欲以爲禘，而無祖所自出之帝，欲以爲禘，而無羣廟合食之文。《集傳》「疑爲禘祭」，與鄭氏「郊祭天」之說，固屬非是。卽姚氏、何氏之主禘祭者，亦多曲爲之。

說，非真知詩意者也。何、姚二說附後。唯楊氏云：「《詩·頌·長發》大禘，但述玄王以下而不及於所自出之帝，則安得謂之禘詩？今案篇首即以『長發其祥』一語開端，明是指帝嚳而言，未嘗不及於所自出之帝也。豈必舉嚳之名而後謂之及嚳耶？」然愚案，詩明言「有娥方將，帝立子生商。」娥子者，契也。契所自出者，娥氏女也。言娥女即言帝嚳也。詩固有意到而筆不到者，此類是已。又況古人文字，類多簡質，如《思文》本以后稷配天，而文不及天，自不失爲郊天之文，又何疑於此詩禘其祖所自出，而不及於祖所自出之人乎？又朱氏善曰：「有商受命之祥，雖在於濬哲相繼之時，而有商受命之基，實定于有娥生商之日。必言有娥者，以契固商人之所由生，而有娥又商之所自出也。」此可見詩言有娥生商者，並非泛言所自出而已。蓋倒裝文法，先言契而後及其所自出耳。若使先從有娥敘起，如前篇「玄鳥生商」，順勢直下，則禘義自明。然天下豈有此刻板文法，篇篇一例耶？諸儒不於此細察，妄生議論，真可怪也！此首章之義也。若至篇末，兼頌功臣，實維阿衡。《書·盤庚》篇曰：「茲予大享于先王，爾祖其從與享之。」此非大禘證乎？何至疑爲禘祭也與郊祭天也耶？序曰「大禘」，可無疑矣。

【附錄】何氏楷曰：漢儒皆以大禘爲合祭羣廟，程子、胡致堂皆從其說。而趙、楊泥《大傳》中「以其祖配之」一語，謂禘祭推始祖之所自出，其配之者，惟始祖一人而已。朱子亦以爲然。今據《大傳》本文曰：「禮：不王不禘。王者禘其祖之所自出，以其祖配之。」諸侯及其太祖，大夫、士有大事，省于其君，干祿及其高祖。」馬端臨謂，玩其文意，亦似共只說一祭，天子則謂之禘，及其祖之所自出。諸侯所

祭，止太祖。大夫、士有功勞，見知於君，許之祿，則干祿可及高祖。蓋共是合祭祖宗，而以君臣之故，所及有遠近也，蓋禘之爲言，諦也。一則如宋神宗謂「審諦其祖之所自出」，一則如許慎爲「審諦昭穆」，張純謂「諦諦昭穆尊卑」之義是也。斯則大禘之禮，七廟之祖皆在，亦以明矣。又曰：此詩末章舉及阿衡，正配享太廟之事，固大禘之一證也。《書·盤庚》篇「茲予大享于先王，爾祖其從與享之」。《周禮·司尊彝》云：「凡四時之間祀，追享朝享。」先儒謂禘追其所自出，故爲追享；祿，羣主皆朝於太廟，故爲朝享。禘、祿皆以享名，而禘尤大於祿，故以大享名也。《盤庚》言功臣配享，正大享之時。則《序》以「長發」爲大禘，信非妄矣。何休亦云：「禘所以異於祿者，功臣皆祭也。」姚氏際恒曰：《小序》謂「大禘」，說者謂禘則功臣與祭，徵之于《盤庚》曰：「茲予大享于先王，爾祖其從與享之」。詩末有阿衡之語也。案禘者，據《禮》文，「禘其祖之所自出，以其祖配之」。今惟言契而不言契之所自出，似非禘矣。《集傳》謂「今案，大禘不及羣廟之主，此疑爲祿祭之詩」。彼意似謂禘不及羣廟之主，惟祿及之，然詩中未嘗有及羣廟之主語。相土未爲王，無廟也，豈認相土爲廟耶？更難曉。愚按祿祭之說，更不如禘，抑或商之禘不必所自出耶？案：以上二說皆主禘祭，於詩末功臣與祭之說，皆確而有據。唯於詩首無所自出之文，均未能確有所見，故多遷就其說以合經，豈能使人信而不疑哉？

【集釋】「潘」深也。【哲】知也。【幅】猶言「邊幅」也。【隕】讀作員，謂周也。【有娥】契之母家也。【將】大也。【玄王】《集傳》玄王，契也。玄者，深微之稱。或曰，以玄鳥降而生也。王者，追尊之號。【桓】武也。【撥】治也。【達】通也。【受小國二句】授之以國政，無不能達。【相土】契之孫也。王氏質曰：契之

後，湯之前，十三傳。而獨舉相土一人，左氏謂「閼伯居商丘，相土因之」，是最盛者也。〔截〕整齊也。〔湯齊〕蘇氏轍曰：至湯而王業成，與天命會也。〔九國〕九州也。〔大球小球〕鄭氏康成曰：小球，鎮圭，尺有二寸。大球，大圭，三尺也。皆天子之所執也。〔下國〕諸侯也。〔綴旒〕何氏楷曰：綴，鄭云，「結也」。旒，毛云，「章也」。章爲冕飾，襄十六年公羊曰：「君若綴旒然」，言諸侯反繫屬於大夫。此言綴旒，與彼意相似，而詞有正反之異。湯爲冕，下國爲綴旒者，取其相繫屬之義也。〔何〕荷也。〔競〕強也。〔綵〕綴也。〔優優〕寬裕之意。〔道〕聚也。〔小共大共〕蘇氏轍曰：共，珙通，合珙之玉也。郝氏敬曰：共，供通。嚴氏粲曰：萬邦惟正之供。案：二說皆可通。〔駿厯〕何氏楷曰：說文：「厯，石大貌」。爲下國駿厯者，下國恃湯以爲安，如倚賴于磐石然也。齊詩以「駿厯」作「駿驪」，謂馬也。以馬比先王，不倫甚矣。〔懋〕恐也。〔竦〕懼也。〔武王〕湯也。〔曷〕過通。或曰：曷，誰何也。〔苞〕蘖五句。〔集傳〕苞，本也。蘖，旁生萌蘖也。言一本生三蘖也。本則夏桀，蘖則韋也，顧也，昆吾也，皆桀之黨也。鄭氏曰：「韋，彭姓。顧，吾昆，己姓。」言湯既受命，載旆秉鉞，以征不義。桀與三蘖，皆不能遂其惡，而天下截然歸商矣。初伐韋，次伐顧，次伐昆吾，乃伐夏桀，當日用師之次序如此。〔葉〕世也。〔業〕危也。〔阿衡〕伊尹官號也。

【標韻】商七陽祥、芒、方、疆、長、將、商並同本韻 撥七曷達、達同越六月發同烈九屑截同通韻 達五微齊八齊遲四支賄齊遲支祇同圖微通韻 球十一尤旒、休、綵、柔、優、道並同本韻 共供通，二冬。厯三江龍同韻，二腫。勇同動一董竦總董叶韻 旒九泰鉞月烈屑曷七曷曷屑達曷截屑伐月桀屑叶韻 葉十六業業十七洽叶韻 子四



### 殷武 高宗廟成也。

捷彼殷武，奮伐荆楚。深入其阻，哀荆之旅，有截其所。湯孫之緒。一章維女荆楚，居國南鄉。昔有成湯，自彼氐羌，莫敢不來享，莫敢不來王，曰商是常。二章天命多辟，設都于禹之積。歲事來辟，勿予禍適。稼穡匪解。姚氏曰：「此句無韻，或脫下一句。」《集傳》謂《商頌》多闕文，然亦惟此耳。○三章天命降監，下民有嚴。不僭不濫，不敢怠遑。命于下國，封建厥福。四章商邑翼翼，四方之極。赫赫厥聲，濯濯厥靈，壽考且寧，以保我後生。五章陟彼景山，松柏丸丸。是斷是遷，方斲是虔，松栢有槲，旅楹有閑。寢成孔安。六章

右《殷武》六章，三章章六句，二章章七句，一章五句。劉氏瑾曰：「篇內第三章爲五句，朱子疑其脫一句。則此時當作四章，章六句，二章，章七句。」《小序》曰：「祀高宗也。」《玄鳥》既祀高宗矣，而此詩又祀高宗，何哉？劉氏瑾曰：「《商書》曰：『七世之廟，可以觀德。』蓋天子七廟，三昭三穆與太祖之廟而七。八世、九世而後，隨其昭穆親盡，遞遷其主而祧於太祖之廟。其有功德之君，則後世宗之，雖親盡而不祧，別立百世不遷之廟，而特祔其主焉。凡有功德者皆然，初不可預限其數。而商則止有三宗，高宗即其一也。」今觀詩詞，首章稱高宗伐楚爲中興顯烈，二章則述戒楚之詞，三章諸侯來朝，四章所受命中興之故，五

章極言其盛，六章乃作廟以安其靈〔一〕。然則此固高宗百世不遷之廟耳。廟既落成，故拊其主而祭之，與玄鳥又異也。或疑商時無楚，遂謂此詩爲春秋時人作。殊不知禹貢荆及衡陽爲荊州，楚卽南荆也。其後成王封熊繹於荊國，以地名，非今日之所謂楚。詎得以是而疑之哉？又況易稱高宗伐鬼方，三年克之，與此詩「桀人其阻」者合。鬼方，今之烏蠻，楚屬國也。其俗尚鬼，故曰鬼方。說者謂驗諸屈原九歌。可見高宗之功，當以此爲最，故詩首述之。郝氏敬曰：「荆楚之國，天下有道則首善焉，文王之『二南』是也；無道則首叛焉，商、周之中葉是也。繼世之王，有能中興者，則天下視此爲向背焉。高宗之『殷武』，周宣之『采芑』是也。」然則高宗有廟，子孫之所以酬報之者，不亦宜哉？

△國宮卒章與此畧同，蓋襲之也。奚足疑？且魯更新，此始作，尤大異歟！

【集釋】〔捷〕疾貌。曹氏粹中曰：言其兵威神速。〔殷武〕殷王之武也。〔桀〕姚氏際恒曰：桀，毛傳作深，是訓冒者，未然。易稱「高宗伐鬼方，三年克之」，此詩云「桀人其阻」，與之合，可見非暫事也。〔哀〕聚也。〔湯孫〕謂高宗。〔氏羌〕孔氏穎達曰：氏、羌之種，漢世仍存，其居在秦、隴之西。〔享〕獻也。〔王〕世見曰王。孔氏穎達曰：遠夷一世而一見於王。秋官·大行人云：「九州外謂之蕃國，世一見。」謂其父死子繼，及嗣王卽位，乃來朝，謂之世見也。〔多辟〕諸侯也。〔來辟〕來王也。〔適〕郝氏敬曰：責，讓也。蓋適、謫通。〔僭〕賞之差也。〔濫〕刑之過也。〔遑〕暇也。〔封〕大也。〔商邑〕王都也。〔翼翼〕整敕貌。〔極〕商所都之山名。衛詩亦言「景山」，乃商舊都也。〔九丸〕圓直也。〔遷〕徙也。徐氏常吉曰：斷，是斷之於景山之上；遷，是遷之於造作之所。〔方〕正也。〔虔〕敬也。季氏本曰：如虔劉之

虔。〔挺〕長也。〔旅〕衆也。孔氏穎達曰：言爲楠與衆極，故訓旅爲衆。〔閑〕大也。〔寢〕廟中之寢也。

何氏楷曰：《閔宮》篇詠廟新，亦但舉路寢，則此可類推矣。〔安〕所以安高宗之神也。

【標韻】武七虔楚六脂阻、旅、所、緒並同通韻 鄉七陽湯、羌、王、常並同本韻 辟十一陌績十二錫辟陌適同通韻

監十五咸嚴十四鹽通韻 濫二十八勘邊七陽叶韻 國十三職福一屋叶韻 翼職極同本韻 聲八庚靈九青寧同

生庚通韻 山十五刪九十四寒遷一先虔、挺並同閑對安寒通韻

以上《商頌》凡五篇。

### 【校記】

〔一〕「安」底本作「妥」，據「雲南本」改。